

O LE EKALESSIA A JESU KERISO O LE AI PAIAO ASO E GATA AI • NOVEMA 2017

Ole Liahona

Saunoaga
o le Konafesi
Aoao



© MARK MISSMAN MA MARK MABRY E LE MAFAI ONA KOPINA

*"E faapefea ona tatou o mai ia te Ia? O Aperila talu ai, na fautua mai ai
Peresitene Russell M. Nelson ma Elder M. Russell Ballard ia tatou suesueina
le 'O Le Keriso Soifua' o se vaega o lo tatou aoao e uiga i le Faaola. . . .*

*"A'o ou suesueina le soifuaga ma aoaoga a Iesu Keriso ma taulai atili
ma tautino atu e tauloto le 'O Le Keriso Soifua,' sa faateleina lo'u lotofaafetai
ma le alofa mo lo tatou Faaola. O fuaiupu taitasi o lena tusiga musuia o
loo i ai se lauga ma ua faalauteleina ai lo'u malamalama i Ana matafaioi
paia ma le misiona i le lalolagi nei. O mea sa ou aoaoina ma lagonaina i
lea vaitau o le suesue ma toe tomanatu i ai, ua faamautu ai e moni lava o
Iesu 'o le malamalama, o le ola, ma le faamoemoe o le lalolagi.'"*

Jean B. Bingham, Peresitene Aoao o le Aualofa, "Ina Ia Atoa Lo Outou Olioli," 85.

*E Ala Atu i Mata o le Faatuatua,
saunia e Mark Missman ma
Mark Mabry*

Anotusi Novema 2017

Voluma 41 • Numera 11

Sauniga Aoao a Tamaitai

- 6 **Ia Pupula Atu Lou Malamalama**
Sharon Eubank
- 10 **Tumau i le Atua ma Faaleleia le Va**
Neill F. Marriott
- 13 **O Le Taua le Mafuataina**
Joy D. Jones
- 16 **O Le Auuso e Toatolu**
Peresitene Dieter F. Uchtdorf

Sauniga o le Taeao o le Aso Toonai

- 21 **O Se Faananau mo le Aiga**
Peresitene Dieter F. Uchtdorf
- 25 **O Manaoga i o Tatou Luma**
Bonnie L. Oscarson
- 28 **O Le Fuafuaga ma le Folafolaga**
Elder Dallin H. Oaks
- 32 **"Ua ia te A'u Se Galuega mo Oe"**
Elder John C. Pingree Jr.
- 36 **O Le Areto Ola Na Alu Ifo**
Mai le Lagi
Elder D. Todd Christofferson
- 40 **Ia Atoatoa Ona Lelei o La Outou Amio—I Le luga**
Elder Jeffrey R. Holland

Sauniga o le Afiafi o le Aso Toonai

- 43 **O Le Lagolagoina o Taitai o le Ekalesia**
Peresitene Henry B. Eyring
- 44 **Gasetoto Faaleagaga**
Elder Gary E. Stevenson
- 48 **O Le Salamo o se Mea Lelei**
Stephen W. Owen
- 51 **O Le Faavavau o Aso Uma**
Elder Quentin L. Cook
- 55 **E Ala i le Mamanu Faalelagi**
Elder Ronald A. Rasband
- 58 **O Le Loto o le Fafine ua**
Oti Lana Tane
Elder O. Vincent Haleck
- 60 **O Le Tusi a Mamona: Faamata e Faape'i Lou Olaga e aunoa ma la?**
Peresitene Russell M. Nelson

Sauniga Aoao a le Au Perisitua

- 64 **O Le Perisitua ma le Mana Togiola o le Faaola**
Elder Dale G. Renlund
- 68 **O Le Moni o Mea Uma**
Elder David F. Evans
- 75 **Mauaina o le Faatuatuaga a le Alii ma Lou Aiga**
Elder Richard J. Maynes
- 78 **O Ē Tauaveina le Malamalama Faalelagi**
Peresitene Dieter F. Uchtdorf
- 81 **E Taitai e le Alii Lana Ekalesia**
Peresitene Henry B. Eyring

Sauniga o le Taeao o le Aso Sa

- 85 **Ina la Atoa Lo Outou Olioli**
Jean B. Bingham
- 88 **Pe Ua Uma Ea le Aso o Vavega?**
Elder Donald L. Hallstrom
- 90 **O Mea Silisili Ese ma le Taua**
Elder David A. Bednar
- 94 **Liliu Atu i le Alii**
Epikopo W. Christopher Waddell
- 97 **Le Alii e, la Pupula o Ma'ua Mata**
Elder W. Craig Zwick
- 100 **Aua le Fefe e Fai Mea Lelei**
Peresitene Henry B. Eyring

Sauniga o le Afiafi o le Aso Sa

- 104 **E Faaauau Pea Le Savaliga!**
Elder M. Russell Ballard
- 107 **O Le Molimau Mamana a le Atua: O Le Tusi a Mamona**
Tad R. Callister
- 110 **Valavalala, ae Lotogatasí Pea**
Elder Joni L. Koch
- 112 **Pe Ua Tatou Faatuatuaina Ea o la? E Lelei le Faigata**
Elder Stanley G. Ellis
- 115 **O Upumoni Taua—Manaomia Lo Tatou Galulue**
Elder Adilson de Paula Parrella
- 117 **Ia Outou Saili Mai Totonu o Tusi Sili**
Elder Ian S. Ardern
- 119 **Ia Fealofani e Pei Ona la Alofa Mai la I Tatou**
Elder Jose L. Alonso
- 122 **O Le Siufofoga o le Alii**
Elder Neil L. Andersen
- 72 **O Au Pulega Aoao ma Taitai Aoao o Le Ekalesia a lesu Keriso o le Au Paia o Aso e Gata Ai**
- 127 **Faasino Upu o Tala o le Konafesi**
- 128 **Tala Fou o le Ekalesia**
- 137 **Sau, Mulimuli Mai ia te A'u—Mo le Perisitua Mekisateko ma le Aualofa**



O Le Konafesi Aoao Faaleafatausaga Lona 187

Afiafi o le Aso Toonai, 23 Setema, 2017, Sauniga Aoao a Tamaitai

Taitai: Jean B. Bingham.

Tatalo Amata: Megumi Yamaguchi.

Tatalo Faaiu: Leslie P. Layton.

O musika na saunia e le aufaipese a le Aualofa mai siteki i eria o Park City, Iuta; Jane Fjeldsted, faatonu; Bonnie Goodliffe, ta okeni: "Let Zion in Her Beauty Rise," *Viiga*, nu. 41, arr. Kasen, lolomiina e Jackman; "Sing Praise to Him," *Viiga*, nu. 70, arr. Fieldsted ma Goodliffe; "True to the Faith," *Viiga*, nu. 254; "We Have Partaken of Thy Love," *Viiga*, nu. 155, arr. Fjeldsted ma Goodliffe.

Taeao o le Aso Toonai, 30 Setema, 2017, Sauniga Aoao

Taitai: Peresitene Henry B. Eyring.

Tatalo Amata: Elder Larry R. Lawrence.

Tatalo Faaiu: Elder Massimo De Feo.

O musika na saunia e le Aufaipese a le Tapeneko; o Mack Wilberg ma Ryan Murphy, o faatonu; o Richard Elliott ma Andrew Unsworth, o ta okeni: "E Alofola i le Atua," *Viiga*, nu. 64; "Arise, O God, and Shine," *Viiga*, nu. 265, arr. Wilberg, lolomiina e le Oxford University Press; "Faamanuia le Atua i le Perofeta Soifua," *Viiga*, nu. 9, arr. Wilberg; "I Luga o Mauga," *Viiga*, nu. 5; "O Le Atua o le Alofa," *Viiga*, nu. 48, arr. Murphy; "Faith in Every Footstep," Dayley, lolomiina and Jackman.

Afiafi o le Aso Toonai, 30 Setema, 2017, Sauniga Aoao

Taitai: Peresitene Dieter F. Uchtdorf.

Tatalo Amata: Elder Lawrence E. Corbridge.

Tatalo Faaiu: Elder Allan F. Packer.

O musika na saunia e se aufaipese a le autalavou mai siteki i Midvale ma Sandy, Iuta; Leah Tarrant, faatonu; Linda Margetts, ta okeni: "O Mai, Fanau a le Alii," *Viiga*, nu. 24, arr. Wilberg, lolomiina e le Deseret Book; pese suifefilo, arr. Sally DeFord: "O Loo Ou Taumafai e Avea e Pei o Iesu," *Tusipese a Tamaitai*, 40–41; "Na Ia auina Mai Lona Alo," *Tusipese a Tamaitai*, 20–21; "Ua Susulu Mai Nei o le La," *Viiga*, nu. 140; "Fiafia, o le Alii o le Tupu!" *Viiga*, nu. 38, arr. Kasen, pub. by Jackman.

Afiafi o le Aso Toonai, 30 Setema, 2017, Sauniga Aoao a le Au Perisitua

Taitai: Peresitene Henry B. Eyring.

Tatalo amata: Elder Kevin W. Pearson.

Tatalo faaiu: Elder Rafael E. Pino.

O musika na saunia e se aufaipese a tamā ma atalii mai siteki i le Itumalo o Cache, Iuta; Geoffrey Anderson, faatonu; Clay Christiansen, ta okeni; "Uunai Atu ia ma Tulei," *Viiga*, nu. 163, arr. Dalton, lolomiina e le LDS Music Source; "Tatalo Faalilo," *Viiga*, nu. 79, arr. Kasen, lolomiina e Jackman; "Le Faavae Malosi," *Viiga*, nu. 45; "Le Perofeta Pele e," *Viiga*, nu. 11, arr. Kasen, lolomiina e Jackman.

Taeao o le Aso Sa, 1 Oketopa, 2017, Sauniga Aoao

Taitai: Peresitene Dieter F. Uchtdorf.

Tatalo amata: Elder Michael T. Ringwood.

Tatalo faaiu: Elder José A. Teixeira.

O musika na saunia e le Aufaipese a le Tapeneko; Mack Wilberg, faatonu; Andrew Unsworth ma Clay Christiansen, o ta okeni: "Praise to the Lord, the Almighty," *Viiga*, nu. 72; "Le Au Paia Uunai i Luma," *Viiga*, nu. 44, arr. Wilberg; "Consider the Lilies," Hoffman, arr. Lyon, lolomiina e Sonos; "Faalogo, Nuu Umal!" *Viiga*, nu. 165, arr. Wilberg; "Mamalu i le Atua," *Viiga*, nu. 40; "Pele i le Leoleo Mamoe," *Viiga*, nu. 135, arr. Wilberg, e lei lolomiina; "Ou te Talitonu ia Iesu," *Viiga*, nu. 71, arr. Wilberg, lolomiina and Jackman.

Afiafi o le Aso Sa, 1 Oketopa, 2017, Sauniga Aoao

Taitai: Peresitene Henry B. Eyring.

Tatalo amata: Elder Joseph W. Sitati.

Tatalo faaiu: Elder Evan A. Schmutz.

O musika na saunia e le Aufaipese a le Tapeneko; Mack Wilberg ma Ryan Murphy, o faatonu; Bonnie Goodliffe ma Linda Margetts, o ta okeni: "Le Tupu o tupu, Afio Mai," *Viiga*, nu. 25, arr. Murphy, e lei lolomiina; "Ua Ou Faia Ea se Lelei?" *Viiga*, nu. 136, arr. Zabriskie, lolomiina e le LDS Music Source; "Ia Fiafia Tatou," *Viiga*, nu. 3; "If the Savior Stood Beside Me," DeFord, arr. Cardon; "Isaraelu, Ua Valaau Mai le Atua," *Viiga*, nu. 6, arr. Wilberg.

E Maua Saunoaga o le Konafesi

Ina ia maua saunoaga o konafesi aoao i luga o le Initonet i le tele o gagana, asiasi i le conference.lds.org ma filifili se gagana. O loo maua foi lauga i luga o le polokalama feaveai o le Gospel Library. O loo maua faamatatalaga e uiga i le konafesi aoao i mamanu e mafai ona faaaogaina e tagata o le ekalesia e i ai manaoga faapitoa i le disability.lds.org.

Savali a Faiaoga o Aiga ma Faiaoga Asiasi

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetaui lelei ma tulaga o loo manaomia e i latou e te lua asia

I Le Faavaa

Luma: Ata na pueina e Leslie Nilsson.

Tua: Ata na pueina e Craig Dimond

Puega o Ata o le Konafesi

Ata na pueina i le Aai o Sate Leki, na pueina e Cody Bell, Janae Bingham, Mason Coberly, Randy Collier, Weston Colton, Craig Dimond, Ashlee Larson, Leslie Nilsson, Matt Reier, ma Dave Ward.



O Le Lomiga Faamaonia Faa-Samoa a le Ekalesia
a Iesu Keriso o le Au Paia o Aso o Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Apostolo e Toasefululua:

Russell M. Nelson, Dallin H. Oaks, M. Russell Ballard,
Jeffrey R. Holland, David A. Bednar, Quentin L. Cook,
D. Todd Christofferson, Neil L. Andersen, Ronald A.
Rasband, Gary E. Stevenson, Dale G. Renlund

Faatonu: Hugo E. Martinez

Assistant Editors: Randall K. Bennett, Carol F. McConkie

Fautua: Brian K. Ashton, Bonnie H. Cordon, LeGrand R.
Curtis Jr., Edward Dube, Sharon Eubank, Donald L.
Hallstrom, Douglas D. Holmes, Erich W. Kopischke

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Debbie Bacon

Au Tusitusi ma Faatonutonu: Maryssa Dennis, David

Dickson, David A. Edwards, Matthew D. Flitton, Lori Fuller,
Garrett H. Garff, LaRene Porter Gaunt, Jon Ryan Jensen,
Charlotte Larcabal, Michael R. Morris, Eric B. Murdock,
Sally Johnson Odekirk, Joshua J. Perkey, Jan Pinborough,
Richard M. Romney, Mindy Anne Selu, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamana: Jeanette Andrews, Fay P. Andrus, C. Kimball
Bott, Thomas Child, David Green, Colleen Hinckley, Eric P.
Johnsen, Susan Lofgren, Scott M. Mooy, Emily Chieko
Remington, Mark W. Robison, Brad Teare, K. Nicole
Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosia: Ira Glen Adair, Julie Burdett, Thomas G. Cronin,
Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufufatuga: Troy R. Barker

Mo le okaina o mekasini, alu i le store.lds.org po o le
Faleutsi Tutotonu i Pesega. Telefoni 64127. Totogi o le
Mekasini: \$0.55 (Samoa) ī le kopi. Totogi mo le Tausaga
Atos \$6.60 (Samoa).

Auina atu tusitusiga ma faafesili i luga o le

initoneti i le liahona.lids.org: pe meli mai i le Liāhona,
Rm. 240-5. E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le Liāhona (o lona uiuga i le Tusi a Mamona o le "tapasa
po o se "faatonuala") ī lomia i le faa-Alepania, Aminia
(Sasae), Pisiāma, Palekeria, Kemupotia, Sepuano, Saina,
Kalaotia, Siekioloslovakia, Tenimaka, Take, Igilisi, Esitonia,
Fitit, Finelani, Farani, Siamani, Eleni, Hanikeri, Initu, Iselani,
Initonlesia, Italia, Japani, Kiripati, Korea, Latvia, Lituania,
Malakasa, Masela, Monokolia, Nouel, Polani, Potukale,
Romania, Rusia, Samoa, Saina (uia faafaofoineima), Slovenia,
Sipanioli, Suetēna, Swahili, Tagaloka, Tahiti, Tai, Toga,
Iukureini, Urutu, ma Viatenamē. (E eseese lava gagana.)

© 2017 Puletaofia e le Intellectual Reserve, Inc. Ua taofia
aia tatau uma. Lomia i le lunaitē Setete o Amerika.

Faamatatalaga o le Puletaofia: Vagana ua faailoa
atu, e mafai e tagata taitoatasi ona kopīina anomea
mai le Liāhona mo lo latou faaaogainga patino, ma
le saili tupe (e aofia ai mo valaauga o le Ekalesia). O
lenei aia tatāu e mafai ona faaleagaina i soo se taimi.
O anomea o mea fāitino e le mafai ona kopīina pe
afai o o loo faailoa mai se faasa i le laina o loo i ai ma
le faatufugaga. O fesili mo le Puletaofia e tatāu ona
faatuatua mai i le Intellectual Property Office, 50 E., North
Temple St., FL 13, Salt Lake City, UT 84150, USA; email:
cor-intellectualproperty@ldschurch.org.

For Readers in the United States and Canada:

November 2017 Vol. 41 No. 11. O Le Liāhona (USPS 311)
Samoan (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.



Failauga i le Faasologa

Faaalafapeta

- Alonso, Jose L., 119
- Andersen, Neil L., 122
- Ardern, Ian S., 117
- Ballard, M. Russell, 104
- Bednar, David A., 90
- Bingham, Jean B., 92
- Callister, Tad R., 107
- Christofferson, D. Todd, 36
- Cook, Quentin L., 55
- Ellis, Stanley G., 112
- Eubank, Sharon, 6
- Evans, David F., 68
- Eyring, Henry B., 43, 88, 106
- Haleck, O. Vincent, 58
- Hallstrom, Donald L., 88
- Holland, Jeffrey R., 40
- Jones, Joy D., 13
- Koch, Joni L., 110
- Marriott, Neill F., 10
- Maynes, Richard J., 75
- Nelson, Russell M., 60
- Oaks, Dallin H., 28
- Oscarson, Bonnie L., 25
- Owen, Stephen W., 48
- Parrella, Adilson de Paula, 115
- Pingree, John C., Jr., 32
- Rasband, Ronald A., 55
- Renlund, Dale G., 64
- Stevenson, Gary E., 44
- Uchtdorf, Dieter F., 16, 21, 78
- Waddell, W. Christopher, 94
- Zwick, W. Craig, 97

Faasino Autu

- Agaga Paia, 13
- Agavaa, 13
- Aiga, 25, 28, 75, 115
- Aiga, 21, 90
- Aiga Atua, 112
- Ala o faasalalauga, 44
- Alofa, 10, 25, 106, 119
- Alofa tunoa, 36, 40
- Amiosaō, 75
- Aualofa, 6
- Auauna Atu, 22, 26, 32, 36,
78, 106, 119
- Avea ma Soo, 16, 21
- Faaaliga, 88, 122
- Faaipoipoga, 75
- Faaleagaga, 55
- Faamagaloga, 48, 51, 119
- Faamalologa, 78, 85, 88,
94, 97
- Faamanatuga, 36, 97
- Faamaualuga, 10, 44, 51
- Faamoemoe, 94
- Faapaiaina, 58
- Faatuatua, 68, 81, 85, 88,
100, 104, 112, 117
- Faatuatinina, 75, 94, 112
- Faigata, 21, 32, 44, 85, 88,
94, 97, 100, 112
- Faitalia, 55, 94
- Faitioga, 97, 110
- Feagaiga, 64, 68, 90
- Fefe, 10, 106
- Fesootaiga, 6
- Filemu, 13, 75, 92
- Fuafuaga o le faaolataga, 28,
88, 112, 115
- Galuega, 32
- Galuega faafaifeautalai, 48,
51, 60
- Iesu Keriso, 10, 13, 16, 21,
36, 40, 48, 51, 60, 64, 78,
81, 85, 94, 97, 100, 107,
112, 115, 119, 122
- Iosefa Samita, 107, 115, 122

Konafesi aoao, 122

Le Atua Le Tama, 10, 40, 115

Liua, 13, 58, 60, 115, 117

Loto faafetai, 58

Lotogatasi, 110

Lotomaualalo, 44, 51

Lototele, 106

Malamalama o Keriso, 21, 78

Malumalu, 58, 68, 90

Molimau, 68, 78, 92,
106, 107

Natura paia, 13, 16, 55, 90

O Epikopo, 88

Olioli, 6, 16, 21, 92

Onosai, 68, 117

Paia, 36

Paionia, 104, 112

Perisitua, 64

Perisitua Arona, 64

Perisitua Mekisateko, 64

Perofeta, 115, 122

Salomo, 6, 36, 48

Saogalemu, 44

Sapati, 90, 117

Sauniga, 90

Sefuluai, 112

Suesue i tusitusiga paia,
60, 117

Taiala, 55

Taitai o le Ekalesia, 88, 122

Taleni, 32

Tamaitai, 6

Tauagafau, 55

Taua o le tagata lava ia, 13, 40

Taulaga, 58, 112

Togiola, 10, 13, 36, 40, 48,
64, 85, 88, 94

Tulaga faaletamā, 75

Tusi a Mamona, 60, 68, 106,
107, 117

Upumoni, 68, 78

Vaaiga, 40, 44, 97

Valaauga i le Ekalesia, 81

Vavega, 88



Mea na Faamamafa Mai mai le Konafesi Aoao Faaleafatausaga Lona 187

*Faamanua le Atua,
i le perofeta soifua,
Ia fiafia.
O ana upu foi,
Tatou te manuia ai;
Ia filifili nei,
I mea lelei.*

(“Faamanua le Atua i le Perofeta Soifua,” *Viiga*, nu. 9, na usuina i le sauniga o le taeao o le Aso Toonai)

Mo le silia ma le 50 tausaga, ua avea ia tala patino faamomoiloto a Peresitene Thomas S. Monson ma le molimau mamana ia Iesu Keriso ma se vaega o le konafesi aoao. Ae ona o le faaletonu o le soifua maloloina, sa matauina ai le le auai uma o Peresitene Monson ma Elder Rober D. Hales o le Korama a le Toasefululuia i le konafesi.

E le'i auai, ae sa le'i faagaloina. E ui na maimoa mai Peresitene Monson mai lona aiga ma maliu filemu Elder Hales i le falema'i a'o lei amataina le sauniga mulimuli, e le gata sa i ai uma i la'ua i o tatou mafau-fau a'o tatou tatalo mo i laua, ae na manino foi lo la'ua faatosinaga i le faagasologa o saunoaga.

Na silia ma le toasefululuia failauga na ta'ua Peresitene Monson, e aofia ai Peresitene Russell M. Nelson (tagai i le itulau e 60), o le na faapitoa lava le ta'uaina o le valaaulia a Peresitene Monson i le konafesi talu ai “ina ia suesue ma le agaga tatalo ma mafau-fau loloto i le Tusi a Mamona i aso taitasi.”¹

O Elder Neil L. Andersen, o le failauga faaiu (tagai i le itulau e 122), na faasoa mai ni faamatalaga lea na saunia e Elder Hales mo le konafesi

peitai ua le mafai ona tuuina mai: “Pe a tatou filifili e faatuatua, ua tatou saunia e tutu i luma o le Atua,” na tusia a Elder Hales. E moni lava, na filifili e Elder Hales le faatuatua.

E le'i auai, ae sa matuai le'i auai, o Peresitene Monson ma Elder Hales sa le'i i ai i le pulelaa, ae sa la faia se vaega taua i le avea o le konafesi ma vaega anoa i le toatele.

*Le perofeta pele e, ia talosia,
Le Atua faamanua ia e fiafia.
A'o solo le matua o lou soifua
Ia sulu pea le malamalama;
Ia sulu pea le malamalama.*
(“Le Perofeta Pele e,” *Viiga*, nu. 11, usuina i le sauniga aoao a le au perisitua) ■

FAAMATALAGA

1. Tagai Thomas S. Monson, “O Le Mana o le Tusi a Mamona,” *Liahona*, Me 2017, 87.





Saunia e Sharon Eubank

Fesoasoani Muamua i le Au Peresitene Aoao o le Aualofa

la Pupula Atu Lou Malamalama

O loo valaau mai perofeta ia i tatou, o'u uso e. E mafai ona outou amiontonu? E mafai ona outou faamatalaina lelei lo outou faatuatuaga? Pe o le a e faasusulu atu lou malamalama?

Atonu tou te le silafiaina, ae ma te masaga ma Peresitene Monson. O le aso tonu na ou fanau ai—i le itula lava lea—i Kalefonia i matu, na lagolago ai Thomas Monson e 36 tausaga o se Apostolo fou. Ou te fiafia i lou sootaga faapitoa ma patino i le perofeta a le Atua, o Peresitene Monson.

O loo saunoa perofeta e uiga i tamaitai.¹ O le a outou faafogoga i nisi o a latou upu i lenei sauniga. Mo a'u tusiga ou te toe foi i tua i le toetiiiti 40 tausaga i se valoaga ofoofogia na tusia e Peresitene Spencer W. Kimball. Ia Setema 1979 ua na o le faalua ai lea ona feiloai tamaitai o le Ekalesia atoa i le latou lava sauniga aoao. Na saunia e Peresitene Kimball lana lauga, ae ina ua oo atu i le aso o le konafesi, sa taofia o ia i le falemai. O lea, na ia talosaga ai i lona faletua, o Camilla Eyring Kimball, e faiatou atu lana lauga mo ia.²

Na faiatou e Sister Kimball upu a le perofeta, lea na faamamafa atua le faatosinaga a tamaitai o le Ekalesia i tamaitai lelei o le lalolagi a'o le i oo i le Afio Mai Faalua o le Faaola. E lata i le faaiuga, sa i ai se poloa'i faagaeitia

i tamaitai o le Ekalesia lea ua tatou talanoa ai lava talu mai lena taimi.

Se'i o'u sii atua sina upu mai le saunoaga a Peresitene Kimball:

“Ma le mea mulimuli, o'u tuafafine pele, se'i ou fautuaina atu ia te outou se mea e le i ta'ua muamua pe i se auala faapenei. O le tele o le tuputupu ae e oo mai i le Ekalesia i nei aso e gata ai, o le a oo mai ona o le toatele o tamaitai lelei o le lalolagi . . . o le a tosina mai i le Ekalesia i ni vaega toatele. O le a tupu lenei mea i se tulaga e atagia atu



Ia Setema 1979, sa faiatou ai e Camilla Eyring Kimball ia saunoaga e fai ma sui o Peresitene Spencer W. Kimball.

ai i olaga o tamaitai o le Ekalesia le amiontonu ma le atamai e tautatala i upu lelei, ma i le tulaga e vaaia ai tamaitai o le Ekalesia e tuma'oti ma e ese lava—i ni auala faafiafaina—mai tamaitai o le lalolagi.

“E aofia ai i toa tamaitai moni i le lalolagi o le a o mai i le Ekalesia, o tamaitai o e sili atu ona popole i le amiontonu nai lo le manatu faapito. O nei toa tamaitai moni e lotomaulalo faamaoni, ua tuu ai se faataua mau-luga atu i le amiosa'o nai lo le vaaiga [a tagata]. . . .

“. . . O lea . . . o tamaitai o faataitaiga o le Ekalesia o le a avea ma ‘malosiaga maoae e le gata i le faatupulaia faafuainumera ae faapea foi i le faaleagaga o le Ekalesia i aso amuli.”³

E maeu lea faamatalaga faavaloga. Ua na o se aotelega:

- O le mafutaga lelei a tamaitai lea o le a uunaia le tuputupu ae tele o le a oo mai i le Ekalesia i tausaga o i le lumana'i.
- O faauooga o loo fausia e tamaitai o le Aualofa, tamaitai talavou, ma teineiti Peraimeri ma tamaitai ma teineiti faamaoni, faatuatua, amio atua o isi faatuatuaga ma talitonuga o le a avea o se ‘malosiaga maoae i le tuputupuae o le Ekalesia i aso e gata ai.
- Ua ta'ua e Peresitene Kimball nei tamaitai mai isi talafaasolopito o “toa tamaitai” o e o le a sili atu ona popole i le amiontonu nai lo le manatu faapito, o e o le a faaali mai ia i tatou o le amiosa'o e sili atu le taua nai lo le vaaiga [a tagata].

Ua ou feiloai i le toatele o nei tamaitai lelei a o faataunuina la'u galuega i le lalolagi. E taua le latou faauooga ia te a'u. E te iloaina foi i latou i totonu o au uo ma tuaoi. Atonu o i latou o ni tagata o le Ekalesia i le taimi nei pe leai foi, ae tatou te fesootai i faauooga lea e taua tele. Ia, e faapefea la ona faia le tatou vaega? O le a se mea e tatau ona tatou faia? Ua ta'ua e Peresitene Kimball mea e lima:

O le mea muamua ia amiontonu.
O le amiontonu e le faapea o le atoatoa



po o le le faia o ni mea sese. O lona uiga o le atiaeina o se fesootaiga i le loto ma le Atua, salamo ia tatou agasala ma mea sese, ma fesoasoani saoloto atu i isi.

O tamaitai ua salamo e suia le ala o le talafaasolopito. E i ai sa'u uo sa i ai i se faalavelave tau taavale a o laitiiti ma sa oo ina fai ma vaisu ia fualau o mea tiga. I se taimi mulimuli ane, na tetea ona matua. Sa maitaga o ia mai se mafutaga puupuu, ma faaaauau pea ana vaisu. Ae i se tasi po, sa ia tilotilo atu i vevesi ma le gaogaosā o lona olaga ma mafaufau, "Ua lava." Ma sa ia tagi atu i le Faaola o Iesu Keriso e fesoasoani mai ia te ia. Fai ma a ia sa ia aaooina e malosi atu Iesu Keriso nai lo ona tulaga ma e mafai ona ia faalagolago atu i Lona malosi a o ia savalia le ala o le salamo.

O le toe foi mai i le Alii ma Ona ala, sa ia suia ai le ala o lona talafaasolopito ma le talafaasolopito a lana tama tama ma lona toalua fou. E amiontonu o ia; ma e alofa tele o ia mo isi o e ua faia ni mea sese ma mananao ia suia. E pei foi o i tatou uma, sa lei atoatoa lona olaga, ae sa ia iloa le ala e salamo ai ma tau-mafai ai pea.

O le lona lua o le atamai e tau-tala. O le atamai e tautala o le faaali manino atu lea o ou lagona e uiga i se mea ma le mafuaaga. I le amataga o lenei tausaga, sa i ai se faaupuga i la'u Facebook na faaleagaina ai le Faa-Kerisiano. Sa ou faiataua ma ou te lei fiafia i ai ae sa ou le amanaiaina. Peitai, o se ue e le auai i le tatou faatuatuaga na tali atu ma sana foi faaupuga. Sa ia tusia: "O le faafeagai tonu lava [lenei] o mea sa tu atu ai Iesu—o ia . . . o se tagata e maoae ona manatu i lona taimi ona sa ia . . . faatutusaina le lalolagi. . . . Sa ia [talanoa i] fafine talitane, [taumafa] faatasi ma le au ao lafoga . . . , faauo i tamaitai ma tamaiti vaivai . . . , [ma] aumai ia i tatou le tala i le Samaria Agalelei. . . . O se taunuuga la e faapea . . . o Kerisiano moni o le a tauivi ia avea ma tagata SILI ona alolofa i le lalolagi." Ina ua ou faiatau i ai, sa ou mafaufau ia te au lava, "Aisea na ou le tusia ai lena mea?"

E manaomia e i tatou taitoatasina ona lelei atili i le faamatalaina o mafuaaga mo lo tatou faatuatuaga. O le a sou lagona e uiga ia Iesu Keriso? Aisea e te tumau ai i le Ekalesia? Aisea e te

talitonu ai o le Tusi a Mamona o se tusitusiga paia? O fea e te maua ai lou filemu? Aisea e taua ai o loo i ai se mea e ta'u mai e le perofeta i le 2017? E faapefea ona e iloa o ia o se perofeta moni? Faaaoga lou leo ma lou malosi e faamatala atu ai ou lagona ma mea e te iloa—i ala faasalalau faaagafesootai, i talanoaga filemu ma au uo, i talanoaga ma fanau a au fanau. Ta'u atu ia i latou aisea e te talitonu ai, faapefea ona e iloa, faape'i ia lagona, afai sa e masaloso, na faapefea ona e faatoilaloina, o ai Iesu Keriso ia te oe. E pei ona fai mai le Apostolo o Peteru, "Aua foi tou te fefefe . . . ; a ia paia le Alii le Atua i o outou loto: ia saunia pea lava outou e tali atu ma le agamalu ma le mata'u ia i latou uma o e fesili mai ia te outou i le uiga o le faamoemoe o loo ia te outou."⁴

O le lona tolu ia ese. Se'i ou ta'u atu ia te outou se tala na tupu ia Iulai lenei i le Aai o Panama Beach i Florida.⁵ I le leva o le aoauli, sa vaaia e Roberta Ursrey ona atalii laiti e toalua o fe'e'i mai mo se fesoasoani mai le 100 iata (90 m) i totonusi o le sami. Na maua i laua e se galu malosi ma sa tafefea atu

ai i le moana. Sa taumafai se ulugalii na lata ane e laveai nei tamaiti, ma sa maua foi i laua e le galu. Sa femaulu atu tagata o le aiga o Ursrey i totonu e laveai mai le au aau o loo tauivi, ma na vave ona maua nei tagata e toaiva i le malolosi o galu.

Sa leai ni maea. Sa leai ni leoleo laveai. Sa auina mai e leoleo se vaa faa-ola, peitai ua 20 minute o tauivi tagata sa i ai i le sami ma ua latou vaivai ma amata ona gogoto ifo i lalo o le sami. Na i ai i le au matamata i luga o le matafaga ia Jessica Mae Simmons. Sa ia i laua ma lona toalua se manatu e fau se filifili i tagata. Sa la feei atu i tagata i luga o le matafaga e fesoasoani ia i laua, ma na felavea'i lima o le toatele o tagata ma savavali atu i le sami. Sa ta'u atu e Jessica i le nusipepa: "O le vaai atu i tagata mai ituiga ma itupa eseese o o mai e fesoasoani i tagata sa MATUA le masani i ai sa matua ofoofogia lava le vaaiga!"⁶ O se filifili o tagata e toa 80 sa oo atu agai i le au aau. Tagai i lenei ata o lena taimi ofoofogia.

O tagata uma sa i ai i le matafaga sa na o vaifofo masani na mafaufauna ma sa meia. Ae e tasi se ulugalii, i se taimi vave, na mafaufau i se vaifofo e ese mai ai. O le fatufatua ma le sogasoga o ni meaalofa faaleagaga. A tatou tausia a tatou feagaiga, e ono ese i tatou mai isi i le tatou aganuu ma atunu, ma e aumaia ia i tatou ni musumusuga e mafai ai ona tatou mafaufau i ni vaifofo eseese, faiga eseese, faaaogaaga eseese. O le a tatou le ogatusa lava ma le lalolagi, ae o le avea ma se tagata ese i ni auala lelei e mafai ai ona avea i tatou ma se faalatotoga i isi o loo tauivi.

O le lona fa ia iloatino. O le iloatino o lona uiga ia iloa lelei ma le manino. Se'i ou toe foi atu i le tala ia Jessica Mae Simmons i le matafaga. O le taimi lava na oo atu ai lena filifili tagata agai i le au aau, sa ia iloa ai na mafai ona ia fesoasoani. Fai mai Jessica Mae, "E mafai ona taofi la'u manava ma faataamilo i se vaitaele o le Olimipeka ma le faigofie! [Sa ou iloa alu ese mai galu malolosi.] Sa ou iloa na mafai ona ou avatua [tagata aau taitasi] i le filifili o tagata."⁷ Sa la toso maia ma lona toalua

ia laupapa aau ma aau atu agai i le filifili seja oo atu i le au aau ma aumai taitasi i latou i le filifili, o e na pasi atua i latou i le saogalemu o le matafaga. Sa i ai ia Jessica se tomai manino: sa ia iloa le ala e aau atu ai i galu malolosi. O le talalelei toefuataiina o se mea ua iloa tino lelei. Ae e tatau ona tatou manino i le ala tatou te mulimuli i ai. E pei ona faataitai e Jessica le aau, e manaomia ona tatou faataitai ona ola i le talalelei a o le i oo i faalavelave ina ia, le fefefe, ma lava lo tatou malosi e fesoasoani atu i isi pe a tafiesea e galu aave malolosi.

Ma le mea mulimuli, o le lona lima o le faia o le tasi i le fa o i luga i ni auala fiafia. O le fiafia e le o le i ai o se ataata le mo'i i ou foliga e tusa lava po o a mea o tutupu. Ae o lona uiga o le tausia o tulafono a le Atua ma atiae ma siitia isi.⁸ A tatou atiae, a tatou siitia ia avega a isi, e faamanuia o tatou olaga i auala e le mafai e o tatou tofotofoga ona aveesea. E i ai sa'u upusii mai ia Peresitene Hinckley e tuu i le mea ou te vaai i ai i aso uma. Na saunoa o ia: "E te le . . . atiaeina se mea mai le masalosalo ma le le talitonu. E vaavaai atu ma le talitonu o le a lelei mea uma, galue ma le faatuitua, ona tutupu ai lea o mea."⁹

O se faataitaiga o lena agaga fiafia ma lelei, ou te iloa se teineititi e 13 tausaga e igoa ia Elsa o lona aiga o le a siitia atu i Baton Rouge, Luisiana, e 1,800 maila (2,900 km) le mamao mai ana uo. E le faigofie pe a e 13 ae siitia atu i se nofoaga fou. Sa iloa lelei e Elsa

lona le mautonu i le siitia atu o lea sa faia ai e lona tama sona faamanuiaga. I le taimi tonu lava o le faamanuiaga, sa tatagi le telefoni a lona tina i se tes. Na auina mai e se tamaitai talavou e nofo i le uarota i Luisiana le ata lenei ma se faaupuga "Faamolemole o mai i le matou uarota!"¹⁰

Sa lagona lelei e nei tamaitai talavou o le a latou fiafia ia Elsa e aunoa ma le feiloi ia te ia. O lo latou naunautai na fatu ai se lagona lelei ia Elsa i le latou siitia atu ma taliina ana tatalo e uiga i le, pe o le a lelei mea uma.

E i ai se naunautaiga lea e oo mai mai le fiafia ma le lagona lelei e le na o le faamanuiaina o i tatou—ae e atiaeina ai tagata uma o siomiaina i tatou. Ma o mea iti e te faia e faamumū ai le fiafia moni i isi e faailoa mai ai o loo e tauaveina le sulu na tutuina e Peresitene Kimball.

Sa 15 ou tausaga i le taimi na tuuina mai ai le lauga a Peresitene Kimball. O i matou o e matutua atu nai lo le 40 o loo tauaveina lenei tiute mai ia Peresitene Kimball talu mai lena aso. Ua ou vaai atu nei i le tai 8 tausaga, 15 tausaga, ma le tai 20 tausaga, ma le tai 35 tausaga, ma o le a ou tuuina atu lenei tiute ia te outou. O outou o taitai o le lumanai o lenei Ekalesia, ma o outou o le a tauaveina atu lenei malamalamaga agai i luma ma le faataunuuga o lenei valoaga. O i matou ua matutua atu nai lo le 40 ua felavea'i o matou lima ma o outou lima ma lagona lo outou malosi. Matou te manaomia outou.

Faalogo i le mau lenei o loo maua i le MF&F 49:26–28. Atonu na tusia i ni



O se filifili tagata e toa 80 o volenitia na aapa atu e laveai le au aau na maua i se galu malosi.

tulaga eseese, ae o lenei po e ala i le Agaga Paia, ou te faamoemoe o le a e aveina o sou valaauga patino i lenei galuega paia.

“Faauta, Ou te fai atu ia te outou, o atu ia e pei ona Ou poloaiina ai outou; ia outou salamo mai ia outou agasala uma; ole mai ma o le a outou maua; tu’itu’i mai ma o le a tatala atu ia te outou.

“Faauta, o le a Ou alu atu i o outou luma ma avea foi ma o outou muli’au; ma o le a Ou i ai i lo outou lotolotoi, ma o le a lē faafememeaiina outou.

“Faauta, o A’u o Iesu Keriso, ma ua vave ona Ou alu atu.”¹¹

Oute aioi atu ia te outou taitoatasi ina ia tuu outou i se nofoaga lea e mafai ai ona tou lagona le alofa agalelei o le Atua mo outou. E le mafai ona e tuuina oe i tua atu o lena alofa. A e lagonaina Lona alofa, a e alofa ia te Ia, o le a e salamo ma tausi Ana poloaiga. A tatou tausia Ana poloaiga, e mafai ona Ia faa-aogaina i tatou i Lana galuega. O Lana galuega ma le mamalu o le faaeaga ma le ola e faavavau o tamaitai ma alii.

O loo valaau mai perofeta ia i tatou, o’u uso e. E mafai ona outou amiontonu? E mafai ona outou faamatalaina lelei lo outou faatuatuaga? Mata e mafai ona e lavatia le iloatino ma le ese mai ai? Mata o le a tatatai atu e lou fiafia e ui i ou tofotofoga isi o e lelei ma malualii ma o e manaomia lau faauooga? Pe o le a e faasusulu atu lou malamalama? Ou te molimau atu o le Alii o Iesu Keriso o le a afio atu i o tatou luma ma i ai i lo tatou lotolotoi.

Ou te faaiu atu ai i upu a lo tatou perofeta pele, o Thomas S. Monson: “O’u tuafafine pele, o le tou aso lenei, o le tou taimi lenei.”¹² I le suafa, o Iesu Keriso, amene. ■

FAAMATALAGA

1. Peresitene Polika Iaga: “Tuu atu [i tuafafine] e faatulaga ia Aualofa i uarota taitasi. E toatele o tatou tamaitai talenia o loo i ai, ma e tatou te manaomia la latou fesoasoani i lenei mataupu. Atoru o le a manatu nisi e le o se mea taua lenei, ae e leai; ma o le a outou iloa ai o le a avea tuafafine ma punawai autu o le polokalamo” (i le *O Afafine i Lo’u Malo: O Le Talafaasolopito ma le Galuega a le Aualofa* [2011], 45).

Peresitene Lorenzo Snow: “Tou te i ai pea i autafa o le Perisitua, ua saunia . . . ma faia la outou vaega e fesoasoani ai e faalautele



mea e manaomia i le malo o le Atua; ma o outou fefaaosaa i nei galuega, o le a le taumateina lo outou maua o faamanuiaga o le galuega ma le faaeaga ma le mamalu o le a tuuina mai e le Alii i Ana fanau faamaoni” (i le *O Afafine i Lo’u Malo*, 7).

Peresitene Spencer We. Kimball, “O loo i ai le mana i lenei faalapotopotoga [a le Aualofa] ae lei matuai faaaogaina atoatoa e faamalolosia ai aiga o Siona ma fausia le Malo o le Atua—ma o le a le atoatoa lava vagana ua taufai maua e tuafafine ma le au perisitua le vaiga mamao a le Aualofa” (i le *O Afafine i Lo’u Malo*, 153).

Peresitene Howard W. Hunter: “O loo i ai se tulaga manaomia tele e aumai faatasi ia tamaitai o le Ekalesia ina ia tutu faatasi ma tutu atu mo le Usoga i le taofiga o le tai fana’e o le amioleaga ua siosiomia ai i tatou, ma le tuleia i luma o le galuega a lo tatou Faaola. . . . O lea matou te augani atu ai ia te outou ina ia auaiga atu ma le uunaiga mamana mo le lelei i le faamalolosia o o tatou aiga, la tatou ekalesia, ma o tatou nuu (i le *O Afafine i Lo’u Malo*, 168).

Peresitene Gordon B. Hinckley: “E i ai le malosiaga ma le mana tele i tamaitai o lenei Ekalesia. O loo i ai le au taitai ma le taitaiga, o se agaga patino o le tutoatasi, ae e i ai le faamalieina tele i le avea ai o se vaega o lenei galuega, le malo o le Alii, ma le galulue soosoo tauau ai ma le perisitua e tuleia i luma” (i le *O Afafine i Lo’u Malo*, 153).

Peresitene Thomas S. Monson: upusii mai ia Belle Smith Spafford, Peresitene Aoao o le Aualofa, lea na tusia: “E le’i i ai muamua ni tamaitai e sili atu ona maoae a latou faataitaiga e pei ona i ai i le lalolagi i ona po nei. E le’i i ai lava muamua se taimi sa matua tatalaina ai faitotoa o avanoa [eseese] mo i latou nai lo le taimi nei. O se vaitau sili lenei ona faatosina, faagaeetia, faigata ma malolosi ona manaoga mo tamaitai. O se taimi ua sili ona tamaoaiga i taui pe afai tatou te ola e tusa ma mataupu

faavae moni, aoaoina ia mea moni taua o le olaga, ma fuafuaina ma le atamai mea e tatau ona faamuamua’ [A Woman’s Reach (1974), 21]. O’u tuafafine pele, o le tou aso lenei, o le tou taimi lenei” (“The Mighty Strength of the Relief Society,” *Ensign*, Nov. 1997, 95).

Peresitene Russell M. Nelson: “Ou te augani atu ai i o’u tuafafine o Le Ekalesia a Iesu Keriso o le Au Paia o Aso e Gata Ai e laa i luma! Tu i lou tulaga tonu ma le manaomia i lou aiga, i lou nuu, ma i le malo o le Atua—ia sili atu nai lo le mea sa i ai muamua. Ou te augani atu ia outou faataunuina le valoaga a Peresitene Kimball. Ma, ou te folafola atu ia te outou, i le suafa o Iesu Keriso, a outou faia lena mea, o le a faateleina e le Agaga Paia lau faatosinaga i se ala e matua sili atu nai lo le mea sa i ai!” (“O Se Talosaga i O’u Tuafafine,” *Liahona*, Nov. 2015, 97).

2. Tagai i le vitio a Sister Camilla Kimball o loo faiatuaina le saunoaga a Peresitene Spencer W. Kimball i le lds.org/general-conference/1979/10/the-role-of-righteous-women also Spencer W. Kimball, “The Role of Righteous Women,” *Ensign*, Nov. 1979, 102–4.
3. Spencer W. Kimball, “The Role of Righteous Women,” 103–4; faaopoopo le faamamafa.
4. 1 Peteru 3:14–15.
5. Tagai McKinley Corbley, “80 Beachgoers Form Human Chain to Save Family Being Dragged Out to Sea by Riptide,” July 12, 2017, goodnewsnetwork.org.
6. Jessica Mae Simmons, in Corbley, “80 Beachgoers Form Human Chain.”
7. Simmons, in Corbley, “80 Beachgoers Form Human Chain.”
8. Tagai Alema 41:10; 34:28; Mataupu Faavae ma Feagaiga 38:27; Luka 16:19–25.
9. *Aoaoga a Peresitene o le Ekalesia: Gordon B. Hinckley* (2016), 74.
10. Faamatalaga mai le aiga o Virginia Pearce.
11. Mataupu Faavae ma Feagaiga 49:26–28.
12. Thomas S. Monson, “O Le Malosiaga Maoae o le Aualofa,” 95.



Saunia e Neill F. Marriott

Fesoasoani Lua i le Au Peresitene Aoao o Tamaitai Talavou

Tumau i le Atua ma Faaleleia le Va

O loo ia Keriso le mana e aumaia ai i tatou i se fa'aumeaga alofa ma le Tama ma faapea foi le tasi ma le isi.

E manaomia ona tatou faalolotoina atili lo tatou malamalama ma le usiusitai i le Tama Faalelagi. O lo tatou sootaga ma Ia e faavavau. O i tatou o Ana fanau faapelepeleina, ma o le a le sua lava lena mea. E faapefea ona tatou taliaina ma le loto atoa Lana valaaulia e faalatalata atu ia te Ia ma tatou olioli ai i faamanuiaga ua Ia naunau e tuuina mai ia te i tatou i lenei olaga ma i le olaga a sau?

Na fetalai atu le Alii ia Isaraelu anamua ma ua Ia fetalai mai foi ia te i tatou, "Ioe, o le alofa e faavavau ua ou alofa atu ai ia te oe: o le mea lea ua ou faafualoaina ai lo'u alofa ia te oe."¹ I le talanoa atu e pei o le a faia e le Tama, ua fetalai mai foi le Tama ia te i tatou, "O le a mau oe ia te au, ma a'u ia te oe; o le a savali faatasi ma a'u."² O lava lo tatou faatuatuaina o Ia e tumau ai ia te Ia ma savavali ai faatasi ma Ia?

Ua tatou i ai iinei i le lalolagi ia aoao ma tuputupu a'e, ma o le aoaoina ma le tuputupu ae aupito taua o le a maua mai lo tatou sootaga ma le Tama Faalelagi ma Iesu Keriso. Mai la tatou sootaga faamaoni ma i La'ua, e maua ai le poto faaleatua, alofa, mana, ma le gafatia e auauna atu ai.

sauniga e tatau ai, na toefuatai mai *mo o tatou faamanuiaga*. Pe o e lagonaina le loloto o le alofa ua i ai i tafa uma o a La tapenapenaga mo lo tatou olioli ma le tuputupu a'e? E tatau ona tatou iloa o le fuafuaga a le Tama Faalelagi mo le faaolataga o le, ia tatou usiusitai i tulafono ma sauniga o le talalei ma maua le ola e faavavau ma avea ai e pei ona i ai nei le Atua.⁴ O le fafia moni lea ma le tumau ua ofoina mai e le Tama Faalelagi ia te i tatou. Ma e leai lava se isi fafia moni ma le tumau.

E mafai e o tatou luitau ona tosoesina i tatou mai le ala o le fafia. E mafai ona le maua la tatou sootaga faatuatuaina ma le Atua pe afai e tata'i e tofotofoga i tatou i mea faalavefau nai lo le tatou lotomaulalo ma tootutuli e tatalo.

Ua augani mai lenei fatuga faigofie e iloilo mea tatou te faamuamua:

*O nisi mea e taua; a o nisi e leai.
E i ai nai mea e tumau, ae o le tele lava e le au.*⁵

Uso e, o a mea e taua ia te outou? O se mea e taua faavavau i le Tama o le, ia tatou aoao ia te Ia, faalotomaulalo i tatou lava, ma ola i le usiusitai ia te Ia i aafiaga i le olaga nei. E finagalo o Ia ia sua lo tatou manatu faapito i le auauna atu ma lo tatou fefefe i le faatuatua. O nei mea taua tumau, e mafai ona aupito faigata le tofotofoina ai o i tatou.





O le taimi *nei*, faatasi ma mutaga o lo tatou malosi faaletino, o loo poloai mai ai le Tama ia tatou alolofa i le taimi ua matua faigata ai ona alofa, e auauna atu i le taimi ua faigata ai, ia faamagalo atu i le taimi tatou te le o mautinoa ai pe tatou te mafaia. E faapefea? O le a faapefea ona tatou faia? Tatou te aapa atu ma le lotonaunau mo le fesoasoani a le Tama Faalelagi, i le suafa o Lona Alo, ma faia mea i Lana ala nai lo lo tatou faia ma le faausili o o tatou lava loto.

Sa ou iloa lo'u faamaualuga ina ua saunoa Peresitene Ezra Taft Benson e uiga i le faamamaina o totolu o le ipu.⁶ Sa ou manatu ifo o a'u o se sioki. E faapefea ona ou sasaa esea toega o le faamaualuga mai la'u sioki? O le fai faamalosi o i tatou lava ia ia lotomaualalo ma taumafai e uunai i tatou ia alolofa faafoliga i isi, e 'o'o, ma e le aoga. O a tatou agasala ma le faamaualuga e fatuina ai se va—po o se ava—i lo tatou va ma le punavai o le alofa uma, o lo tatou Tama Faalelagi lea.

Ua na o le Togiola a le Faaola e mafai ona faamama ai i tatou ma a tatou agasala ma punitia ai le va.

Tatou te mananao ia si'omia i tatou i aao o le alofa ma le taitaiga a lo tatou Tama Faalelagi, ma o lea tatou te faamuamua ai Lona finagalo ma faatasi ai

ma se loto nutimomoia o loo ole atu ia liligi mai e Keriso au o le vai faamama i a tatou sioki. I le taimi muamua atonu e toulu mai i mataua, ae a o tatou saili, ole atu, ma usiusitai, o le a liligi tele mai. O le a amata ona faatumuina i tatou i lea vai ola, ma taumasuasua ai i Lona alofa, ona mafai lea ona faasipa le sioki o o tatou agaga ma faasoa atu ona 'anomea i isi o e o galala mo le faamologa, faamoemoe, ma le fia taulia. A oo ina mama totolu o o tatou ipu, ona amata lea ona maloloina a tatou sootaga i le olaga nei.


O le taulagaina o o tatou lava naunauga e moomia ina ia maua ai se avanoa mo fuafuaga faavavau a le Atua. O le Faaola, o le o avea ma fofoga taumomoli o le Tama, ua aioi mai o Ia ia i tatou e "faalatalata mai ia te au ma o le a Ou faalatalata atu ia te outou."⁷ O le faalatalata atu i le Atua e mafai ona faauigaina ia aoao Ana upumoni mai tusitusiga paia, mai le mulimuli i fautuaga faaperofeta, ma le taumafai e fai atoatoa atili Lona finagalo.

Pe o tatou malamalama o loo ia Keriso le mana e aumaia ai i tatou i se faa'aumeaga alofa ma le Tama ma faapea foi le tasi ma le isi? O Ia, e ala i le mana o le Agaga Paia, e mafai ona tuuina mai ia te i tatou le malamalamaaga moomia i sootaga.

Sa ta'u mai ia te au e se faiaoga o le Aoga Sa se aafiaga mamana ma lana vasega o tamaiti e 11-tausaga. O se tasi o i latou o le a ou faagoaina ia Simi, o se tamaititi e le faalogo ma sa faaesea. I se tasi Aso Sa, sa musuia ai le faiaoga e tuuese lana lesona ae ta'u atu le mafuaaga e alofa ai ia Simi. Sa talanoa o ia i lona lotofaafetai ma lona talitonuga i lenei alii talavou. Ona fesili lea o le faiaoga i le vasega e ta'u atu ia Simi se mea latou te talisapaia ai o ia. A o taitasi le vasega ma ta'u atu ia Simi le mea e ala ai ona faapitoa o ia ia i latou, sa faagaugau ifo le ulu o le tamaititi ua amata ona tafe ifo loimata i ona foliga. Sa faufina e lenei faiaoga ma le vasega se alalaupapa i le loto tuuatoatas i Simi. O sina alofa faigofie, sa ta'u atu ma le lotofaamaoni, ua avatu ai le faamoemoe ma le taua i isi. Ou te faaigoina lea mea o le "faaleleia o le va."

Masalo o lo tatou olaga i se lalolagi i le muai olaga, atonu, na faavae ai lo tatou naunautai mo le alofa moni, tumau i lenei lalolagi. Ua manamuina faalelagi i tatou e tuuina atu le alofa ma ia alofagia, ma e oo mai le alofa aupito loloto pe a tatou tasi ma le Atua. Ua valaaulia i tatou e le Tusi a Mamona "ia tatou faalelei ma le [Atua] e ala i le togiola a Keriso."⁸

Na tautala Isaia e uiga ia i latou o e ola faamaoni i le tulafono o le anapogi



ma avea ai i latou o le ati ae i solo mo a latou lava fanau. O i latou ia o e, ua folafola mai Isaia, o le a “ati ae mea na faatafunaina.”⁹ I se ala faapena, sa atiae ai e le Faaola solo i le va, po o le mamao o le tatou va, o i tatou ma le Tama Faalelagi. O Ia, e ala i Lana tulaga tele o le togiola, ua tatala ai le ala mo i tatou e maua ai le mana alofa o le Atua, ma mafai ai lea ona tatou ati ae ai “mea ua faatafunaina” i o tatou lava olaga patino. O le faamaloloina o le va faalelagona i le va o le tasi ma le isi, o le a momia ai lo tatou taliaina o le alofa o le Tama faatasi ai ma se ositau-lagaina o o tatou faamoemoega faapito-’au masani ma manatu atuatuvale.

I se tasi po e le galo, sa ma feese-esea’i ai ma se tasi ma te aiga, e uiga i se mataupu faaupufai. Sa vave ona ia faitioina ma tuu mai ana lafoga i o’u manatu, ma fai mai e sese o’u manatu a o lologo o matou aiga. Sa pei a’u o se vale ua le maumanatu—ma atonu a e sa’o. Sa ou tootuli e tatalo i lena po, sa vave ona ou faamatala atu i le Tama Faalelagi le faigata o lenei tagata o lo’u aiga! Sa faaauau ona ou talanoa. Atonu sa ou malolo mai lo’u faitio ma

sa maua e le Agaga Paia se avanoa e faagauai atu ai au, aua, i lo’u ofo tele, sa sosoo ma lo’u faalogoina o au lava o faapea atu, “Atonu e te finagalo ou te alofa ia te ia.” Alofa ia te ia? Sa ou toe tatalo, ma faapea atu, “E mafai faapefea ona ou alofa ia te ia? Ou te manatu ou te le manao foi ia te ia. E malo lo’u loto; ma ua tiga o’u lagona. E le mafai ona ou faia.”

Ona oo lea, e moni lava, faatasi ai ma le fesoasoani mai o le Agaga, sa ou maua se mafaufauga fou a o ou fai atu, “Ae e alofa Lau Afio ia te ia, Tama Faalelagi. Pe mafai lava ona aumai e Lau Afio ia te au se tufaaga o Lou alofa mo ia—inia ia mafai ai ona ou alofa foi ia te ia?” Sa faamaluluina o’u lagona tiga, sa amata ona suia lou loto, ma amata ona ou vaai i lenei tagata i se tulaga ese. Sa amata ona ou lagonaina lona taua moni na silafia e le Tama Faalelagi. Na tusia e Isaia, “E fusi e Ieova le gau o lona nuu, ma fofoina le manu’a e manunu’a ai i latou.”¹⁰

Na oo mai le taimi na punia fiafia ai le ava i lo ma va. Ae e ui ina sa ia le i taliaina lo’u loto ua suia, sa ou aoaoina o le a fesoasoani mai le Tama Faalelagi

ia tatou alolofa atu e oo lava foi ia i latou tatou te ono manatu e le mafai ona alolofa i ai, pe afai tatou te ole atu mo Lana fesoasoani. O le Togiola a le Faaola o se ala lea o le tafe mai e le aunoa o le alofa mama mai le Tama o i le Lagi. E tatau ona tatou filifili e tumau i lena alofa ina ia maua ai le alofa mama mo tagata uma.

Pe a tatou tuu atu o tatou loto i le Tama ma le Alo, ua tatou suia le lalolagi—tusa lava pe le sua tulaga o loo siomia ai i tatou. Tatou te faalatalata atu i le Tama Faalelagi ma lagonaina ai Lona taliaina fiafia o a tatou taumafaiga e avea ma soo moni o Keriso. E faate-leina lo tatou iloatino, mautinoa, ma le faatuatua.

Ua ta’u mai e Mamona ia tatou tatalo ma le malosi uma o le loto mo lenei alofa, ma o le a faaee mai i o tatou luga mai lona faapogai—o le Tama Faalelagi.¹¹ Ua na o iina e mafai ai ona avea i tatou o ni e fonoina le va o sootaga faaleolaga nei.

O loo pa’i mai le alofa e le i’u o lo tatou Tama mo i tatou, ina ia toe aumai i tatou i Lona mamalu ma le olioli. Na Ia ofoina mai Lona Alo Pele e Toatas, o Iesu Keriso, e fonoina le ava o loo taatia mai i malae i lo tatou va ma Ia. O le toe faatasia ma le Tama o i le Lagi o le fatu lea o le alofa tumau ma faamoemoega e faavavau. E tatau ona tatou faia se sootaga ma Ia i le taimi nei e aoao ai pe o le a moni le mea e taua, ia alofa e faapei ona Ia alofa mai ma ia tuputupu ae ma ia faapei o Ia. Ou te molimau atu o lo tatou sootaga faamaoni ma le Tama Faalelagi ma le Faaola, e taua e faavavau ia te i La’ua ma i tatou. I le suafa, o Iesu Keriso, amene. ■

FAAMATALAGA

1. Jeremia 31:3.
2. Mose 6:34.
3. Bruce R. McConkie, “The Mystery of Godliness” (Brigham Young University fireside, Jan. 6, 1985), 1, speeches.byu.edu.
4. Tagai Bruce R. McConkie, “The Mystery of Godliness,” 4.
5. E le iloa le tusitala.
6. Tagai Ezra Taft Benson, “O Le Faamamaina o Totonu o le Ipu,” *Ensign*, Me 1986, 4–7.
7. Mataupu Faavae ma Feagaiga 88:63.
8. Iakopo 4:11.
9. Isaia 58:12.
10. Isaia 30:26.
11. Tagai Moronae 7:48.



Saunia e Joy D. Jones
Peresitene Aoao o le Peraimeri

O Le Taua le Mafuatiaina

E mafai ona tatou olioli soo i musumusuga malu a le Agaga Paia o loo faamaonaina le upumoni o lo tatou taua faaleagaga.

Ao asiasi atu i le atunu o Siera Leone i Aferika i Sisifo, sa ou auai ai i se fonotaga sa faatautaia e se taitai o le Peraimeri a le siteki. Sa taitai Mariama i le alofa, alofatunoa, ma le talitonuga ma sa faigofie ona manatu ua leva ona avea o ia ma tagata o le Eklesia. Peitai, o Mariama o se tagata sa lei leva ona liliu mai.

Sa auai lona uso laitiiti i le Eklesia ma valaaulia Mariama e auai i se vasega a le Eklesia ma ia. Sa matua faagaeitia Mariama i le savali. O le lesona sa faatatau i le tulafono o le legavia. Sa ia talosaga ia o atu faifeautalai e aoao atili o ia ma sa lei pine ae maua sana molimau o le Perofeta o Iosefa Samita. Sa papatisoina o ia i le 2014, ma sa papatisoina lana tama teine i le masina ua tuanai. Mafaufau i aoaoga autu e lua na taitai atu i le liua o Mariama, o le tulafono o le legaviā ma le Perofeta o Iosefa Samita, o manatu ia e lua e tele ina vaai i ai le lalolagi o se mea e le fetaui, pasiā, pe le talafeagai. Ae sa molimau Mariama sa pei o ia o se pepe na tosina atu i le molī. Fai mai o ia, "Ina ua ou mauaina le talalelei, na ou mauaina au lava ia." Sa ia iloaina lona taua e ala i mataupu faavae paia. O lona taua o se afafine o le Atua sa faaali atu ia te ia e ala i le Agaga Paia.

Ia sei o tatou feiloai atu nei i le auso Singh mai Initia. O Renu i le itu taumatau, o le uluai uso o le auso toalima na muamua auai i le Eklesia, na faasoaina manatu nei:

"Ae ou te lei amata sailiili i le Eklesia, ou te lei lagonaina moni o au o se tagata faapitoa. Sa na o a'u o se tasi o le toatele o tagata, ma sa lei aoaoina moni au e lo'u sosaiete ma le aganuu e i ai so'u taua faaletagata lava ia. Ina ua ou aoaoina le talalelei ma aoaoina e faapea o a'u o se afafine o lo tatou Tama Faalelagi, sa suia ai a'u. Sa faafuasei



O Mariama, o loo i ai ma lana tama teine, na iloaina lona taua ina ua mavae le mauaina o mataupu faavae paia.

ona ou lagonaina le faapitoa—sa foafomaoni e le Atua a'u ma foafolina lo'u agaga ma lo'u olaga ma se taua ma se faamoemoega.

"Ae ou te lei mauaina le talalelei i lo'u olaga, sa ou taumafai i taimi uma e faamaonia atu i isi o au o se tagata faapitoa. Ae ina ua ou iloaina le upumoni, o au o se afafine o le Atua, sa le toe moomia ona ou tau faamaonia atu se mea i soo se tasi. Na ou iloa e faapitoa lava au. . . . Aua lava ne'i manatu o oe o se meanoa."

Sa sa'o atoatoa le saunoaga a Peresitene Thomas S. Monson ina ua ia siiina mai upu nei: "O le taua o se agaga o lona gafatia lea e avea ai ma Atua."¹

Sa faamanuiaina talu ai nei a'u e feiloai i se isi tamaitai talavou e malamalama i lenei lava upumoni e tasi. O lona igoa o Taiana. Sa ma feiloai i le Falemai o Tamaiti Laiti i le Aai o Sate Leki. Sa i ai Taiana i le vasega amata o le a'oga maualuga ina ua maua i le kanesa. Sa tauivi o ia i se taua ma le lototoa mo le 18 masina ae lei maliu o ia i ni nai vaiaso talu ai. Sa tumu Taiana i le malamalama ma le alofa. Sa lauiloa o ia i lana ataata tele ma lana failogoga "lima matua uma e lua i luga." A fesili isi, "Aisea ua tupu ai ia te oe Taiana?" o lana tali, "Aisea e le tatau ai ona tupu ia te au?" Sa saili Taiana e avea e faapei o lona Faaoala, o le na ia matua alofa i ai. I a'u asiasiga, sa ou iloa ai sa



I le iloaina o ia o se afafine o le Atua na tuuina atu ai ia Taiana le filemu ma le lototele e feagai ai ma lana luitau.

malamalama Taiana i lona taua paia. I le iloaina o ia o se afafine o le Atua na ia maua ai le filemu ma le lototele e feagai ai ma ona tofotofoga loftuina i le ala lelei na ia faia ai.

Ua aoao mai e Mariama, Renu, ma Taiana i tatou e faapea o le a faamautu mai e le Agaga ia i tatou taitoatasi lo tatou taua paia. O le iloaina moni o oe o se afafine o le Atua o le a aafia ai vaega uma o lou olaga ma taiala oe i auaunaga e te tuuina atu i aso taitasi. Sa faamalamalama mai e Peresitene Spencer W. Kimball i upu mamalu nei:

“O le Atua o lou Tama. E alofa o Ia ia te oe. E matua le mafuatiaina le faatauina o oe e Ia ma lou tina i le lagi. . . . E tulagaese oe. O se ituaiga e tasi, ua foafoa i le atamai e faavavau lea ua e maua ai le tofi i le ola e faavavau.

“Ia leai lava se fesiligaina e lou mafaufau o lou taua o se tagata patino. O le faamoemoega atoa lava o le fuafuaga o le talalelei o le mauaina lea o se avanoa mo outou taitoatasi ia ausia ai o outou gafatia atoa, o lona uiga o le alualu i luma e faavavau ma le avanoa i le tulaga atua.”²

Se'i o'u faasino atua le manaomia ona tuueseese o upu taua nei e lua: *taua* ma le *agavaa*. E le tutusa upu ia e lua. O le *tauaua* faaleagaga o lona uiga o le faatauina o i tatou lava i le auala o loo faatauina ai i tatou e le Tama

Faalelagi, ae le o le auala e faataua ai e le lalolagi i tatou. Sa fuafuaina lava lo tatou taua ae tatou te lei o mai i lenei lalolagi. “E le mafuatia le alofa o le Atua ma o le a tumau pea e faavavau.”³

I le isi itu, e ausia le *agavaa* e ala i le usiusitai. Afaia tatou te agasala, e faaitiitia lo tatou agavaa, ae le faaitiitia ai lava lo tatou taua! E faaauau pea ona tatou salamo ma tauivi pea ina ia faapei o Iesu faatasi ma lo tatou taua. E pei ona aoao mai Peresitene Polika Iaga: “O le mea sili ona itiiti, le agaga sili ona maualalo ua i ai nei i le fogaeleele . . . , e tutusa le taua ma lalolagi.”⁴ E tusa lava po o le a, e i ai lava lo tatou taua i le silafaga a lo tatou Tama Faalelagi.

E ui i lenei upumoni ofoofogia, e toafia i tatou e tauivi mai lea taimi i lea taimi, ma manatu po o ni lagona le lelei e uiga ia i tatou lava? O a'u. O se mailei faigofie. O Satani o le tama o pepelo uma, aemaise lava pe a oo i le faafoligaseineina o lo tatou lava natura paia ma le faamoemoega. O le manatu faatauvaa ia i tatou lava e le faia ai se lelei mo i tatou. Ae na te taofiofia i tatou. E pei lava ona aoao soo ai i tatou, “E leai lava se tasi e mafai ona faia oe ia lagona le le taua e aunoa ma lau faatagaga.”⁵ E mafai ona tatou taofi le faatusata o lo tatou leaga i tulaga

silisili o le isi tagata. “O le faatusata faoaina le olioli.”⁶

I se eseesegea, e faamautinoa mai e le Alii ia i tatou i taimi tatou te maua ai mafaufauga mama, o le a Ia faamanuiaina i tatou i le talitonuga maumaututu, e oo lava i le talitonuga maumaututu e iloa ai po o ai moni lava i tatou. E leai lava se isi taimi sili ona taua e faalogo ai i Ana upu [i lo le taimi nei]. “Ia tuu le amiomamā e teuteuina ai ou mafaufauga e lē aunoa,” sa Ia fetalai mai ai. “Ona malosi ai lea o lou faatuatua fai ifo i luma o le Atua . . . ma avea ai le Agaga Paia ma au aumea tumau.”⁷

Sa faaali mai e le Alii lenei upumoni faaopoopo i le Perofeta o Iosefa Samita: “O ia o lē na te maua se mea mai i le Atua, ia ta'u e ia ua mai i le Atua; ma ia tuu atu ia te ia e olioli ua ta'u agavaa o ia e le Atua na te mauaina lena mea.”⁸ A tatou lagonaina le Agaga, e pei ona faamalamalama mai e lenei fuaipu, tatou te iloaina o mea ua tatou lagonaina ua mai lo tatou Tama Faalelagi. Tatou te faamamalu ma viia o Ia mo le faamanuiaina o i tatou. Ona tatou olioli lea ona ua ta'u agavaaina i tatou e mauaina.

Mafaufau o loo e faitauina tusitusiga paia i se taeao ma ua musumusu lemu atu le Agaga ia te oe o mea o loo e faitauina e moni. O mafai ona e iloaina le Agaga ma fiafia ua e lagonaina Lona alofa ma ua agavaa e mauaina?

Tina, atonu e te tootuli i talaane o lau tama fa tausaga le matua a o ia faia lana tatalo moe. Ona loftuina lea o oe i se lagona a o e faalogo atu. E te lagonaina le mafanafana ma le filemu. E puupuu lava le lagona, ae ua e iloaina i lena lava taimi, ua ta'u agavaaina oe e maua. Atonu e seasea tatou mauaina se faailoaga tele faaleagaga i o tatou olaga; ae e mafai ona tatou olioli soo i musumusuga mālū a le Agaga Paia, o loo faamaoniaina le upumoni o lo tatou taua faaleagaga.

Sa faamalamalama mai e le Alii le sootaga i le va o lo tatou taua ma Lana taulaga togiola sili ina ua Ia fetalai:

“Ia manatua ua tele lava le taua o agaga i le silafaga a le Atua;

“Aua, faauta, na mafatia le Alii lo



E ala i le talalelei, o Renu Singh (taumatau mamao) sa aoaoina lona taua o se afafine o le Atua ma sa avea ma uluai o le auuso e toalima e auai i le Ekalesia.

oulua Togiola i le otia i la le tino; o le mea lea na mafatia o ia i le tiga o tagata uma, ina ia mafai ona salamo tagata uma ma o mai ia te ia.”⁹

Uso e, ona o mea na Ia faia mo i tatou, “ua noatia ai i tatou ia te ia i noataga alofa.”¹⁰ Sa Ia fetalai mai: “Ma na auina mai a'u e lo'u Tama ina ia sii ae au i luga o le satauro; ma a mavae ona sii ae o au i luga o le satauro, ina ia mafai ona ou aumai o tagata uma ia te au.”¹¹

Sa faamalamalama mai foi e le Tupu o Peniamina lenei fesootaiga mausali ma lo tatou Faaola: “Ma faauta, o le a mafatia o ia i faaososoga, ma tiga o le tino, ma le fia 'ai ma le fia inu, ma le lailoa, e sili atu i lo le mea e mafai e le tagata ona onosaia, vagana ai ua otia; au faauta, e sau le toto mai ona pu afu uma, ona o le a tele naua o lona mafatia mo le amioleaga ma mea inosia a ona tagata.”¹² O lena mafatiaaga ma taunuuga o lena mafatiaaga ua tumu ai o tatou loto i le alofa ma le lotofaafetai. Sa aoao mai Elder Paul E. Koelliker, “Pe a tatou aveesea ia faatosinaga lea e tosaina i tatou i le lalolagi ma faaaogaina lo tatou faitalia e saili ai o Ia, ua tatou tatalaina o tatou loto i se malosiaga faaselesitila ma uunaia ai i tatou e agai atu ia te Ia.”¹³ Afai o le alofa tatou te lagonaina mo le Faaola ma mea na Ia faia mo i tatou e sili atu i lo le malosi tatou te tuu atu i vaivai-ga, masalosalo ia te oe lava ia, po o mausa leaga, ona Ia fesoasoani lea ia i tatou e faatoilalo mea ia e mafua ai puapuaga i o tatou olaga. Na te laveaina i tatou mai ia i tatou lava.

Se'i o'u toe faamamafaina atu: afai e malosi atu le toso a le lalolagi nai lo le tatou faatuatua ma le faalagolago i le Faaola, o lona uiga e manumalo lava la le toso a le lalolagi i taimi uma. Afai tatou te filifili e taulai atu i o tatou mafaufauga le lelei ma masalosalo i lo tatou taua, nai lo le pipii atu i le Faaola, o le a oo ina faigata atili ona lagona ia unaiga a le Agaga Paia.

Uso e, aua ne'i tatou fenumiai po o ai i tatou! E ui e masani lava ina faigofie atu ona faavailolo faaleagaga nai lo le tuuina atu o le taumafaiga faaleagaga ina ia manatuaina ma opomauina lo



tatou faasinomaga paia, ae e le mafai ona tatou faia lena uiga lamatia i nei aso e gata ai. I le avea ai ma usoga, ia tatou “faamaoni ia Keriso; . . . ma talosia ia sii ae [i tatou] i luga e Keriso, ma talosia ia mau e faavavau i lou mafau-fau ona mafatia ma lona maliu, . . . ma lona alofa mutimutivale ma le tali-tiga, ma le faamoemoe o lona mamalu ma le ola faavavau.”¹⁴ A o siitia i tatou e le Faaola i faavae maualuga atu, e mafai ona sili atu ona manino la tatou vaai e le gata po o ai i tatou ae o le a tatou latalata atili ia te Ia nai lo le mea tatou te mafaufauna. I le suafa paia o Iesu Keriso, amene. ■

FAAMATALAGA

1. I le Thomas S. Monson, “O Lo Tatou Tiute Paia Faaleperisita,” *Liahona*, Me 2006.
2. Spencer W. Kimball, “Privileges and Responsibilities of Sisters,” *Ensign*, Nov. 1978, 105.
3. D. Todd Christofferson, “Tumau i Lo'u Alofa,” *Liahona*, Nov. 2016, 48.
4. Brigham Young, “Remarks,” *Deseret News*, Mat. 6, 1861, 2.
5. Attributed to Eleanor Roosevelt.
6. Attributed to Theodore Roosevelt.
7. Mataupu Faavae ma Feagaiga 121:45, 46.
8. Mataupu Faavae ma Feagaiga 50:34.
9. Mataupu Faavae ma Feagaiga 18:10–11.
10. “O Le Alofa o le Faaola,” *Viiga* nu. 61.
11. 3 Nifae 27:14.
12. Mosaea 3:7.
13. Paul E. Koelliker, “E Alofa Moni o Ia i ai Tatou,” *Liahona*, Me 2012, 18.
14. Moronae 9:25.



Saunia e Peresitene Dieter F. Uchtdorf
Fesoasoani Lua i le Au Peresitene Sili

O Le Auuso e Toatolu

E nafa i tatou lava mo lo tatou lava avea ma soo, ma e itiiti lava—pe afai e i ai se mea—e faatatau i le ala e taulima ai i tatou e isi.

Tuafafine pele, uo pele, o le amataina o le konafesi aoao i se sau-niga a tamaitai i le lalolagi atoa e ttau ma matagofie. Ia mafaufau foi laia: o tuafafine o vaitausaga uma, talaaga, ituaiga, ma gagana ua autasi uma i le faatuatua ma le alofa mo le Alii o Iesu Keriso.

Ina ua matou feiloai talu ai nei lava ma lo tatou perofeta pele, o Peresitene Thomas S. Monson, sa ia faailoa mai ia i matou le tele o lona alofa mo le Alii. Ma ou te iloa e matua faafetai lava Peresitene Monson mo lo outou alofa, o a outou tatalo, ma lo outou tuuto i le Alii.

I aso lava la ua leva i se lauelee mamao lava sa nonofo ai se auuso tamaitai se toatolu.

O le uso muamua o **faanoanoa**. O mea uma mai lona isu i lona auvae ma mai lona pa'u i ona tama'ivae sa foliga mai sa lei lava lea lelei ia te ia. A tautala o ia, o nisi taimi e le lelei ai upu e sau i fafo, ma sa tōē i ai tagata. A faitio se tasi ia te ia pe "galo" foi ona valaaulia o ia i se mea, e valu lona ulu, savali ese, ma su'e se nofoaga lilo e faate'a ese atu ai sona faanoanoa ma tomanatu pe aisea ua oo ai le olaga i se tulaga le talileleia ma le le fiafia.

O le uso lona lua o **ita**. Sa ia manatu lava o ia o se tagata e poto tele, ae sa

lauiloa ai foi. O nisi taimi, e gali ai ona nifo, umau ana moto, ma mafaufau, "E matua le fea a le olaga!"

Ona i ai lea o le uso lona tolu. E le pei la o ona uso o faanoanoa ma ita, sa matua—**fiafia o ia**. Ma sa le'i mafua ona sa poto atu o ia pe sili atu lona aulelei pe sili atu lona gafatia i lo ona uso. Leai, o nisi taimi e taumamao pe le amanaia foi o ia e tagata. O nisi taimi latou te faatauemai ai i ona ofu e fai po o ana tala e fai. O nisi taimi latou te faia ai ni tala pa'a e uiga ia te ia. Ae sa ia le faatagaina lava soo se mea o na mea e faalavelave tele ia te ia.

Sa fiafia lenei uso e pese. Sa le'i lelei tele lona leo, ma sa tōē i ai tagata, ae sa le'i taofia ai o ia. Na te fai mai, "O le a ou le faatagaina isi tagata ma o latou manatu e taofia a'u mai le pese!"

O le mea moni o lona pesepese pea sa mafua ai ona faanoanoa lona uso muamua ma ita lona uso lona lua.

I le tele o tausaga na mavae ai, ma mulimuli ane sa oo uso taitasi i le si'ui o lona lava taimi i le lalolagi.

O le uso muamua, sa ia iloaina pea lava pea sa leai se motusiaina o faanoanoaga i le olaga, sa i'u ai lava ina maliu ma le *faanoanoa*.

O le lona lua, o le sa ia maua lava se mea fou i aso uma e le fiafia i ai, sa maliu ma le *ita*.

Ma o le uso lona tolu sa faaaluina lona olaga e usu ai lana pese ma lona malosi ma se ataata maumaututu i ona foliga, sa maliu ma le *fiafia*.





O le mea moni, e le faigofie lava le olaga, ma o tagata e le faigofie ma le masuia e pei o uso e toatolu i lenei tala. Ae oo lava i ni faataitaiga malolosi faapenei e mafai foi ona aoaoina ai i tatou i se mea e uiga ia i tatou lava. Afai e pei outou o le toatele o i tatou, atonu e te ono iloaina se vaega o oe lava i se tasi o uso nei, po o le toaulua po o i latou uma e toatolu. Se'i o tatou tagai toto'a lava i uso taitasi.

O Lē ua Afaina

O le uso muamua sa ia vaai ia te ia lava o se ua afaina—o se tasi sa puleaina e isi.¹ Sa foliga mai sa tupu pea lea mea ma lea mea ia te ia na ala ai ona ia faanoanoa. Faatasi ma lenei manatu i le olaga, sa ia faatagaina ai isi e puleaina ona lagona ma ana amioga. A tatou faia nei mea, e fetosoaiina i tatou e matagi uma o manatu—ma i nei aso o le anoanoai o ala faasalalau faaagafesootai, ua agi ai na matagi i le malolosi o afā.

Tuafafine pele, aisea la tou te lafo atu ai fua lo outou fiafia i se tasi, po o se vaega o ni tagata, e itiiti lava se popole mo outou po o lo outou fiafia?

Afai e te iloaina o loo e popole po o a tala a tagata e fai e uiga ia te oe, e

mafai lava ona ou fautuaina atu lenei vaifofo: manatua po o ai oe. Manatua o oe o se tasi o le aiga tautupu o le malo o le lagi, o afafine o Matua Faalelagi, o loo nofotupu i le atulaulau atoa.

O loo ia te oe le DNA faaleagaga o le Atua. Ua ia te oe ni meaalofa tulagaese na pogai mai i lou foafoaga faaleagaga ma sa atiaeina i se taimi umi lava o lou muai olaga. O oe o se afafine o lo tatou Tama i le Lagi alofa mutimutivale ma faavavau, o le Alii o Au, o Le na foafoaina le atulaulau, ma faasalalauina ia fetu taamilomilo i le vanimonimo tele, ma tuu paneta i o latou taamilo-saga atofaina.

O loo e i ai i Ona aao.

Aao lelei lava.

Aao alofa.

Aao popole.

Ma e leai ma se mea e tautala ai se tasi e uiga ia te oe e mafai ona sua lena mea. O a latou upu e leai se uiga e faatusa i mea ua fetalai i ai le Atua e uiga ia te oe.

O oe o Lona afafine pele.

E alofa o Ia ia te oe.

E tusa lava pe e te tautevateva, e tusa lava pe e te liliu ese mai ia te Ia, e alofa le Atua ia te oe. Afai o loo

e lagonaina le leiloa, tulafoaiina, pe faagaloina—uaa le fefe. O le a maua oe e le Leoleo Mamoe Lelei. O le a Ia si ae oe i Ona tauau. Ma o le a Ia ave oe i le aiga.²

Ou tuafafine pele, faamolemole ia tuu nei upumoni paia ia goto ifo i le ta'ele o o outou loto. Ma o le a e iloa ai o loo tele lava mafuaaga e le tatau ona faanoanoa ai, uaa o loo i ai sou taunuuga e faavavau ia faataunuuina.

Na foai mai e le Faaola pele o le lalolagi Lona soifua ina ia mafai ona outou filifili e avea lena taunuuga o se mea moni. Ua outou tauave i o outou luga Lona suafa; o outou o Ona soo. Ma ona o Ia, ua mafai ai ona outou faaofuina outou lava i ofutalaloa o le mamalu e faavavau.

O Lē Ita

O le uso lona lua sa ita i le lalolagi. E pei foi o lona uso faanoanoa, sa ia lagonaina o faafitauli i lona olaga sa mafua uma ona o se isi tagata. Sa ia tuua'ia lona aiga, o ana uo, o lana pule ma uso a faigaluega, o leoleo, o tuaoi, taitai o le Ekalesia, o sitaili fou, malolosi o ave o le la, ma le le laki lava. Ma sa ia faapa atu ai lona ita ia i latou uma.

Sa ia le'i manatu ia te ia o se tagata leaga. I se eseesege, sa ia lagona sa pau le mea na ia faia o le tu atu mo ia lava. Sa ia talitonu o isi tagata uma, sa faaosofia i le manatu faapito, manatu faatauvaa, ma le inoino. I le isi itu, sa faaosofia o ia i faamoemoega lelei—faamasinotonu, amiosa'o, ma le alofa.

Ae paga lea, o le ituaiga manatu o le uso ita lea ua taatele tele. Sa matauina lenei mea i se suesuega lata mai na iloa ai le feteenaiga i le va o ni vaega faatautavā. O se vaega o le suesuega, sa faatalanoaina ai e tagata suesue ia tagata Palesitina ma Israelu i Sasae Tutotonu, faapea ma le au Ripapelika ma le au Temokarasi i le Iunaite Setete. Sa latou iloaina e faapea "sa lagonaina e itu taitasi sa faaosofia la latou lava vaega e le alofa e sili atu i lo le ita, ae ina ua fesiliglia pe aisea [na] aafia ai le vaega faatautavā i fetaua'iga, sa [latou] faasino atu i le ita sa faaosofia ai [le isi] vaega."³

I se isi faaupuga, sa mafaufau vaega taitasi ia i latou lava o ni "tagata lelei"—talafeagai, agalelei, ma faamaoni. I se eseesege, sa latou vaa i o latou fili o ni "tagata leaga"—le iloa se mea, le faamaoni, ma amioleaga.

I le tausaga na ou fanau mai ai, sa fetaua'i le lalolagi i se taua matautia na mafua ai le tiga matuitui ma le faanoanoa lofituina i le lalolagi. Sa amatalia lenei taua e lo'u lava atunuu—o se vaega o tagata na faailoaina nisi vaega patino o ni tiapolo ma uunaia le itagiaina o i latou.

Sa latou faafilemuina i latou na latou le fiafia i ai. Sa latou faamaasia ma ta'uleagaina i latou. Sa latou manatu ia i latou o ni tagata mauala-lalo—matua faatauvaa lava. Ma o le taimi lava e te faamāina ai se vaega o tagata, o lou faamaonia atili lava lena o upu ma faatinoga o fetaua'iga e faasaga ia i latou.

Ou te gatete pe a ou mafaufau atu i le mea na tupu i le seneturi 20 i Siamani.

A tetepe le ioe se tasi ia i tatou, e faaosoosoina lava le manatu o loo i ai se mea o faaletonu ia i latou. Ma o iina e faigofie ai lava ona faapipii i ai ni uiga leaga i a latou upu ma amioga.

O le mea moni, e tatou ona tatou tutu atu i taimi uma mo le mea sa'o, ma e i ai taimi e tatou ai ona faaleo o tatou manatu mo lena mafuaaga. Peitai, a tatou faia ma le ita po o le inoino i o tatou loto—pe a faapa atu lo tatou ita i isi e faamanualia ai, faamāina, pe faafilemu ai i latou—tatou te le o faia la i le amiontonu.

O le a le mea na aoao mai e le Faaola?

"Ou te fai atu a'u ia te outou, ia outou alolofa atu i e ua ita mai ia te outou, faamanua i e ua fetuu mai ia te outou, ia agalelei atu i e ua inoino mai ia te outou, ma tatalo foi mo e ua tuuifua mai ma faasaua mai ia te outou;

"Ina ia avea outou ma fanau a lo outou Tamā o lē o i le lagi."⁴

O le ala lenei a le Faaola. O le laasaga muamua lava lea i le talepeina i lalo o papuipui lea e faatupuina le tele o le ita, inoino, fevaevae'a'iga, ma fetaua'iga i le lalolagi.

"Ioe," atonu e te faapea, "O le a ou loto e alofa i o'u fili—pe afai latou te loto foi e faia lea lava mea e tasi."

AE e le afaina lena mea, a ea? E nafa i tatou lava mo lo tatou lava avea ma soo, ma e itiiti lava—pe afai e i ai sina mea—e afaina ai le ala e taulima ai i tatou e isi. Tatou te faamoemoe ma le manino o le a latou malamalamāma agalelei mai foi, ae o lo tatou alofa mo i latou e tutoatasi mai o latou lagona e faasaga mai ia i tatou.

Masalo o a tatou taumafaiga e alolofa i o tatou fili o le a faamalūlūina ai o latou loto ma uunaia ai i latou mo

le lelei. Ae masalo foi e leai. Ae e le suia ai e lena mea lo tatou tautinoga e mulimuli ia Iesu Keriso.

O lea la, i le avea ai ma tagata o le Ekalesia a Iesu Keriso, o le a tatou alolofa pea i o tatou fili.

O le a tatou faatoilaloina le ita ma le inoino.

O le a tatou faatumuliaina o tatou loto i le alofa mo fanau uma a le Atua.

O le a tatou aapa atu e faamanua isi ma auaua atu ia i latou—e oo lava ia i latou e ono "tuua'ifuaina i [tatou], ma faasaua mai ia te i [tatou]."⁵

O Le Soo Moni

O le uso lona tolu ua fai ma sui o soo moni o Iesu Keriso. Sa ia faia se mea sa ono matua faigata lava ona faia—sa ia faatuatuaina le Atua e oo lava i fetaiaga ma faitioga ma faafitauli. Sa mafai lava ona ia faatumauina lona faatuatua ma le faamoemoe, e ui i le itagia ma le le mautonu na siomia ai o ia. Sa ia ola fiafia, e le ona o ona tulaga sa fiafia ae ona o ia sa fiafia.

E leai ma se tasi o i tatou e sao mai mea feteenai o le malaga o le olaga. Faatasi ai ma le tele o malosiaga o loo taumafai e toso ese atu i tatou, e faapefea la ona tatou faatumauina ma le mausali la tatou vaaiga mamao i le fiafia mamalu na folafolaina mai i e faatuatua?

Ou te talitonu e mafai ona maua le tali i se miti sa faia e se perofeta i le faitau afe o tausaga ua alu. O le igoa o le perofeta o Liae, ma o loo faamauina lana miti i le Tusi a Mamona taua ma ofoofogia.



I lana miti, sa vaai ai Liae i se fanua tele lava ma, i totonu, sa i ai se laau ofoofogia sa le mafaamatalaina lona matagofie. Sa ia vaaiia foi ni vaega toatele o tagata o loo agai atu i le laau. Sa latou mananao e tofo i ona fua matagofie. Sa latou lagonaina ma faatuatuaina o le a latou maua ai le fiafiaga sili ma le filemu tumau.

Sa i ai se ala vaiti na tau atu i le laau, ma i luga o le ala sa i ai se āi u'amea sa fesoasoani ia i latou e tumau ai i luga o le ala. Ae sa i ai foi se puao o le pogisa na faalavelave i le latou vaai i le ala ma le laau. Ma e masalo sa matautia atu foi le leo o tōēga ma upu faifai na sau mai se fale tele ma le ateatea na lata ane. O le mea na faate'ia ai, sa faatalitonuina e tauemuga nisi o tagata na oo atu i le laau ma tofo i le fua matagofie ma amata lagona le maasiasi ma ō ese atu ai.⁶

Masalo sa amata ona latou masalo-salo i le matagofie moni o le laau e pei ona latou muai manatu i ai. Masalo sa amata ona latou fesiliglia le moni o mea na latou lagonaina.

Atonu sa latou manatu afai latou te liliu ese mai le laau, o le a faigofie atu le olaga. Atonu o le a le toe tauemuina i latou pe tōē i ai.

Ma o le mea moni, o tagata sa faifai atu ia i latou sa foliga mai e pei o ni tagata sa fiafia lava ma olioli. O lea la, masalo afai latou te tuulafoaia le laau, o le a talileleia i latou e le faapotopotoga o le fale tele ma le ateatea ma viia i latou mo le latou faaiuga, atamai, ma le poto.

Tumau i luga o le Ala

Tuafafine pele, uo pele, afai e faigata ia te oe ona pipiimau i le āi u'amea ma savali ma le mausali agai atu i le faaolataga; afai o tōēga ma tauemuga a isi ua foliga mai ua maumaututu ua mafua ai ona e femoumouai; afai ua e atuatuvale i ni fesili e le o taliina po o ni aoaoga faavae e te le o malamalamā i ai; afai o loo e lagonaina le faanoanoa ona o ni lagona le fiafia, ou te uunaia oe ia manatua le miti a Liae.

Tumau i luga o le Ala.

Aua lava ne'i faamamuluina le āi u'amea—le afioga a le Atua!



Ma a taumafai soo se tasi e faama-asiasi oe i le taumafa ai i le alofa o le Atua, aua le amanaiaina i latou.

Aua lava ne'i galo, o oe o se afafine o le Atua; o loo faapolopoloina ni faamanuiaga silisili; afai e mafai ona e aoao e fai Lona finagalo, o le a e toe mafuta faatasi ma Ia!⁷

O folafolaga o viiga ma le taliaina e le lalolagi e le faatuatuaina, e le moni, ma e le faamalieina. O folafolaga a le Atua e mautinoa, e moni, ma e olioli—nei ma le faavavau.

Ou te valaaulia oe ia mafaufau i le tapuaiga ma le faatuatua mai se vaaiga maualuga atu. E leai ma se mea e ofo mai e le fale tele ma le ateatea e mafau-tusalia i le fua o le ola ai i le talalelei a Iesu Keriso.

E moni lava, "o mea e lei vaaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alofa ia te ia."⁸

Ua ou aoaoina mo au lava ia o le ala i le avea ma soo i le talalelei a Iesu Keriso o le ala lea i le olioli. O le ala i le saogalemu ma le filemu. O le ala i le upumoni.


Ou te molimau atu e ala i le mealofo ma le mana o le Agaga Paia, e

mafai ai ona e aoaoina lenei mea mo oe lava ia.

Ae mo le taimi nei, afai e oo ina faigata le ala mo oe, ou te faamoemoe o le a e maua le malutaga ma le malosi i a tatou faalapotopotoga matagofie o le Ekalesia: Peraimeri, Tamaitai Talavou, ma le Aualofa. E pei lava o ni nofoaga e malolo i ai i luga o le ala, ia e mafai ona e faafouina ai lou talitonuga ma le faatuatua mo le malaga o i luma atu. O i latou o se aiga saogalemu, lea e mafai ona e lagona ai se lagona o le aia e aumau ai ma maua ai le faamalosiauga mai ou uso ma soo.

O mea e te aoaoina i le Peraimeri e saunia ai oe mo upumoni faaopoopo e te aoaoina o ni tamaitai talavou. O le ala o le avea ma soo lea e te savali ai i totonu o au vasega a Tamaitai Talavou e taitai atu ai i le faaaumea ma le usoga a le Aualofa. Faatasi ai ma laasaga taitasi i luga o le ala, ua tuu atu ai ia te oe ni avanoa faaopoopo e faaalia ai lou alofa mo isi e ala i faatinoga o le faatuatua, agaalofa, alofa mama, amio mama, ma le auauna atu.

O le filifilia o lenei ala o le avea ma soo o le a taitai atu ai i le fiafia ma le lotomalie le mafaamatalaina o lou natura paia.



O le a le faigofie. O le a manaomia ai le mea silisili o ia te oe—lou atamai uma, aga fatufatua'i, faatuatua, amios'a'o, malosi, naunautaiga, ma le alofa. Ae e i ai le aso o le a e toe tepa ai i tua i au taumafaiga, oka i lou lotofaafetai o le a i ai ona sa e tumau malosi, sa e talitonu, ma sa e lei aluese mai le ala.

Fetaomi Pea

Atonu e tele ni mea e uiga i le olaga e le mafai ona tatou puleaina. Ae i le iuga, e te maua le mana e filifili ai lou taunuuga ma le tele o ou aafia i luga o le ala. E le o le tele o ou tomai, ae o au filifili na te faia le eseesega i le olaga.⁹

E le mafai ona e faatagaina ou tulaga na te faia oe ia faanoanoa.

E le mafai ona e faatagaina i latou e faia oe ia e ita.

E mafai ona e olioli o oe o se afafine o le Atua. E mafai ona e mauaina le olioli ma le fiafia i le alofatunoa o le Atua ma i le alofa o Iesu Keriso.

E mafai ona e fiafia.

Ou te uunaia outou ina ia faatumilia o outou loto i le faafetai mo le anoanoai ma le le tapulaa o le agalelei o le Atua. Ou tuafafine pele, e mafai

ona outou faia lenei mea! Ou te tatalo faatasi ai ma lagona uma o lo'u agaga ina ia e faia le filifili e fetaomi atu i luma i le laau o le ola. Ou te tatalo o le a e filifili e sii ae lou leo ma faia lou olaga ma pesega mamalu o viiga, e olioli ai i mea e mafai e le alofa o le Atua ma mea ofoofogia o Lana Ekalesia, ma le talalelei a Iesu Keriso ona aumaia i le lalolagi.

O le pese o le avea ma soo moni atonu e pā'ō papa pe fai foi si leotele i nisi tagata. Talu mai lava le amataga o taimi, o le mea lava lena sa i ai.

Ae i lo tatou Tama Faalelagi, ma i latou e alolofa ma faamamalu ia te Ia, o se pese sili ona taua ma matagofie—o le pese musuia ma faapaiaina o le alofa togiola ma le auauna atu i le Atua ma uso a tagata.¹⁰

Ou te tuu atu ia te oe la'u faamunuiga o se Aposetolo a le Alii ina ia e maua le malosi ma le lototele e uluola ai ma le olioli o se afafine o le Atua a o e savali ai ma le fiafia i aso taitasi i luga o le ala mamalu o le avea ma soo. I le suafa paia o Iesu Keriso, amene. ■

FAAMATALAGA

1. Tagai 2 Nifae 2:14, 26.
2. Tagai Luka 15:4–6.

3. Boston College, "Study Finds Intractable Conflicts Stem from Misunderstanding of Motivation," *ScienceDaily*, Nov. 4, 2014, sciencedaily.com.
4. Mataio 5:44–45.
5. Mataio 5:44.
6. Tagai 1 Nifae 8.
7. Tagai "O Au o se Atalii o le Atua," *Tusipese a Tamaiti*, 2–3.
8. 1 Korinito 2:9.
9. Tagai "The Most Inspirational Book Quotes of All Time," pegasuspublishers.com/blog.
10. Tagai Alema 5:26.





Sauniga i le Taeao o le Aso Toonai | 30 Setema, 2017

Saunia e Peresitene Dieter F. Uchtdorf

Fesoasoani Lua i le Au Peresitene Sili

O Se Faananau mo le Aiga

Ia liliu atu la lou agaga agai i le malamalama. Ia amata lau oe lava ia malaga matagofie i le aiga. A e faia lea mea, o le a lelei atili lou olaga, fiafia atili, ma mausali atili.

Talu ai nei, a o matou feiloai ma Peresitene Thomas S. Monson, sa ia faaalia, ma le mamalu tele ma foliga o le fiafia, le tele o lona alofa mo le Alii ma e na te silafia e alofa le Alii ia te ia. O'u uso e ma tuafafine, ou te iloa ua matua faafetai lava Peresitene Monson mo lo outou alofa, tatalo, ma tuuto i le Alii ma Lana talalelei sili.

O Bobbie le Taifau Ofoofogia

Toeitiiti atoa le seneturi talu ai, sa faimalologa atu ai se aiga mai Oregon i Initiana—e silia ma le 2,000 maila le mamao—ina ua leiloa le latou taifau pele, o Bobbie. Sa saili le aiga atuatuvale mo le taifau i mea uma ae sa lei faamanuiaina. Sa lei maua Bobbie.

I le lotonutimomoia, sa latou toefoi atu ai i le fale, o maila taitasi sa faateleina ai lo latou mamao mai le latou fagafao faapelepele.

Ono masina mulimuli ane, sa maofa ai le aiga i le tu ai o Bobbie i lo latou faitotoa i Oregon. “I le palapala, paee, maosiosia o vae e tau i ivi—sa foliga mai ai na [ia] savali i le mamao atoa lava . . . na o ia.”¹ O le tala ia Bobbie na taaina atu i ai mafaufauga o tagata i

le Iunaite Setete atoa, ma oo ai ina lauiloa o ia o Bobbie le Taifau Ofoofogia.

O Bobbie e le na o le pau lea o se manu ua iso ai saienitisi i se lagona maofa o le taitaiga ma le faananau mo le aiga. O nisi o anoano o pepe Monaki e felelei ese atu i le 3,000 maila i tausaga taitasi i tau sili atu ona lelei e talafeagai mo lo latou ola. E malaga ese atu laumei patua pa’u i le salafa o le atu Vasa Pasefika mai Initonesia i talafatai o Kalefonia. E aau atu tafolā mai vai

malulu i Pole i Matu ma Saute e agai atu i le ekueta ma toefoi mai. Masalo e sili atu ona ofoofogia, o le manulele o le tereni o le atika e lele mai le Li’o Atika i Anetatika ma toefoi mai i tau-saga uma, pe tusa ma le 60,000 maila.

A suesueina e saienitisi lenei amioga mata’ina, latou te fesiligia lava fesili e pei o le “E faapefea ona latou iloaina le mea e o i ai?” ma le “E faapefea e tupulaga e sosoo ai ona aoaoina lenei amioga?”

A ou faitau i lenei uiga mamana i manu, e le matatalia lo’u tuufesili, “Mata e mafai ona i ai i tagata soifua lea lava faananau e tasi—se faatulagaga o le tai-alia mai le loto, afai e te mafai—o lena mea e tosina atu ai i latou i lo latou *aiga faalelagi?*”

Ou te talitonu o alii uma, tamaitai, ma tamaiti ua lagonaina le valaau a le lagi i se taimi i lona olaga. I le taele o o tatou loto o loo i ai se faananau ia taunu atu ma pasia le veli ma opomau i Matua Faalelagi sa tatou iloaina ma faapelepele i ai muamua.

O nisi e ono taotaomiaina lenei faananau ma mafua ai ona latou le lagonaina le malosi o lenei lagona. Ae o i latou e le taotaomiaina lenei lagona i totonu o i latou lava e mafai ona amataliaina se malaga maoae—o se masiiga ofoofogia e agai atu i nofoalii faalelagi.

E Valaau mai le Atua ia te Oe

O le savali musuia a Le Eklesia a Iesu Keriso o le Au Paia o Aso e Gata Ai e faapea, o le Atua o lo tatou Tama,





e popole o Ia ia i tatou, ma o loo i ai se ala e toefoi atu ai ia te Ia.

E valaau mai le Atua ia te oe.

E silafia e le Atua ou mafaufauga uma, ou faanoanoaga, ma ou faamoe-moega silisili. E silafia e le Atua le tele o taimi e te saili atu ai ia te Ia. Le tele o taimi na e lagona ai le leai o se tapulaa o le fiafia. Le tele o taimi e te tagi ai i le tuuatoatas. Le tele o taimi e te lagona ai le leai o se fesoasoani, fenumiai, po o le ita.

Ae, po o le a lava lou talafaasolopito—afai na e vaivai, toilalo, lagona le nutimomoia, ita, faalataina, po o le fasia—ia iloa e le o tuua nao oe. E valaau mai pea le Atua ia te oe.

O loo faaloaloa mai e le Faaola Lona aao ia te oe. Ma, e pei ona sa Ia faia i na aufaifaiva sa tutu i se taimi ua leva lava i auvai o le Sami o Kalilaia, ma se alofa lemafuatia e fetalai mai ai o Ia ia te oe: "Sau, mulimuli mai ia te a'u."²

Afai o le a e lagonaina o Ia, o le a Ia fetalai atu ia te oe i lenei lava aso.

A amata ona e savali i le ala o le avea ma soo—a amata ona e agai atu i le Tama Faalelagi—o loo i ai se mea i totonu ia te oe o le a faamautu atu ua e faalogo i le valaau a le Faaola ma seti lou loto agai i le malamalama. O le a ou

ta'u atu ia te oe o loo e i ai i luga o le ala sa'o, ma o loo e toefoi atu i le aiga.

Talu mai lava le amataga o taimi, ua uunaia ai lava e perofeta a le Atua tagata o o latou aso ia "faalogo i le siufogga o le Ieova lou Atua, . . . tausi i ana poloaiga ma ana sauniga . . . , [ma] foi atu ia te [Ia] ma lou loto atoa, ma lou agaga atoa."³

Ua aoao mai e tusitusiga paia ia i tatou le faitau afe o mafuaaga e tatau ai ona tatou faia lenei mea.

O le asō, se'i ou ofo atua ni mafuaaga se lua e tatau ai ona tatou foi atu i le Alii.

Muamua: O le a lelei atili ai lou olaga.

Lua: O le a faaaoga e le Atua oe e faaleleia atili ai olaga o isi.

O Le A Lelei Atili Ai Lou Olaga

Ou te molimau atu a tatou amataina pe faaaaua pe a le malaga maoae lea e tau atu i le Atua, o le a lelei atili o tatou olaga.

E le faapea la o le a saoloto ai o tatou olaga mai faanoanoaga. Ua tatou iloa uma soo faatuatua o Keriso na puapuaga i faalavelave matautia ma le amioletonu—sa mafatia Iesu Keriso lava Ia e sili atu i lo se isi lava. E pei

lava ona faia e le Tama "na te faaoso i lona la i e ua amio leaga atoa ma e ua amio lelei," Na te faatagaina foi faigata e tofotofa ai e ua amiontonu ma e ua amioletonu.⁴ O le mea moni, o nisi taimi e foliga mai ai ua faigata atili o tatou olaga *ona* o loo tatou taumafai e ola i lo tatou faatuatua.

Leai, o le mulimuli i le Faaola o le a aveesea uma ai ou tofotofoga. Peitai, o le a aveesea ai papupuni i le va o oe ma le fesoasoaniga e finagalo lou Tama Faalelagi e avatu ia te oe. O le a faatasi le Atua ma oe. O le a Ia taialaina ou laasaga. O le a Ia savali i ou talaane ma e oo foi ina Ia tauave oe pe a matua tele ou mafatiaga.

O le a e lagonaina le fua musuia o le Agaga: "alofa, olioli, filemu, onosai, mataalofa, agalelei, [ma le] faatuatua."⁵

O nei fua faaleagaga e le o se fua o se uluola faaletino, tulaga manuia, po o se laki lelei. E oo mai e ala i le mulimuli i le Faaola, ma e mafai ona avea ma a tatou fesoasoaniga faamaoni e oo lava i le lotolotoi o tofotofoga sili ona faigata.

O vevesi ma le vavao o le olaga faaletino e ono faamatau ma taufaafefe, ae o i latou e ua'i atu o latou loto i le Atua o le a siomiaina e Lona filemu. O le a le faaititia lo latou olioli. O le a le tuulafoaiina i latou pe faagaloina.

"Ia e faatuatua ia Ieova ma lou loto atoa;" ua aoao mai ai tusitusiga paia, "a e aua le faalagolago i lou lava atamai. Ia e manatua o ia i ou ala uma, ona faatonuina ai lea e ia lava ou ala."⁶

O i latou e faalogo atu i le valaau mai totonu ma saili atu i le Atua, o i latou e tatalo, talitonu, ma savavali i le ala ua saunia e le Faaola—e tusa pe tautevateva foi i latou i luga o lena ala i nisi taimi—e mauaina le faamautinoaga faamafanafana e faapea "o le a galulue faatasi mea uma mo lo [latou] lelei."⁷

Aua o le Atua e "avatua le malosi i e ua vaivai [ma faatuputele le malosi i] e ua leai se malosi."⁸

"Aua [e ui] e atu fitu ona pa'u le amiontonu, a e toe tu o ia."⁹

Ma na fetalai mai le Alii i Lona agalelei:

E te manao ia tofo i le olioli tumau?

E te fia faananau ea ia lagonaina i

totonu o lou loto le filemu e le mafai ona malamalama i ai?¹⁰

Ia liliu atu la lou agaga agai i le malamalama.

Ia amata lau oe lava ia malaga matagofie i le aiga.

A e faia lea mea, o le a lelei atili lou olaga, fiafia atili, ma mausali atili.

O Le A Faaaoga Oe e le Atua

I lou malaga e toefoi atu i le Tama Faalelagi o le a vave ona e iloaina o lenei malaga e le na o le tau na ona e ola i lou lava olaga. Leai, o lenei ala e mautinoa lava e taitai atua oe ina ia avea ma se faamanuiaga i olaga o isi fanau a le Atua—o ou uso ma tua-fafine. Ma o le mea mata'ina e uiga i le malaga o lou auauna lea i le Atua, ma a o e popole ma fesoasoani atu e faamanuia olaga o ou uso a tagata, o le a e vaaia le alualu tele i luma o lou lava olaga, i ni auala e te lei mafaufaufina.

Masalo e te le i mafaufau ia te oe lava ia e i ai sou aoga; masalo e te le i mafaufau ia te oe lava ia o se faamanuia i le olaga o se isi tagata. E masani lava, a tatou vaaia ia i tatou lava, e na o o tatou tapulaa ma lē atoatoa tatou te vaaia. Atonu tatou te manatu e ao ona avea tatou ma se tagata “sili atu” mo le Atua ina ia faaaogaina ai i tatou—sili atu ona atamai, sili atu ona mauoa, sili atu ona mataalia, sili atu ona talenia, sili atu ona faaleagaga. O faamanuiaga o le a oo mai e le o le tele o ou tomai ae ona o au filifiliga. Ma o le a galue le Atua o le atulaulau i totonu o oe ma auala atu ia te oe, i le faalauteleina o au taumafaiga faatauvaa mo Ana faamoemoega.

O Lana galuega e agai lava i luma i taimi uma ona o lenei mataupu faavae taua: “O mea iti e tutupu mai ai mea tetele.”¹¹

Ina ua tusi atu i le Au Paia i Korinito, sa matauina e le Apostolo o Paulo sa le i toatele ni tagata sa manatu i ai e atamamai e tusa ma tulaga faaelalolagi. Ae sa lei afaina lena, ona “ua filifilia e le Atua . . . mea vaivai a le lalolagi e faamaina ai mea malolosi.”¹²

O le talafaasolopito o galuega a le Atua ua faatumulia i tagata e manatu ia i latou lava e le agavaa. Ae sa latou



auauna atu ma le lotomaualalo, ma le faalagolago i le alofa tunoa o le Atua, ma sa latou mauaina Lana folafolaga: “O lo latou lima o le a fai mo O’u lima, ma o le a avea a’u ma o latou talita . . . , ma o le a latou tau faatamatane mo a’u; ma . . . o le a Ou faasaoina i latou.”¹³

I le taumafanafana ua te’ā atu nei sa maua ai e lo matou aiga se avanoa matagofie e asiiasi atu ai i nisi o nofoaga anamua o talafaasolopito o le Ekalesia i le itu i sasae o le Iunaite Setete. I se ala faapitoa, sa matou toe ola ai i le talafasolopito o lena taimi. O tagata na ou faitau i ai—e pei o Matini Harisi, Oliva Kaotui, ma Thomas B. Marsh—sa oo ina moni ia te au a o matou savavali ai i mea na latou savavali ai ma mafaufau loloto i osigataulaga na latou faia e atiae le malo o le Atua.

Sa tele ni o latou uiga maoae na faatagaina ai i latou e faia ni saofaga

ilogia i le Toefuataiga o le Ekalesia a Iesu Keriso. Ae o i latou foi o ni tagata soifua, e vaivai, ma lē atoatoa—e pei lava o oe ma a’u. O nisi sa oo ina latou le fiafia i le Perofeta o Iosefa Samita ma pa’u’u ese atu ai mai le Ekalesia. Mulumuli ane, o le toatele o ia lava tagata e tasi sa suia loto, faalotomaualaloina i latou lava, ma toe saili atu ai le faaumeaina ma le Au Paia.

Atonu tatou te ono maua se lagona e faamasino atu ai i nei uso ma isi e pei o i latou. Atonu tatou te faapea, “O le a ou le teenaina lava le Perofeta o Iosefa.”

E ui atonu e moni lena mea, ae tatou te le iloa moni lava pe na faape’i le ola ai i lena taimi, i na tulaga. Leai, sa lei atoatoa i latou, ae e maeu le faamalosiau o le iloaina sa mafai ona faaaogaina e le Atua i latou i soo se auala. Sa Ia silafiaina o latou malosiaga



ma vaivaiga, ae sa Ia tuu atu ia i latou le avanoa tulagaese and saofagā atu ai se fuaiupu po o se fati i le vii mammalu o le Toefuataiga.

E maeu le faamalosiau o le iloaina, e ui *tatou* te le atoatoa, ae afai e ua'i atu o tatou loto i le Atua, o le a Ia agaalofa ma agalelei mai ma faaaoga i tatou mo Ana faamoemoega.

O i latou e alolofa ma auauna atu i le Atua ma uso a tagata, ma auai ma le faamaulalo ma le mataalia i Lana galuega, o le a vaaia mea ofoofogia e tutupu i o latou olaga ma i olaga o i latou, latou te alolofa i ai.

O faitotoa na foliga mai na tapunia o le a tatalaina.

O le a muamua atu agelu i o latou luma ma saunia le ala.

Po o le a lava lou tofiga i lou nuu po o le Ekalesia, o le a faaaoga oe e le Atua, pe afai e te loto i ai. O le a Ia faalauteleina ou manaoga amiotonu ma liua faatinoga o loo e luluina i se seleselega tele o le lelei.

E Le Mafai Ona Tatou Oo ai lina i se Pailate Otometi

O tatou, i tatou taitoatasi, o "tagata ese ma e aumau"¹⁴ i lenei lalolagi. I le

tele o ala, o loo tatou mamaao ai mai le aiga. Ae le faapea la e manaomia ai ona tatou lagonaina le leiloloa po o le tuuatoatasi.

Ua foai mai e lo tatou Tama i le Lagi pele ia i tatou le Malamalamā o Keriso. Ma i le taele o i tatou taitoatasi, o loo uunaia ai i tatou e se uunaiga faalelagi ia liliu atu lo tatou vaai ma loto ia te Ia a o tatou faia le malaga e toefoi atu i lo tatou aiga selesitila.

E manaomia ai e lenei mea se tau-mafaiga. E le mafai ona e oo i ai iina e aunoa ma le tauivi e aoao e uiga ia te Ia, ia malamalamā i Ana faatonuga, faaaoga, ma tuu le tasi vae i luma o le isi.

Leai, o le olaga e le o se taavale otometi. E le o se vaalele e alu i le pailate otometi.

E le mafai ona tau na ona e faaopeopea i vai o le olaga ma faalagolago i le āu o le a ave oe i soo se mea ua e faamoemoe e te oo i ai i se aso. O le avea ma soo e manaomia ai le 'ā'u atu i le tatafe pe a manaomia ai.

E leai lava ma se isi e nafa ma lau lava faigamalaga patino. O le a fesoasoani le Faaola ia te oe ma saunia le ala i ou luma, ae o le tautinoga e mulimuli

ia te Ia ma tausi i Ana poloaiga e tatau ona sau mai ia te oe. O lau lava ia avega lena, ma lou lava avanoa.

O lau malaga sili lea.

Faamolemole faalogo i le valaau a lou Faaola.

Mulimuli ia te Ia.

Ua faatuina e le Alii le Ekalesia a Iesu Keriso o le Au Paia o Aso e Gata Ai e fesoasoani ia te oe i lenei tautinoga e auaua atu i le Atua ma uso a tagata. O lona faamoemoega o le faamalosiau, aoao atu, siitia, ma musuia. E saunia e lenei Ekalesia matagofie ni avanoa mo oe e faatino ai le agaalofa, aapa atu ai i isi, ma faafou ma tausi ai feagaiga paia. Ua mamanuina e faamanuiaina ai lou olaga ma faaleleia ai lou aiga, nuu, ma le malo.

Sau, auai ma i matou ma faalagolago i le Alii. Tuu atu au taleni i Lana galuega ofoofogia. Aapa atu, faamalosiau atu, faamalolo, ma lagolago tagata uma e mananao ia lagona ma gauai atu i le faananau mo lo tatou aiga faalelagi. Ia tatou auai faatasi i lenei malaga mamalu i maota faalelagi.

O le talalelei o se savali mamalu o le faamoemoe, fiafia, ma le olioli. O le ala lea e taitai atu ai i tatou i le aiga.

A tatou opomauina le talalelei i le faatuatua ma galuega, i aso taitasi ma itula uma, o le a tatou latalata atili atu i lo tatou Atua. O le a lelei atili o tatou olaga, ma o le a faaaoga e le Alii i tatou i ni auala ofoofogia e faamanuia ai i latou o siomiaina i tatou ma faataunu ai Ona faamoemoega e faavavau. Ou te molimau atu ai i lenei mea ma tuu atu lau faamanuiaga ia te outou, i le suafa o Iesu Keriso, amene. ■

FAAMATALAGA

1. Tagai Susan Stelljes, "Bobbie the Wonder Dog," *The Oregon Encyclopedia*, oregonencyclopedia.org/articles/bobbie_the_wonder_dog.
2. Tagai Mataio 4:19; Luka 18:22.
3. Teuteronom 30:10.
4. Mataio 5:45.
5. Kalatia 5:22.
6. Faataoto 3:5–6.
7. Mataupu Faavae ma Feagaiga 90:24.
8. Isaia 40:29, Lomiga Fou Faavaomalo.
9. Faataoto 24:16, Lomiga Fou Faavaomalo.
10. Tagai Filipi 4:7.
11. Mataupu Faavae ma Feagaiga 64:33.
12. 1 Korinito 1:27.
13. Mataupu Faavae ma Feagaiga 35:14.
14. Eperu 11:13; 1 Peteru 2:11.



Saunia e Bonnie L. Oscarson
Peresitene Aoao o Tamaitai Talavou

O Manaoga i o Tatou Luma

O nisi o o tatou manaoga taua e mafai ona tatou taulimaina o loo i totonu o o tatou lava aiga, i a tatou uo, i a tatou uarota, ma i o tatou nuu.

nai aso talu ai sa tatou molimauna ai se fuainumera tele o mala faalenatura, i Mekisiko, le Iunaite Setete, Asia, le Atu Keripeane, ma Aferika. Ua faaalia ai le tulaga silisili i tagata a o faia se mea e le faitau afe e fesoasoani ai ia i latou o e na lamatia pe na manaomia ma e na maliliu. Sa ou fafia i le vaai atu i tamaitai talavou i Texas ma Florida o e, faatasi ai ma isi, na ofuina mitiafu Lima Fesoasoani ma o loo fesoasoani e faamama fale mai mea na faaleagaina ina ua mavae afa talu ai nei. E faitau afe isi o e semanu e fafia e o atu i nofoaga o loo manaomia tele ai le fesoasoani pe ana le mamao. Nai lo lena, ua outou ofoina atu se foai limafoai e faaititia ai le mafatia. O lo outou agalelei ma le agaalofa e musuia ma e faaKeriso.

O le aso, ou te fia tau atua se vaega o le auaunaga ou te lagona e taua mo i tatou uma—e tusa lava po o fea o tatou i ai. Mo i latou o e sa maimoaina talafou o mea na tutupu talu ai nei ma sa lei iloa po o le a le mea e fai, atonu o loo i ai lava le tali i o tatou luma.


Sa aoao mai le Faaola, “Aua ai se fia faasaogalemuina lona ola, e maumau ai ia te ia: a o lē faamaumau i lona ola ona o a'u, e faasaoina e ia.”¹ Na saunoa

mai Peresitene Thomas S. Monson e uiga i lenei mau: “Ou te talitonu ua ta’u mai e le Faaola ia i tatou, sei vagana ua tatou faamaumau o tatou ola ona o isi, o le a ititi se faamoemoega o o tatou lava olaga. O i latou o e ola mo na o i latou lava, e iu ina galoma atu le faaleagaga, ma maumau ai lo latou ola, a o i latou o e faaaoga o latou lava ola e

auauna atu ai i isi, e ola ma lausiusi—ma faasaoina ai o latou ola.”²

O loo tatou ola i se aganuu lea ua atili faateteleina lo tatou taulai atu i se tamai lau laitiiti i o tatou lima nai lo tagata o loo siomia ai i tatou. Ua suitulaga le tesi ma savali i ala faasalalau mo le vaai moni i fofoga o se tasi ma ataata atu po ua seasea foi maua se talanoaga faafesagai. Ua tele ina tatou popole pe toafia “tagata e mulimuli mai” ma “mananao” ia i tatou, nai lo le faauouo atu o se ue ma faaali atu le alofa, popole, ma le fafia moni. E ui o tekinolosi i aso nei e mafai ona maoae i auala e faasoa ai le talalelei a Iesu Keriso ma fesoasoani ia i tatou e tumau ai le fesootai atu i aiga ma ue, a tatou le faaeteete i le auala tatou te faaaoga ai a tatou masini patino, e mafai foi ona tatou taulai ia i tatou lava ma faagalo le ute o le ola ai i le talalelei o le auauna atu.

Ua ia te au le alofa tele ma le faatuatua ia te outou o e o i ai i o outou tausaga o le talavou ma talavou matutua. Ua ou vaai ma lagonaina o outou manao e auauna atu ma faia se eseesege i le lalolagi. Ou te talitonu o le toatele o tagata o le ekalesia e mafaufau i le auauna atu o se vaega autu o a latou feagaiga ma le avea ma soo. Ae ou te manatu foi o nisi taimi e faigofie ai ona misi ni avanoa silisili e auauna ai i isi ona o loo faalavelaveina





i tatou pe ona o loo tatou vaavaai mo auala maoae e suia ai le lalolagi ma tatou le vaai ai i nisi o manaoga sili ona taua e mafai ona tatou taulimaina o loo i totonus o o tatou lava aiga, i a tatou uo, i a tatou uarota, ma i o tatou nuu. E ootia i tatou pe a tatou vaai i mafatiaga ma le tele o manaoga o i latou o loo mamaao mai tatou, ae atonu tatou te le o iloa atu o loo i ai se tagata o loo manaomia la tatou faauoga o loo nofotunu i o tatou autafa i le vasega.

Sa faamatala e Sister Linda K. Burton le tala o se peresitene o le Aualofa a le siteki o le, sa galulue ma isi, e aoina mai ie soosoo mo tagata e manaomia le fesoasoani i le vaitaimi o le 1990. "Sa la ave atua ma lana tama teine se loli e tumu i na ie soosoo mai Lonetona i Kosovo. I lana malaga toefoi i le fale, sa ia mauaina se uunaiga faaleagaga lemafaaseseina lea na goto ifo i lona loto. O le uunaiga lenei: "O le mea ua e faia o se mea lelei tele. Alu loa i le fale, savali atu i le alatele, ma auauna atu i ou tuaoi!"³

O le a se lelei o le a i ai i le faasaoina o le lalolagi pe afai tatou te faatuuanai manaoga o i latou e sili ona latalata mai ia i tatou ma i latou e sili ona tatou alolofa i ai? O le a se taua o i ai i le faaleleia o le lalolagi pe afai o loo tauivi tagata o siomia ai i tatou ae tatou

te le iloaina? Atonu na tuu e le Tama Faalelagi i latou e manaomia i tatou ia sili ona latalata ia i tatou, aua ua silafia e sili ona fetaui i tatou mo le taulimaina o o latou manaoga.

E mafai e tagata uma ona sailia ni auala e ofo atu ai le auaunaga faaKeriso. Sa ta'u mai e lo'u fesoasoani, o Sister Carol F. McConkie, talu ai nei e uiga i le tama teine a lana tama e 10 tausaga o Sara, ina ua ia iloa ua gasegase lona tina, sa filifili ia lava e fesoasoani atu. Sa ia fafagu i luga lona uso laitiiti, fesoasoani e fai ona ofu, fufulu ona nifo, fai lona ulu, ma inu lana ti ina ia mafai ona malolo lona tina. Sa ia faia le leoa lenei faatinoga faigofie o le auaunaga e aunoa ma le faatonuina aua sa ia vaaia se mea e manaomia ma sa naunau ai e fesoasoani. E le gata sa faamanuia e Sara lona tina, ae ou te mautinoa sa ia lagona le olioli i le iloaina sa ia faamainaina le avega a se tasi sa ia alofa i ai ma, a o faia, sa faamalosia ai le la sootaga ma lona uso. Sa saunoa Peresitene James E. Faust: "O le auauna atu i isi e mafai ona amataina e toetoe lava o soo se tupulaga. . . . E le tau faia i se fua maoae, ma e sili ona tamalii i totonus o se aiga."⁴

Pe o iloa e a outou fanau le taua tele i o outou matua ma tagata o le aiga pe

a outou vaavaai mo ni auala e auauna atu ai i le aiga? Mo i latou i o outou tausaga talavou, o le faamalosia ma auauna atu i tagata o le aiga e tatau ona i ai i a outou faamuamua maualuga a o outou vaavaai mo ni auala e suia ai le lalolagi. O le faaali atu o le agalelei ma le popole mo o outou tei ma matua e fesoasoani e fatu ai se agaga o le lotogatasi ma valaaulia ai le Agaga i totonus o le aiga. O le suia o le lalolagi e amata i le faamalosia o lou lava aiga.

O se isi eria o le taulaiga mo a tatou auaunaga e mafai ona faia i o tatou aiga i uarota. O nisi taimi e fesili mai ai le ma fanau, "Aisea e tatau ai ona ou alu i le Mutual? E faaletele sa'u mea o maua mai ai."

Afai sa ou maua se taimi faalematua lelei, ou te tali atu, "O le a le mea ua e manatu ai e te alu i le Mutual ona o se mea e te maua mai ai?"

Au uo talavou e, e mafai ona ou faamautinoa atu o le a i ai lava se tasi i sauniga uma o le Ekalesia e te auai ai o loo tuuatoatasi, o loo feagai ma ni lui-tau ma manaomia se uo, pe o ia lagona e le o faitalia. Ua ia te oe se mea taua e saofaga atu i sauniga ma gaoioiga uma, ma e finagalo le Alii e te vaavaai solo i lau tupulaga ona auauna atu lea e pei ona Ia faia.

Sa aoao mai Elder D. Todd Christofferson: "O se mafuaaga tele ua faia ai e le Alii se ekalesia, o le fatuina lea o se nuu o le Au Paia o le a lagolago ai e le tasi le isi i le "ala sa'o ma le vaapiapi lea e tau atu i le ola e faavavau." Na ia faaauau, "O lenei tapuaiga e le na o ia lava e popole i ai; ae ua valaaolina i tatou uma e auauna atu. O i tatou o mata, lima, ulu, vae, ma isi itutino o le tino o Keriso."⁵

E moni tatou te auai i a tatou sauniga Lotu i vайасо тайтаси e faatino sauniga, aoao aoaoga faavae, ma ia musuia, ae o le isi mafuaaga taua tele mo le auai o le, i le avea ma se aiga o le uarota ma soo o le Faaola o Iesu Keriso, tatou te vaavaaia le tasi ma le isi, faamalosia i le tasi, ma saili auala e auauna ma fefaamalosia'i ai le tasi ma le isi. Ua le na o i tatou o ni e talaina ma ave mea ua ofoina mai i le lotu; e manaomia foi i tatou ina ia avea ma

tagata e tuuina atu ma ni e sauniaina. Tamaitai talavou ma alii talavou, o le isi taimi e te i ai i le Mutuale, nai lo le piki i luga o lau telefoni e vaai po o a mea a au uo o fai, taofi, vaavaai solo, ma fesili ia te oe lava, "O ai o manaomia au i le aso?" Atonu o oe o le ki e aapa atu ma pai atu i le olaga o se paaga pe tuuina atu se faamalosiauga i se uo o loo tauivi le leo.

Ole atu i lou Tama Faalelagi e faaali mai ia te oe i latou o siomia oe o manaomia lau fesoasoani ma uunaia oe i le auala sili e auauna atu ai ia i latou. Ia manatua sa masani lava ona auauna atu le Faaola i se tagata e toatasi i le taimi.

O le atalii o le ma tama, o Ethan e 17 tausaga. Sa ou ootia i lenei taumafanafana ina ua ia ta'u mai ia te au e faapea, na uunaia o ia i le faataitaiga a lona tina, e tatalo o ia i aso taitasi ia maua se avanoa e auauna atu ai i se tagata. A o matou faaaluina se taimi ma lona aiga, sa ou matauina le taulimaina e Ethan o ona uso ma tuafafine i le onosai, alofa, ma le agalelei ma e fesoasoani i ona matua; ma vaavaai mo ni auala e aapa atu ai i isi. Sa faagaeitia lava au i lona nofouta mo tagata o loo siomia o ia ma i lona manao e auauna atu ia i latou. O ia o se faataitaiga ia te au. I le faia o le mea o faia e Ethan—o le valaaulia o le Alii e fesoasoani ia i tatou e saili auala e auauna atu ai, o le a mafai ai e le Agaga ona fesoasoani e faapupula o tatou mata ia iloa manaoga o siomia ai i tatou, ia vaai i le "toatasi" o manaomia i tatou i lena aso, ma ia iloa le auala e auauna atu ai ia te ia.

E faaopoopo i le auauna atu i lou aiga ma tagata o lau uarota, vaavaai mo ni avanoa e auauna atu ai i o outou tuaoi ma le nuu. E ui e i ai taimi e talosagaina ai i tatou e fesoasoani atu i se mala ogaoga, ae o aso taitasi ua fautuaina i tatou e vaavaai mo ni avanoa i o tatou lava eria e siitia ma fesoasoani ia i latou o manaomia le fesoasoani. Sa aoaoina au talu ai nei e se Peresitene o le Eria, o loo auauna atu i se atunuu e tele luitau faaletino, e faapea o le auala sili e fesoasoani ai ia i latou i isi vaega o le lalolagi o le totogi lea o se taulaga anapogi limafoai, foai atu i le Tupe o Fesoasoaniga Alofa a le Eklesia, ma

vaavaai mo ni auala e auauna ai ia i latou i lou lava nuu po o fea lava o e nofo ai. Tau lava ina manatu e faamanuiaina le lalolagi pe a mulimuli tagata uma i lenei fautuaga!

Uso e ma tuugane, aemaise lava le autalavou, a o outou taumafai e avea atili e pei o le Faaola o Iesu Keriso ma ola i a outou feagaiga, o le a faaauau pea ona faamanuiaina outou i naunauga e faamama i mafatiaga ma fesoasoani ia i latou e le tagolima. Ia manatua atonu o nisi o manaoga silisili o i latou ia o loo outou fesaga'i. Amata lau auaunaga i o outou lava fale ma i totonu o o outou lava aiga. O loo i ai sootaga e mafai ona faavavau. E tusa lava pe afai—ma atonu aemaise lava pe afai—o le tulaga o lou aiga e itiiti ifo ma le atoatoa, e mafai ona e maua auala e auauna ai, siitia, ma faamalolosia. Amata i le mea o e i ai, alofa ia i latou i o latou tulaga o i ai, ma saunia mo le aiga e te fia manao ai i le lumana.

Tatalo mo le fesoasoani ia e iloa i latou i lou aiga o le uarota e manaomia le alofa ma le faamalosiauga. Nai lo le auai i le lotu ma le fesili "O le a sa'u mea o le a maua mai lenei sauniga?" fesili, "O ai o manaomia a'u i le aso? O le a sa'u mea e saofaga atu?

A o outou faamanuiaina o outou lava aiga ma tagata o le uarota, vaavaai mo ni auala e faamanua ai i latou i o outou nuu i le lotoifale. Pe o i ai sou taimi mo se auaunaga tele pe na o ni nai itula e mafai ona tuuina atu i se masina, o a outou taumafaiga o le a manuia ai olaga ma manuia ai foi oe i auala e te lei amata mafaufaunia.

Na aoao mai Peresitene Spencer W. Kimball: "E silafia i tatou uma e le Atua, ma na te leoleoina i tatou. Ae e masani lava, o se isi tagata e faaauala mai ai lona taulimaina o o tatou manaoga."⁶ E tatau ona taitasi i tatou ma iloa o le avanoa e le laumaua ma le faamanuiaga le punouai e faataunu le galuega a lo tatou Tama Faalelagi a o tatou taulimaina manaoga o Ana fanau o la'u tatalo lea i le suafa o Iesu Keriso, amene. ■

FAAMATALAGA

1. Luka 9:24
2. Thomas S. Monson, "O Le A Se Mea Ua Ou Faia mo Se Tasi i le Aso?" *Liahona*, Nov. 2009, 85.
3. Linda K. Burton, "Sa Avea Au ma Tagata Ese," *Liahona*, Me 2016, 15.
4. James E. Faust, "Tulaga Faatamaitai: O Le Tulaga Pito Sili Faamamaluina," *Liahona*, Julai 2000, 117.
5. D. Todd Christofferson, "E Manaomia i Se A Le Ekalesia," *Liahona*, Nov. 2015, 108, 109.
6. *Aoaoga a Peresitene o le Ekalesia: Spencer W. Kimball* (2006), 82.





Saunia e Elder Dallin H. Oaks
O Le Korama a Aposetolo e Toasefululua

O Le Fuafuaga ma le Folafolaga

O le folafolaga o le aiga o se toefaaamamafa lea a le Alii i upumoni o le talalelei e manaomia ona tatou tausia ai i tatou i luitau o i ai nei i le aiga.

Epei ona manino mai i la tatou folafolaga i aiga, ua faamanuina tagata o Le Ekalesia a Iesu Keriso o le Au Paia o Aso e Gata Ai i le aoaoga faavae tulagaese ma auala eseese e vaai atu ai i le lalolagi. Tatou te auai ma atamamai foi i le tele o gaoi-oiga faalelalolagi, ae i nisi o matapu tatou te le auai ai pe a tatou saili atu e mulimuli i aoaoga a Iesu Keriso ma Ana Aposetolo, anamua ma aso nei.

I.

I se faataoto, sa faamatala ai e Iesu i latou o e “[faalogol] i le upu” ae na oo ina “le fua mai” ina ua “fetinaiina” lena upu ona “o le loto popole i mea a lenei lalolagi ma le pepelo o le oa” (Mataio 13:22). Mulimuli ane, sa faasa’o e Iesu Peteru mo le le gaua’i atu “i mea a le Atua, ae o mea a tagata,” ma tautino atu, “Aua se a le aoga i le tagata pe afai na te maua le lalolagi uma, a e maumau lona ola?” (Mataio 16:23, 26). I Ana aoaoga faai’u, sa Ia ta’u atu i Ana Aposetolo, “Afai a ni tagata o le lalolagi outou, po ua alofa mai le lalolagi i ona tagata; ae [ona] e le ni o o le lalolagi outou . . . [ua] inoino ai le lalolagi ia te outou” (Ioane 15:19; tagai foi Ioane 17:14, 16).

E faapena foi, ua faaaoga e tutsiga a uluai Aposetolo a Iesu le faatusa o le “lalolagi” e fai ma faatusa o le faafeagai o aoaoga o le talalelei. “Aua foi tou te amio faatasi ma lenei lalolagi” (Roma 12:2), na aoao mai ai le Aposetolo o Paulo. “Aua o le poto o lenei lalolagi o le valea lea i luma o le Atua” (1 Korinito 3:18–19). Ma, “Ia outou [faaeteete],” sa ia lapatai mai ai, “ne’i faatagataotauaina outou e se tasi

. . . e tusa ma le uputuu a tagata, e tusa ma mataupu muamua a le lalolagi, a e le tusa ma mataupu a Keriso” (Kolose 2:8). Sa aoao mai le Aposetolo o Iakopo e faapea “o le fefaauoa’i ma le lalolagi o le ita lea i le Atua[.] O lenei o se fia uo ma le lalolagi, ua avea o ia ma ita i le Atua” (Iakopo 4:4).

E tele ina faaaoga e le Tusi a Mamona le faatusa lenei o le faafeagai “o le lalolagi.” Sa valoia e Nifae le faafanoga mulimuli o “i latou o e ua ati a’e i luga ina ia tausafia ai i mata o le lalolagi, ma i latou o e ua saili . . . i mea o le lalolagi” (1 Nifae 22:23; tagai foi 2 Nifae 9:30). Sa ta’usalaina e Alema i latou o e na “fefete a’e . . . i mea le aoga o le lalolagi” (Alema 31:27). Ua faaalia i le miti a Liae o i latou o e saili atu e mulimuli i le äi u’amea, le afioga a le Atua, o le a fetaiai ma le faafeagai o le lalolagi. O i latou na tumu i le “fale tele ma le ateatea” lea na vaai i ai Liae sa “faatauemu ma tusitusi mai” le “tamamatamailima o le faatauemu” (1 Nifae 8:26–27, 33). I lana faaaliga i le faaliuina o lenei miti, sa aoao ai e Nifae o lenei faatauemu ma le itu tetee sa sau mai “le motu o tagata o le lalolagi, . . . le lalolagi ma lona poto; . . . le faamaualuga lea o le lalolagi” (1 Nifae 11:34–36).

O le a le uiga o nei lapataiga faatusiga paia ma poloaiga ina ia le avea ma ni “o o le lalolagi” po o le poloaiga o aso nei ia “lafoai i le lalolagi”?



(MF&F 53:2). Sa aoteleina e Peresitene Thomas S. Monson nei aoaoga: “E tatau ona tatou faaeteete i se lalolagi ua mamao ese lava mai mea faaleagaga. E taua lo tatou teenaina o soo se mea e le ogatusa ma o tatou tulaga faatonuina, o le musu e teenaina i le faagasologa, e lafoai ai le mea e sili ona taua: o le ola e faavavau i le malo o le Atua.”¹

Sa foafoaina e le Atua lenei lalolagi e tusa ma Lana fuafuaga e saunia ai se nofoaga mo Lana fanau e ola ai faaletino e fai ma laasaga talafeagai e agai atu ai i mamalu ua Ia finagalo ai mo Ana fanau uma. E ui o loo i ai malo ma mamalu e tele, ae o le finagalo silisili o lo tatou Tama Faalelagi mo Ana fanau o le mea lea na ta’ua e Peresitene Monson “o le ola e faavavau i le malo o le Atua,” o lona uiga o le faaeaga i aiga. E sili atu lenei nai lo le faaolataga. Ua faamanatu mai e Peresitene Russell M. Nelson ia i tatou, “I le fuafuaga e faavavau a le Atua, o le faaolataga o se mataupu faaletagata lava ia; [ae] o le faaeaga o se mataupu faaleaiga.”²

O le talalelei toefuataiina a Iesu Keriso ma le folafolaga musuia i aiga, lea o le a ou talanoaina mulimuli, o aoaoga taua ia e taialaina ai sauniuniga faaletino mo le faaeaga. E ui e tatau ona tatou ola faatasi ma tulafono o le faaipoipoga ma isi tumasani o se lalolagi ua faateteleina le amioleaga, ae o i latou e tauivi mo le faaeaga e tatau ona faia ni filifiliga patino i le olaga faaleaiga, e tusa ma le ala a le Alii i soo se taimi lava e ese ai mai le ala a le lalolagi.

I lenei olaga faaletino, e le o i ai ma so tatou manatuaina po o a mea na muamua atu i lo tatou fanau mai, ae o lenei la ua tatou oo i mea faafeagai. Tatou te tuputupu ae ma matutua faaleagaga e ala i le filifili e usitai i poloaga a le Atua i se soloaiga faifai pe a filifiliga sa’o. E aofia i nei mea ia feagaiga ma sauniga ma le salamo pe a sese a tatou filifiliga. I se faatusatugsaga, afai e leai so tatou faatuatua i le fuafuaga a le Atua ma e le usiusitai pe le faia foi ma le loto i ai mea e ao ona fai, ua tatou misia lena tuputupu ae ma le faatagatamatua. Ua aoao mai le Tusi a Mamona, “O le olaga lenei o le taimi



lea mo tagata e saunia ai e fetaiai ma le Atua” (Alema 34:32).

II.

O le Au Paia o Aso e Gata Ai e malamalamai le ata o le faaolataga a le Atua ua i ai so latou vaaiga tupito faalelalolagi lea ua fesoasoani ia i latou e iloa ai le mafuaaga mo poloaga a le Atua, le natura lemasuia o Ana sauniga manao-mia, ma le matafaioi autu a lo tatou Faaola, o Iesu Keriso. Ua faasaoina e le Togiola a lo tatou Faaola i tatou mai le oti ma, afai tatou te salamo, o le a laveaiina i tatou mai le agasala. Faatasi ma lena vaaiga faalelalolagi, ua i ai i le Au Paia o Aso e Gata Ai ni faamuamua ma ni faiga tulagaese ma ua faamanu-iaina i le malosi e onosaia ai le le fiafia ma tiga o le olaga faaletino.

E mautinoa foi, o faatinoga a i latou e taumafai e mulimuli i le ata o le faaolataga a le Atua e mafai ona tupu ai le malamalamai sese pe oo foi ina feteenai ma tagata o le aiga po o uo e le talitonu i ona mataupu faavae. O ia feteenaiga e tupu soo lava. O augatupulaga uma na saili atu e mulimuli i le fuafuaga a le Atua sa oo i luitau. I aso anamua, na tuuina atu e le perofeta o Isaia le malosi i le fanauga o Israuelu, lea na ia ta’ua “outou o e ua iloa le amiontonu, . . . ua i o latou loto la’u tulafono.” Ia i

latou na ia fai atu ai, “Aua le fefefe i le faalumaina mai e tagata, aua foi le faavaivai i lo latou faifai mai” (Isaia 51:7; tagai foi 2 Nifae 8:7). Ae po o le a lava le mafuaaga o feteenaiga ma i latou e le malamalamai pe talitonu i le fuafuaga a le Atua, ae o i latou e malamalamai, e poloaiina i taimi uma e filifili le ala a le Alii ae le o le ala a le lalolagi.

III.

O le fuafuaga o le talalelei e tatau ona mulimuli ai aiga taitasi e saunia ai mo le ola e faavavau ma le faaeaga, ua ototo atu i le folafolaga a le Ekalesia 1995, “O Le Aiga: O Se Folafolaga i le Lalolagi.”³ O ana folafolaga, o le mea moni, e manino lava le eseeese ma nisi o tulafono o i ai nei, faiga masani, ma mea ua taliaina e le lalolagi o loo tatou ola ai nei. I o tatou aso, o eseeesega e aupito sili ona manino o le nonofo faapouliuli e aunoa ma le faaipoipo, faaipoipoga o le itupa e tasi, atoa ai ma le tausiga o se fanau o loo i ai i ia sootaga faapea. O i latou e le talitonu pe le fia saili i le faaeaga ma o loo sili ona faatosinaina e ala o le lalolagi, e manatu i lenei folafolaga i le aiga ua na o se faamatalaga o aiaiga faavae e tatau ona suia. I se eseesega, ua faamautu e le Au Paia o Aso e Gata Ai o le folafolaga i le aiga ua faauigaina ai le ituaiga



o sootaga faaleaiga lea e mafai ona tupu ai le vaega sili ona taua o lo tatou atinaega e faavavau.

Ua tatou molimauina le faatelevaveina ma le faatupulaia o le taliaina lautele o le nonofo faapouliuli e aunoa ma le faaipoipo ma le faaipoipoga o le itupa e tasi. O le faamaoniga ua ioeina e ala i faasalalauga, a'oga, ma e oo foi i mea manaomia faalegaluega, ua tupu ai ni luitau faigata mo le Au Paia o Aso e Gata Ai. E tatau ona tatou taumafai e faapaleni manaoga faatautavā o le mulimuli i tulafono o le talalelei i o tatou olaga patino ma aoaoga, e oo lava i lo tatou saili e faaali atu le alofa mo tagata uma.⁴ I le faia o lea mea o nisi taimi tatou te feagai ai, ae le tatau ona tatou fefefe ai, ma le mea na ta'uua e Isaia "o le faalumaina mai e tagata".

E talitonu le Au Paia o Aso e Gata Ai ua liuaina, o le aoaoga faavae i le folafolaga i le aiga, lea na fofogaina mai i le toetoe atoa le kuata seneturi talu ai, o le toefaamamafa lea a le Alii i upumoni o le talalelei e manaomia ona tatou tauaia i tatou ia manumalo i luitau o i ai nei i le aiga. O faataitaiga e lua o le faaipoipoga o le itupa e tasi ma le nonofo faapouliuli e aunoa ma le faaipoipo. E 20 tausaga talu ona mavae le fofogaina o le folafolaga i le aiga, ae faatagaina e le Faamasinoga Maualuga a le Iunaite

Setete le faaipoipoga o le itupa e tasi, ma soloia ai le faaipoipoga ua faitau afe tausaga o tapulaa mo na o se alii ma se tamaitai. O le pasene faate'ia o fanau a le Iunaite Setete e fananau mai i se tina e le faaipoipo i se tama sa faifai malie lava: 5 pasene i le 1960,⁵ 32 pasene i le 1995,⁶ ma i le taimi lenei ua silia ma le 40 pasene.⁷

IV.

E amata le folafolaga i le aiga i le tautinoga, "o le faaipoipoga i le va o se alii ma se tamaitai ua faauuina e le Atua ma o le aiga e totonugalemu i le fuafuaga a le Foafoa mo le taunuuga e faavavau o Ana fanau." O loo faamautu mai ai foi "o le tulaga tane po o le fafine [o le tagata] o se vaega ttau lea o le muai olaga, olaga faitino, ma le faasinomaga e faavavau ma le faamoe-moega." O loo tautino mai foi e faapea, "Ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipoipoina faaletulafono, o se tane ma le ava, e tatau ona faaaogaina ai."

Ua faamautu mai e le folafolaga le tiute faifai pea o le tane ma le ava ina ia fanafanau ma uluuluola ai le lalolagi ma o le la tiutetauave paia o le alofa ma le tarsi e le tasi o le isi ma le la fanau: "E tatau ona fanauina fanau i

totonu o feagaiga o le faaipoipoga, ma ia tauaia e se tama ma se tina o e ua faamamaluina ma le faamaoni atoatoa feagaiga faaleulugalii." O loo lapatai mai ma le mamafa e tetee atu i le sauina o taitoalua ma fanau, ma ua faamautu mai "e maua le fiafia i le olaga faaleaiga pe a faavae i aoaoga a le Alii o Iesu Keriso." Ma le mea mulimuli, o loo valaau mai mo le faalauiloaina atu o "na fua faataatau [aloaial] ua fuafuaina ina ia faatumauina ma faamalosia ai le aiga o se iunite faavae o malo."

I le 1995, na tuuina mai ai e se Peresitene o le Ekalesia ma isi Apostolo e 14 a le Alii nei faamatatalaga taua faaleaoaoga faavae. I le avea ai ma se tasi o na Apostolo e toafitu o loo soifua pea, ou te lagona le tiute e faasoa atu mea na taitai atu i le folafolaga i le aiga mo le silifiaina e tagata uma o e e mafaufau i ai.

O le musumusuga na iloa ai le manaoga mo se folafolaga i le aiga na oo mai i le au taitai o le Ekalesia i le silia ma le 23 tausaga talu ai. O se mea na faateia ai nisi o e na mafaufau o upumoni faaleaoaoga faavae e uiga i le faaipoipoga ma le aiga sa malamalamalama lelei i ai e aunoa ma le toe ta'uaina.⁸ Ae peitai, sa matou lagonaina le faamau-tinoaga ma matou galulue ai loa. Sa faailoaina mataupu ma talanoaina e uso o le Korama a le Toasefululua mo le toeitiiti tausaga atoa. Sa fautuaina le gagana, iloiloina, ma toe lauliliuina. Sa matou faaaauau pea ona aioi atu ma le agaga tatalo i le Alii mo Lana musumusuga i mea e tatau ona matou ta'u atu ma le auala e tatau ona ta'u atu ai. Sa matou aoao uma "i lea fasifuaite ma lea fasifuaite, o le mataupu i lea mataupu," e pei ona folafola mai e le Alii (MF&F 98:12).

I le taimi o lea faagasologa o faa-aliga, sa tauaao atu ai se tusiga fautuaina i le Au Peresitene Sili, o e vaavaiaia ma faasilasilaina aoaoga ma le aoaoga faavae a le Ekalesia. Ina ua mavae ona faia e le Au Peresitene isi suiga, sa faasilasilaina aoaoga ma le aoaoga faavae a le Ekalesia, Gordon B. Hinckley. I le sauniga a tamaitai i le aso 23 o Setema, 1995, sa ia faalauiloa atu ai le folafolaga i upu nei: "Ona o le tele



o mataupu sese ua manatu le lalolagi o upumoni ia, faatasi ma le tele o le taufaasese e faatatau i tulaga faatonuina ma tulaga faatauaina, faatasi ai ma le tele o faaosooosoga ma faatosinaga o loo pisia lemu ai mai le lalolagi, ua matou lagona ai e tatau ona lapatai ma muai lapatai atu.”⁹

Ou te molimau atu o le folafolaga i le aiga o se malelega o le upumoni e faavavau, o le finagalo o le Alii mo Ana fanau o e sailia le ola e faavavau. Ua avea pea ma faavae o aoaoga ma faatinoga a le Ekalesia mo le 22 tausaga talu ai ma o le a faaaauau pea mo le lumanai. Mafaufau i ai, aoao atu, ola ai, ma o le a faamanuiaina outou a'o tou fetaomi atu i luma agai i le ola e faavavau.

I le fasefulu tausaga talu ai, sa aoao mai ai Peresitene Ezra Taft Benson e faapea “e tofu lava le augatupulaga ma ona tofotofoga ma ona avanoa e tutu atu ai ma faamaonia latou lava.”¹⁰ Ou te talitonu o o tatou uiga e faatatau i le folafolaga i le aiga ma lona faaaogaina o se tasi lea o na tofotofoga mo lenei tupulaga. Ou te tatalo mo tagata uma o le Au Paia o Aso e Gata Ai ia tutu mausali i lena tofotofoga.

Ou te faamaea atu i aoaoga na sauноa i ai Peresitene Gordon B. Hinckley i le lua tausaga talu ona ia faasilasila atua le folafolaga i le aiga. Sa ia saunoa: “O loo o'u vaaia se lumanai matagofie i se lalolagi ua matua le mautonu lava. Afai o le a tatou pipiimau pea i a tatou tulaga faatauaina, afai o le a tatou

atinae i luga o lo tatou tofi, afai o le a tatou savavali i le usiusitai i luma o le Alii, afai o le a tau lava o le tatou ola i le talalelei, o le a faamanuiaina i tatou se auala mataina ma matagofie. O le a vaavaai mai [tagata] ia i tatou o ni tagata tulaga ese o e ua mauaina le ki i se fiafiaga tulaga ese.”¹¹

Ou te molimau atu i le upumoni ma le taua e faavavau o le folafolaga i le aiga, sa faaaliai mai e le Alii o Iesu Keriso i Ana Apostetolo mo le faaeaga o le fanau a le Atua (tagai Mataupu Faavae ma Feagaiga 131:1-4), i le suafa o Iesu Keriso, amene. ■

FAAMATALAGA

1. Thomas S. Monson, “Tutu i Nofoaga Paia,” *Liahona*, Nov. 2011, 83.
2. Russell M. Nelson, “Faaolataga ma le Faaeaga,” *Liahona*, Me 2008, 10.
3. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129.
4. Tagai Dallin H. Oaks, “O Le Alofa ma le Tulafono,” *Liahona*, Nov. 2009, 26-29.
5. Tagai i le “Disastrous’ Illegitimacy Trends,” *Washington Times*, Tes. 1, 2006, washingtontimes.com.
6. Tagai Stephanie J. Ventura and others, “Report of Final Natality Statistics, 1996,” *Monthly Vital Statistics Report*, June 30, 1998, 9.
7. Tagai Brady E. Hamilton and others, “Births: Provisional Data for 2016,” *Vital Statistics Rapid Release*, June 2017, 10.
8. Sa lelei ona faaupuina e lo tatou Peresitene Aoao o Tamaitai Tālavou i le 20 tausaga mulimuli ane: “Matou te lei iloaina i lena taimi, le matua manaomia e i tatou o nei folafolaga autu i le lalolagi i lenei vaitaimi e avea ma tulaga manaomia tatou te faamasino ai soo se aoaoga fou po o filosofia a le lalolagi tatou te maua mai i ala o faasalauga, le Initoneti, tagata atamamai, TV ma ata tifaga, ma e oo lava i sui o palemene. Ua avea le folafolaga i aiga ma se sua faatatau mo le faamasinoina o manatu o le lalolagi, ma ou te molimau atu o mataupu faavae ua tuuina atu i totonu o lenei malelega e moni i lenei vaitaimi e pei lava i le taimi na tuuina mai ai ia i tatou e se perofeta a le Atua i le toeitiiti atoa le 20 tausaga talu ai.” (Bonnie L. Oscarson, “O Tagata e Puipua le Folafolaga o le Aiga *Liahona*, Me 2015, 14-15).
9. Gordon B. Hinckley, “Ia Tu Malosi e Tetee atu i Togafiti a le Lalolagi,” *Ensign*, Nov. 1995, 100.
10. Ezra Taft Benson, “Our Obligation and Challenge,” regional representatives’ seminar, Sept. 30, 1977), 2; in David A. Bednar, “I le Itu a le Alii: O Lesona mai le Tolauapiga a Siona,” *Liahona*, Julai 2017, 19.
11. *Aoaoga a Peresitene o le Ekalesia:* Gordon B. Hinckley (2016), 186; tagai fo Gordon B. Hinckley, “Look to the Future *Ensign*, Nov. 1997, 69.



Saunia e Elder John C. Pingree Jr.
O Le Fitugafulu

“Ua ia te A’u Se Galuega mo Oe”

E tofu i tatou taitoatasi ma se matafaioi taua e faatino i le tuleia i luma o le galuega a le Atua.

Na tautino atu e le Atua ia Mose, “Ua ia te A’u se galuega mo oe” (Mose 1:6). Pe ua i ai se taimi na e manatunatu ai pe e i ai se galuega a le Tama Faalelagi mo oe? Pe o i ai ni mea taua ua Ia saunia mo oe—ma e patino lava mo oe—e faataunuina? Ou te molimau atu o le tali o le ioe!

Mafaufau ia Kilisi Kimaea, o le na fanau ma ola ae i le atunu o Nepale. A o talavou, sa a’oga o ia i Saina, lea na faailoa atu ai e se tasi o lana vasega ia te ia le talalelei a Iesu Keriso. Mulimuli ane, sa sau Kilisi i le Iunivesite o Polika Iaga i se galuega mo galuega faauu ma feiloai ai i lana ava i le lumanai. Sa nonofo i la’ua i le Vanu o Sate Leki ma sa la vaeta-maina ni fanau se toalua mai Nepale.

I ni tausaga mulimuli ane, ina ua silia ma le 1,500 le au sulufai mai tolau-apiga i Nepale na toe masii atu i Iuta,¹ sa musuia Kilisi e fesoasoani. Faatasi ai ma le lelei o lana gagana faa-Nepale ma le malamalamalama faaleaganuu, sa avea Kilisi ma faamatalaupu, faiaoga, ma se faufautua. Ina ua mae’ a ona toe faamautu i le nuu, sa i ai ni tagata sulufai mai Nepale sa faaalia le naunau i le talalelei. Sa faatulagaina se para-nesi mo le gagana Nepale, ma sa avea

mulimuli ane Kilisi ma peresitene o le paranesi. Sa avea foi o ia o se tufuga-ao i le faaliliuina o le Tusi a Mamona i le faa-Nepale.

Pe o mafai ona outou vaai i le auala na saunia ai e le Tama Faalelagi ma faaaoga ia Kilisi?

Ua i ai i le Atua se Galuega mo i Tatou Taitoatasi

Uso e ma Tuafafine, ua i ai i le Atua se galuega taua mo i tatou taitoatasi.

I le saunoa atu i tuafafine ae aoao atu ai ni upumoni e faatatau i tagata uma, na aoao atu ai Peresitene Spencer W. Kimball: “Ae tatou te lei o mai iinei, na tuuina mai ia i [tatou] ni tofiga patino. . . . E ui tatou te le o manatua nei ni auiliiliga, ae e le faapea o le a sua ai le mea moni mamalu o mea na tatou ioeina.”² Se upumoni ina a faaeaea! Ua i ai i lo tatou Tama Faalelagi ni mea patino ma le maoae mo oe ma a’u e faataunuina (tagai Efeso 2:10).

O nei tofiga paia e le o faapolopolo-in a mo na o ni nai tagata faapitoa ae e mo tagata uma—tusa lava po o le a le itupa, tausaga o le matua, lanu, atunu, maualuga o le tamaoaiga, tulaga faale-agafesootai, po o valaauga i le Ekalesia. E tofu i tatou taitoatasi ma se matafaioi taua e faatino i le faalauteleina o le galuega a le Atua (tagai Mose 1:39).

O nisi o i tatou e tuufesili pe mafai e le Tama Faalelagi ona faaaoga i *tatou* e faia ni sao taua. Ae ia manatua, Na te faaaogaina pea tagata masani e ausia ai mea ofoofogia (tagai 1 Korinito 1:27–28; MF&F 35:13; 124:1). “O [tatou] o pule,” ma “ua i totonu ia te i [tatou] le mana” e “aumai [ai] le amiotonu tele” (MF&F 58:27–28).³

Na faamatala mai e Peresitene Russell M. Nelson:

“E tele atu mea o loo mafaufau i ai le Alii mo oe nai lo mea o loo e mafaufau i ai mo oe lava ia! Na faasaoina ma faapolopoloina oe mo lenei taimi ma nofoaga. . . .



“E manaomia oe e le Alii e suia le lalolagi. A o e talia ma mulimuli i Lona finagalo mo oe, o le a maua oe lava i le ausiaina o mea faigata!”⁴

E faapefea la ona tatou malamalama ma faatino le galuega ua faamoemoe mai ai le Atua mo i tatou? Se'i ou faaso atu ni mataupu faavae se fa o le a fesoasoani ai.

Taulai Atu i Isi


Muamua, taulai atu i isi. E mafai ona tatou mulimuli ia Keriso, “o le na femiliua’i ma agalelei” (Galuega 10:38; tagai foi 2 Nifae 26:24)

Ina ua ou toe taliu mai se misiona tala’i, sa ou misia le faamoemoega i aso taitasi sa ou fiafia lava i ai. E manino, sa ou manaomia le tausia o au feagaiga, a’otauina, amata se aiga, ma faigaluega. Ae sa ou taumafaufau pe sa i ai se isi mea, pe o se mea faapitoa foi sa finagalo le Alii ou te faia. I le uma ai ona manatunatu loloto mo ni masina, sa ou tau i le fuaiupu lea: “Afafi e te manao i ai, o le a avea oe ma ala o le faia o mea lelei e tele i lenei tupulaga” (MF&F 11:8). Sa fesoasoani mai le Agaga ia te au ia malamalama o le uluai faamoemoega lava o tofiga faalelagi o le faamanuiaina ai lea o isi e ala i le “faia o mea lelei e tele.”

E mafai ona tatou faalatalata atu i vaega o faaiuga i o tatou olaga—e pei o le a le mea e a’o, po o le a le mea e fai mo le galuega, po o fea e nofo ai—i le tulaga o le fesoasoani i isi.

Sa siitia mai se tasi aiga i se aai fou. Nai lo le sailia o se fale i se pitonuu mauoa, sa uunaia i latou e nonofo i se eria e tele manaoga faaleagafesootai ma faletamaoaiga. I le aluga o tausaga, sa galue le Alii e ala mai ia i latou e lagolagoina le toatele o tagata taitoatasai ma atiae le latou uarota ma le siteki.

O se polofesa faafomai sa tausisia se faiga masani ae sa lagona ua taiala o ia e tuuese se aso se tasi i vaiaso taitasi e siaki fua ai tagata e leai ni inisiua mo le soifua maloloina. Ona o le naunau-taiga o lenei tamalii ma lona faletua e faamanua isi, sa saunia e le Alii se ala mo i la’ua e lagolagoina ai le fia selau o gasegase sa manaomia le fesoasoani, a o tausia foi lo la’ua aiga toatele.



Iloa ma Atiae Meaalofa Faaleagaga

Lona lua, ia iloa ma atiae meaalofa faaleagaga. Ua tuuina mai e le Tama Faalelagi nei meaalofa e fesoasoani ai ia tatou iloa, faatino ma olioli i le galuega ua te Ia mo i tatou.

E taumanatunatu nisi o i tatou, “Pe i ai ea *ni* a’u meaalofa?” Ou te toe fai atu, o le tali o le ioe! “Ua tuuina atu i alii *uma* [ma tamaitai] se meaalofa e le Agaga o le Atua . . . ina ia manuia ai” (MF&F 46:11–12; ua faaopoopo le faamamafa).⁵ E tele ni meaalofa faaleagaga ua tusifaamaumauina i tusi paia (tagai 1 Korinito 12:1–11, 31; Moronae 10:8–18; MF&F 46:8–26), ae e tele atu isi.⁶ O nisi faataitaiga e ono aofia ai le lotoalofa, faaali atu o le faamoemoe, fesootai lelei ma tagata, faatulagaina lelei, tautala atu pe tusi faatauanau, aoao manino atu, ma le galue malosi.

E faapefea la ona tatou iloaina a tatou meaalofa? E mafai ona faasino

i o tatou faamanuiaga faapeteriaka, fesili atu ia i latou e iloa lelei i tatou, ma faailoa patino mai mea tatou te lelei ai ma fiafia i ai. O le mea e sili ona taua, e mafai ona tatou fesili atu i le Atua (tagai Iakopo 1:5; MF&F 112:10). Na te silafia a tatou meaalofa, ona o Ia na foai maia ia te i tatou (tagai MF&F 46:26).

A tatou iloaina a tatou meaalofa, ua ia te i tatou se tiutetauave e atiae (tagai Mataio 25:14–30). E oo foi ia Iesu Keriso “e lei maua le atoatoaga i le amataga, ae [sa ati ae] mai lea alofa tunoa i lea alofa tunoa” (MF&F 93:13).

Sa tusia e se tasi alii talavou ni ata e faalauiloa ai tulaga faatauaina faalelotu. O le ata ou te fiafia lava i ai o se ata o le Faaola, o se kopi o lea ata o loo tautau i lo matou fale. Sa atiae e lea uso ma faaaoga ana meaalofa faatufugaga. I le galue ai e ala mai ia te ia, sa musuia ai e le Tama Faalelagi isi e faaleleia le avea o i latou ma soo.



O nisi taimi tatou te lagona ai e leai ni a tatou meaalofa taua ma patino. I se tasi aso, sa aioi atu ai se tamaitai talavou lotovaivai, "Le Alii e, o le a la'u galuega patino?" Sa Ia tali mai, "Ia matau isi tagata." O se meaalofa faaleagaga! Talu mai lena taimi, sa ia maua le olioli i le matauina o i latou o e galo i le tele o taimi, ma sa galue le Atua e ala ia te ia e faamanuia ai le toatele. O nisi o a tatou meaalofa faaleagaga atonu e le faalauiloa ai i tatou e tulaga masani o le lalolagi, ae e taua i le Atua mo Lana galuega.⁷

Faaaoga Mafatiaga

Lona tolu, faaaoga mafatiaga. O o tatou tofotofoga e fesoasoani tatou te iloa ai ma sauniuni mo le galuega a le Tama Faalelagi o loo i ai mo i tatou. Na faamalamalama mai e Alema, "ina ua mavae le puapuaga tele, sa faia e le

Alii a'u o se meafaigaluega i ona aao" (Mosaea 23:10).⁸ Faapei o le Faaola, o lana taulaga togiola ua mafai ai e Ia ona fesoasoani mai ia te i tatou (tagai Alema 7:11–12), e mafai ona tatou faaaogaina le malamalam a maua mai aafiaga faigata e siitia ai, faamalolosia, ma faamanuia ai isi.

Ina ua faamalolo se pule sili faamanuiaina o punaoa mo tagata faigaluega, sa ia faitauina lona faamanuiaiga faapeteriaka ma lagona ua musuia o ia e amata se kamupani e fesoasoani ai i isi tagata e sue ni galuega. (Sa fesoasoani foi o ia ia te au e sue sa'u galuega ina ua toe foi mai lo matou aiga mai se misiona.) Sa faaaoga e le Alii lona tofotofoga e avea o se maa-sopo e faamanuia ai isi, a o tuuina atu ia te ia se isi matata e sili ona 'anoa.

Sa aafia se ulugalii talavou i se pepe na fanau mai ua maliu. Faatasi ai ma

loto nutimomoia, sa tonu ia i la'ua e faamamaluina lo la afafine e ala i le saunia o fautuaga ma ni 'anomea e lagolago ai matua e onosaia tulaga talitutusa faapea. Sa galue le Alii e ala i lea ulugalii ona o lo la alofanaunau faapitoa, sa atiae e ala i mafatiaga.

Faalagolago i le Atua

Ma le lona fa, faalagolago i le Atua. Pe a tatou ole atu ia te Ia i le faatuatua ma le faamoemoega tonu, o le a Ia faaalia mai o tatou tofiga faalelagi ia te i tatou.⁹ A tatou iloa loa, o le a fesoasoani mai o Ia ia i tatou e faataunu na tofiga. "Aua ua i luma o [Ona fofoga] mea uma" (MF&F 38:2; tagai foi Ape-raamo 2:8), ma i le taimi sa'o, o le a Ia tatalaina faitotoa e talafeagai mo i tatou (tagai Faaaliga 3:8). Sa Ia auina mai foi Lona Alo, o Iesu Keriso, ina ia mafai ai ona tatou faalagolago ia te Ia mo le malosi e sili atu i lo o tatou lava tomai faalenatura (tagai Filipi 4:13; Alema 26:12).

O se tasi o uso, na popole i faaiuga faalemalo i le lotoifale, sa uunaia o ia e tauva mo se tofi lautele. E ui i se faiga faatosina taufaafefe, sa ia faaaoga lona faatuatua ma ao mai punaoa e tauva ai. O le taunuuga, e lei manumalo ae sa ia lagonaina na tuu mai e le Alii ia te ia se taitaiga ma se malosi e faaleo ai mataupu e taua i le afioaga.

O se tinanofotoatasi, sa tausia se fanau na alia'e mai ai ni manaoga faapitoa, sa ia fesiliglia pe mafai ona ia gafataulimaina manaoga o lona aiga. E ui ina sa faigata, ae sa ia lagona le faamalosia o ia e le Alii e faataunu ma le manuia lana misiona taua.

O Se Upu o le Lapataiga

O le taimi lava e tasi e fesoasoani mai ai le Atua ia te i tatou e faataunu ia tofiga faalelagi, o le taimi foi lena e galue ai le fili e faalavelave ma tata'i ese i tatou mai se olaga ta'uaogaina.

O le agasala atonu o lo tatou maagao aupito tele lea, e faapogisaina lo tatou lagona nofouta i le Agaga Paia ma taofia ai lo tatou maua o le mana faaleagaga. Ina ia faatino le galuega a le Tama Faalelagi ua ia te Ia mo i tatou, e tatau ona tatou taumafai ia mama

(tagai 3 Nifae 8:1). Pe o tatou ola ea i se ala e mafai ai ona galue le Atua e auala mai ia i tatou?

O loo saili foi e Satani e faalavefauina i tatou i mea e le taua. Sa lapata'ia e le Alii se taitai muamua o le Ekalesia, "Sa tele ona i ai lou mafaufau i mea o le lalolagi nai lo o mea a a'u . . . ma le auaunaga na valaaaulia ai oe" (MF&F 30:2). Pe ua faatumuina ea i tatou i mea faaleelalolagi ua tatou faasee ese ai mai o tatou tofiga faalelagi?

E le gata i lea, e faalotovaivaia foi i tatou e Satani i lagona o le le agavaa. Na te faia ia foliga mai e matua faigata tele la tatou galuega pe taufaafefe. Peitai, e mafai ona tatou faalagolago i le Atua! E alofa o Ia ia i tatou. E finagalo ia tatou manuia. O le a Ia "savali i [o tatou] luma; o le a faatasi ma [i tatou], na te le tuuna [i tatou]." (Teuteronome 31:8; tagai foi Salamo 32:8; Faataoto 3:5–6; Mataio 19:26; MF&F 78:18).

E mafai foi e Satani ona faaseseina i tatou e vaai atu i la tatou galuega o se mea e ititi le taua nai lo le galuega ua atofaina atu i isi. O galuega uma mai le Atua e taua, ma o le a tatou maua le olioli a o tatou "mitamita i le mea ua polooiina ai [tatou] e le Alii" (Alema 29:9).

A o galue le Atua e ala ia i tatou, e ono faaososoina i tatou e le fili e ave le faamalo ia i tatou lava mo soo se mea e ausia. Peitai, e mafai ona tatou faataitai i le lotomaualalo o le Faaola i le taumamao mai le viia o le tagata lava ia ae ia viia ma faamamaluina le Tama (tagai Mataio 5:16; Mose 4:2). Ina ua taumafai se failipoti e faaaloia Mother Teresa mo lana misiona i le olaga e fesoasoani i e matitiva, sa ia tali atu: "O le galuega [a le Atua]. O a'u e pei o se . . . penitala i Lona aao. . . . O Ia e mafaufau. O Ia e tusitusia. E leai lava se mea a le penitala e fai i ai. O le penitala e tatau lava na o le faataga ina faaaoga."¹⁰

Faaiuga

O'uso e ma tuafaine, ou te valaaaulia i tatou taitoatasia ia "tuuina atu [outou lava] i le Atua . . . e fai ma auupega a le amiontonu" (Roma 6:13). O le tuuina atu e aofia ai le tuu atu ia te Ia ia silafia

tatou te mananao ia faaaoga i tatou, sailia Lana taitaiga, ma maua Lona malosiaga.

E pei ona masani ai, e mafai ona tatou vaavaai atu ia Iesu Keriso, lo tatou faataitaiga atoatoa. I le muai olaga, sa fesili ai le Tama Faalelagi, "O ai se Ou te auina atu?"

Ma sa tali atu Iesu, "O A'u lenei, auina atu au" (Aperaamo 3:27; tagai foi Isaia 6:8).

Sa talia e Iesu Keriso, sa saunia i ai, ma sa faatinoina Lana matafaioi na muai faauuina ai o Ia o lo tatou Faaola ma le Togiola. Na Ia faia le finagalo o le Tama (tagai Ioane 5:30; 6:38; 3 Nifae 27:13) ma faataunu Ana galuega paia.

A o tatou mulimuli i le faataitaiga a Keriso ma tuuina atu i tatou lava ma le lotofaamaoni i le Atua, ou te molimau atu o le a ia faaaogaina foi i tatou e tulei Lana galuega ma faamanuiaina ai isi. I le suafa, o Iesu Keriso, amene. ■

FAAMATALAGA

- See Refugee Processing Center, "Admissions and Arrivals," ireports.wrapsnet.org/Interactive-Reporting.
- Spencer W. Kimball, "The Role of Righteous Women," *Ensign*, Nov. 1979, 102.
- Sa faamalosiau mai Peresitene Gordon B. Hinckley: "Talitonu ia te oe lava. Talitonu i lou mafai ona e faia ni mea maoae. . . . O oe o se atalii/afafine o le Atua, e le gafa mai mea e te gafatia" (*Aoaoga a Peresitene o le Ekalesia: Gordon B. Hinckley* [2016], 82).
- Russell M. Nelson, *Accomplishing the Impossible: What God Does, What We Can Do* (2015), 147.
- Na saunoa Peresitene Dieter F. Uchtdorf: "O loo silasai mai lo tatou Tama Faalelagi i o tatou gafatia moni. O loo Ia silafia mea e uiga ia i tatou ia tatou te le iloa e i tatou lava. Na te uunaia i tatou i o tatou olaga e faataunu le mea na foaoaina ai i tatou. . . ."
- "Ia tatou filifili ai e mulimuli i le Faaola ma galulue ma le filiga ia avea ma tagata na manamuina ai i tatou e avea ai. Ia tatou faalogo atu ma usiusitai i uunaiga a le Agaga Paia. Pe a tatou faia ia mea, o le a faaali mai e le Tama Faalelagi ia i tatou mea tatou te lei iloaina e uiga ia i tatou lava. O le a Ia faamalamalamaina le ala oi luma ma faapupula o tatou mata ia vaa'i i a tatou taleni e le o iloa ma atonu e lei mafaufau lava i ai" ("E Uiga i Faanoanoaga ma Filifili," *Liahona*, Nov. 2012, 22, 23).
- Na aoao mai e Elder Bruce R. McConkie: "O meaalofa faaleagaga e le mafaitaulia le aofai ma e le masino foi ona ituaiga eseise. O meaalofa na ua lisina i afioga faaalia mai, ua na o ni faailoaga o le anoanoai o le liligiina mai o le alofa tunoa faalelagi lea e tuuina mai e se Atua agaalofa ia i
- Na aoao mai foi Paulo, "E faamafanafanaina e le [Atua] i tatou i o tatou lava puapuaga, i le faamafanafanaga ua faamafanafanaina ai i tatou e le Atua" (2 Korinto 1:4).
- Sa faamalamalamaina mai e Elder Richard G. Scott: "E i ai le fuafuaga patino a le Atua mo lou olaga. (O le a Ia faaalia mai vaega o lena fuafuaga ia te oe p e a sueina ma le faatuutua ma le usiusitai la'i'a'i" "How to Live Well amid Increasing Evil," *Liahona*, Me 2004, 102).
- Mother Theresa, i le Edward W. Desmond, "Interview with Mother Teresa: A Pencil in the Hand of God," *Time*, Dec. 4, 1989, time.com.



latou o e alolofa ma auauna atu ia te ia" (*A New Witness for the Articles of Faith* [1985], 371).

- Na aoao mai Elder Marvin J. Ashton: "Sei ou taaa la ni nai meaalofa, e le lauliloa i taimi uma pe tautaua foi a e matua taaa lava. Faatasi ai ma nei meaalofa atomu o au meaalofa—o meaalofa e le o matua iloga mai, ae e moni lava ma e taaa.

"Sei o tatou toe iloiloina nisi o nei meaalofa e iloagata: o le meaalofa o le ole atu; o le meaalofa o le faalogologo; o le meaalofa o le faalogo ma faaaoga le leo ititi ma le filemu; o le meaalofa o le mafai ona tagi; o le meaalofa o le aloese mai finauga; o le meaalofa o le loto gatas; o le meaalofa o le aloese mai le tautu i upu le aoga; o le meaalofa o le saili o le mea sao; o le meaalofa o le faamasino atu; o le meaalofa o le vaai atu i le Atua mo le taitaiga; o le meaalofa o le avea ma se sooo; o le meaalofa o le alofa i isi; o le meaalofa o le mafai ona mafaufau loloto; o le meaalofa o le faia o tatalo; o le meaalofa o le tuuina atu o se molimau malosi; ma o le meaalofa o le mauaina o le Agaga Paia" (*E Tele Meaalofa*, "Liahona," Jan. 1988, 19).

- Na aoao mai foi Paulo, "E faamafanafanaina e le [Atua] i tatou i o tatou lava puapuaga, i le faamafanafanaga ua faamafanafanaina ai i tatou e le Atua" (2 Korinto 1:4).
- Sa faamalamalamaina mai e Elder Richard G. Scott: "E i ai le fuafuaga patino a le Atua mo lou olaga. (O le a Ia faaalia mai vaega o lena fuafuaga ia te oe p e a sueina ma le faatuutua ma le usiusitai la'i'a'i" "How to Live Well amid Increasing Evil," *Liahona*, Me 2004, 102).

- Mother Theresa, i le Edward W. Desmond, "Interview with Mother Teresa: A Pencil in the Hand of God," *Time*, Dec. 4, 1989, time.com.



Saunia e Elder D. Todd Christofferson
O Le Korama a Aposetolo e Toasefululua

O Le Areto Ola Na Alu Ifo Mai le Lagi

Afai tatou te naunau e mau ia Keriso ma ia mau o la i totonu o i tatou, o lona uiga o le paia o le mea lea tatou te sailia.

Ole aso na sosoo ai ma le fafagaina faavavega e Iesu Keriso o le toa 5,000 i Kalilaia i le na o le "lima potoi areto, ma i'a iti e lua,"¹ sa Ia toe fetalai atu foi i tagata i Kapanaumi. Na silafia e le Faaola e toatele e lei naunau i Ana aoaoga e pei ona mananao ia toe fafagaina.² O lea, na Ia taumafai ai e faatalitonuina i latou i le matua taua naua o "lena mea e 'ai e tumau i le ola e faavavau, e foaiina atu ia te outou e le Atalii o le tagata."³ Na tautino atu e Iesu:

"O a'u o le areto o le ola.

"Na aai e o outou tama le manai i le vao, a ua oti i latou.

"O lenei le areto ua alu ifo mai le lagi, ai se ai ai ona le oti lea o ia.

"O a'u le areto ola na alu ifo mai le lagi: pe a ai se tasi i lenei areto ona ola ai lea o ia e faavavau: o le areto foi ou te avatua, o lo'u tino lea, ou te avatua ma ola o le lalolagi."⁴

O le uiga [o le fetalaina a le Faaola] na matuai nenefu i Lana aufaalogologo o e sa malamalamala o Lana fetalaina e na o le faaletino. O le tali atu ma le le fiafia i lea manatu, sa latou taumananatu ai, "E mafai faapefea e lenei tagata ona aumai o lona tino tatou te aai ai?"⁵

"E faapeei ona soifua o le Tama ua na auina mai a'u, o loo ola foi a'u i le Tama; e faapeea foi o le 'ai ia te au, e ola lea ia te au."⁷

E lei maua lava e Lana aufaalogologo le mea na fetalai ai Iesu, ma e "toatele . . . , ina ua latou faalogo atu i lenei mea, sa latou fai mai, "O le upu faigata lena; o ai ea se na te mafaia ona faalogologo i ai? . . . [Ma] mai lena taimi e toatele soo na toe solomuli, ma ua le toe savavali faatasai ma ia."⁸

O le 'ai o Lona tino ma inu i Lona toto o se ala uiga ese lea o le faaali atu o le ala e tatau ai ona tatou matua aumaia atoatoa o le Faaola i o tatou olaga—i o tatou tagata—ina ia tasi i tatou. Pe faapefea ona tupu lenei mea?

Muamua, ua tatou malamalamala o le ositaualagaina o Lona tino ma le toto, na togiolaina ai Keriso mo a tatou agasala ma faatoilalo ai le oti, i le tino ma le agaga.⁹ Ua manino ai lava, tatou te aai i Lona tino ma feinu i Lona toto pe a tatou taliaina mai ia te Ia le mana ma faamanuiaga o Lona Togiola.

O le aoaoga faavae a Keriso ua ta'u mai ai le mea e tatau ona tatou faia ina ia maua ai le alofatunoa togiola. O le talitonu lea ma faatuatua ia Keriso, ia salamo ma papatiso, ma maua le Agaga Paia, "ona oo mai ai lea o se faamalogo o a outou agasala i le afi ma i le Agaga."¹⁰ O le faitotoa lea, o lo tatou ala i le alofatunoa togiola a le Faaola ma i le ala sa'o ma le vaapiapi e tau atu i Lona malo.

"O le mea lea, afai tou te fetaomi atu i luma, ma taumamafa fiafia i le afioga a Keriso, ma tumau e oo i le iuga, faauta,

Sa toe faamalamalamala atili e Iesu le mataupu:

"E moni e moni, ou te fai atu ia te outou, afai tou te le aai i le tino o le Atalii o le tagata, a le inu foi i lona toto, ua le i totonu ia te outou le ola.

"O lē ai i lo'u tino ma inu i lo'u toto, ua ia te ia le ola e faavavau; ou te toe faatuina foi o ia i le aso gataaga.

"Aua o lo'u tino o le mea e 'ai moni lea, o lo'u toto foi o le mea e inu moni lea."⁶

Ona Ia fetalai atu lea i le uiga maoae o Lana atavalii:

"O le 'ai i lo'u tino ma inu i lo'u toto, e tumau o ia ia te au, o a'u foi ia te ia.




ua faapea ona fetalai mai o le Tamā: O le a outou maua le ola e faavavau.

“ . . . Ma o lenei, faauta, o le mataupu faavae lenei a Keriso, ma o le mataupu faavae moni lenei e tasi a le Tamā, ma le Alo, ma le Agaga Paia, o ni Atua ua tasi, ua leai se gataaga.”¹¹

E matagofie le mafaufau loloto i le faatusa o le faamanatuga o le Talisaga a le Alii. Ua faatusa le falaoa ma le vai i le tino ma le toto o Ia o le Areto o le Ola ma le Vai Ola,¹² e faamanatu mai ai lava ma le loto nutimomoia ia i tatou le tau na Ia totogiina e togolaina ai i tatou. A o tofitofi le falaoa, tatou te manatua ai le tino na tuimomoina o le Faaola. Sa matauina e Elder Dallin H. Oaks i se tasi taimi e faapea “ona e tofitofi ma vaevaeina, e tulaga ese fasi falaoa taitasi, e pei o tagata taitoatas i o e aai ma feinu i ai e tulaga ese. E ia tei tatou uma ni agasala eseese e salamo ai. E ia tei tatou uma ni manaoga eseese ina ia faamalolosia e ala i le Togiola a le Alii o Iesu Keriso, o lē tatou te manatua i lenei sau-niga.”¹³ Pe a tatou feinu i le vai, tatou te mafaufau i le toto na Ia faamaligiina i Ketesemane ma i luga o le satauro ma lona mana faapaia.¹⁴ I le iloa ai “e leai se mea e le mama e mafai ona ulu atu i lona malo,” ua tonu ai ia i tatou e i ai faatasi ma “i latou o e ua faamamaina o latou ofu i le toto [o le Faaola], ona o lo latou faatuatua, ma le salamo i a latou agasala uma, ma lo latou faamoni e oo i le iuga.”¹⁵

Ua ou tautala atu e uiga i le mauaina o le alofatunoa togiola o le Faaola e aveesea ai a tatou agasala ma pisia o na agasala o ia i tatou. Ae i se tulaga faafaatusa, o loo i ai se faauigaga sili atu o le aai i Lona tino ma feinu i Lona toto, ma o lena faauigaga o le teuloto o tomai ma uiga o Keriso, aveesea o le natura faaletagata ma avea ma Au Paia “e ala i le togiola a Keriso le Alii.”¹⁶ A o tatou aai ma feinu i le falaoa ma le vai o le faamanatuga i vайасо taitasi, o le a lelei lo tatou mafaufau pe o le a le atoatoa e tatau ai ona tatou faaaofia ai Ona uiga ma le mamanu o Lona soifua e aunoa ma se agasala i o tatou lava tagata. Semanu e le mafai e Iesu ona togiola mo agasala a isi vagana



ai e leai se agasala a Ia Lava. Talu ai e leai se aia a le faamasinotonu ia te Ia, o lea ua mafai ai e Ia ona ofoina mai o Ia lava e suitulaga ai, ina ia faamalie ai le faamasinoga tonu ma aumai ai le alofamutimutivale. Pe a tatou manatua ma faamamaluina Lana taulaga togiola ua tatau foi ona tatou mafaufau loloto i Lona soifua e aunoa ma se agasala.

Ua ta'u mai ai i le manaomia ona tatou taumafai malosi e faatino la tatou vaega. E le mafai ona faamalieina i tatou e tumau ai i le mea ua tatou i ai, ae e tatau ona tatou agai atu pea e le aunoa i luma “ia oo i le fua o le ua matua e tatau ma le tumu o Keriso”¹⁷ Pei o le tama o le Tupu o Lamonae, e tatau ona tatou naunau e lafoai a tatou agasala uma¹⁸ ae taulai atu i mea ua faamoemoe mai ai le Alii ia i tatou, taitoatas i tatou faatasi.

E lei leva talu ai, sa faamatala mai ai e se ue ia te au sona aafiaga ao avea ma peresitene o se misiona. Sa faia sona taotoga na manaomia ai ni vайасо e toefotuai ai le malosi. I le taimi o lona fotuaiga, sa tuuto atu le tele o lona

taimi e faitau ai ma manatunatu loloto i tusitusiga paia. I se tasi aoauli a o ia manatunatu loloto i upu a le Faaola i le mataupu e 27 o le 3 Nifae, sa ia faagalelegale moe. Sa ia faasoa mulimuli mai:

“Sa oo ina fai la'u miti lea na tuuina mai ai se vaaiga atoatoa le mafaagaloina o lo'u olaga. Sa faatilotilo a'u i a'u agasala, o filifiliga le lelei, o taimi . . . sa ou taulima ai tagata ma le le onosai, faatasi ai ma lo'u le faia o mea lelei sa tatau ona ou tautala atu ai pe faia foi. . . . Sa faaali mai ia te atu [se] [iloilogia] atoia o lo'u olaga i ni nai minute, ae sa foliga mai sa matua umi atu. Sa ou ala, ua ou te'i ma . . . faapa'u ifo ai loa lava i lena taimi i o'u tulivae i autafa o lo'u moega ma amata ona ou tatalo, ma ole atu mo se faamagaloga, ma sasaa atu lagona o lo'u loto e pei ou te lei faia lava muamua.

“A o lei faia la'u miti, sa ou le'i iloaina o loo ou matua manaomia tele ona salamo. O o'u sese ma vaivaiga na faafuasei ona matua manino mai ia te au o le ava i le va o le tagata na ou i ai ma le paia ma le agalelei o le Atua na [peil] e



faitau miliona maila. I la'u tatalo i lena afiafi, sa ou faaali atu ai lo'u lotofaafetai loloto i le Tama Faalelagi ma le Faaola faatasi ma lo'u loto atoa ona o mea sa La'ua faia mo au, ma mo fegalegaleaiga sa ou faatauaina ma lo'u toalua ma le fanau. Ao ou i ai i o'u tulivae, sa ou lagonaina foi le alofa ma le alofamutiviale sa matua maoae e ui i lo'u lagonaina o le le agavaa. . . .

"E mafai ona faapea atu ua ou le toe pei o le mea sa ou i ai talu mai lena aso. . . . Sa suia lo'u loto. . . . O le mea na sosoo ai sa ou atina a'e le lotoalofa tele atu i isi, ma le gafatia sili atu e alofa ai, faaluaina i se lagona o le faanatinati e talai le talalelei. . . . Ua mafai ona ou malamalamana i savali o le faatuatua, faamoemoe, ma le meaalofo o le salamo o loo maua i le Tusi a Mamona [e pei] e lei faia muamua."¹⁹

E taua le iloaina, o le faaaliga manino a lenei tamalii lelei e uiga i ana agasala ma vaivaiga e lei faalotovaivai ai o ia pe na taitai atu ai i le faanoanoa. Ioe, sa ia lagona le te'i ma le salamo. Sa ia lagonaina lelei lona manaomia ona salamo. Sa lotomaualalo o ia, ae sa ia lagonaina le lotofaafetai, filemu, ma le faamoemoe—faamoemoe moni—ona

o Iesu Keriso, "o le areto ola lea e sau mai le lagi."²⁰

Sa talanoa lau uo e uiga i le ava na ia iloaina i lana miti i le va o lona olaga ma le paia o le Atua. *Paia* o le upu sa'o lea. O le 'ai i le tino ma inu i le toto o Keriso o lona uiga ia tulimatai atu i le paia. Ua poloai mai le Atua, "Ia paia outou; aua o A'u nei e paia lava a'u."²¹

Sa fautuaina i tatou e Enoka, "Ia aoao atu i lau fanau, e ao i tagata uma, i soo se mea lava, ona salamo, po o o le a leai se ala e mafai ai ona latou mautofai le malo o le Atua, ona e leai se mea lē mama e mafai ona mau iina, pe mau i ona luma; ona, i le gagana a Atamu, o le Tagata Paia o lona suafa lea, ma o le suafa o lana Toatasi na Fanaua o le Atalii o le Tagata, o Iesu Keriso lava."²² A o ou tamaitiiti, sa ou taumanatunatu pe aisea i le Feagaiga Fou e tele taimi e faasino atu ai ia Iesu (e oo foi ia te Ia lava) o le Atalii o le Tagata a'o Ia moni lava o le Alo o le Atua, ae o loo manino i le saunoaga a Enoka o nei ta'u o se faailoaga moni o Lona faaleagaga ma le paia—O Ia o le Atalii o le Tagata o le Paia, le Atua le Tama.


Afai tatou te naunau e mau ia Keriso ma ia mau o Ia i totonu o i tatou,²³ o

lona uiga o le paia o le mea lea tatou te sailia, i le tino ma le agaga.²⁴ Tatou te sailia lena mea i le malumalu lea o loo tusivane i luga le "E Paia i le Alii." Tatou te sailia i a tatou faaipoipoga, aiga, ma fale. Tatou te sailia i vaiaso taitasi pe a tatou olioli i le aso paia o le Alii.²⁵ Tatou te sailia i mea tatou te faia i o tatou olaga i aso taitasi: o a tatou tala, o lavalava, o o tatou mafaufauga. E pei ona ta'u e Peresitene Thomas S. Monson, "O i tatou o fua o mea uma tatou te faitauina, o mea uma tatou te matamata ai, o mea uma tatou te faa-logo ai ma mea uma tatou te mafaufau i ai."²⁶ Tatou te sailia le paia pe a tatou amoina o tatou satauro i aso taitasi.²⁷

Na matauina e Sister Carol F. McConkie: "Ua tatou iloaina le anoanoai o tofotofoga, faaososoga, ma faigata lea e mafai ona tosoesea i tatou mai mea uma e mama ma tauleleia i luma o le Atua. Peitai ua ofo mai e o tatou aafiaga faaletino le avanoa e filifili ai le paia. E masani lava o osigataulaga tatou te faia e tausia ai a tatou feagaiga lea e faamamaina ai i tatou ma faapaaina."²⁸ Ma i "osigataulaga tatou te faia" ou te faaopoopo atu auanaga tatou te tuuina atu.

Ua tatou iloa "pe a [tatou] auauna atu i o outou uso a tagata, ua na o lo outou auauna atu lava lea i lo [tatou] Atua."²⁹ Ma ua faamanatu mai foi e le Alii ia i tatou o lena auaunaga o se vaega taua o Lona soifuaga ma ona uiga: "Aua foi o le Atalii o le tagata na le sau o ia ina ia auauna tagata ia te ia, ae peitai ia auauna o ia, ma foaiina atu lona ola o le togiola e sui a'i tagata e toatele"³⁰ Na aoao mai ma le poto ia Peresitene Marion G. Romney: "O le auauna atu e le o se mea tatou te tigaina ai i lenei lalolagi ina ia tatou maua ai le aia tatau e nonofo ai i le malo selesitila. O le auauna atu o uiga tonu lea e faavae ai se olaga faaeaina i le malo selesitila."³¹

Na valoia e Sakaria e faapea o le aso e nofotupu ai le Alii, e oo lava i uamea tagitagi o solofanua o le a i ai le faaupuga "E paia ia Ieova."³² I lena lava agaga, sa faapipii ai e le Au Paia paonia i nei vanu lena lava faamanatu, "E paia i le Alii," i luga o mea masani



po o mea faatauvaa faapea foi mea e fesoottai sa'o ma le faatuatua ma faiga faalelotu. Sa tusivaneina i luga o ipu inu ma ipu mafolafola o le faamanatuga ma sa lolomiina i luga o tusi faamaonia o faauuga o le Au Fitugafulu, ma fu'a a le Aualofa. "E Paia i le Alii" o loo vaaia foi i luga o faamalama e faalauliloa ai oloa o le Zion's Cooperative Mercantile Institution, le faleoloa o le ZCMI. Sa maua foi i luga o le ulu o se samala ma i luga o se atigipalau. "E Paia i le Alii" sa tusivaneina i luga o 'au o faitotoa o le fale o Polika Iaga, le Fale o le Ofagapi. O nei faasinoga i le paia i ni nofoaga e foliga mai e le masani ai pe le mafaufauna e ono foliga mai e le talafeagai, ae o loo ta'u mai ai le loloto ma le tatau ai i taimi uma ona tatou tauai atu i le paia.

O le 'aa'i i le tino o le Faaola ma feinu i Lona toto o lona uiga o le tuu-e mai o tatou olaga soo se mea e le ogatusa ma se uiga faaKeriso ma avea Ona uiga faaleatua mo i tatou lava. O le faauigaga tele atu lea o le salamo: e le gata i le liliu ese mai agasala ua tuanai ae "o se liliu atu o le loto ma le agaga i le Atua"³⁵ ma agai i luma. E pei ona tuu i la'u uo i lana miti faafaaaliga, o le a faaali mai e le Atua ia i tatou o tatou faaletonu ma vaivaiga, ae o le Ia fesoasoani foi ia i tatou e faalili le vaivai i le malosiaga.³⁴ Afai tatou te fesili ma le

lotofaamaoni, "Se a se mea ou te lei faia?"³⁵ O le a Ia le tuua lava i tatou e taumate, ae o le a Ia tali mai i le alofa ina ia tatou fiafia. Ma o le a Ia tuu maia ia i tatou le faamoemoe.

O se taumafaiga lofituina, ma o le a matuai taufaafefe lava pe afai tatou te taumafai na o i tatou lava mo le paia. O le mea moni fiafia e le o tuua lava na o i tatou. Ua ia i tatou le alofa o le Atua, o le alofa tunoa o Keriso, le mafanafana ma le taitaiga a le Agaga Paia, ma le faaaumea ma le faamalosiauga a le Au Paia i le tino o Keriso. Aua nei faamalieina i tatou i le mea ua tatou i ai nei, ae aua foi nei o tatou lotovaivai. Ua uunaia i tatou e se viiga faigofie ae ootia:

*Faaalu se taimi ia paia ai, le lalolagi
o loo natinati;
faaalu le tele o le taimi na o oe i le mea
lilo ma Iesu.
I le vaavaai atu ia Iesu, e tatau ona e
avea e pei o ia;
e vaaia e au uo o Ia i au amioga.³⁶*

Ou te molimau atu o Iesu Keriso, "o le areto ola na alu ifo mai le lagi,"³⁷ ma "o ai lava e 'ai i [Lona tino] ma inu i [Lona toto, e maua e ia le ola e faavavau,"³⁸ i le suafa o Iesu Keriso, amene. ■

FAAMATALAGA

1. Ioane 6:9.
2. Tagai Ioane 6:26.

3. Ioane 6:27.
4. Ioane 6:48–51.
5. Ioane 6:52.
6. Ioane 6:53–55.
7. Ioane 6:56–57.
8. Ioane 6:60, 66 O i foi lea na fesili ai le Faaola i Lana Toasefululua, "Pe tou te fia o ese foi?" Ioane 6:67). I le tali atu mo le Toasefululua ma le faatuatua a'i'a'i, na tali atu Peteru: "Le Alii e, o ai ea a matou o i ai? o ia te oe upu o le ola e faavavau. "Ua matou talitonu, ma ua matou iloa o oe o le Keriso, o le Alo o le Atua soifua" (Ioane 6:68–69). Ou te iloa, i lena lava taimi, pe na sili atu le malamalamā o Peteru ma lana Usoga i mea sa aoao atu e le Faaola nai lo sooi ia na lafoai le Matai, peitai na iloa e Peteru i le molimau faapitoa o le Agaga o Iesu o le Keriso, le Alo o le Atua soifua (tagai Mataio 16:15–17), ma e leai se isi mea e mafai ona maua ai le faaolataga. O lea sa ia tautino atu ai ma le atoatoa e mulimuli a Iesu e tusa lava pe a. Afai sa i ai ni ana fesili, e mafai ona taliina i se taimi tatau ai, ae o le a le mafai ona tauanaueseina mai le faamaoni i le Alo o le Atua—o se faataitaiga matagofie mo i tatou uma.
9. Tagai Luka 22:44; Eperu 13:12; Mosaea 3:7; 15:7–8; Alema 7:13; Mataupu Faavae ma Feagaiga 19:18; 38:4; 45:4–5.
10. 2 Nifae 31:17.
11. 2 Nifae 31:20–21.
12. Tagai Ioane 4:10.
13. Dallin H. Oaks, "Molimau" (o le lauga na tuuina atu i le semina mo peresitene fou o le misiona, 25 Iuni, 2014), 1–2.
14. Tagai Mose 6:60.
15. 3 Nifae 27:19; tagai foi Moronae 10:32–33.
16. Mosaea 3:19.
17. Efeso 4:13.
18. Tagai Alema 22:18.
19. Fesootaiga patino.
20. Ioane 6:51.
21. 1 Peteru 1:16.
22. Mose 6:57.
23. Tagai Ioane 6:56.
24. Tagai Roma 12:1.
25. Tagai Isaia 58:13.
26. *Teachings of Thomas S. Monson*, comp. Lynne F. Cannegieter (2011), 112.
27. Tagai Faaliliuga a Iosefa Samita, Mataio 16:25–26 (i le Mataio 16:24, vaefamatatalaga e); Luka 9:23; 14:27–30; Faaliliuga a Iosefa Samita, Luka 14:27–28 (i le Luka 14:27, vaefamatatalaga e); Iosefa Samita Faaliliuga, Luka 14:31 (i le Luka 14:30, vaefamatatalaga a).
28. Carol F. McConkie, "O Le Malumalū e Matagofie," *Liahona*, Me 2017, 10.
29. Mosaea 2:17.
30. Mareko 10:45; tagai foi Alema 34:28.
31. Marion G. Romney, "The Celestial Nature of Self-Reliance," *Liahona*, Mat. 2009 19.
32. Sakaria 14:20.
33. Bible Dictionary, "Prayer."
34. Tagai Eteru 12:27.
35. Mataio 19:20.
36. William D. Longstaff, "Take Time to Be Holy," *The United Methodist Hymnal* (1989), no. 395.
37. Ioane 6:51.
38. Ioane 6:54



Saunia e Elder Jeffrey R. Holland

O Le Korama a Aposetolo e Toasefululua

la Atoatoa Ona Lelei o La Outou Amio— I Le luga

Afai tatou te tutumau, ona i ai lea o se mea i le faavavau o le a faamaea ai ma facaatoatoa ai lo tatou faaleleiga.

Na tusia tusitusiga paia ina ia faamanuia ma faamalosiau ai i tatou, ma e mautinoa lava lo latou faia o lena mea. Tatou te faafetai i le lagi mo mataupu ma fuaiupu uma ua tuuina mai ia i tatou. Ae pe o e matauina mai lea taimi i lea taimi o le a oso mai lava se fuaitea e faamanuia mai ai ia i tatou o *loo* fai lava si o tatou le ‘a’u’a’u? Mo se faataitaiga, o le Lauga i luga o le Mauga e amata i faamuia malu ma agavaivai, ae i fuaiupu e sosoo ai, ua ta’u mai ai ia i tatou—faatasi ai ma isi mea—e le gata e aua le fasioti tagata ae faapena foi le aua ne’i ita. Ua ta’u mai ia i tatou e le gata e aua le mulilua ae faapena foi le aua ne’i i ai ni mafaufauga le mama. Mo i latou e ole mai, e ao ona tatou avatu i ai lo tatou pulupulu ona toe avatu foi lea i ai ma le ofutalaloa. E ao ona tatou alolofa i o tatou fili, faamanuia atu ia i latou e fetuu mai, ma ia agalelei atu ia i latou o e inoino mai.¹

Afai o lau suesuega lena o tusitusiga paia i le taeao, ma a uma ona fiaitau ma na o le pau lea ma ua e mautinoa lava

e te le maua ni togi lelei i lau lipoti o le talalelei, o le poloaiga mulimuli la i le filifili ua mautinoa lava le faamaea ai o le galuega: “O lenei ia atoatoa ona lelei o la outou amio, e pei o lo outou Tama . . . o i le lagi e atoatoa ona lelei o ia.”² I lena poloaiga tomuli, tatou te toe fia foi ai i le moega ma toe pulou le ieafu. O ia sini faaselesitila e foliga mai tatou te le gafatiaina. Ae mautinoa lava e le

aumaia lava e le Alii ia i tatou se polo-aiga Na te silafia e le mafai ona tatou tausiaina. Ia se’i o tatou vaai po o fea e ave i ai tatou e lenei faafitauli fenumiai.

I le Ekalesia atoa ou te faalogo pea i le toatele o loo tauivi ma lenei faafitauli: “E le lava so’u agavaa.” “Ou te le taitai oo i ai.” “O le a ou le gafataulima-in lava.” Ou te faalogo i nei tala mai le autalavou. Ou te faalogo i ai mai fai-featalai. Ou te faalogo i ai mai tagata fou liliu mai. Ou te faalogo i ai i tagata ua leva ona lolotu. Na matauina e se tasi o tagata malamalamo o le Au Paia o Aso e Gata Ai, o Sister Darla Isackson, ua mafai e Satani ona faia ia feagaiga ma poloaiga ia foliga o ni mala ma tau-salaga. Mo nisi ua ia liliua ia mataupu ma musumusuga o le talalelei e ita ai le tagata ia te ia lava ma mafua ai ona faanoanoa.³

O le mea lea ua ou fai atu ai nei e leai ma se mea e teena ai pe ta’uleagaina ai soo se poloaiga ua aumai e le Atua ia i tatou. Ou te talitonu i Lona atoatoa, ma ou te iloa o i tatou o Ona atalii ma afafine faaleagaga o loo i ai le gafatia faalelagi e avea ai e faapei o Ia. Ou te iloa foi, i le avea ai ma fanau a le Atua, e le tatau ona tatou faalumaina ma fai upu malolosi ia i tatou lava, e peisea’i a tatou faasalaina i tatou lava o le a avea ai i tatou ma tagata e finagalo le Atua e avea ai i tatou. Leai! Faatasi ai ma se naunautaiga e salamo ma se manao mo le amiontonu faateleina i o tatou loto, ou te faamoemoe o le a tatou sailia le faaleleiga faaletagata lava



ia i se ala e le aofia ai le maua ai i le gasegase o le 'asa po o le le fia tausami, lagonaina o le ātu po o le faaleagaina o lo tatou naunautaiga. E *le* o le mea lena e finagalo ai le Alii mo fanau Peraimeri po o soo se tasi lava e usuina ma le faamaoni le pese, "O loo ou taumafai ia pei o Iesu."⁴

Ina ia tuu atu lenei mataupu i le loloto, ou te faamanatu atu ia i tatou uma o loo tatou ola i se lalolagi pa'u ma o le taimi nei o i tatou o ni tagata pa'ūū. O loo tatou i ai i le malo *tele-sitila*; sipelaina i le *t,ae* le o le *s*. E pei ona aoao mai Peresitene Russell M. Nelson, o iinei i le olaga faaletino o loo "faatalitali" ai pea le atoatoa.⁵

O lea ou te talitonu ai e lei fuafuaina e Iesu Lana lauga i lenei mataupu e avea o se samala tautala mo le sasaina o i tatou e uiga i o tatou vaivaiga. Leai, ou te talitonu na Ia fuafuaina e avea o se saafiafiga i le Atua ma po o ai le Atua le Tama e Faavavau ma le mea e mafai ona tatou ausia faatasi ma Ia i le faavavau. I soo se tulaga, ou te faafetai i le iloaina e ui lava i *o'u* vaivaiga, pau le mea ou te iloa e atoatoa le Atua—pau le mea ou te iloa, mo se faataitaiga, e mafai ona Ia alofa atu i Ona fili, aua e tele lava, ona o le "tagata natura"⁶ o i totonu o i tatou, o nisi taimi o oe ma a'u o lena fili. Ou te faafetai tele lava ona e mafai e le Atua ona faamanuia i latou e tuua'ifua o Ia ona o i tatou *uma*, e aunoa ma le manao po o le faamoemoe e faia lena mea, tatou te tuua'ifua ai o Ia i nisi taimi. Ou te faafetai ona e alofa mutimutivale le Atua ma o se faatupufilemu aua ou te manaomiaina le alofa mutimutivale ma e manaomia foi e le lalolagi le filemu. Ioe, o mea uma tatou te talanoa ai e uiga i le mama o le Tama tatou te talanoa ai foi e uiga i Lona Alo e Toatasina Fanaua, o le sa soifua ma maliu i le atoatoa lava e tasi.

Ua uunaia a'u e fai atu o le taulai atu i mea e ausiaina e le Tama ma le Alo nai lo o tatou toilalo tatou te le maua ai se aunese se tasi o le faamaoniga mo olaga le puleaina po o le lafoaia ese o o tatou tulaga faatonuina. Leai, mai lava le amataga o le talalelei e mo le "faaatoatoaina ai [o] le au paia, . . .



seia tatou oo atu . . . ma fai ma tagata matua, ia oo i le fua o le ua matua, e tatau ma le tumu o Keriso."⁷ Ua na ona ou fautuaina atu o nisi taimi o le faamoemoega autu o se mau po o se poloaiga atonu o le faamanatu mai lea ia i tatou o le matagofie moni lava "o le matua e tusa ma le tumu o Keriso"⁸ e uunaia ai i o tatou loto se alofa tele atu ma le faamemelo mo Ia ma se manao sili atu ia avea e faapei o Ia.

"Ioe, o mai ia ia Keriso, ma faaatoatoaina ia te ia . . . , o loo aioi mai ai Moronae. "Alolofa i le Atua ma o outou manatu atoa, mafaufau, ma le malosi atoa, ona . . . o lona alofa tunoa e mafai ai ona outou atoatoa ia Keriso."⁹ Pau le tatou faamoemoega mo le atoatoa moni o le taliaina lea e avea ma se meaalofa mai le lagi—e le mafai ona tatou "mauaina". O le mea lea, ua ofo mai ai ia i tatou e le alofa tunoa o Keriso e le gata o le faaolataga mai le faanoanoa ma le agasala ma le oti ae o le faaolataga mai a tatou lava faitioga faifai pea.

Se'i o'u faaaogaina se tasi o faataoto a le Faaola e faamatala ai lenei mea i sina auala e ese teisi ai. Sa nofoatalafu se auauna i lona tupu i le aofaiga e 10,000 taleni. I le faalogo atu i le aioi mai o le auauna mo le onosai ma le

alofa mutimutivale, "ona mutimutivale ai lea o le alofa o le alii o lea auauna, ma . . . faamagalo . . . le aitalafu." Ae o lena lava auauna sa lei faamagalo atu i se uso a auauna na aitalafu ia te ia i tenari e selau. I le faalogo atu i lenei mea, sa alaga atu ai le tupu i le na ia faamagaloina, "E le tatau ea ona e alofa atu i lou uso a auauna e pei o a'u foi na ou alofa atu ia te oe?"¹⁰

O loo i ai sina eseesege o manatu i le au atamamai e faatatau i le tau o le tupe o loo ta'ua i i—ma ia faamagalo le vaega e faasino i mea tautupe a le I.S.—ae i le faafaigofieina o le matematika, afai o le aitalafu laitiiti sa lei faamagaloina e 100 taleni, po o le \$100 i le tatou tupe i le taimi nei, o lona uiga o le aitalafu 10,000 taleni sa faamagalo fua e tai latalata atu i le \$1 piliona—pe sili atu!

I le avea ai ma se aitalafu patino, o se numera tele naua lena—tatou te matua le malamalamava i ai. (E leai se tasi e faia se faataau tele faapena!) Ae, mo faamoemoega o lenei faataoto, e *tatau* ona le malamalamava i ai; e *tatau* ona sili atu ma lo tatou gafatia e malamalamava i ai, le faia o se tala e sili atu ma lo tatou gafatia e totogiina. O le mafuaaga ona e le o se tala lenei e faataau i ni auauna se toalua na fefinauai



i le Feagaiga Fou. O se tala e faatatau ia i tatou, o le aiga pa'ū o le tagata—o tagata aitalafu faaletino, solitulafono, ma o pagota uma. O i tatou uma o ni tagata aitalafu, ma o le i'uga o le faafalepuipuiina o i tatou uma taitoatasi. O iina o le a tatou tumau ai pe a na le seanoa le alofa tunoa o lo tatou Tupu lea na faasaolotoina ai i tatou ona e alofa o Ia ia i tatou ma o loo "liuliu mai [lona] loto o le agaalofa ia te i [tatou]."¹¹

O loo faaaogaina e Iesu se fuataga e faigata ona malamalama i ai i ona o Lana Togiola o se meaalofa e faigata ona malamalama i ai na faia i se tau e faigata ona malamalama i ai. O lena mea, e foliga mai ia te au, o se vaega o le uiga i tua atu o le poloaiga a Iesu ia atoatoa. Atonu o le a le mafai ona tatou faataitaia ia taleni e 10,000 o le faaatoatoaga ua ausia e le Tama ma le Alo, ae e le o se mea tele mo i Laua le fai mai ia i tatou ina ia tatou avea atili faapei o se atua i mea iti, ia tatou tautatala ma amio ai, alofa ma faamagalo atu, salamo ma faalelei aemaise ai i le tulaga e 100 sene o le faaatoatoaga, lea e manino lava e i totonus o lo tatou gafatia e faia ai.

Ou uso e ma tuafafine, vagana ai Iesu, e leai lava ni faatinoga atoatoa i luga o lenei faigamalaga faalelalolagi o

loo tatou i ai, a o i ai la iinei i le olaga faaletino ia tatou tauivi mo le agai i luma tumau ae le o le faananau i le mea ua ta'ua e saienitisi o amioga o "faananauga le lelei o le faafia atoatoa."¹² E tatau ona tatou aloese mai lena faamoe-moega faaiu o i tatou lava, o isi, ma ou te fia faaopoopo atu, o i latou o e ua valaauina e auauna atu i le Ekalesia—lea mo le Au Paia o Aso e Gata Ai o lona uiga o *tagata uma*, aua ua valaauina i tatou e auauna atu i se mea.

I lena tulaga, sa tusia ai e Leo Tolstoy se tala e uiga i se faifeau sa faitioina e se tasi o lana aulotu mo le le ola ai e pei ona sa ia tatau ai, o le faitioga sa faaiuina faapea o mataupu faavae ia sa aoaoina e le failauga faaletonuga sa faapena foi ona pepelo ma e le tatau ona talitonuina.

I se tali atu i lena faitioga, sa fai atu le faifeau: "Tagai i lo'u olaga i le taimi nei e faatusatusa i lo'u olaga sa i ai muamua. O le a e iloaina sa ou taumafai lava e ola i le upumoni o loo ou folafolaina atu." O le le mafai ai ona ola e tusa ma mataupu maualuluga na ia aoaoina, na tautino ai e le faifeau ua ia toilalo. Ae sa tagi o ia:

"Osofai a'u, [pe afai e te manao ai,] ua ou faia lea mea ia te a'u lava ia, ae [aua] le osofaia . . . le ala o ou mulimuli ai. . . . Afai ou te iloa le auala i le pale [ae] o loo ou savali onā ai, pe ua le avea ai ea ma ala sa'o ona o loo ou tau-tevateva solo ai mai le isi itu i le isi itu?

" . . . Aua ne'i alalaga fiafia atu, 'Vaai atu ia ia te ia! . . . Lale ua [tolotolo] atu i totonus o le lopala!' Leai, aua ne'i fiafia, ae tuu mai . . . la outou fesoasoani [i] soo se taumafaiga e savalia ai le auala e toetoi atu ai i le Atua.]"¹³

Uso e ma tuafafine, o i tatou uma lava o loo saili atu i se olaga sili FaaKeriso nai lo le faamanuiaina masani i le olaga. Afai tatou te tautino atu lena faamaoni ma taumafai ia faalelei, e le o i tatou la o ni tagata pepelo; o tatou o tagata soifua. Tau ina ia tatou mumusu e tuu atu i o tatou lava tulaga faavasivasi faaletino, ma faaletonu le maalofia o alii ma tamaitai lelei o siomiaina i tatou, ma faamasalosaloina i tatou e uiga i upumoni o le talalelei, o le moni o le Ekalesia, o lo tatou

faamoemoe mo lo tatou lumanai, po o le mafai ona i ai le amioatua moni. Afai tatou te tutumau, ona i ai lea o se mea i le faavavau o le a faamaea ai ma faaatoatoa ai—o le faauigaga lea o le Feagaiga Fou o le *atoatoaga*.¹⁴

Ou te molimau atu i lena taunuuga sili, lea ua faaavanoa mai ia i tatou e le Togiola a le Alii o Iesu Keriso, o Ia lava e faaauau pea "mai le alofa tunoa i le alofa tunoa"¹⁵ seja oo i Lona tino ola pea¹⁶ sa Ia maua ai le atoatoaga o le mamalu selesitila.¹⁷ Ou te molimau atu i lenei itula ma itula uma, faatasi ai ma ona aao ua ma'ilā i fao, o loo Ia faaloaloa mai pea ia i tatou i lea lava alofa tunoa e tasi, ma uumauina ma faamalosiau mai ia i tatou, musu e tuu i tatou e o seia tatou taunu saogalemu ai i le aiga i le opomau a o tatou Matua e Faavavau. Mo sea taimi atoatoa, e faaauau pea ona ou tauivi, po o le a lava le le mautonu. Mo sea meaalofa atoatoa, e faaauau pea ona ou faafetai, po o le a lava le le lelei. Ou te faia ai i le igoa lava o le Atoatoaga lava ia, o Ia o le sa lei le mautonu lava pe sa le'i le lelei lava ae e alofa ia i tatou uma, le Alii o Iesu Keriso, amene. ■

FAAMATALAGA

1. Tagai Mataio 5:1-47.
2. Mataio 5:48.
3. Tagai Darla Isackson, "Satan's Counterfeit Gospel of Perfectionism," *Meridian Magazine*, June 1, 2016, ldsmag.com.
4. "O Loo Ou Taumafai e Avea e Pei o Iesu," *Tusipese a Tamaiti*, 40-41.
5. Tagai Russell M. Nelson, "Atoatoaga o loo Faatalitali," *Liahona, Ian. 1996, 103-107.*
6. Mosaea 3:19.
7. Efeso 4:12-13.
8. Efeso 4:13.
9. Moronae 10:32; ua faaopoopo le faamamafa.
10. Tagai Mataio 18:24-33.
11. Mataupu Faavae ma Feagaiga 121:4.
12. Tagai Joanna Benson and Lara Jackson, "Nobody's Perfect: A Look at Toxic Perfectionism and Depression," *Millennial Star*, Mar. 21, 2013, millennialstar.org.
13. "The New Way," *Leo Tolstoy: Spiritual Writings*, sel. Charles E. Moore (2006), 81-82.
14. Mo se suesuega malamalama o le uiga o le upu Eleni o loo faaaogaina i le Feagaiga Fou mo le *perfect* (*teleios*"), tagai i le lauga a Peresitene Russell M. Nelson i le konafesi aaoao ia Oketopa 1995 "Atoatoaga o loo Faatalitali" (*Liahona, Ian. 1996, 103-07.*)
15. Mataupu Faavae ma Feagaiga 93:13.
16. Tagai Luka 13:32.
17. Tagai Mataupu Faavae ma Feagaiga 93:13.



Saunia e Peresitene Henry B. Eyring
Fesoasoani Muamua i le Au Peresitene Sili

O Le Lagolagoina o Taitai o le Ekalesia

Uso e ma tuafafine, o le a ou tuuina atu nei ia te outou le Au Pulega Aoao, Fitugafulu Eria, ma au Peresitene Aoao o Ausilali o le Ekalesia mo la outou palota lagolago.

E tuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le

Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e e lagolagoina ia faailoa mai.

O i latou e faatuiese, pe afai e i ai, ia faailoa mai.

E tuuina atu ia tatou lagolagoina Russell M. Nelson o le Peresitene o le Korama a Apostolo e Toasefululua ma uso nei o lena korama: Russell M. Nelson, Dallin H. Oaks, M. Russell

Ballard, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, ma Dale G. Renlund.

O e e lagolagoina, faamolemole ia faailoa mai.

A i ai se faatuiese ia faailoa mai. E tuuina atu ia tatou lagolagoina ia fesoasoani i le Au Peresitene Sili ma le Korama a Apostolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faamolemole ia faailoa mai.

O e faatuiese, pe afai o i ai, i le faailogia lava lea e tasi.

O Elders Donald L. Hallstrom ma Richard J. Maynes ua faamaloloina mai le auauna atu o ni uso o le Au Peresitene o Fitugafulu.

O i latou uma o e fia faaalia le agaga faafetai i nei Uso mo le auaunaga sa laua tuuina atu e mafai ona faaalia i le siitiaina o le aao.

Ua tuuina atu ina ia tatou lagolagoina Elders Juan A. Uceda ma Patrick Kearon, o e ua valaaufina e auauna atu o ni uso o le Au Peresitene o Fitugafulu.

O i latou o e lagolagoina nei Uso i o laua valaauga fou, faamolemole ia faailoa mai.



Soo se tasi e faatui ese ia faailoa mai i lea lava faailoga e tasi.

E tuuina atu ina ia faamalolo mai ma le agaga faafetai mo a latou auau-naga tuuto ia Elders Stanley G. Ellis, Larry R. Lawrence, ma W. Craig Zwick o ni Fitugafulu o le Pulega Aoao ma ua malolo ma le mamalu.

O i latou e fia aufaatasi ma i matou e tuu atu le agaga faafetai i nei Uso mo la latou tautua maoae, faamole-mole ia faailoa mai.

E tuuina atu ina ia faamalolo mai i latou nei o ni Fitugafulu Eria: Pedro U. Adduru, Detlef H. Adler, Angel H. Alarcon, Winsor Balderrama, Robert M. Call, Christopher Charles, Gene R. Chidester, Ralph L. Dewsnap, Ángel A. Duarte, Peter F. Evans, Francisco D. N. Granja, Yuriy A. Gushchin, Clifford T. Herbertson, Aniefiok Udo Inyon, Luiz M. Leal, Alejandro Lopez, L. Jean Claude Mabaya, Declan O. Madu, Alexander T. Mestre, Jared R. Ocampo, Andrew M. O'Riordan, Jesús A. Ortiz, Abenir V. Pajaro, Siu Hong Pon, Robert C. Rhien, Jorge Luis Romeu, Jorge L. Saldívar, Ciro Schmeil, Alin Spannaus, Moroni B. Torgan, Steven L. Toronto, ma Ricardo Valladares.

O e fia au faatasi ma i matou e faailoa atu le lotofaafetai mo la latou tautua matavela, faamolemole faailoa mai.

E tuuina atu ina ia tatou lagolagoina Torben Engbjerg o se Fitugafulu Eria.

O e uma e lagolagoina, ia faailoa mai.

O i latou e faatui ese, pe afai e i ai.

Ua tuuina mai tatou te lagolagoina isi Au Pulega Aoao, Fitugafulu Eria, ma Au Peresitene Aoao o Ausilali e pei ona i ai nei.

O e uma e lagolagoina, ia faailoa mai.

O e faatui ese, pe afai o i ai, i le faailoga lava lea e tasi.

O i latou atonu na faatui ese i soo se tofiga e tatau ona faafesootai o latou peresitene o siteki.

Uso e ma tuafine, matou te faafe-tai atu mo lo outou faatuatua ma tatalo faifai pea mo taitai o le Eklesia. ■



Sauniga e Elder Gary E. Stevenson

O Le Korama a Aposetolo e Toasefululua

Gasetoto Faaleagaga

Aua le faatagaina faalavefau o le olaga e punitia ai le malamalama o le lagi.

le aso 21 o Aokuso o lenei tau-saga, e lua ni mea e le masani ona tutupu na gauai atu i ai le vaaiga a tagata i le salafa o le lalolagi. O le mea muamua o le faamanatuina o le 90 tausaga o lo tatou perofeta pele, o Peresitene Thomas S. Monson. I lena taimi, sa ou i ai i se tofiga i le Eria o le Pasefika ma na faagaeetia e le gata i le iloaina e le Au Paia i Ausetalia, Vanuatu, Niu Sila, ma Farani Polenia o lana matatia faale-tagata lava ia, ae sa latou fiafia foi i le faamanatuina. Sa ou lagona le faa-manuiaina e avea ma se vaega o le

latou faaaliga mafana o le faatuatua ma le alofa mo lenei tamalii maoae. O se uunaiga le vaaia o le fesootaiga o loo faaalia e Au Paia o Aso e Gata Ai ma lo latou perofeta.

Ioe, o Peresitene Monson, i le sila-fia ai o i latou o e fia faamanuia atu lona aso fanau, ua faamatatalaina ai le mea na te mafaufauina o se meaalofa lelei o se aso fanau: "Saili se tagata o loo mafatia pe o gasegase pe o tuuatoatasi ma fai se mea mo i latou. Pau na o le mea ou te manao ai."¹ Matou te alolofa ma lagolagoina oe, Peresitene Monson.



Gasetoto o le La

O le isi mea e le masani ai ma e faaelagagi na tupu i le aso lava lea e tasi ma na tosinaina le faitau miliona o tagata i le lalolagi, o le gasetoto atoa lea o le la. O le taimi muamua lea ua sopoia ai e se gasetoto le Iunaite Setete atoa i le 99 tausaga.² Ua e vaai i se gasetoto o le la? Atonu e mafai ona ou faamatalaina auiliili atili lenei mea.

E gasetoto atoa le la pe a uia e le masina le va o le lalolagi ma le la, ma toetoe a punitia atoa ai soo se malamalama mai le la.³ O se mea ou te ofo ai le mafai ona tupu o lenei mea. Afai e te vaai faalemafaufau i le la e telē pei se pa'u masani o le uila, o le masina i le faatusatusa i ai, masalo e telē pei o se maamaa laitiit.

E faapefea e se malamalama o loo susulu mai i se tino selesitila telē ona punitia atoa e se mea e matua faatauvaa lava le faatusalia o le telē?

E ui e faa 400 le lapoa atu o le la nai lo le masina, e faa 400 foi le mamao ese mai le lalolagi.⁴ Mai se vaaiga mai le lalolagi, o lenei faatulagaga e foliga mai ai o le la ma le masina e talitutusa lava le tetelē. A tutu faatasi le toalua, e foliga mai o loo punitiaina e le masina le la atoa. O a'u uo ma aiga o e na i le eria lea na iloa atoa ai le gasetoto o le la, sa faamatala le auala na suitulaga ai e le pogisa le malamalama, sa iloa atu fetu, ma sa taofi le pepese o manulele. Na amata ona malulu le ea, aua e faaititia e le gasetoto le fua o le vevela i le silia ma le 20 tikeri Fahrenheit (11 tikeri Celsius).⁵

Sa latou faamatalaina se lagona o le maofa, ofo tele, ma o nisi taimi o le atuatuvala, i le iloaina e aumaia e se gasetoto nisi o tulaga lamatia. Peitai, e tatau ona latou faaeteete e puipui mai le faaleagaina tumau o mata po o le "gasetoto tauaso" i le taimi e tupu ai le gasetoto. Sa maua le saogalemu aua sa latou faaaogaina matatioata ua faaaupegaina i tioata tiufasolo faapitoa lea e puipua o latou mata mai soo se tulaga lamatia faamoemoeina.

O Le Tala Faatusa

I le tulaga lava e tasi lea e mafai ai e se tamai masina ona punitia le la



maoae, faatamaia ai lona malamalama ma le mafanafana, e mafai ona tupu se gasetoto *faaleagaga* pe a tatou faatagaina ni faalavefau laiti ma atuatuvala—ia tatou te fetai i o tatou olaga masani—ia faalatalata atili mai ma latou punitia ai le tulaga maoae, susulu, mafanafana o le malamalama o Iesu Keriso ma Lana talalelei.

Na faalautele mai e Elder Neal A. Maxwell lenei tala faatusa ina ua ia saunoa mai: "E oo lava i se mea laitiiti e pei o se limamatua o se alii, pe a tuu faalatalata atu i le mata, e mafai ona faatausoina o ia mai le la tele lava. Ae o loo i ai lava iina le la. O le tauaso e mafua mai i le tagata lava ia. A tatou taulai tele atu i mea e le taua, o le faamuamuina o i latou e punitia ai le tatou vaaiga mamao i le lagi."⁶

E manino lava e leai se tasi o i tatou e manao e punitia e aunoa ma se mafuaaga le tatou vaaiga mamao atu i le lagi pe faataga se gasetoto faaleagaga e tupu i o tatou olaga. Sei ou faaso atua ni manatu e mafai ona fesoasoani ia i tatou i le puipua mai le gasetoto faaleagaga lea e mafua ai le faatamaia tumau faaleagaga o i tatou.

Matatioata Faaletalalelei: Faatumauina o se Vaaiga Faaletalalelei

Tou te manatuaina la'u faamatalaga e uiga i matatioata faapitoa e faaaoga e puipua ai le faatamaia o mata po o le tauaso mai le gasetoto o le la? O le vaa

atu i se gasetoto faaleagaga e ala atu i tioata malupupiuia ma faamaluina a le Agaga e aumaia ai se vaaiga o le talalelei, ma puipua ai i tatou mai le tauaso faaleagaga.

Tatou mafaufau i nai faataitaiga. O le i ai o upu a perofeta i o tatou loto ma le avea o le Agaga Paia ma o tatou fesoasoani, e mafai ai ona tatou pulatoa atu i se malamalama faalelagi ua punitia sina vaega e ala atu i "matatioata faaletalalelei."

E faapefea la ona tatou faaaogaina o tatou matatioata faaletalalelei? O nisi nei o faataitaiga: Ua tau mai e o tatou matatioata faaletalalelei ia i tatou e finagalo le Alii ina ia tatou aai ma feinu i le faamanatuga i vайасо таитаси ма e Na te finagalo foi ia tatou suesue i tusi-tusiga paia ma faia tatalo i aso taitasi. Ua latou faailoa mai foi ia i tatou o le a faaosoozoina i tatou e Satani ia aua le faia. Ua tatou iloa o lana mataupu o le saili e aveese lo tatou fitalia e ala i faatosinaga ma faaosoozoga faalelalagi. E oo lava i aso o Iopu, atonu na i ai nisi na aafia i se gasetoto faaleagaga, ua faamatalaina: "Latou te fetai i ma le pouliuli i le ao, ma tautagotago i le aoaulli e peiseai o le po."⁷

Uso e ma tuafafine, a ou talanoa atu e uiga i le vaai atu e ala i matatioata faaletalalelei, faamolemole ia silafia ou te le o fautua atu ia aua nei o tatou faailoaina pe talanoaina luitau e feagai ma i tatou po o le tatou savavali fiafia ma le le nofouta i mailei ma mea leaga ua tuuina e le fili i o tatou luma. Ou te le o talanoa atu i le faaaogaina o tioata pogisa—ae o le faafeagai. O loo ou fautua atu ina ia tatou vaavaai atu i luitau e ala atu i tioata faaletalalelei. Ua matauina e Elder Dallin H. Oaks faapea "o le vaaiga o le gafatia lea e vaai atu i faamatalaga uma e faatatau i ai i se fesootaiga anoa."⁸ O se vaaiga faaletalalelei e faalauiteleina lo tatou vaai atu i se vaaiga faavavau.

A e faaaogaina matatioata faaletalalelei, o le a maua le taulaiga ma le vaaiga mamao i le ala o e mafaufau ai e uiga i au mea e faamuamuua, ou faafitauli, ou faaosoozoga, ma e oo lava i au mea sese. O le a e vaai atu i le malamalama susulu atu e le mafai ona

e vaai i ai e aunoa ma ni [matatioata faaletalalelei].

O le mea e ese ai, e le na o mea le lelei e mafua ai se gasetoto faaleagaga i o tatou olaga. E masani lava, o gaoioiga mataina pe lelei foi lea tatou te tuuto atu i ai i tatou lava, e mafai ona latalata tele mai ua latou punitia ai le malamalama o le talalelei ma aumaia ai le pouliuli. O nei tulaga lamatia po o faalavefau e aofia ai le aotauina ma le faamanuiaina, mana ma faatosinaga, naunautaiga, e oo lava i taleni ma mealofa.

Na aoao mai Peresitene Dieter F. Uchtdorf faapea “soo se amioga lelei pe a soona fai e mafai ona avea ma mea leaga. . . . E i ai le taimi e mafai ai ona avea mea tatou te ausia ma faalavefau, ae avea faamoemoega ma ni mea faasalavei.”⁹

Sei ou faasoaina atu ni faataitaiga auiiliili maoae e mafai ona avea ma elemene ola mo le aloese mai o tatou lava gasetoto faaleagaga.

Ala o Faasalalauga Faaleagafesootai

I nai masina talu ai sa ou lauga ai i le Konafesi a Tamaitat i BYU.¹⁰ Sa ou faamatalaina le ala e faasalalau atu ai e tekinolosi o ala faasalalau faagafesootai “le malamalama o se Faaola . . . i atunuuma, ituaiga, gagana, ma tagata.”¹¹ O nei tekinolosi na aofia ai uepisaita a le Ekalesia e pei o le LDS.org ma le Mormon.org, polokalama o masini feaveai e pei o le Potutusi o le Talalelei, Alaata Mamona, LDS Tools, ma le Family Tree; ma polokalama o ala o faasalalauga faagafesootai e aofia ai le Facebook, Instagram, Twitter, ma le Pinterest. Ua mauaina e nei polokalama o ala o faasalalauga faagafesootai le faitau selau ma miliona o likes, faasoaa, maimoa, retweets, ma pins ua matua lelei ma vave i le faasoaina atu o le talalelei i aiga, uo, ma paaga.

Ae ui i lea, mai amioga lelei uma ma le faaaogaina talafeagai o nei tekinolosi, e i ai ni lamatia o fesootai ma i latou pe a faalatalata tele atu i ai, e mafai ona tuuina i tatou i se gasetoto faaleagaga ma punitia ai le malamalama ma le mafanafana o le talalelei.

O le faaaogaina o ala o faasalalauga faagafesootai, polokalama o masini feaveai, ma taaloga e mafai ona matua faamaumau taimi ma faaitiitia ai fesootaiga faafesagai. O lenei leiloa o talanoaga faaletagata lava ia e mafai ona taofia ai le atiaeina o tomai faagafesootai ma suitulaga i faataitaiga faaleagaga taua, aemaise i le autalavou.

E lua tulaga lamatia e faatatau i ala faasalalau faagafesootai o le faafoliga ma faatusatusaga faavaivailoto.

O le tele o ata ua tuu i luga o ala o faasalalauga e foliga mai o loo faaaliai ai le olaga i le tulaga sili—e masani lava e le talafeagai. Ua tatou vaai uma lava i ata matagofie o sitaili o fale, nofoaga matagofie mo tafaoga, ata o tagata o ataata, faamatalaga o sauniga o meaai, ma ata o tino e foliga e le mafai ona maua.

Ia, mo se faataitaiga, o se ata atonu e te vaai i ai i luga o se fai totoa o ala o faasalalauga faagafesootai a se tagata. Peitai e le o maua *atoa* le ata o le mea *moni* o loo tupu i le olaga.


A tatou faatusatusa i ai o tatou lava olaga masani ma olaga o isi ua lelei le manamuina e pei ona faaaliai i luga o ala o faasalalauga faagafesootai, o nisi taimi e tuua ai i tatou ma lagona o le lotovaivai, lotovale, ma le toilalo e pei ua tatou leiloa i le olaga.

O se tagata se toatasi lea na faasoaa mai ni ona lava ata se tele, sa fai mai, masalo i se tulaga taufaalili, “O le a se mea e fiafia fua ai pe afai e te le tuuina i luga?”¹²

Sa faamanatu mai ia i tatou e Sister Bonnie L. Oscarson i lenei taeao, o le manuia i le olaga e le o le tele o likes ua tatou maua po o le tele o uo ua tatou maua i ala faasalalau faagafesootai. Peitai, e i ai se uiga i le fesootai anoa ma isi ma faaopoopo atu le malamalama i o latou olaga.

Talosia, e mafai ona tatou aoao ia sili atu le moni, saili nisi uiga malie, ma faaitiitia le lotovaivai pe a fetaiai ma ni ata o loo faaali mai ni tulaga faafoliga ma e masani ona taitai atu ai i faatusatusaga faavaivailoto.

O le faatusatusa e foliga mai e le na o se faailoga o o tatou taimi ae o taimi foi ua mavae. Sa lapataia e le Aposetolo o Paulo tagata o lona taimi “o loo fefuafuai i latou ia te i latou, ma



O le ata na tuuina i luga o ala faasalalau faagafesootai e lei maua ai le ata atoa o le mea moni o loo tupu i le olaga moni.

fefaatusatusai i latou ia te i latou, e le popoto i latou.”¹³

Faatasi ai ma le tele naua o faaaogaaga talafeagai ma musuia o tekinolosi, sei o tatou faaaogaina e aoao atu ai, musuia, ma siitia i tatou lava atoa ai ma le uunaia o isi ina ia avea ma o latou tagata sili ona lelei—nai lo le faaali atu o o tatou tagata faafoliga. E tatau ona tatou faia mea uma tatou te mafaia e aoao atu ai ma faataitai ia faaaogaaga amiotonu o tekinolosi i le tupulaga faiae ma lapataia i tulaga lamatia e faatatau i ai ma le faaaogaina le lelei. O le maimoaina o ala o faasalalauga faaagafesootai i tioata o le talalelei, e mafai ai ona tatou taofaina mai le avea o se gasetoto faaleagaga i o tatou olaga.

Faamaualuga

Sei o tatou talanoa nei i le puniala ua loa tausaga, o le faamaualuga. O le faamaualuga o le faafeagai o le lotomaualalo ma o se naunau lea e gauai atu i le finagalo o le Alii.”¹⁴ A faamaualuga, tatou te mananao ia avatu le mamalu ia i tatou lava nai lo le tuuina atu i isi, e aofia ai le Alii. O le faamaualuga e masani lava o le faatautava; o le lilifa atu i le sailiga ia sili atu mea ua maua ma mafaufau ua tatou sili atu nai lo isi. O le faamaualuga e masani ona iu i lagona o le ita ma le inoino; e mafua ai le ita o se tasi po o le taofia ai o le faamagalo atu. Ae peitai, o le faamaualuga e mafai ona taomia ai i le uiga faaKeriso o le lotomaualalo.

O mafutaga, e oo lava i aiga vavalata ma e pele ia i latou, *aemaise lava* i aiga vavalalata ma e pele ia i latou—e oo foi i va o tane ma ava—e atiaeina i le lotomaualalo ae taofiofia e le faamaualuga.

I le tele o tausaga ua tea, na valaau mai se pule o se faleoloa tele ia te a'u e talanoa e uiga i lana kamupani, lea ua faatau e se tasi o ana tagata faipisini faatauva. Sa matua popole lava o ia ma le tele o isi tagata faigaluega i le laumua e ono leai ni a latou galuega. O le iloaina sa lelei le ma masaniga ma le pule sinia o le kamupani o le a faataua, sa ia fesili mai ai pe mafai ona ou faailoa atu o ia ma tuu atu se upu lelei mo

ia, e oo lava i le setiina o se feiloaiga mo ia. Ona ia faaiu lea i le faamatalaga lenei: “Ua e iloa le latou tala? ‘E fano e agamalu!’”

Sa ou malamalama i lana tala ma faapea ua fuafua e avea o se tala malie. Sa ou mauaina le tala malie. Ae sa i ai se mataupu faavae taua lea na ou lagona atonu e aoga ia te ia. Sa ou tali atu, “E moni lava, ae e le o le latou tala lena. O le mea moni, ua na o se faafeagai. ‘O e agamalu . . . [e] fai mo o latou tofi le lalolagi’¹⁵ o le latou tala lena.”

I lou aafiaga i le Ekalesia faapea foi i la'u matata faigaluega, o nisi o tagata maoae, sili ona lelei ua ou iloa o tagata sili ona agamalu ma lotomaualalo.

O le lotomaualalo ma le agamalu e ogatusa lava. Ia tatou manatua “e leai se tasi e ono talia i luma o le Atua, vagana ai i latou o e ua agamalu ma maulalalo i le loto.”¹⁶

Ou te tatalo o le a tatou taumafai e aloese i le gasetoto faaleagaga o le faamaualuga i le taliaina o le uiga o le lotomaualalo.

Faaiguag

I se faaiuga, o le gasetoto o le la, e moni, o se mea ofoofogia o le natura lea e mafai ona uitia atoa ai le tulaga matagofie, mafanafana, ma le malamalama o le la e ala i se mea faatauvaa, ma mafua ai le pouliuli ma le malulu.

O se mea ofoofogia foi talitutusa e mafai ona toe faia i se tulaga faaleagaga, pe afai o isi mea laiti ma lē taua e faatagaina e faalatalata mai ma punitia ai le matagofie, mafanafana, ma le malamalama faalelagi o le talalelei a Iesu Keriso, e sui ai i se pouliuli malulu.

O matatioata ua mamanuina e puipui ai le vaaiga a i latou o i le vaega o le gasetoto atoa o le la e mafai ona puipua mai ai i le faaleagaina tumau ma e oo lava i le tauaso.¹⁷ O matatioata faaletalalelei o loo aofia ai se malamalamaaga ma le molimau e uiga i mataupu faavae o le talalelei, ma o sauniga ua sauniaina se vaaiga faaletalalelei lea e talitutusa lava ona saunia se puipuiga sili atu faaleagaga ma le manino mo se tasi o aafia i lamatiaga o se gasetoto faaleagaga.

Afai e te iloaina soo se mea e foliga mai o loo punitiaina le malamalama ma le olioli o le talalelei i *lou* olaga, ou te valaaulia oe e tuu i se vaaiga faaletalalelei. Vaavaai e ala atu i ni tioata faaletalalelei ma ia mataalia e aua le faatagaina ni mea e le taua i le olaga e faanenefuina lau vaaiga e faavavau o le fuafuaga sili o le fiafia. I se faapuupuuga, aua nei faatagaina faalavefau o le olaga e punitia ai le malamalama o le lagi.

Molimau

Ou te molimau atu po o le a lava se faalavefau o ono punitia ai la tatou vaaiga o le malamalama o le talalelei, o loo i ai lava iina le malamalama. O lena punavai o le mafanafana, upumoni, ma le susulu o le talalelei lea a Iesu Keriso. Ou te molimau atu i se Tama Faalelagi alofa; i Lona Alo, o Iesu Keriso, ma le matafaioi a le Alo o le avea ma o tatou Faaola ma Togiola. I le suafa, o Iesu Keriso, amene. ■

FAAMATALAGA

1. Thomas S. Monson, i le Sarah Jane Weaver, “What Gift Does President Monson Want for His Birthday?” *Deseret News*, Aug. 17, 2017, deseretnews.com.
2. Tagai Christina Zdanowicz ma Judson Jones, “An Eclipse Will Cross the US for the First Time in 99 Years,” July 24, 2017, cnn.com.
3. Tagai “Gasetoto: O ai? E a? O fea? O afea, ma le E Faapefeta?” eclipse2004.nasa.gov.
4. Tagai EarthSky in Space, “Coincidence That Sun and Moon Seem the Same Size?” earthsky.org.
5. Tagai Brian Lada, “5 Surprising Effects the Total Solar Eclipse Will Have besides Darkness,” accuweather.com.
6. Neal A. Maxwell, *Of One Heart: The Glory of the City of Enoch* 1975), 19.
7. Iopu 5:14
8. Saunoaga a Dallin H. Oaks, na tuuina atu i le faeasaite a le Siteki o Sate Leki Bonneville mo Talavou Nofofua Matutua, i le Aai o Sate leki, Iuta, 8 Feb., 2015.
9. Dieter F. Uchtdorf, “E Uiga i Mea e Sili Ona Taua,” *Liahona*, Nov. 2010, 20.
10. See Gary E. Stevenson, “The Knowledge of a Savior Brigham Young University Women’s Conference, May 5, 2017).
11. Mosaea 3:20
12. Jade, “The Obsession of Creating a Picture-Perfect Life on Social Media.”
13. 2 Korinito 10:12.
14. Tagai *Tala'i La'u Talalelei: O Se Taiala mo le Galuega Faafeautalai* (2004), 129.
15. Mataio 5:5; 3 Nifae 12:5.
16. Moronae 7:44.
17. Tagai “Solar Eclipse and Your Eyes,” preventblindness.org.



Saunia e Stephen W. Owen
Peresitene Aoao o Alii Talavou

O Le Salamo o se Mea Lelei

O le taimi lava tatou te tuvae ai i luga o le ala o le salamo, ua tatou valaaulia le mana togiola a le Faaola i o tatou olaga.

le tele o tausaga ua mavae, sa auai atu ai Peresitene Gordon B. Hinckley i se taaloga lakapi [amerika] a le kolisi. Sa susu mai e logo mai o le a faaigoa le falemaimoa i le faiaoga alofagia ua loa ona i ai a le ‘au, o le e le o toe mamao ona litaea lea. Sa matua naunau lava le ‘au ia malo i le taaloga e faamamalu ai le latou faiaoga. Sa valaaulia Peresitene Hinckley e asiiasi ane i le potu sui e avatu ni upu faamalosiau. Uunaia i ana upu, na malo lena ‘au i lena aso i lena taaloga ma faaiuina le taamilosaga ma se faamaumauga o le manumalo.

I le asō, ou te fia talanoa atu ia i latou o e atonu latou te le o manumalo i le olaga. O le mea moni, “ua agasala tagata uma lava, ma ua le oo i le viiga mai le Atua.”¹ Atonu o i ai ni vaitau i taaloga e le faiaina ai, ae e leai ni mea i le olaga. Ae ou te molimau atu na faatinoina e le Faaola o Iesu Keriso se Togiola atoatoa ma tuuina mai ia tei tatou le meaalofa o le salamo—o lo tatou ala e toe foi ai i se faamoemoega atoatoa ma se olaga manumalo.

O Le Usiusitai e Aumaia le Fiafia

E tele taimi tatou te mafaufau ai o le salamo o se mea e faanoanoa ma

te maua ai le avanoa i le alofa tunoa togiola o Iesu Keriso. O le salamo . . . e faasino atua i tatou i le saolotoga, mautinoa, ma le filemu.”³ O la’u savali i tagata uma—aemaise o le autalavou—o le salamo o se mea lelei.

Pe a tatou talanoa i le salamo, tatou te le na ona talanoa e uiga i taumafaiga o le faaleleia o oe lava. O le salamo moni e sili atu i lo lena—e musuia e le faatuatua i le Alii o Iesu Keriso, ma Lona mana e faamagalo ai a tatou agasala. E pei ona sa aoao mai i tatou e Elder Dale G. Renlund, “A aunoa ma le Togiola, . . . e avea le salamo ua na o se fesuiaiga faanoanoa o le amio.”⁴ E mafai ona tatou taumafai i tatou lava e suia la tatou amio, peitai ua na o le Faaola lava e mafai ona aveesea o tatou pisia ma sii ese a tatou avega, ma mafai ai e i tatou ona tulimatai ma le mautinoa le ala o le usiusitai ma le malosiaga. O le olioli i le salamo e tele atu nai lo le na o le olioli o le ola i se olaga e onomea. O le olioli ona o le faamagaloina, o le toe mama, ma le latalata atili atu i le Atua. A oo ina e iloa lena olioli, e leai a se isi mea i lalo ifo e suitulaga ai.

O le salamo moni e musuia i tatou ia avea lo tatou usiusitai o se tau-tinoga—o se feagaiga, e amata i le papatisoga ma e faafou i vaiaso taitasi i le talisuaga a le Alii, o le faamanatuga. O iina tatou te maua ai le folafolaga e

mamafatu. Ae o le fuafuaga a le Atua o le fuafuaga o le fiafia, e le o se fuafuaga o le faanoanoa! O le salamo e faagaetia ma faaeaea. O le agasala e aumaia le le fiafia.² O le salamo o lo tatou ‘aula ‘alo lea! E pei ona sa faamalamalama mai e Elder D. Todd Christofferson: “A aunoa ma le salamo, e leai se alualu moni i luma po o se faaleleia atili i le olaga. . . . Ua na o le salamo lava tatou



mafai ona “tatou maua pea lona Agaga e faatasi ma i [tatou],”⁵ faatasi ai ma le olioli uma ma le filemu e aumai mai Lona mafuta mai pea e le aunoa. O le fua lena o le salamo, ma o le mea lena e afua ai ona o se mea fiafia le salamo!

O Le Salamo e Moomia ai le Tumau Maua’i

Ou te fiafia lava i le faataoto i le atalii faamaumau oa.⁶ E i ai se mea faamomoiloto i lena taimi taua na “atamai ai” le atalii faamaumauoa. A o nofonofo i le sai o mea i tuaolo, ua tupu lona manao i “atigi mea e ‘aina e puua ia ma’ona ai o ia,” sa iu ina ona iloaina e le gata ina sa ia faamaumauina le tofi mai lona tama ae o lona lava ola. Faatasi ai ma le faatuatua atonu e toe talia o ia e lona tama—afai e le talia o ia o se atalii ia tau lava o se auauna—sa naunau o ia e lafoai lona fouvale sa i ai, ae foi i le fale.

E tele ina ou mafaufau i le savaliga umi a le atalii i le fale. Pe na i ai ni taimi na faatuatua ai ma tau mafaufau “Mata e toe talia a’u e lo’u tama? Atonu na toe laalaa teisi i tua i mea i tuaolo. Manatu faalemafaufau i le eseesege semanu e i ai le tala pe ana fiu o ia. Ae o le faatuatua na tuleia o ia, o le faatuatua foi na saga autilo ai foi ma faatalitali ma le onosai lona tama, seia i'u ina oo mai le taimi.

“Ua iloa mamao atu foi o ia e lona tama, ona mutimuti vale lea o lona alofa, ua momoe atu o ia, ua fusi ia te ia, ma sogi atu ia te ia.

“Ua fai mai le atalii ia te ia, Lo’u tama e, ua ou agasala i Le o i le Lagi atoa ma ou luma, ua ou le toe aoga ona ta’ua o lou atalii.

“Ua fai atu le tama i ana auauna, Aumai ia le ofu tatapuvae e aupito lelei, ma faafou ia te ia; ma ia tuu se mama i lona lima, ma faasee i ona vae: . . .

“Aua o lou atalii lenei, na oti, ua toe ola mai; na le iloa foi o ia, a ua maua.

O Le Salamo e Mo Tagata Uma

Uso e ma tuafafine, o i tatou uma o faamaumau oa. E tatou ia i tatou uma ona “tatou atamamai”—e masani lava e sili atu i le tasi—ma filifili le ala e toe foi ai i le fale. O se filifliga tatou te faia i aso taitasi, i o tatou olaga atoa.



E tele ina tatou tuu faapaagaina le salamo ma agasala mataga lea e manaomia ai “se suiga tele.”⁷ Peitai o le salamo e mo tagata uma—o i latou o loo feofeo’i i “ala faasaina ma [ua] leiloloa”⁸ faapea foi i latou o e “ua i ai i [le] ala lauititi ma le vaapiapi” ma ua manaomia nei ona “fetaomi i luma.”⁹ O le salamo e tuua i tatou i luga o le ala sa’o ma tausisia i tatou i luga o le ala sa’o. E mo i latou o e ua faatoa amata ona talitonu, o i latou o e o loo talitonu pea lava, ma i latou o e ua manaomia ona toe amata ona talitonu. E pei ona aoao mai Elder David A. Bednar: “O le toatele o i tatou ua malamalamalama lelei o le Togiola e mo tagata agasala. Ae peitai, ou te le o mautinoa lelei, pe ua tatou iloa ma malamalamalama o le Togiola e mo tagata paia foi—mo alii ma tamaitai lelei o e usiusitai, agavaa, ma . . . taumafai ia lelei atu.”¹⁰

Talu ai nei sa ou asiasi atu ai i le nofoaga autu e aoao ai faifeautalai i le taimi sa faatoa taunu ai se vaega o faifeautalai fou. Sa matua tuia lava lo’u loto a o ou matamata atu ia te i latou

ma matauina le sulu i o latou mata. Sa foliga ua matua susulu i latou ma fiafia ma naunautai. Ona oo mai ai lea o se manatu ia te au: “Ua latou faatuatua ma ua salamo. O le mafuaga lea ua faatumulia ai i latou i le olioli ma le faamoemoe.”

Ou te le manatu faapea o lona uiga na i ai uma ni o latou solitulafono matuia i aso ua mavae, ae ou te manatu sa latou iloa le ala e salamo ai; sa latou aoaoina o le salamo e lelei; ma sa latou saunia ma ua naunautai e faasoa atu lenei savali fiafia i le lalolagi.

O le mea lea e tupu pe a tatou lagonaina le olioli o le salamo. Mafaufau i le faataitaiga a Enosa. Sa i ai foi lana lava taimi “ua oo ina atamai o ia” ina ua “tafi ese [lona] lagona o [ona] sese,” sa vave ona liliu atu lona loto mo le manuia o isi. Sa faaalu e Enosa aso na totoe o lona ola e valaaulia ai tagata uma e salamo ma “fiafia i ai i lo o mea o le lalolagi.”¹¹ O le mea lena e faia e le salamo; na te faaliliu atu o tatou loto i o tatou uso a tagata, aua ua tatou iloa o le olioli ua tatou lagonaina e mo tagata uma lava.

O Le Salamo o se Tulimataiga i le Olaga Atoa

E i ai sa'u uo sa ola a'e i se aiga e le malolosi o le Au Paia o Aso e Gata Ai. A o avea o ia o se talavou matua, sa oo foi "ina atamai o ia" ma sa tonu ai o le a sauniuni mo se misiona.

Sa avea o ia ma se faifeautalai lelei tele. I lona aso mulimuli a o lei taliu mai i le fale, sa faatalanoaina o ia e le peresitene o le misiona ma sa fai atu i ai e fai sana molimau. Sa ia faia, ma ina uma se feopoa'iga i loimata, sa fai atu le peresitene o le misiona, "Elder, e mafai ona galo ia te oe pe faafitia foi mea uma ia sa faatoa e molimau mai ai, i ni nai masina pe afai e te le faaauau pea ona e faia o mea sa fausia ai lau molimau i le uluai taimi."

Sa ta'u mai e la'u uo mulimuli ane, sa ia tatalo ma faitau tusitusiga paia i aso taitasi talu ona foi mai o ia mai lana misiona. O le "fafagaina [pea e le aunoa] i le upu lelei a le Atua" na tausisia ai o ia "i le ala sa'o."¹²

Outou na o loo sauniuni mo misiona tala'i ma outou na ua foi mai, ia manatua! E le lava ona tau ina maua o se molimau; e tatau ona e tausia ma faamalosia. E pei ona silafia e faifeautalai uma, afai e tuu lou viliina o se uila, o le a pa'ū, ma a tuu foi lou fafagaina o lau molimau, o le a faavaivaia. E faataatau foi lena lava mataupu faavae i le salamo—o se tulimataiga i le olaga atoa, e le o se aafiaga e tasi i le olaga.

Ia i latou uma o e o loo sailia le faamagaloga—le autalavou, talavou nofofua matutua, matua matutua, ioe, e oo lava i matua o matua matutua—Ou te valaaulia outou e foi mai i le fale. O le taimi lenei e amata ai. Aua le faatuai lou aso e salamo ai.¹³

Ona, a e faia loa lena faaiuga, ia tatao ai pea i le ala. O loo faatalitali mai lo tatou Tama, o loo naunau mai e talia oe. O loo faaloaloa mai Ona aao "i le aso atoa" mo oe.¹⁴ E matua tauia le taumafaiga!

Manatua nei upu mai ia Nifae: "E tatau ona outou fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaomi atu i luma,



ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai o le Tamā: O le a outou maua le ola e faavavau"¹⁵

O nisi taimi e foliga ai e umi le malaga—o le mea moni, o le malaga e tau atu i le ola e faavavau. Ae e mafai ona avea ma malaga fiafia pe afai tatou te tulimata'i ma le faatuatua ia Iesu Keriso ma le faamoemoe i Lana Togiola. Ou te molimau atu o le taimi lava tatou te tuvae ai i luga o le ala o le salamo, ua tatou valaaulia le mana togiola a le Faaola i o tatou olaga. O lena mana o le a faamausaliina o tatou vae, faalauete la tatou vaaiga, ma faaloloto la tatou faaiuga e tausia ma agai i luma, i lea laa ma lea laa, seia oo i lena aso mamalu o le a tatou toe foi atu ai i lo tatou aiga faalelagi ma faologoina lo

tatou Tama oi le Lagi o tulei mai ia te i tatou, "Ua lelei ia."¹⁶ I le suafa, o Iesu Keriso, amene. ■

FAAMATALAGA

1. Roma 3:23.
2. Tagai Alema 41:10.
3. D. Todd Christofferson, "O Le Meaalofa Paia o le Salamo," *Liahona*, Nov. 2011, 38.
4. Dale G. Renlund, "Salamo: O Se Filifiliga Fiafia," *Liahona*, Nov. 2016, 122.
5. Mataupu Faavae ma Feagaiga 20:77.
6. Tagai Luka 15:11–32.
7. Alema 5:12.
8. 1 Nifae 8:28.
9. 2 Nifae 31:19–20.
10. David A. Bednar, "O Le Togiola ma le Malaga i le Olaga Faitino," *Liahona*, Apr. 2012, 14.
11. Tagai Enosa 1.
12. Moronae 6:4.
13. Tagai Alema 13:27.
14. Iakopo 6:4.
15. 2 Nifae 31:20.
16. Mataio 25:21.



Saunia e Elder Quentin L. Cook
O Le Korama a Aposetolo e Toasefululua

O Le Faavavau o Aso Uma

O le lotomaualalo e uiga po o ai i tatou ma le faamoemoega o le Atua mo i tatou e taua.

Talu mai la'u auaunaga i le Misiona i Peretania o se taulealea, ua ou fiafia i uiga malie o Peretania. O nisi taimi e tino mai i se faiga e te tau-lima ai le olaga e ala i le tuu o oe lava i lalo, tauagafau, ma le lotomaualalo. O se faataitaiga o lea mea o se atatosi o le taumafanafana. O taumafanafana i Peretania e matuai pupuu lava ma e faafuasei ona oo mai. E pei ona ta'uua e se tasi o tusitala filemu, "Ou te fiafia i le taumafanafana a Peretania, o se *aso* e sili ona ou fiafia i ai i le tausaga."¹ O le tagata e sili ona ou fiafia i ai o le katuni Peretania sa faaalia i lona moega ua tuai ona ala i le taeao ma sa ia fai atu i lana taifau, "Oi aue! Pei ua ta moeumi ma misia ai le taumafanafana."²

E i ai se talafaatusa i lenei mea malie i lo tatou olaga i lenei lalolagi matagofie. E manino lava ia mau e faapea o lo tatou olaga i le tino o se taimi e puupuu tele. E mafai ona faapea atu mai se vaaiga o le faavavau, o lo tatou taimi i le lalolagi e matua puupuu lava e pei o le taumafanafana a Peretania.³

O nisi taimi o le faamoemoega o le tagata ma lona ola ai, e faamatalaina foi i ni faaupuga maualalo lava. O le perofeta o Mose na soifua a'e i le mea

atonu e faaigoa e nisi i aso nei, o se talaaga e le laumaua. E pei ona tusia i le Penina Tau Tele, o le Alii, i le tapenaina o Mose mo lona tofiga faaperofeta, na tuuina atu ia te ia se vaaiga aoao o le lalolagi ma le fanauga uma a tagata na i ai ma sa foafaina.⁴ O le tali tau atatuuvale a Mose: "O lenei . . . ua ou iloa ai o le tagata o se mea noa, o se mea ou te le'i mafaufauna lava."⁵

Mulimuli ane, i se mea na tino mai

o se faafitifiti i lagona o le le taua atonu na oo ia Mose, sa folafola mai ai e le Atua Lona faamoemoega moni: "Aua faauta, o la'u galuega ma lo'u mamalu lenei—ia aumaia le tino ola pea ma le ola faavavau o le tagata."⁶

Ua tutusa i tatou uma i luma o le Atua. Ua manino Lana aoaoga faavae. Ua tatou faitau i le Tusi a Mamona, "Ua tutusa tagata uma i le Atua," e aofia ai le "uliuli pe pa'epa'e, pologa pe saoloto, o tane ma fafine"⁷ O le mea lea, ua valaaulia tagata uma e o mai i le Alii.⁸

Soo se tasi e faasausili i lalo o le fuafuaga a le Tama ona o itu e pei o lanu, itupa, tagatanuu, gagana, po o tulaga tau i le tamaoiga e matuai sese lava ma e le malamalamā i le faamoemoega moni o le Alii mo fanau uma a lo tatou Tama.⁹

O le mea e leaga ai, i o tatou taimi e toetoe o vaega uma o faapotopotoga, ua tatou vaaia ai le olaola o le taua o le tagata lava ia ma le faasausili ae ua faitioina le lotomaualalo ma le tali atu i le Atua. O le tele o faalapotopotoga ua leiloa o latou faavae ma e po foi malae pe aisea ua tatou i ai i lenei lalolagi. O le lotomaualalo moni, lea e taua mo le faataunuina o le faamoemoega o le Alii mo i tatou, ua seasea vaaia.¹⁰

E taua le malamalamā i le maoae o le lotomaualalo, amiontonu, uiga, ma le atamai o Keriso e pei ona faaalia i tusitusiga paia. E faavalevalea le





manatu maualalo i le ttau o le taumafai pe a lava pea mo nei uiga auaumama faaKeriso ma uiga faaleatua i aso taitasi, aemaise lava o le lotomaualalo.¹¹

E manino ia mau e faapea e ui ina matua'i puupuu lenei olaga, ae e ttau lava. Na fai mai Amoleka, o le sa avea ma soa faifeautalai a Alema i le Tusi a Mamona, "O le olaga lenei o le taimi lea mo tagata e saunia ai e feiloai ma le Atua; ioe, faauta o le aso o le olaga lenei o le aso lea mo tagata e fai ai a latou galuega."¹² Tatou te le mananao e momoe loa i lenei olaga, faapei o la'u tagata o le ata katuni.

O le faataitaiga a le Faaola o le lotomaualalo ma le ositaulaga mo tagata uma, o le mea aupito maoae lea na tupu i le talafaasolopito. Sa naunau le Faaola, e ui o se tasi o le Aiga Atua, e sau i le lalolagi o se pepemeamea ma amata ai se soifuaga lea na aofia ai le aoao atu ma le faamalologa o Ona uso ma tuafine ma taualuga ai i tiga e le mafaamatatalaina i Ketesemane ma luga o le satauro ina ia faaatoatoa ai Lana Togiola. O lenei faatinoga o le alofa ma le lotomaualalo e Keriso ua lauiloa faapea o Lona faamaualalo.¹³ Na Ia faia lenei mea mo alii ma tamaitai uma ua foaoaina ma o le a foaoaina e le Atua.

E le finagalo lo tatou Tama Faalelagi e lotovaivai pe fiu Ana fanau i la latou sailiga mo le mamalu selesitila. Pe a tatou mafaufau moni i le Atua le Tama

ma Keriso le Alo, po o ai i La'ua, ma mea ua La ausia mo i tatou, e faatumilia i tatou i le migao, maofa, lotofafe-tai, ma le lotomaualalo.

O Lotomaualalo e Taua e Fesoasoani ai i le Alii e Faatu Lana Ekalesia

Sa fai e Alema se fesili e talafeauga foi i aso nei: "Afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei?"¹⁴ Sa faaauau le tala a Alema, "Pe afai e valaaulia outou e feoti i le taimi nei, . . . ua lava lo outou lotomaualalalo"¹⁵

O taimi uma lava ou te faitau ai e uiga ia Alema le Ititi o ositaulagaina lana matafaioi o se ao o le malo ina ia folafola le upu a le Atua,¹⁶ e faagaeetia au. E manino lava sa i ai se molimau maoae a Alema i le Atua le Tama ma Iesu Keriso ma sa lagonaina e tatau ona ia tali atoatoa atu ia i La'ua e aunoa ma se faatuai. Sa sa'o ana faamuamua ma le lotomaualalo e lafoai mamalu faale-nuu ma tulaga aua sa ia iloa e sili ona ttau le auauna atu i le Alii.

O le lava ma totoe o le lotomaualalo i o tatou olaga e fesoasoani ai i le faatuina o le Ekalesia e aupito taua. E fesoasoani se faataitaiga o le talafaasolopito o le Ekalesia tatou te malamalamai ai. Ia Iuni o le 1837, sa musuia ai le Perofeta o Iosefa Samita a o i ai

i le Malumalu o Katelani, e valaau le Aposetolo o Heber C. Kimball e ave le talalelei a Iesu Keriso i "Egelani . . . ma tatala le faitotoa mo le faaolataga o lena atunu."¹⁷ Sa tofia le Aposetolo o Orson Hyde ma ni isi e o faatasi ma ia. Sa ofoofogia le tali atu a Elder Kimball. "O le manatu i le tofia i se misiona taua sa toetoe ina a ou le gafataulimaina.

. . . Toetoe a [ou] sauni e magoto ifo i lalo o le avega sa tuu mai i o'u luga."¹⁸ Ae ui o lea, sa ia tauaveina le misiona ma le faatuatua a'iai, tautinoga, ma le lotomaualalo.

O nisi taimi o le lotomaualalo o le taliaina lea o valaauga pe a tatou lagona tatou te le agavaa. O nisi taimi o le lotomaualalo o le auauna atu ma le faamaoni pe a tatou lagona tatou te gafatia se tofiga e sili atu le taua. Ua faamautu mai e taitai lotomaualalo i saunoaga ma faataitaiga e le o le nofoaga tatou te auauna atu ai, ae o le ala tatou te auauna atu ai ma le faamaoni.¹⁹ O nisi taimi o le lotomaualalo o le faatoilaloa lea o lagona tiga pe a tatou manatu ua soona fai i tatou e taitai po o isi tagata.

I le aso 23 o Iulai, 1837 sa fono ai le Perofeta o Iosefa Samita ma Elder Thomas B. Marsh, Peresitene o le Korama a le Toasefululua. Na manino le le fiafia o Elder Marsh ina ua valauina e le Perofeta uso e toalua o lana Korama e o i Egelani e aunoa ma le logoina o ia. Ina ua feiloai Iosefa ma Elder Marsh, sa faataatia ese soo se lagona tiga, ma sa maua e le Perofeta se faaaliga ofoofogia. Ua avea nei ma vaega e 112 o le Mataupu Faavae ma Feagaiga²⁰ O loo aumai ai se taitaiga maoae mai le lagi e tusa ai ma le lotomaualalo ma le galuega faafafeautalai. Fuaiupu e 10 ua faitauina, "Ia e *lotomaualalo*; ona taitaiina ai lea o oe e le Alii lou Atua, ma tali atu i au talosaga."²¹

O lea faaaliga na tupu i le aso tonu lava na tautino atu ai e Elders Kimball, Hyde, ma John Goodson, i le lotomaualalo uma, le Toefuataiga mai o le talalelei a Iesu Keriso i le Falesa o Vauxhall i Preston, Egelani.²² O le uluia taimi lea na folafola atu ai e faifeautalai le talalelei toefuataiina i fafo atu o

Amerika i Matu i le tisipenisione lenei. O le taunuuga o la latou taumafaiga faafaifeatalai na toetoe o le taimi lava lea na maua ai papatisoga o e liliu mai ma oo atu ai ina toatele tagata auai faamaoni.²³

O vaega na sosoo ai o le faaaliga o loo taiala ai le taumafaiga a faafeatalai i ona po nei. Latou te faitau i se vaega, "Soo se tasi tou te auina atu i lo'u igoa . . . o le a i ai le mana e tatala ai le faitotoa o lo'u malo i soo se atunu . . . o le tulaga e oo i ai le latou *faamaualalalo* o i latou lava i o'u luma, ma tumau i lau upu, ma faalogo i le leo o lo'u Agaga."²⁴

O le lotomaualalo o se vaega taua o lenei taumafaiga maoae faafaifeatalai e mafai ai e le Alii ona faatu Lana Ekalesia i se ala ofoofogia.

Ma le faafetai, o loo tatou vaaia pea lea mea i le Ekalesia i ona po nei. Ua ofo atu e tagata o le au paia, e aofia ai ma le tupulaga faia'e o latou taimi ma tolopo le a'otauina ma galuega ina ia auauna atu i misiona. E toatele tagata matutua o le au paia ua tuua galuega ae faia isi osigataulaga ina ia auauna atu ai i le Atua po o le a lava le tulaga e valaauina ai i latou. Tatou te le faatagaina faafitauli faaletagata lava ia e faalavefauina pe seuseina i tatou mai le faataunuina o Ona faamoemoega.²⁵ O le auaunaga i le Ekalesia e manaomia ai le lotomaualalo. Tatou te auauna atu ma le lotomaualalo faatasi ai ma o tatou manatu, mafaufau, ma le malosi atoa. I vaega uma o le Ekalesia, e taua le malamalama i le uiga faaKeriso o le lotomaualalo.

O Le Lotomaualalo Faifaipea e Taua i le Fesoasoani e Saunia ai Tagata Taitoatasie e Feiloai ma le Atua

O le sini o le faamamaluina o le Alii ma le gauai atu o i tatou lava i Lona finagalo²⁶ ua le o faatauaina i faalapotopotoga i aso nei e pei ona sa i ai i aso ua mavae. E talitonu nisi taitai Kerisiano o isi faatuatuaga o loo tatou ola i se lalolagi ua le toe amanaia ai le faa-Kerisiano.²⁷

I le tele o augatupulaga, o le mana o le Judeo-Christian o le lotomaualalo ma amiomama faaleagafesootai o le

tauagafau ma le fetalai'i, o le tagavai taatele lea sa i ai.

I le lalolagi i ona po nei, ua i ai se faamamafa faateleina o le faamaulauga, manatu faasausili ia te ia lava, ma le mea ua ta'u'a o le "faafatonu" lea i nisi taimi e tau atu ai i le leai o se lotomaualalo moni. Fai mai nisi o mea moni e taua mo le fiafia i aso nei e aofia ai le "ia mao'i, ia malosi, ia fuatele mai—ma le mea e sili ona taua, aua le faalagolago i isi tagata . . . aua o lou manuia ua . . . i ou lava lima."²⁸

Ua fautuina mai e tusitusiga paia se isi faiga e ese ai. Ua fautua mai e tatau ona avea i tatou ma soo moni o Iesu Keriso. O lenei mea e aofia ai le faavaeina o se lagona mamana o le tali atu i le Atua ma se aga atu faamaualalo i le olaga. Na aoao mai e le Tupu o Peniamina o le tagata natura o se ita lea i le Atua, ma sa fautua mai e manaomia ona tatou gauai atu i tatou lava "i uunaiga a le Agaga Paia." Sa ia faamalamalama mai, faatasi ai ma isi mea, o lenei mea e manaomia ai le "usiusitai, agamalu, lotomaualalo, onosai, [ma le] tumu i le alofa"²⁹

Ua faaaoga sese e nisi le *talitonuina* o se faailogaga o le tagata natura ma uiga ia o ni faafeagai o le lotomaualalo, agalelei, alofamutimutivale, lotofaa-magalo, ma le amio solia. E mafai ona tatou faailogaina lo tatou lava tulagaese o ni fanau a le Atua e aunoa ma le faaaogaina o le ta'utalitonuina e fai ma 'alofaga o se amio e le o Keriso.

I la tatou tulimataiga mo le lotomaualalo, ua fatuina e le initonet i ona po nei ni luitau e 'alofia ai le faamaulauga. O faataitaiga e lua o le faiga faaloloto ia "tau lava o a'u e tilotilo mai i ai" po o le osofaia o isi i le faia o tusiga ita ma uumi i fesootaiga faaagafesootai. Toe tasi le isi faataitaiga o le "gugutu le 'aina." Ua faauigaina o "se faamatlagaga e foliga mai e tauagafau pe tuu ai oe lava i lalo [po o se atal] o lona faamoemoega moni lava o le faatosina mai lea i se mea o loo e mitamita ai."³⁰ Ua lapataia mai pea i tatou e perofeta e uiga i le faamaulauga ma faamamafa mai ai mea le aoga o le lalolagi.³¹

O le faateleina o le solofa ifo o fesootaiga faaaloalo ua avea foi ma



se popolega. O le mataupu faavae faavavau o le fitalia e manaomia ai lo tatou faaaloalogia o filifiliga e tele tatou te le ioeina. O taua ma fefinauaiga lea ua tele ina solia ai "tuaoi o aga masani faatamalii."³² Tatou te manaomia ia tele atu le tauagafau ma le lotomaualalo.

Ua lapatai mai Alema i le "faafefete a'e i luga i le faamaualuluga o outou lo," i le manatu faapea ua sili atu lo outou lelei nai lo o se tasi," ma le sauina o e lotomaualalo ua "savavali e tusa ma le faatulagaga a le Atua."³³

Ua ou maua le lelei faamaoni i tagata o faatuatuaga uma o e ua lotomaualalo ma lagonaina latou te tali atu i le Atua. O le toatele o i latou ua mulimuli i le perofeta o le Feagaiga Tuai o Mika, o le na tautino mai, "Se a foie mea e finagalo ai Ieova ia te oe, pe a le o ia mea, ia fai le amiontonu, ia naunau i le alofa, ma ia feoa'i ma lou Atua ma le loto faamaulalo?"³⁴

A oo ina tatou lotomaualalo faamaoni, tatou te tatalo mo le lotofaamagalo ma faamagalo atu foi i isi. Pei ona tatou faitaufina i le Mosaea, na aoao mai Alema e faapea o le tele o taimi e salamo ai, o le a faamagalo e le Alii a tatou solitulafono.³⁵ I se isi itu, e pei ona ta'u'a mai i le Tatalo a le Alii,³⁶ a tatou le faamagalo atu i solitulafono a isi, ua tatou aumaia i tatou lava i lalo o le ta'usalaga.³⁷ Ona o le Togiola a Iesu Keriso, ua faamagaloina ai a tatou agasala e ala i le salamo. A tatou le faamagalo atu i e agaleaga mai ia i tatou,

ua tatou teena le Togiola a le Faaola. O le teulotoina o se mea e le fiafia ai ma musu e faamagalo atu ma musu e tau-lima ma le lotomaualalo a tatou fegale-galeaiga i se ala faaKeriso o le a aumaia moni lava i tatou i lalo o le ta'usalaga. O le teulotoina o se mea e le fiafia ai o se mea oona i o tatou agaga.³⁸

Se'i ou lapatai atu foi faasaga i soo se ituaiga o faasausili. Ua faia e le Alii, e ala mai i le perofeta o Moronae se eseesege manino i le va o le faasausili ma le lotomaualalo: "E faatauemu e valelea, ae o le a faanoanoa i latou; ma ua lava lou alofa tunoa mo e agamalu." Na toe tautino atili mai le Alii, "Ou te avatu i tagata ia vaivaiga ina ia *faalotomaualalo* ai i latou; ma ua lava lou alofa tunoa mo tagata uma o e e latou te faalotomaualalo ai i latou lava i ou luma; aua afai latou te faalotomaualalo ina i latou lava i ou luma, ma faatuatua mai ia te au, ona ou faia lea o mea vaivai ia avea ma mea malolosi ia te i latou."³⁹

O le lotomaualalo e aofia ai le lotofaafetai mo o tatou mau faamanu-iaga ma fesoasoani mai le lag. O le lotomaualalo e le o se ausiaga iloga pe o se faatoilaloina o ni luitau maoae. O se faailoga o le malosi faaleagaga. O le mauaina o le mautinoa le leoa faapea e mafai ona tatou faalagolago i le Alii i lea aso ma lea aso o lea itula foi ma lea itula, e auauna atu ia te Ia, ma ausia ai Ona faamoemoega. Ou te tatalo o le a tatou taumafai pea lava pea i lenei lalolagi o fefinauaiga, mo le lotomaualalo moni i aso uma. Sa faaupu faapea e se solo e fiafia i ai:

*O le su'ega o le maoa'e o le ala lea E fetia'i ai le tagata ma le faavavau i Aso Taitasi.*⁴⁰

Ou te tuuina atu se molimau mautu i le Faaola ma Lana Togiola ma le taua lofituina o le auauna atu ia te Ia ma le lotomaualalo i aso taitasi ma aso uma. I le suafa, o Iesu Keriso, amene. ■

FAAMATALAGA

- Kathy Lette, in "Town and Country Notebook," ed. Victoria Marston, *Country Life*, June 7, 2017, 32; emphasis added.
- Annie Tempest, "Tottering-by-Gently," *Country Life*, Oct. 3, 2012, 128.
- Heber C. Kimball, "History of Heber Chase Kimball By His Own Dictation," ca. 1842–1856, Heber C. Kimball Papers, Church History Library; Orson F. Whitney, *Life of Heber C. Kimball, An Apostle; The Father and Founder of the British Mission* 1888), 116.
- Heber C. Kimball, "History of Heber Chase Kimball by His Own Dictation," 54; see



- Tagai Salamo 90:4. Pe puupuu pe umi e faatatau i tausaga o le lalolagi o tatou taimi o le olaga e matua puupuu lava mai se vaaiga e faavavau. "O mea uma ua pei o se aso e tasi i le Atua, ma ua nao le tagata ua fuaina le taimi" (Alema 40:8). Na tautino mai e le Apostolo o Peteru, "Le au pele, aua nei lilo ia te outou lenei mea e tasi, e tusa i luma o le Alii le aso e tasi ma tausaga e afe, o le afe foi o tausaga e tusa ma le aso e tasi" (2 Peteru 3:8).
- Tagai i le Mose 1:6–9. O Keriso lenei o loo fetalai atu ma le tuuina atu o le pule paia (tagai Aoaoga a Peresitene o le Ekalesia: Iosefa Filitia Samita [2013], 47, vaefaaamatagalaga 11).
- Mose 1:10.
- Mose 1:39.
- Nifae 26:33; tagai foi Mataupu Faavae ma Feagaiga 1:34–35; 38:16; Folafolaga Aloaia 2.
- Mataupu Faavae ma Feagaiga 20:37 e amataina, O i latou uma o e e faalotomaualalo ina i latou lava i luma o le Atua." Ona faatulaga ai lea o mea e manaomia mo le papatisoga. Tagai foi Mataio 11:28.
- Tagai Mataupu Faavae ma Feagaiga 20:37.
- Ua tatou iloa afai tatou te le salamo, maua sauniga, ma mulimuli i le ala o feagaiga lea e saunia ai i tatou mo le faavavau, "ona oo mai lea o le po o le pouliuli e le mafai ona faia ai o se galuega" (Alema 34:33).
- Tagai 3 Nifae 27:27.
- Alema 34:32.
- Tagai 1 Nifae 11:26–33; 2 Nifae 9:53; Iakopo 4:7; Mataupu Faavae ma Feagaiga 122:8.
- Alema 5:26.
- Alema 5:27.
- Tagai Alema 4:19.
- Heber C. Kimball, "History of Heber Chase Kimball By His Own Dictation," ca. 1842–1856, Heber C. Kimball Papers, Church History Library; Orson F. Whitney, *Life of Heber C. Kimball, An Apostle; The Father and Founder of the British Mission* 1888), 116.
- also Orson F. Whitney, *Life of Heber C. Kimball*, 116.
- Na aoao mai e Peresitene J. Reuben Clark, "I le galuega a le Alii, e le o le mea e te auauna atu ai ae o le auala. I le Ekalesia a Iesu Keriso o le Au Paia o Aso e Gata Ai, e tulai mai le e tofia i le tulaga e tofia ai, ma o lea tulaga e le sailia e se tasi pe teena foi" (in Conference Report, Apr. 1951, 154).
- Tagai *The Joseph Smith Papers, Documents, Volume 5: October 1835–January 1838*, ed. Brent M. Rogers and others (2017), 412–17. Na lipotia mai e Vilate Kimball i se tusi i lona toalua o, Heber C. Kimball, na ia kopu maia le faaaliga mai le tusi a "Elder Marshs a o ia tusia mai le fofoga o Iosefa" (Vilate Murray Kimball to Heber C. Kimball, Sept. 6, 1837, in *The Joseph Smith Papers, Documents, Volume 5: October 1835–January 1838*, 412).
- Mataupu Faavae ma Feagaiga 112:10; faaopoopo le faamamafa.
- Tagai Orson F. Whitney, *Soifiuaga o Heber C. Kimball*, 136–37.
- Tagai Orson F. Whitney, *Soifiuaga o Heber C. Kimball*, 149
- Mataupu Faavae ma Feagaiga 112:21–22; ua faaopoopo le faamamafa.
- "E ui tatou te le fesili atu ina ia faamaloloia mai se valauga, afai e suaia o tatou tulaga. e talafeagai lava mo i tatou le fefauatai ma i latou na tuuina mai le valauga ona taatia lea o le faaiuga ia i latou" (Boyd K. Packer, "Called to Serve," *Ensign*, Nov. 1997, 8).
- Tagai "Lotomaualalo," i le mataupu 6 o le *Tala'i La'u Talalelei: O Se Taiala mo le Galuega Faafaiateatalai* (2004), 120.
- Tagai Charles J. Chaput, *Strangers in a Strange Land* (2017), 14–15; tagai foi Rod Dreher, *The Benedict Option* (2017).
- Tagai Carl Cederstrom, "The Dangers of Happiness," *New York Times*, Julai 18, 2015, 8.
- Mosaea 3:19.
- English Oxford Living Dictionaries*, "humblebrag," oxforddictionaries.com.
- E i ai ni nai itu o loo atagia mai ai le faamalamalamaga a Alema i o latou o e sa mauaina "ituaiga uma o mea taua eseese, ia sa latou maua e ala i lo latou toaaga; . . . [ae] sa . . . faafefeteina i le faamaualuluga o o latou mata" (Alema 4:6). Ua matauina o se "gugutu le 'aina' o le gugutu lava.
- David Brooks, "Finding a Way to Roll Back Fanaticism," *New York Times*, Aug. 15, 2017, A23.
- Alema 5:53, 54.
- Mika 6:8.
- Tagai Mosaea 26:30.
- Tagai Mataio 6:12, 15.
- Tagai Mosaea 26:31.
- E pei ona saunoa Nelson Mandela, "O le ita e tai pei lava o le inuina o se vai oona ma faamoemoe o le a fasiotia ai ou fili" (in Jessica Durando, "15 of Nelson Mandela's Best Quotes," *USA Today*, Dec. 5, 2013, usatoday.com).
- Eteru 12:26, 27; ua faaopoopo le faamamafa.
- Edmund Vance Cooke, "The Eternal Everyday," *Impertinent Poems* (1907), 21.



Saunia e Elder Ronald A. Rasband
O Le Korama a Aposetolo e Toasefululua

E Ala i le Mamanu Faalelagi

O loo taijalaina oe e le aao o le Alii. E ala mai i le “mamanu faalelagi,” ua i ai o la i auiliiliga iti faapea foi i mea iloga o lou olaga.

Uso e ma tuafafine, a o ou tu atu ii i lenei konafesi aoao musuia i le lalolagi atoa ma lagonaina lo outou malosiaga ma o outou agaga, ua tatau ona ou mafaufau i upu a le Aposetolo o Peteru: “[Le Alii el], e lelei pe a tatou nonofa iinei.”¹

E le o upu tonu ia na fai atu e Alema ina ua uma ona folafola atu i le nuu o Amonaea. Na tuua e Alema le aai ona o le amioleaga o le nuu. Sa lei pine ae faaali atu se agelu ia Alema ma valaauna o ia e “toe foi atu i le aai o Amonaea ma toe talai atu i tagata o le aai.”²

Ma sa “vave,” ona foi Alema, ma ulu atu “i le aai i se tasi auala.”³

“Ma a’o ulu atu o ia i le aai, sa fia ai o ia, ma sa ia fai atu i se alii: E te tuuina mai ea sina meaai i se auauna faatauvaa a le Atua?

Ma sa fai mai lea alii ia te ia: “O au o se sa Nifaē, ma ua ou iloa o oe o se perofeta paia a le Atua, ona o oe o le tagata lea o lē na fetalai mai ai se agelu i se faaaliga vaaia: Ia e talia o ia.”⁴

O lea alii o Amoleka.

Pe o se mea faafuaveta ea na feiloai ai Alema ma Amoleka? E leai, sa le o se mea faafuasei na alu ai o ia i le aai i le

ala o le a taitai atu ai o ia i lenei tagata faamaoni o le o le a avea ma ana soa faifeautalai.

Sa faamalamalama e Elder Neal A. Maxwell i se tasi taimi: “E leai se tasi o i tatou ua faaaogaina atoatoa avanoa gafatia o loo maua mai le li’o o a tatou uo. E ono faaigoa e oe ma au nei feiloaiga ma isi tagata o feiloaiga ‘faafuasei.’ E malamalamalama lelei lea upu mo le faaaogaina e tagata, ae o le *faafuasei* e le o se upu talafeagai lea e faamatala ai galuega a se Atua e silafia mea uma. Na te le faia ‘faafuasei’ ni mea ae i le ‘mamanu faalelagi.’”⁵


O o tatou olaga e pei o se laupapa o le mu, ma e fesiitai i tatou e le Alii mai lea mea i lea mea—pe afai tatou te nofouta i uunaiga faaleagaga. Pe a toe tagatagai i tua, e mafai ona tatou vaaia Lona aao i o tatou olaga.

Ua tatou vaaia lea ituuga o faalafevau faalelagi ina ua toe foi Nifae e aumai papatusi mai ia Lapana. Ma “sa taitai [o ia] e le Agaga, ona sa [ia] lē mua’i iloa muamua mea e tatau ona [ia] faia.”⁶ E lei pine ae i ai Lapana i ona luma ua ‘ona ma ua le iloa se mea ma sa fasiotia o ia e Nifae, sa aumai papatusi, ma toe sola atu i ona uso. Pe o se laki ea le mea na tupu ia Lapana? Pe o se “mamanu faalelagi”?

E i ai mea iloga na tutupu i le talalelei ma i le Ekalesia ua tulei ai i luma le malo o le Atua i le lalolagi. E le o ni mea faafuaveta, ae o le fuafuaga a le Atua. O Ia o le sa foafoaina lenei lalolagi e mafai ona faatoofilemuina foi le sami i Lana upu, ma e mafai ona taijalaina Alema ma Amoleka, ma Nifae ma Lapana ina ia i ai i le nofoaga sa’o i le taimi tonu e tatau ai.

E faapena foi, o mea e tutupu ma mafutaga e tutupu i o tatou olaga taitasi e tulei ai i luma le galuega a le Atua i le lalolagi.

Na saunoa Elder Joseph B. Wirthlin e uiga i se taimi na saunoa atu ai Peresitene Thomas S. Monson ia te ia: “O loo i ai se lima ta’iala i luga o mea uma. E tele taimi a tutupu ni mea, e le ona o se mea faafuasei. E i ai se aso, pe a tatou toe tepa i tua i mea na tatou manatu o ni mea na tutupu ae lei tau-pulea i o tatou olaga, a o le a tatou iloa ai atonu e sa’o lava na faafuasei.”⁷





A e o le tele lava o taimi, o a tatou galuega lelei e na o ni nai tagata lava latou te iloa. Peitai, o na galuega o loo tusifaamaumauina i le lagi. E i ai se aso, o le a tatou tutu atu ai o se molimau o a tatou galuega atoatoa ma le tuuto o le amiontonu. E leai se tofotofoga po o se malaia e mafai ona taofia le fuafuaga a le Atua mo le faanolataga. E moni lava, e ala i le "mamanu faalelagi," "e oo mai ai le alaga fiafia i le taeao."⁸ "Ua ou sau i le lalolagi e fai le finagalo o lo'u Tama,"⁹ na aoao mai ai Iesu. Uso e ma tuafafine pele, e faapena foi i tatou.

E ala i aafiaiga o la'u lava malaga i le olaga, ou te iloa o le a fesiitai e le Alii i tatou i luga o lena laupapa o le mu e faia Lana galuega. O le mea e ono foliga mai na tupu faafuasei, o le mea moni, na faafoe e se Tama o i le Lagi, o le e mafai ona faitaua lauulu o ulu taitasi.¹⁰ E leai foi se manu iti e pau i le eleele e aunoa ma le silafia e le Tama.¹¹ O loo i ai le Alii i auiliiliga iti o o tatou olaga, ma o na mea e tutupu ma avanoa e saunia ai i tatou e sii a'e o tatou aiga ma isi a o tatou fesoasoani e fausia le malo o le Atua i le lalolagi. Manatua, e pei ona fetalai le Alii ia Aperaamo, "Ua ou iloa le iuga mai le amataga; o lea o le a i ai lo'u lima i luga o oe."¹²

Sa tuuina a'u e le Alii i se aiga e i ai ni matua amiontonu. Pe a fua i tulaga faalelalolagi, o i la'u o ni tagata e le taualoa; o lo'u tama, o se tama faamoni o se aveloli; o lo'u tina agelu, o se

tina sa nofo i le fale. Sa fesoasoani mai le Alii ia te au e saili lo'u toalua lalelei o Melanie; sa Ia musuia se faipisinisi, o le sa avea ma se uo pele, e tuu mai se avanoa ou te faigaluega ai. Sa valaauna a'u e le Alii i le galuega faamisiona, e le gata o se alii talavou ae faapea foi o se peresitene o le misiona; sa Ia valauina a'u i le Korama a Fitugafulu, ma ua Ia valaauna nei a'u o se Apostolo. Pe a toe tilotilo i tua, ua ou iloa ai ou te lei fuafuaina na fesiitaiga; na faia lava e le Alii, e faapei foi ona Ia fuafuaina fesiitaiga taua mo oe ma mo i latou e te alofagia.

O le a se mea e tatau ona e sailia mo lou lava olaga? O a vavega a le Atua e faamanatu atu ai ia te oe o loo latalata mai o Ia, ma faapea mai, "O lea ou te i ai iinei"? Mafaufau i na taimi, o nisi o aso taitasi, na faatino ai e le Alii se mea i lou olaga—ona toe galue ai foi lea. Ia faatauaina o ni taimi sa faalia ai e le Alii Lona talitonuga ia te oe ma au filifiliga. Ae tuu atu ia te Ia e faia oe ia sili atu ona o lou mulimuli ia te ia nai lo le mea e te mafafia na o oe lava. Faatauaina Lona Aofia Ai. O nisi taimi tatou te mafaufau ai i suiga i a tatou fuafuaga o ni mea ua sese o la tatou malaga. Mafaufau atili i ai o ni uluai laasaga o le i ai "i le feau a le Alii."¹³

I ni nai masina ua mavae, sa auai atu le tama teine a lo ma afafine i se malaga maimoa a le autalavou i ni nofoaga o le talafaasolopito o le

Ekalesia. O le fuafuaga faai o le malaga na matauina ai o le a ia ui atu i le mea tonu lava o loo galue faamisiona ai lona tuagane, le tama tama a lo ma afafine. Sa lei i ai se faamoemoe o le tama a lo'u afafine e vaai i lona tuagane i lana misiona. Peitai, a o ulu atu le pasi i le taulaga o loo faamisiona ai lona tuagane, sa vaaia ni faifeautalai se toalua o savavali i le alatele. O le tasi o ia faifeautalai o lona tuagane.

Sa faatumulia le pasi i le naunau ina ua faanoi tamaiti aoga i le avevasi e seu i tua ina ia mafai ai e ia ona feiloai atu i lona tuagane. E lei atoa se minute, ina ua uma ni upu alofa ma loimata, sa toe foi lona tuagane e faataunu ona tiute faafaifeautalai. Sa matou iloa mulimuli ane, e lei atoa se lima minute na i ai lona tuagane i lena magaala, sa savali mai se tuugatala faatulagaina e agai i lana taavale.

E mafai e le Tama Faalelagi ona tuu i tatou i tulaga e i ai ni faamoemoega patino i le mafaufau. Sa Ia faia foi i lo'u olaga, ma o loo Ia faia foi i o outou olaga, e faapei ona sa Ia faia i olaga o fanau pele o a ma fanau.

E ttau i tatou ma alofagia e le Alii o le e manatu mai, o le e musumusu mai, ma o le e puipuia i tatou i ni ala e tulagaese mo i tatou taitoatasi. E sili atu Lona poto ma e sili atu foi Lona mamana nai lo alii ma tamaitai i le olaga nei. Na te silafia o tatou luitau, o o tatou manumalo, ma manaoga amiontonu o o tatou loto.

Ua silia ma le tausaga talu ai, a o ou savali e ui atu i le Lotoa o le Malumalu, sa soso mai se tasi o tuafafine faifeautalai ma fesili mai, 'E te manatuaina a'u? Ou te sau mai Florida.' Sa ia ta'u mai lona igoa, o Sister Aida Chilan. Ioe, sa ou manatuaina lelei lo'u feiloai atu ia te ia ma lona aiga. Sa fautuaina mai e lana peresitene o le siteki matou te asiasi i lona aiga. Sa oo ina manino na matou i ai iina mo lo la afafine, o Aida, e lei papatiso. Ina ua uma le matou asiasiga, ma le silia i se tausaga na aoao ai ma faaaumeaina, sa papatiso ia Aida.

Ina ua uma ona ma talanoa i le Lotoa o le Malumalu, sa ia tusiina mai se tusi ia te a'u. Fai mai a ia: "Ou te iloaina ma lo'u loto atoa e silafia e le

Tama Faalelagi i tatou taitoatasi, ma o loo faaaauau pea ona Ia tuu i tatou i le ala o le tasi ma le isi ona o se mafuaaga. Faafetai mo le avea ma se tasi o a'u faifeautalai, mo le aapa mai ia te a'u ma le mauaina o a'u i le lima tausaga ua mavae."¹⁴ Sa auina mai foi e Aida ia te au le tala o lona liliu mai na faamatala mai ai "mea paia e lei fuafuaina" lea na tupu i lona olaga na iu ai ina papatiso ma faamau, ma auaua atu i se misiona i le Lotoa o le Malumalu, ma lana faaipoipoga talu ai nei i le malumalu.¹⁵

Pe ua na o se mea faafuasei ia le taiala o matou e le peresitene o le siteki i le fale o le au Chillian po o lo ma feiloai mulimuli ane i le Lotoa o le Malumalu? O le molimau a Aida ua molimauina ai o se vaega uma lava lenei o le "mamanu faalelagi" a le Atua.

E fiafia le Alii e mafuta ma i tatou. E le o se mea faafuasei pe a e lagonaina Lona Agaga ma faatinoina ana uluai uunaiga ua e lagonaina o Ia ao Ia folafola mai: "O le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo'u Agaga i o outou loto, ma si'o faataamilo outou e a'u agelu, e sapasapai outou i luga."¹⁶

E tofu i tatou uma ma mea faapena e tutupu i o tatou olaga. Atonu tatou te feiloai i se tasi e foliga masani, faafou se mafutaga, pe i ai ni mea e tutusa ai ma se tagataese. A oo ina tutupu na mea, atonu o loo faamanatu mai e le Alii ia i tatou o i tatou uma lava o uso ma tuafafine. O le mea moni o loo tatou punouai i le faamoemoega e tasi; le mea ua ta'ua e Iosefa Samita "o le faamoemoega o Keriso."¹⁷

O gafea e fetaui i ai la tatou faitalia i se "mamanu faalelagi"? E i ai sa tatou filifiliga e mulimuli pe le mulimuli foi i lo tatou Faaola ma Ana taitai filifilia. E manino le mamanu o i le Tusi a Mamona ina ua liliu ese sa Nifae mai le Alii. Sa tagi aue Mamona:

"Ma sa latou vaai . . . ua le toe faasoina i latou e le Agaga o le Alii; ioe, ua alu ese mai ia te i latou, aua e le afio le Agaga o le Alii i malumalu le paia—

"O lea na le toe faasaoina ai i latou e le Atua i lona mana faavavega ma le



mafaatusalia, ona ua latou pauu atu i se tulaga o le le talitonu ma le amio-leaga tele."¹⁸

E le faapea o mea uma e manaomia mai e le Alii mai ia i tatou o se tau-nuuga o lo tatou malosi, lo tatou faamaoni, pe o mea tatou te iloa. Mafaufau ia Saulo, o le na taofi e le Alii i le ala i Tamaseko. E sese le itu na ia ui ai i lona olaga, ma e leai se faiā ma matu po o saute. O Saulo na toe faatonutonu mai le lagi. Sa igoa mulimuli ane ia Paulo, o lana galuega faaapostolo na atagia mai ai le mea ua uma ona silafia e le Alii na te mafai ona fai ma avea ai, ae le o le mea sa aga atu o ia e fai a o Saulo. I lena lava auala e tasi, e silafia e le Alii mea e tofu mafai e i tatou ona fai ma avea ai. O le a le mea na aoao mai e le Aposetolo o Paulo? "Ua tatou iloa foi e galulue faatasi mea uma e lelei ai i latou o e ua alofa atu i le Atua, o e ua valaaui na lona finagalo."¹⁹


Pe a tatou amiontonu, naunau, ma mafafia, pe a tatou taumafai ia agavaa ma gafataulimaina, tatou te agaigai i luma i nofoaga tatou te lei mafaufauina ma avea o se vaega o le "mamanu faalelagi" a le Tama Faalelagi. E tofu i tatou ma se uiga paia i totonus. Pe a tatou vaia le Atua o galue e ala mai ia i tatou ma faatasi ma i tatou, ina se'i faamalosiauina i tatou, ma faafe-tai mo lena taitaiga. Ina ua malele lo tatou Tama o i le Lagi, "O la'u galuega ma lo'u mamalu lenei—ia aumaia le

tino ola pea ma le ola faavavau o le tagata,"²⁰ sa talanoa o Ia e uiga i Ana fanau uma—aemaise lava o oe.

O loo taialaina oe e le aao o le Alii. E ala mai i le "mamanu faalelagi," ua i ai o Ia i auiliiliiga iti faapea foi i mea iloga o lou olaga. E pei ona ta'ua i le Faataoto, "Faatuatua ia Ieova ma lou loto atoa; . . . ona faatonuina ai lea e ia lava o ou ala."²¹ Ou te molimau atu o le a Ia faamanuiaina oe, lagolagoina oe, ma aumaia ia te oe le filemu. I le suafa, o Iesu Keriso, amene. ■

FAAMATALAGA

1. Luka 9:33.
2. Alema 8:16.
3. Alema 8:18.
4. Alema 8:19–20.
5. Neal A. Maxwell, "Brim with Joy" (Brigham Young University devotional, Jan. 23, 1996), speeches.byu.edu.
6. 1 Nifae 4:6.
7. Joseph B. Wirthlin, "Lessons Learned in the Journey of Life," *Liahona*, May 2001, 38; aumai mai se lauga na tuuina atu e Elder Wirthlin i se faesaaite o le Ofisa o Aoga a le Ekalesia i le Iunivesite a Polika Iaga, Nov. 7, 1999.
8. Salamo 30:5.
9. 3 Nifae 27:13.
10. Tagai Luka 12:7.
11. Tagai Mataio 10:29.
12. Aperaamo 2:8.
13. Mataupu Faavae ma Feagaiga 64:29.
14. Tusi mai ia Aida Chilan, Apr. 20, 2017.
15. Tusi mai ia Aida Chilan, Apr. 20, 2017.
16. Mataupu Faavae ma Feagaiga 84:88.
17. Tagai Aoaoaga a Peresitene o le Ekalesia: Iosefa Samita (2007), 349–57.
18. Helamana 4:24–25.
19. Roma 8:28.
20. Mose 1:39.
21. Faataoto 3:5–6.



Saunia e Elder O. Vincent Haleck
O Le Fitugafulu

O Le Loto o le Fafine ua Oti Lana Tane

Sei o tatou faia le mea e talafeagai ina ia maua ai le loto o le fafine ua oti lana tane, olioli moni i faamanuiaga lea o le a faatumuina le "manao" lea e taunuu i ai.

Ua faamanuiaina tele a'u i le auauna atu i Au Paia o le Pasefika mo le tele o lo'u olaga faatagatamatua. O le faatuatua, alofa, ma ositaulaga ofoofogia a nei Au Paia tuuto ua faatumulua ai a'u i musumusuga, lotofaaafetai, ma le olioli. O a latou tala e tai pei foi o a outou tala.

Na oo mai se manatu ia te a'u faapea o nei Au Paia e talitutusa lava ma le fafine ua oti lana tane lea na matauina e le Faaola a o Ia "nofo . . . ua silafia foi e ia le vao tagata o lafo tupe i le mea e teu ai tupe; e toatele foi o e mauoa ua tele a latou ua lafo i ai.

"Ua alu ane foi le tasi fafine mativa ua oti lana tane, ua lafo ane ai tupe iti e lua, o le kotane e tasi ia. . . .

"Ona valaau atu lea o ia i ona soo, ua fetalai atu ia te i latou, E moni, ou te fai atu ia te outou, o mea a lena fafine mativa ua oti lana tane, ua lafo i le mea e teu ai tupe, ua sili ia i a latou uma na lafo i ai:

"Aua . . . ua latou lafo nisi mea mai a latou mea ua tele; ao ia ua mativa ua ia lafo ana mea uma sa ia te ia, o ana mea uma e ola ai."¹

se tasi o nei motu, sa taliaina ai e se tama matua ma lona faletua le valaulia a faifeautalai ina ia ole atu ma le faamaoni i le Alii pe moni lesona ia na aoao ai i laua. I lenei faasologa, sa la mafaufau ai foi i taunuuga o tautinoga o le a manaomia ona la faia pe afai o le tali la te mauaina e oo atu ai i le la taliaina o le talalelei toefuataiina. Sa la anapopogi ma tatalo ina ia iloa le moni o le Ekalesia ma le moni o le Tusi a Mamona. Na oo mai le tali i a tatalo i le tulaga o se faamautinoaga malie ae manino: "Ioe!" E moni lava!"

O le mauaina o lenei molimau, sa la filifili ai ina ia papatiso. Sa le o se filifiliga na le aunoa ma ni taunuuga patino. O le la filifiliga ma papatisoga sa o faatasii ma se tau maualuga. Sa leai ni la galuega, ositaulaga o la tulaga faaleagafesootai, faamutaina faauooga taua, ma sa leai se lagolagosua, alofa, ma le faaaloalogia a aiga. Ua la savavali nei i le Lotu i Aso Sa taitasi, fesuiai fetepaiga le mautonu ma uo ma tuaoi o e na savavali mai le isi itu.

I nei tulaga faigata, na fesiligia lenei uso lelei po o a ni ona lagona e uiga i le la faaiuga e auai i le Ekalesia. O lana tali faigofie ma le le maluelue o le "e moni, a ea? Sa manino le ma filifiliga."

O nei Au Paia e toalua faatoa liliu mai na i ai moni lava le loto o le fafine ua oti lana tane. O i laua, e pei o le fafine ua oti lana tane, "na lafo mea uma" na ia i laua, ma tuuina atu ma le iloa o la "manao." O se taunuuga o o la loto talitonu ma le faatuatua tumau

E ui o ana tupe iti e lua o se saofaga itiiti tele, ae i le Faaola ua sili atu le ttau o lana meaalofa, ona sa ia avatu mea uma. I lena lava taimi, na silafia lelei e le Faaola le fafine ua oti lana tane, aua sa faaali atu ia te Ia [Iesu] i lana meaalofa lona loto. O le tulaga ma le loloto o lona alofa ma le faatuatua o se mea sa ia tuu atu ma le iloa o le a tausia lona "manao."

Na ou vaai i lena lava loto e tasi i Au Paia o le Pasefika. I se tamai aai i



i na taimi faigata, na faamamaina ai a la avega. Sa lagolagoina ma siomiaina i laua e tagata lagolagosua ma auauna atu o le ekalesia, ma sa faamalosia patino i laua i le la auaunaga i valaauga o le Ekalesia.

Ina ua uma ona tuuina atu "mea uma" sa ia i laua, na oo mai le aso sili ona maoae mo i laua ina ua latou faamau i le malumalu o se aiga e faavavau. E pei ona Ia faia i tagata liliu mai i le taitaiga a Alema, "Ioe, sa faamalosia i latou e le Alii ina ia mafai ona latou tauave ma le faigofie a latou avega, ma sa latou gaua'i atu ma le fiafia ma le onosai i le finagalo atoa o le Alii."² E faapena le loto o le fafine ua oti lana tane o loo faataitaia e lenei ulugalii matagofie.

Ou te fia talanoa atu e uiga i se isi aafiaga lea na iloa manino ai le loto o le fafine ua oti lana tane. I Samoa, matou te galulue faatasi ma aufono o nuu ina ia maua le faatagaga e talai atu ai e faifeatalai le talalelei. I nai tausaga ua mavae, sa faia se ma talanoaga ma se matai mai se nuu lea na faasa ai faifeatalai mo le tele o tausaga. O le ma talanoaga sa faia i se taimi e lei mamao atu talu ona tatalaina e le matai taua le Lotu i totonus o le nuu, faataga ai a tatou faifeatalai e aoao atu i latou e fia aoao e uiga i le talalelei ma ona aoaoga faavae.

I le mavae ai o le tele o tausaga, o le mauaina o lenei liliuga faavavega, sa ou fia iloa ai po o le a se mafuaaga ua a'e ai se tofa i lenei matai taua ma faia ai lenei faatinoga. Sa ou fesili atu e uiga i lenei mea, ma sa fai mai le matai sa ma talanoa, "E mafai ona ola se tagata i le pouliuli mo se taimi, ae o le a i ai le taimi o le a ia fia sau ai i le malamalama."

O le tatalaina [o le lotu] e le matai taua o le nuu, na faataitai ai le loto o le fafine ua oti lana tane—o se loto e faamaluluina pe a faaalia le mafanafana ma le malamalama o le upumoni. Sa naunau lenei taitai ina ia lafoai le tele o tausaga o tu ma aga masani, fetaiai ma le tele o le teteet, ma tu mausali ina ia faamanuiaina ai isi. O se taitai lenei sa taulai atu lona loto i le manuia ma le fiafia o lona nuu, nai lo le mafaufau i tu ma aga masani, aganuu, ma le malosi



faaletagata lava ia. Sa ia tuuinea na popolega ona o le mea na aoao mai e Peresitene Thomas S. Monson ia i tatou: "A tatou mulimuli i le faataitaiga a le Faaola, o lo tatou avanoa lenei e avea ai ma se malamalama i olaga o isi."³

Ma le mea mulimuli, sei ou faasoa atua ia te outou se isi aafiaga se tasi i totonus o le Au Paia o le Pasefika lea e tamauina loloto ma faaleagaga i lou agaga. I le tele o tausaga ua mavae, sa avea au ma se fesoasoani talavou i se epikopo i se uarota fou i Amerika Samoa. E toa 99 le matou au paia e aofia ai ni faifaatoaga tau atiae, tagata faigaluega tuuapa, tagata faigaluega o le malo, ma o latou aiga. Ina ua faasila-sila mai e le Au Peresitene Sili i le 1977 o le a fausia se malumalu i Samoa, sa matou faaalia uma le olioli ma le loto-faafetai. O le malaga i le malumalu mai Amerika Samoa i lena taimi na manao-mia ai le malaga atu a le o Hawaii po o Niu Sila. O se malaga taugata tele lenei [malaga] ma sa le gafatia e le toatele o tagata faamaoni o le Ekalesia.

I le gasologa o lena taimi, na uunaia tagata o le ekalesia e foai atu i se tupe mo fale e fesoasoani i le fausiga o malumalu. I lena agaga, na talosagaina ai e lo matou au epikopo tagata o le uarota ina ia mafaufau ma le agaga tatalo i mea e mafai ona latou foai mai. Na setiina se aso mo aiga e potopoto ai e tuuina mai a latou foai. Mulimuli ane, ina ua tatalaina faalilolilo nei foai, sa faalotomaua-laloina ma ootia le matou au epikopo i le faatuatua ma le lima foai o tagata matagofie o le matou uarota.

O le iloaina o aiga taitasi ma o latou tulaga, sa ou lagonaina se lagona malosi ma tumau o le maofa, faaalo-aloi, ma le lotomaua-lalo. O nei mea, i soo se auala, o ni tupe itihi a fafine ua oti a latou tane i nei ona po ma ua tuuina mai ma le saoloto mai o latou "manaoga" ma le olioli i le faamanuiaga folafolaina o le fausiaina o se malumalu paia a le Alii i Samoa. O nei aiga ua faapaiaina mea uma latou te mafai i le Alii, ma le faatuatua o le a le tuulafoaia i latou. O le latou meaalofa na faaalia ai o latou loto, o loto a fafine ua oti a latou tane. O i latou uma na foai sa faia ma le loto malie ma le fiafia aua sa i ai i totonus o i latou le loto o le fafine ua oti lana tane ma ua mafai ai ona latou vaai atu ma mata o le faatuatua i faamanui-iaga silisili o loo faapolopolo mai mo o latou aiga, ma tagata uma o i Samoa ma Amerika Samoa, mo augatupulaga e mulimuli mai. Ou te iloa na silafia ma taliaina e le Alii a latou taulaga faapaiaina ma a latou tupe iti a le fafine ua oti lana tane.

O le loto o le fafine ua oti lana tane lea na tuuina atu ana tupe iti e lua o se loto o le a tuuina atu mea uma i le faia o ni ositaulaga; i le onosaia o faigata, sauaga, ma le teena; ma i le tauaveina o avega o le tele o ituaiga. O le loto o le fafine ua oti lana tane o se loto ua lagonaina, ma iloa le malamalama o le upumoni ma e tuuina atu soo se mea e taliaina ai lena upumoni. E fesoasoani foi i isi ia iloa lena lava malamalama e tasi ma o mai i le fuataga lava e tasi o le fiafia ma olioli e faavavau. Ma le mea


mulimuli, o le loto o le fafine ua oti lana tane ua faaiugaina i se naunautaiga e tuu atu mea uma mo le fausiaina o le malo o le Atua i le lalolagi.

Sei o tatou auai faatasi o ni Au Paia i le lalolagi atoa i le faia o mea e talafeagai ina ia maua ai le loto o le fafine ua oti lana tane, olioli moni i faamanuiaga ma faatumuina le "manao" lea e taunu i ai. O lau tatalo mo i tatou taitoatas i se aioiga ina ia i ai le loto e tauave ai avega, faia ni ositaulaga talafeagai, ma ia maua le loto e tuuina atu ai ma faia. Ou te molimau atu o le a le tuulafoia outou e le Alii ia manaonao. O le loto o le fafine ua oti lana tane ua tumu i le faafetai faapea o le Faaola o "le tagata faanoanoa, ua masani foi ma le tiga"⁴ ina ia tatou le tofo i le "ipu oona."⁵ E ui i o tatou vaivaiga ma faaletonu, ma ona o i latou, ua faaauau ai pea ona Ia ofoina mai Ona aao, lea na tuia mo i tatou. O le a Ia siiina i tatou i luga pe a tatou naunau e o mai i le malamalamo o Lana talalelei, taliaina o Ia, ma faataga o Ia e faatumu o tatou "manao."

Ou te molimau atu e uiga i le alofa sili lea e mafai ona tatou faasoaa atua o ni soo o le Alii o Iesu Keriso. Ou te alofa ma lagolagoina Peresitene Thomas S. Monson o se perofeta a le Atua i le fogaeleele. O le Tusi a Mamona o le isi molimau ia Iesu Keriso i le lalolagi, ma ou te valaaulia tagata uma ina ia faitau i ai ma iloa ona savali mo outou. O i latou uma o e talia le valaaulia a le Alii ina ia o mai ia te Ia o le a maua le filemu, alofa, ma le malamalamo. O Iesu Keriso o lo tatou Faataitai Sili ma le Togiola. Ua na o Iesu Keriso, ma le vavega o Lana Togiola Le Iu, e mafai ai ona tatou maua le ola e faavavau. Ou te molimau atu i lenei mea i Lona suafa paia, o Iesu Keriso, amene. ■

FAAMATALAGA

1. Mareko 12:41–44.
2. Mosaea 24:15.
3. Thomas S. Monson, "Avea ma se Faataitaiga ma se Malamalamo." *Liahona*, Nov. 2015, 86.
4. Isaia 53:3.
5. 3 Nifae 11:11.



Sauniga e Peresitene Russell M. Nelson

Peresitene o le Korama Aposetolo e Toasifululuia

○ Le Tusi a Mamona: Faamata e Faape'i Lou Olaga e aunoa ma la?

I se ala sili ona faavavega ma tutasi, o loo aoao mai e le Tusi a Mamona i tatou e uiga ia Iesu Keriso ma Lana talalelei.

Le 1986, sa valaaulia ai a'u e tuu atu se aoaoga faapitoa i se iunivesite i Accra, Kana. O iina na ou feiloi ai i le toatele o tagata maualuluga, e aofia ai se tupu o se ituaiga o Aferika. A o matou feiloi ai a o lumanai le aoaoga, sa saunoa mai ai le tupu ia te a'u e ala mai i lana faamatalaupu, lea na ia faaliliuina mo a'u. Sa ou tali atu i le faamatalaupu, ona faaliliu atu lea e le faamatalaupu a'u tali i le tupu.

Ina ua maea la'u aoaoga, sa susu sa'o mai lava le tupu ia te a'u, ae o le taimi la lea sa le o i ai lana faamatalaupu. I lo'u te'i, sa ia saunoa mai i se Igilisi lelei atoa—o le Igilisi a le Tupu Tamaitai, ou te faaopoopo atu!

Sa foliga mai na le mautonu le tupu. "O ai ea oe?" sa ia fesili mai ai.

Sa ou tali atu, "O a'u o se Apostolo faauuina a Iesu Keriso."

Sa fesili mai le tupu, "O le a se mea e mafai ona e aoaoina ai a'u e uiga ia Iesu Keriso?"

Sa ou tali atu i se fesili: "E mafai ona ou fesili atu po o le a se mea ua e iloaina e uiga ia te Ia?"

Sa iloa i le tali a le tupu o ia o se tagata suesue moni o le Tusi Paia ma o se tasi e alofa i le Alii.

Ona ou fesili atu lea i ai pe o ia silafaina le galuega a Iesu Keriso i tagata i Amerika anamua?

E pei ona ou faamoemoeina, na te lei iloaina.

Sa ou faamalamalamo atu i ai i le mavae ai o le Faasatauroga ma le Toetu o le Faaola, sa Ia afio mai i tagata o Amerika anamua, lea na Ia aoaoina i Lana talalelei. Sa Ia faatulagaina Lana Ekalesia ma faatonu Ona soo e tausi se faamaumauga o Lana galuega ia i latou.

"O lena faamaumauga," sa ou faamatala atu, "o le mea ua matou iloa o le Tusi Mamona. O se tasi molimau ia Iesu Keriso. O se soa o tusitusiga paia i le Tusi Paia."

I lea taimi, sa oo ina *matua* naunau mai lava le tupu. Sa ou liliu atu i le peresitene o le misiona na ma toalua ma fesili atu i ai po o i ai se isi ana kopi o le Tusi a Mamona ia te ia. Sa ia aumaia se kopi mai lana atopa'u.


Sa ou susueina i le 3 Nifae mataupu 11, ma sa ma faitaua faatasi ma le tupu le lauga a le Faaola ia sa Nifaē. Ona ou foai atua lea o le kopi o le Tusi a Mamona ia te ia. O lana tali na teufatu i lo'u mafaufau ma lo'u loto e faava-vau. "Sa ono mafai ona e foai maia ni taimane ma ni penina, ae e leai ma se mea e sili atu lona taua ia te a'u nai lo lenei malamalama faaopoopo e uiga i le Alii o Iesu Keriso."

I le mavae ai ona lagonaina o le mana o fetalaiga a le Faaola i le 3 Nifae, sa folafola mai ai e le tupu, "Afaí ou te liliu mai ma auai i le Ekalesia, o le a ou aumaia lo'u ituaiga atoa faatasi ma a'u."

"Oi, lau susuga i le Tupu," sa ou tali atu ai, "e le faapena le ala e fai ai. O le liuaina o se mataupu faaletagata lava ia. Sa auauna atu le Faaola ia sa Nifaē, e taitoatasi. E tofu maua e tagata taitoatasi se tautinoga ma se molimau o le talalelei a Iesu Keriso."¹

O'uso e ma tuafafine, o le a le taua o le Tusi a Mamona ia te oe? Afaí e ofo atu ia te oe ni taimane po o ni penina po o le Tusi a Mamona, o le a le mea e te filifilia? Ma le faamaoni, o le a *le mea* e sili atu lona taua ia te oe?

Manatua i le sauniga o le taeao o le Aso Sa o le konafesi aoao ia Aperila 2017, sa aioi mai ai Peresitene Thomas S. Monson ia i "tatou taitoatasi ia sue-sue ma le agaga tatalo ma mafaufau loloto i le Tusi a Mamona i aso taitasi."² E toatele sa tali atu i le augani a lo tattou perofeta.



E faitauina e Riley lana Tusi a Mamona faatasi ai ma le fesoasoaniga a se faailogatusi "O A'u o se Atalii o le Atua."



O loo mulimuli Peresitene Nelson i le fautuaga a Peresitene Thomas S. Monson mai le konafesi aoao ia Aperila 2017, e suesue ma mafaufau loloto i le Tusi a Mamona i aso uma.

Se'i ou fai atu, ou te le'i iloaina pe na iloa foi e Riley e valu tausaga le matua sa pu'eina e se tasi lo ma ata. Ia matau o loo faitauina e Riley lana Tusi a Mamona faatasi ma le fesoasoaniga a se faailogatusi "O A'u o se Atalii o le Atua."

E tupu se mea mamana pe a saili atu se atalii o le Atua ia iloa atili e uiga ia te Ia ma Lona Alo Pele. E leai ma se isi mea o loo manino ma mamana atili ai le aoaoina o na upumoni nai lo le Tusi a Mamona.

Talu mai lava le lu'i a Peresitene Monson i le ono masina ua mavae, sa ou taumafai ai lava e mulimuli i lana fautuaga. Faatasi ai ma isi mea, ua ou faia ni lisi o mea e *uiga* i le Tusi a Mamona, o mea na te *faamaautuina*, o mea na te *faamaonainaina le sese*, o mea na te *faataunuuiina*, o mea na te *faamaninoina*, ma mea na te *faaalialia mai*. O le suesueina o le Tusi a Mamona i lena auala ua avea ma se faatinoga malamalama ma musuia! Ou te fautuina atu ia te outou taitoatasi.

I le taimi o nei masina e ono, sa ou valaaulia ai foi ni vaega eseese—e aofia ai le Usoga i le Korama a le Toasefululua, o faifeatalai i Chile, ma peresitene o misiona ma o latou faletua na potopoto i Atenitina—ia mafaufau i ni fesili fesootai se tolou lea ou te uunaia outou e mafaufau i ai i le asō.

Muamua, faamata e faapei lou olaga e *aunoa* ma le Tusi a Mamona? Lua, o le a se mea o le a e *le iloaina?* Ma le tolu, o le a se mea o le a e *le mauaina?*

O tali faagaeetia mai nei vaega sa o mai sa'o mai o latou loto. O nisi nei o o latou manatu faaalialia:

"A aunoa ma le Tusi a Mamona, o le a ou le mautonu e uiga i aoaoga ma manatu feteenai e uiga i le *tele* o mea. O le a pei lava a'u o le taimi ae ou te lei mauaina le Ekalesia, a o ou saili mo le malamalama, faatuatua, ma le faamoemoe."

Fai mai le isi tagata: "Semanu ou te le iloa e uiga i le matafaioi a le Agaga Paia e mafai ona faia i lo'u olaga."



O le isi: "Semanu ou te le malamalama manino i lo'u faamoemoega iinei i le lalolagi."

Fai mai le isi tali: "Semanu ou te le iloa o loo i ai se alualu i luma faifai pea pe a mavae lenei olaga. Ona o le Tusi a Mamona, ua ou iloa ai o loo i ai moni lava se olaga pe a mavae le oti. O le sini laualuga lena lea o loo tatou tausinio nei i ai."

O le tali mulimuli na ou mafaufau ai i lo'u olaga i le tele o tausaga ua alu a o avea ma se fomai tipitipi talavou. O se tasi o tiutetauave mamafa e tauave e se fomai tipitipi, i nisi taimi, o le faailoa atu lea i le aiga pe a maliu se tasi e pele. I se tasi falemai na ou faigaluega ai, sa fausia ai se potu faapitoa i puipui e utu i momi lea e mafai ai e tagata o aiga ona talia se tala faapea. O iina, e faailoa ai e nisi tagata lo latou faavauvau i le tatu'iina o o latou ulu i na puipui momi. Oka so'u faanaunau e aoao atu i na tagata o le oti, e ui e faigata mo e pele o loo ola, ae o se vaega talafeagai o lo tatou ola pe a mavae le oti. E faataga e le oti i tatou ia agai atu i le isi lalolagi.³

Sa fai mai le isi tali i la'u fesili: "Sa leai so'u olaga seja oo ina ou fatauina le Tusi a Mamona. E ui sa ou tatalo ma alu i la'u lotu i lo'u olaga atoa, ae sa fesoasoani le Tusi a Mamona ia te a'u e fesootai moni ai lava ma le Tama Faalelagi mo le taimi muamua."

Fai mai le isi tagata: "Ana leai le Tusi a Mamona, semanu ou te le malamalama sa lei gata na puapuaga

le Faaola mo a'u agasala, ae e mafai foi ona Ia faamaloloina o'u tiga ma faanoanoaga."⁴

Ae fai mai foi le isi: "Semanu ou te le iloaina o loo i ai ni perofeta o loo taitaia i tatou."

O le faatofuina soo o i tatou i upumoni o le Tusi a Mamona e mafai ona avea ma aafiaga e suia ai le olaga. O se tasi o afafine o le ma atalii o loo faamisiona, o Sister Olivia Nelson, sa folafola atu i se tagata saililili afai na te fatauina le Tusi a Mamona i aso taitasi, o le a faaleleia ana togi o suega i le iunivesite. Sa ia fataua, ma sa lelei ona togi.

O'u uso e ma tuafafine pele, ou te molimau atu o le Tusi a Mamona o le afioga moni lava a le Atua. O loo i ai tali i fesili sili ona ttau o le olaga. O loo aoaoina ai le mataupu faavae a Keriso.⁵



O le afafine o le atalii a Peresitene Nelson, o Olivia.

O loo faalauteleina ma faamanino ai le tele o upumoni "faigofie ma taua"⁶ ia na leiloloa i le tele o seneturi o taimi ma le anoanoai o faaliliuga o le Tusi Paia.


Ua tuuina mai e le Tusi a Mamona le atoatoaga ma le malamalama sili ona mausali o le Togiola a Iesu Keriso e maua i soo se mea. O loo aoao mai ai le uiga moni o le toe fanauina. Mai le Tusi a Mamona tatou te aoao ai e uiga i le faapotopotoina o Isaraelu ua faataapeapeina. Ua tatou iloa le mafuaaga ua tatou i ai iinei i le lalolagi. O upumoni nei ma isi upumoni e sili ona aoao atu ma le mamana ma le faatauanau i le Tusi a Mamona nai lo se isi lava tusi. O le mana atoa o le talalelei a Iesu Keriso o loo i ai i totonu o le Tusi a Mamona. Periota.

O loo faamanino uma e le Tusi a Mamona aoaoga a le Matai ma faailoa atu ai togafiti a le fili.⁷ O loo aoao e le Tusi a Mamona le aoaoga faavae moni e soloia ai uputuu faalelotu sese—e pei o faiga masani sese o le faatinoina o le papatisoga o tamaiti.⁸ Ua maua i le Tusi a Mamona le faamoemoega i le olaga e ala i le uunaiaina o i tatou e mafaufau loloto i le gafatia o le ola e faavavau ma le "fafia e le gata."⁹ Ua talepeina e le Tusi a Mamona talitonuga sese e faapea e mafai ona maua le fafia i le amio-leaga¹⁰ ma o le lelei o le tagata lava ia na o le pau lena o le mea e manaomia e toefoi atu ai i le afioaga o le Atua.¹¹ Ua nutipalaina ai e faavavau ia manatu sese e faapea na muta faaaliga i le Tusi Paia ma o loo tapunia le lagi i aso nei.

A ou mafaufau i le Tusi a Mamona, ou te mafaufau i le upu *mana*. O upumoni o le Tusi a Mamona ua i ai le *mana* e faamalolo ai, faamafanafana, toefuatai, fesoasoani, faamalosia, faatoifimalie, ma faafafia o tatou agaga.

O'u uso e ma tuafafine pele, ou te folafola atu a outou suesueina ma le agaga tatalo le Tusi a Mamona i *aso uma*, o le a outou faia ni faaiuga lelei atu—i *aso uma*. Ou te folafola atu a outou mafaufau loloto i mea tou te suesueina, o le a matale mai pupuni o le lagi, ma o le a outou mauaina tali i a outou lava fesili ma le taitaiga mo o outou lava olaga. Ou te folafola atu a e faatofuina oe lava ia i le Tusi a Mamona i aso taitasi, e mafai ona puipuia oe mai mea leaga o le aso, e aofia ai le mala faataumaoi o ponokalafi ma isi vaisu ua punitia ai le mafaufau i mea faaleagaga.

Soo se taimi lava ou te faalogo ai i se tasi, e aofia ai ma a'u lava ia, o faapea, "Ou te iloa e moni le Tusi a Mamona," e oso lava lo'u fia alaga atu, "E manaia tele, ae le lava lena!" E manaomia ona tatou lagonaina, i le loloto i le "taele" o o tatou loto,¹² o le Tusi a Mamona e manino lava o le afioga a le Atua. E tatau ona tatou lagonaina le o'oo' lea tatou te le mananao ai lava e ola i se aso e aunoa ma le tusi. Ou te toe fia faaupuina le saunoaga a Peresitene Polika Iaga, ina ua saunoa, "Ou te manao i laulaufaiva o faititili e fitu, ina ia fafaguina i lugatagata"¹³ i le upumoni ma le mana o le Tusi a Mamona.



Ua tamoe atu se faifeautalai talavou e faasoa atu le Tusi a Mamona i se alii i le paka.

E manaomia ona tatou pei o lenei faifeautalai talavou o loo auaua i Europa lea sa lagonaina tele le loloto o le moni o le Tusi a Mamona lea na ia tamoe sa'o atu ai ma se kopi o lenei faamaumauga paia i se alii i se paka lea faatoa la mauaina ma lana soa.

Ou te molimau atu o Iosefa Samita sa avea, ma o le perofeta o lenei tisipenisione. O ia lava lea, e ala i le meaalofa ma le mana o le Atua, sa faaliliuina lenei tusi paia. O le tusi lenei o le a fesoasoani i le saunaiaina o le lalolagi mo le Afio Mai Faalua o le Alii.

Ou te molimau atu o Iesu Keriso o le Alo moni ma soifua o lo tatou Atua soifua. O Ia o lo tatou Faaola, lo tatou Togiola, lo tatou Faataitaiga sili, ma lo tatou Puluvaga i le Tama. O Ia le Mesia folafolaina, le Mesia i la le tino, ma o le a avea ma Mesia o le meleniuma. Ou te molimau atu ma lo'u agaga atoa i se ala sili ona faavavega ma tutasi, o loo aoao mai e le Tusi a Mamona i tatou e uiga ia Iesu Keriso ma Lana talalelei.

Ou te iloa o Peresitene Thomas S. Monson o le perofeta a le Atua i le lalolagi i aso nei. Ou te alofa ia te ia ma lagolagoina o ia ma lo'u loto atoa. Ou te molimau atu ai i le suafa o Iesu Keriso, amene. ■

Lisi o le Tusi a Mamona a Peresitene Nelson

O Le Tusi a Mamona o le:

- O se tasi o molimau ia Iesu Keriso. O ona tusitala autu o—Nifae, Iakopo, Mamona, Moronae—ma o lana faaliliu upu, o Iosefa Samita, o i latou *uma* o molimau ola a le Alii.
- O se faamaumauga o Lana galuega i tagata na nonofo i Amerika anamua.
- E moni, e pei ona faamaonia e le Alii lava Ia.

O Le Tusi a Mamona ua faamautuina:

- Le faasinomaga patino o le Tama Faalelagi ma Lona Alo Pele, o Iesu Keriso.
- O le manaomia o le Pa'u o Atamu ma le poto o Eva, ina ia maua e tagata le olioli.

O Le Tusi a Mamona ua faamaoniaina le sese o manatu e faapea:

- Na muta faaliga i le Tusi Paia.
- E manaomia ona papatisoina tamaiti.
- E mafai ona maua le fiafia i le amioleaga.
- Ua lava le lelei o le tagata ia mo le faaeaga (e manaomia sauniga ma feagaiga).
- O le Pa'u o Atamu ua leaga ai tagata uma i le "uluai agasala."

O Le Tusi a Mamona ua faataunu ai valoaga faatusi paia e faapea:

- E faalogo foi "isi mamoe" i Lona leo.
- O le a faia e le Atua "se galuega ofofogia ma se mea e ofo ai," i le fetalai "mai le efuefu."

- O le "laau a Iuta" ma le "laau a Iosefa" o le a tasi.
- O le a faapotopotoina Israaelu ua faataapeapeina "i aso e gata ai" ma le auala o le a faia ai lena mea.
- O le nuu o le tofi mo le gafa o Iosefa o le Iulagi i Sisifo.

Ua faamanino e le Tusi a Mamona malamalamaaaga e uiga:

- I lo tatou muai olaga.
- Oti. O se vaega taua o le fuafuaga sili o le fiafia a le Atua.
- O le olaga pe a oo mai le oti, lea e amata i le parataiso.
- O le toetu o le tino, toe tuufaatasia ma lona agaga, e avea ai ma agaga ola pea.
- O le faaminoina o i tatou e le Alii o le a fua i a tatou galuega ma manaoga o o tatou loto.
- O le auala e faatino tatau ai saunaiga: mo se faataitaiga, papatisoga, faamanatuga, faaeega o le Agaga Paia.
- O Le Togiola a Iesu Keriso.
- O Le Toetu.
- O le matafaioi taua a agelu.
- O le natura faavavau o le perisitua.
- O le auala e faatosina atili ai amioga faletagata soifua e le mana o le upu nai lo le malosi o le pelu.

O le Tusi a Mamona ua faaalia mai faamatalaga sa lei iloaina muamua:

- Sa faatinoina papatisoga a o lei soifua mai Iesu Keriso.
- Sa fausiaina malumalu ma faaaogaina e tagata i Amerika anamua.
- O Iosefa, le atalii lona 11 o Israaelu, na muai vaaia le matafaioi faaperofeta o Iosefa Samita.
- Sa muai vaaia e Nifae (i le 600–592 TLM) le mauaina ma le nofoia o Amerika.
- O vaega faigofie ma taua o le Tusi Paia na leiloloa.
- O le Malamalama o Keriso e tuu atu i tagata taitoatasi.
- O le taua o le faititalia o le tagata lava ia ma le manaomia mo se faafeagai o mea uma.
- O lapataiga e uiga i "pulega faalilolilo."

FAAMATALAGA

1. Tagai 3 Nifae 17:9–12.
2. Thomas S. Monson, "O Le Mana o le Tusi a Mamona," *Liahona*, Me 2017, 87.
3. Tagai i le Alema 42:8.
4. Tagai Alema 7:11–12.
5. Tagai, mo se faataitaiga, 2 Nifae 31:2–21.
6. Tagai 1 Nifae 13:29–33.
7. Tagai 2 Nifae 26–33.
8. Tagai Moronae 8:11–15.
9. Mosaea 2:41; tagai foi Alema 28:12.
10. Tagai Alema 41:10–11.
11. E manaomia foi sauniga ma feagaiga paia faapitoa.
12. Tagai Alema 13:27.
13. Tagai Aooga a Peresitene o le Ekalesia: *Polika Iaga* (1997), 305. Sa ia faasino atu i le taua o le galuega o malumalu ma talafasolopito o aiga.



Saunia e Elder Dale G. Renlund

O Le Korama a Aposetolo e Toasefululua

O Le Perisitua ma le Mana Togiola o le Faaola

Ae, mo le ausiaina o faamoemoega a le Tama Faalelagi, e tatau ona avanoa le mana togiola a Keriso i fanau a le Atua. E tilivaina atu e le perisitua nei avanoa.

Ta vaai faalemafaufau faatasi i se roketi ua uliina atu i se tulaga ina ia saunia mo le masii atu i luga. Vaai faalemafaufau la i le afi. O le suauu, i se mumu faatonutonu, e liua i le kesi vevela lea e puna mai i fafo, ma tuuina atu le uunaiga manao-mia e tulei ai le roketi i le vanimominimo. O le mea mulimuli, mafaufau i le uta o loo nofo i luga o le roketi. E faatoa iloa atoa le taua o le uta pe a oo i le mea e tatau ona i ai ma galue e pei ona tatau ai. E le manaomia ona avea se tasi ma saienisi o roketi e talisapaiaina, o le taatiatia ai o se satelite taugata mo fesootaiga i le lalolagi i se faleteuoloa o le a ititi ai le taua. O le misiona a le roketi e na o le tilivaina lava o se uta.


I lenei afiafi, ou te fia faatusaina le perisitua ua tatou umiaina i se roketi ma le avanoa e manuia ai mai le mana togiola a le Faaola i le uta o tilivaina atu e se roketi.

Ona o Lana taulaga togiola, ua i ai ia Iesu le pule ma le mana e togiola ai tagata uma. Ina ia mafai ona maua Lona mana togiola, ua Ia faamatuu atu ai se vaega o Lana pule ma le mana i

alii o i le lalolagi. O lenei pule ma le mana ua faamatuuina mai ua ta'ua o le perisitua. E faatagaina ai e umia le perisitua e fesoasoani i le Tama Faalelagi ma Iesu Keriso i le La galuega —o le aumaia o le olataga ma le faaeaga i fanau a le Atua. Ua faia ona e tuuina atu ai i Lana fanau le avanoa e maua ai faamanuiaga o le mana togiola a le Faaola.

E taua le mana togiola a Iesu Keriso ona e leai se tasi o i tatou e mafai ona toe foi atu i lo tatou aiga faalelagi e aunoa ma se fesoasoani. I le olaga faalelagino, tatou te faia ai pea mea sese ma solia tulafono a le Atua. Tatou te pisipisia i le agasala ma e le mafai ona faatagaina e toe nofo i le afioaga o le Atua. Tatou te manaomia le mana togiola a le Faaola e mafai ai ona tatou toe faalelei ma le Tama Faalelagi. Na motusia e Iesu Keriso noataga o le oti faalelagino, ma mafai ai ona toetu tagata uma. Ua Ia ofoina mai le faamagaloga o agasala, e faalagolago lea i le usiusitai i tulafono ma sauniga o Lana talalelei. E ala atu ia te Ia, ua ofoina mai ai le faaeaga. O le avanoa ia manuia mai le mana togiola a le Faaola o le uta sili lea ona ttau o le foafoaga.

Ae, mo le ausiaina o faamoemoega a le Tama Faalelagi, e tatau ona avanoa le mana togiola a Keriso i fanau a le Atua.¹ E tilivaina atu e le perisitua nei avanoa. O le roketi lea. E taua le perisitua aua ua na o lana pule e faatautaia ai ia sauniga ma feagaiga talafeagai i luga o le fogaeleele. Afai e toilalo le perisitua i le tuuina atu o le avanoa ia manuia ai mai le mana togiola a le Faaola, o le a la lona faamoemeoga? Pe ua na o se mea faapapa lavelave e gauai atu i ai? Ua faamoemoe le Atua ia faaaoga le perisitua ia sili atu nai lo se vasega i Aso Sa po o le avea ma se avanoa mo le auauna atu. Na te faamoemoe ina ia tilivaina le uta.





O faaletonu laiti i roketi e mafai ona faatoilalo ai se misiona. O tāpuni manutinuti ma le vaivai o le tino [o le roketi] e mafua ai ona faaletonu se roketi. Ina ia puipuia le perisitua mai tulaga faafaatusa o le manutinuti o tāpuni ma le vaivai o le tino, ua puipuia ai e le Atua lona faaeeina atu ma le faaaogaina.² O le faaeeina atu o le perisitua ua malupuipuia e ala i ki o le perisitua, o aia tatou ia o le au peresitene ua tuuina atu i alii.³ O le faaaogaina o le perisitua ua malupuipuia i feagaiga lea e faia e lē o loo umaina le perisitua. O le faaaogaina o le perisitua e puleaina uma e ki ma feagaiga o le perisitua. O le tofi o le perisitua o se alii e tuuina atu taitoatasi ma e le tutoatasi mai ia te ia;⁴ o le perisitua e le o se punavai le mailoa o le mana tutoatasi.

E maua uma le Perisitua Arona ma le Perisitua Mekisateko e ala i le feagai ga.⁵ E fuafuaina e le Atua ia tuutuuga ae talia e alii. I le talanoa lautele atu, e osi feagaiga e umia le perisitua e fesoasoani i le Atua i Lana galuega.

I le amataga o lenei tisipenisione, sa faamalamalama mai e Iesu Keriso, o le feagaiga o le perisitua e “faamauina i luga o outou i le manatu ia te outou, ma ua le nao mo le manatu ia te outou, ae mo le manatu i le lalolagi atoa . . . ona ua latou le o mai ia te a’u.”⁶

E aoao e lenei mea o le faamoemoega o le perisitua o le valaaulia lea o isi e o mai ia Keriso i le fesoasoani atu ia i latou ia maua le talalelei toefuataina. Ua tatou maua le perisitua ina ia mafai ona tatou fesoasoani atu i fanau a le Tama Faalelagi ina ia faamamaina le avega o le agasala ma avea faapei o Ia. E ala atu i le perisitua, ua faaalia le mana faale-Atua i olaga o i latou uma o e osia ma tausia feagaiga o le talalelei ma maua sauniga e faatatau i ai.⁷ O le auala lenei tatou te o mai taitoatasi ai ia Keriso, ia faamamaina, ma faalelei ma le Atua. Ua avanoa le mana togiola e Keriso e ala atu i le perisitua, lea e tilivaina le uta.

O feagaiga ma le Atua e faamaoni ma paia. E tatau i se alii ona saunia mo,

aoao e uiga i, ma ulu atu i ia feagaiga ma le faamoemoe e faamamaluina i latou. O se feagaiga e avea ma se tautinoga a le tagata lava ia. I le toe faaupuina o le tusitala Peretania o Robert Bolt, e faatoa osia e se alii se feagaiga pe a ia manao e tuuto atu o ia lava i se tulaga ese i se folafolaga. Na te faia se fesoootaiga i le va o le moni o le folafolaga ma lona lava amio mama. Pe a osia e se alii se feagaiga, o loo ia uuina ia lava, e pei o le vai, i ona lima faafuofu. Ma afai e matala ona tamailima, o le a le mafai ona ia toe mauaina o ia. O se tagata e solia le feagaiga ua le o toe i ai se tagata e tautino atu po o se faamaoniga e ofoina atu.⁸

E osifeagaiga se tagata e umia le Perisitua Arona ia aloese mai le amioleaga, fesoasoani i isi ia faaleleia ma le Atua, ma saunia ina ia maua le Perisitua Mekisateko.⁹ O nei tiutetauave paia e faataunuina pe a ia aoao atu, papatiso, faamalosia tagata o le Ekalesia, ma valaaulia isi e talia le talalelei. O ana metotia e “faaroketi”. O se taui, ua



folafola mai e le Atua le faamoemoe, faamagaloga, le auaunaga a agelu, ma ki o le talalelei o le salamo ma le papatisoga.¹⁰

E osifeagaiga le tagata e umia le Perisitua Mekisateko e faataunuina ia tiutetauave e faatatau i le Perisitua Arona ma faalautele lona valaauga i le Perisitua Mekisateko.¹¹ Na te faia i le tausia o poloaiga e o faatasi ma le feagaiga. O nei poloaiga e aofia ai le tuuina atu "ma le filiga i upu o le ola e faavavau" i le ola ai i "afioga uma e tulei mai le fofoga o le Atua,¹² molimau atu ia Iesu Keriso ma Lana galuega i aso e gata ai,¹³ e le mitamitavale ia te ia lava,¹⁴ ma avea ma uo o le Faaola, faalagolago atu ia te Ia e pei ona faia e se uo.¹⁵

O se taui, ua folafola mai e le Atua o le a maua e lē o umia le Perisitua Mekisateko ia ki e malamalamai ai mealilo a le Atua. O le a ia atoatoa ina ia mafai ai ona ia tu i luma o le Atua. O le a mafai ona ia faatunuina lana matafaioi i le galuega o le faaolataga. O le a saunia e Iesu Keriso le ala e afio muamua atu ai i luma o lē o umia le perisitua ma o le a faatasi ma ia. O le a i ai le Agaga Paia i le loto o lē umia le perisitua ma o le a sapasapaia o ia e agelu. O le a famalosia ma faafouina lona tino. O le a avea o ia ma suli i faamanuiaga a Aperaamo ma, faatasi ai ma lona faletua, avea ma suli faatasi

ma Iesu Keriso i le malo o le Tama Faalelagi.¹⁶ O nei mea o ni "[folafolaga] silisili ese lava ma le aoga."¹⁷ E leai ni folafolaga sili atu e mafai ona mafaufaufina.

I alii taitoatasai o e mauaina le Perisitua Mekisateko, ua faamautu mai e le Atua Ana folafolaga o le feagai-ga faatasi ai ma se tautoga.¹⁸ O lenei tautoga ua na o le Perisitua Mekisateko e faatatau i ai,¹⁹ ma o le Atua e tauto i le tautoga, ae le o lē umia le perisitua.²⁰ Talu ai o lenei tulaga uiga ese e aofia ai Lona mana ma le pule faalelagi, e faaaoga e le Atua se tautoga, e faaaoga ai le gagana sili ona malosi e mafai ona ia faia, e faamautinoa mai ai ia i tatou le natura mausali ma lemasuia o Ana folafolaga.

O taunuuga ogaga e mafua mai i le solia o feagaiga o le perisitua ma le fulitua atoa mai ia i latou.²¹ O le le amanaiaina po o le le popole i se valaauga o le perisitua e tai pei o le faalauiloa atu o le vaivai o mea faitino i totonu o se vaega o le roketi. E lamatia ai le feagaiga o le perisitua aua e mafai ona taitai atu ai i le le manuia o le misiona. O le le usiusitai i poloaiga a le Atua e solia ai le feagaiga. Mo se tasi e faaauau pea ma e le salamo i le solia o feagaiga, e aveesea ia faamanuiaga folafolaina.

Na oo ina ou malamalamai atoa i le fesootaiga i le va o le roketi "perisitua"

ma le uta o "avanoa e manuia ai mai le mana togiola a Keriso" i le tele o tau-saga ua mavae. I se faaiuga o se vaiaso, e lua ni ou tofiga sa i ai. O le tasi o le fatuina o le uluai siteki i se atunu, ma le isi o le faatalanoaina o se alii talavou ma, a faapea ua sologa lelei mea uma, toefuatai lona perisitua ma faamanu-iaga o le malumalu. O lenei alii ua 30 tausaga sa liliu mai i le Ekalesia i le faaiuga o lona vaitausaga o le 20. Sa ia auauna atu i se misiona faamama-luina. Ae ina ua ia toe foi mai i le fale, na leiloa lona ala, ma leiloa lona auai i le Ekalesia. Ina ua mavae ni tausaga, "sa ia iloaina lona tulaga,"²² ma faatasi ma le fesoasoani a taitai perisitua alofa ma tagata agalelei o le ekalesia, sa ia salamo ma toe faaulufale mai e ala i le papatisoina i le Ekalesia.

Mulimuli ane, sa ia talosaga ia toe-fuatai lona perisitua ma faamanuiaga o le malumalu. Sa matou faatulagaina se taimi mo le Aso Toonai i le 10 i le taeao i le falelotu. Ina ua ou taunu atu mo faatalanoaga e muamua atu, ua leva ona i ai o ia iina. Sa ia matua naunau lava ia toe maua le perisitua, sa le mafai ona ia faatali.

I le taimi o le ma faatalanoaga, sa ou faaali ia te ia le tusi o loo faamatala ai le iloiloina patino e Peresitene Thomas S. Monson o lana talosaga ma faataga-inia ai le faatalanoaga. Sa tagi lenei alii

talavou lototele. Ona ou tauina atu lea ia te ia, o le aso o le ma faatalanoaga o le a leai se uiga aloaia i lona olaga. Sa foliga le mautonu o ia. Sa ou tau atu ia te ia e uma loa ona ou toefuataiina ona faamanuiaga, e pau le mea o le a faaali mai i lana pepa faamaumau o uluai aso o lona papatisoga, faamauga, faauuina o le perisitua, ma le faaeega paia. Sa tau toe mole o ia.

Sa ou fai atu ia te ia e faitau mai le Mataupu Faavae ma Feagaiga:

“Faauta, o le ua salamo i ana agasala, o ia lava lea ua faamagaloina, ma o A'u, o le Alii, e le toe manatuaina lava i latou.

“O le mea lenei e mafai ai ona outou iloa pe afai ua salamo se tagata i ana agasala—faauta, e ta'uta'u atu e ia i latou ma lafoai i ai.”²³

Na tumu ona mata i loimata mo le taimi lona tolu. Ona ou tuuina lea o'o'u lima i luga o lona ulu ma i le suafa o Iesu Keriso ma e ala i le pule o le Perisitua Mekisateko, ma faatasi ai ma le faatagaga a le Peresitene o le Ekalesia, sa ou toefuataiina lona perisitua ma faamanuiaga o le malumalu.

O le olioli na uftitia ai i ma'uua sa maoae. Ua ia iloa ua toe faatagaina o ia e umia ma faaaoga le perisitua a le Atua. Ua ia iloa ua toe faagaoioa atoatoa ona faamanuiaga o le malumalu. Sa i ai se osooso i lana laa ma



se malamalama susulu e uiga ia te ia. Sa ou matua mitamita ia te ia, ma sa ou lagona le mitamita foi o le Tama Faalelagi ia te ia.

Mulimuli ane, sa faatulagaina le siteki. Sa lelei le auai o le Au Paia nau-nautai ma faamaoni i sauniga, ma sa lagolagoina se au peresitene matagofie o le siteki. Ae, mo a'u, o le talaaga iloga o le faatulagaina o le uluai siteki i se atunuua sa faamalumaluina e le olioli sa ou lagonaina i le toefuataiina o faamanuiaga i lenei alii talavou.

Ua ou iloaina o le faamoemoega o le faatulagaina o se siteki, po o le faaaogaina o le perisitua a le Atua i soos se auala, ina ia fesoasoani i le Tama Faalelagi ma Iesu Keriso i le La galuega, ma tuuina atu ai i fanau taitoatasati a le Atua le avanoa mo le faaolataga ma le faaeaga. E pei o le roketi o lona faamoemoega o le tilivaina atu o se uta, o le perisitua e tilivaina atu le talalelei a Iesu Keriso, ma mafai ai e tagata uma ona osia feagaiga ma maua ia sauniga e faatatau i ai. “O le toto togiola o Keriso”²⁴ e mafai ona faaaoga i o tatou olaga a o tatou maua le faatosinaga faapaiaina a le Agaga Paia ma maua faamanuiaga ua folafola mai e le Atua.

E le gata i lou usiusitai o oe lava ia i tulafono ma sauniga o le talalelei, ou te valaaulia outou ina ia osia ma tausia feagaiga o le perisitua. Maua le tautoga a le Atua ma Lana folafolaga. Faalautele ou tiutetauave i le perisitua e fesoasoani ai i le Tama Faalelagi ma Iesu Keriso. Faaaoga le perisitua e fesoasoani e tilivaina atu ai i se tasi le avanoa ia manuia ai mai le mana togiola o le Faaola! A o e faia, o le a oo mai faamanuiaga silisili ia te oe ma lou aiga. Ou te molimau atu o loo soifua le Togiola ma o loo taitaia lenei galuega, i le suafa o Iesu Keriso, amene. ■

FAAMATALAGA

1. Tagai 1 Nifae 11:31; 2 Nifae 2:8.
2. Tagai Mataupu Faavae ma Feagaiga 121:36.
3. Tagai Mataupu Faavae ma Feagaiga 42:11; tagai foi ia Dallin H. Oaks, “O Ki ma le Pule o le Perisitua,” *Liahona*, Me 2014, 49–52.
4. Tagai Mataupu Faavae ma Feagaiga 124:95, 130, 132. O le perisitua e mauaina e se alii e le sili atu le tutoatasati ia te ia nai lo le mana togiola o Keriso e tutoatasati ia Keriso.
5. O mau faasino i se feagaiga e fesootai i le perisitua maualalo o loo maua i le Numera 25:10–13; Neemia 13:29; ma le Malaki 2:2–8.

O mau faasino e faatatau i se feagaiga i le Perisitua Mekisateko o loo maua i le Joseph Smith Translation, Kenese 14:26–37 (in the Bible appendix); Salamo 110:1, 4; ma le Mataupu Faavae ma Feagaiga 84:39–42. Tagai foi Bruce R. McConkie, “The Doctrine of the Priesthood,” *Ensign*, May 1982, 32–34.

6. Mataupu Faavae ma Feagaiga 84:48, 50.
7. Tagai Mataupu Faavae ma Feagaiga 84:19–21.
8. Tagai Robert Bolt, *A Man for All Seasons. A Play in Two Acts* (1990), xiii–xiv, 140.
9. Tagai Numera 25:12–13; Neemia 13:29; Esekielu 34:2–6; Malaki 2:2–9; Mataupu Faavae ma Feagaiga 13:1; 20:46–59; 84:33–40.
10. Tagai Eperu 7:19; Mataupu Faavae ma Feagaiga 84:26–27.
11. Tagai Mataupu Faavae ma Feagaiga 84:33.
12. Tagai Mataupu Faavae ma Feagaiga 84:33–44.
13. Tagai Mataupu Faavae ma Feagaiga 84:61–62.
14. Tagai Mataupu Faavae ma Feagaiga 84:73.
15. Tagai Mataupu Faavae ma Feagaiga 84:77–88.
16. Tagai Faaliliuga a Iosefa Samita, Kenese 14:26–37 (i le faaopoopoga o le Tusi Paia); Eperu 7:11; Mataupu Faavae ma Feagaiga 84:19, 33–34, 38, 42, 77–88.
17. 2 Peteru 1:4.
18. Tagai Faaliliuga a Iosefa Samita, Kenese 14:27–31 (i le faaopoopoga o le Tusi Paia); Salamo 110:1, 4; Faaliliuga a Iosefa Samita, Eperu 7:19–21 (i le faaopoopoga o le Tusi Paia); Mataupu Faavae ma Feagaiga 84:33–40, 48.
19. Tagai *The Teachings of Ezra Taft Benson* (1988), 223; Joseph Fielding Smith, in Conference Report, Apr. 1970, 59; *Teachings of the Prophet Joseph Smith* sel. Joseph Fielding Smith (1976), 323.
20. E leai se mau faasino faatusipaia po o se tala o le tagata na faatauto i se tautoga a o faia le feagaiga o le Perisitua Mekisateko. Nai lo lena, i le Faaliliuga a Iosefa Samita, Kenese 14:27–31 (i le faaopoopoga o le Tusi Paia); Salamo 110:1, 4; Eperu 7:21 ma le Mataupu Faavae ma Feagaiga 84:40, o le Atua e tauto i se tautoga a o Ia osia le feagaiga ma le tagata. Na saunoa Elder Bruce R. McConkie: “Ua tauto le Alii i se tautoga i lona lava suafa . . . faapea o tagata uma o e tausia feagaiga na osia e fesootai ma le Perisitua Mekisateko o le a mautofi, maua ma mauaina mea uma i lona malo tumau e faavavau. . . . Na tauto le Atua i se tautoga o le a faaeaina Keriso, ma e toe tauto, i le taimi o le a tofu maua ai e i tatou taitoatasati le Perisitua Mekisateko, o le a tatou maua se faaeaga pe a tatou faamaoni ma faatuatua i mea uma” (“The Doctrine of the Priesthood,” *Ensign*, May 1982).
21. Tagai Mataupu Faavae ma Feagaiga 84:41–42. O le salamo e mafai lava i taimi uma mo i latou o e naunau ia sui. Tagai, mo se faataitaiga, Dale G. Renlund, “Salamo: O Se Filifila Fiafia,” *Liahona*, Nov. 2016, 121–24.
22. Luka 15:17.
23. Mataupu Faavae ma Feagaiga 58:42–43.
24. Mosaea 4:2.



Saunia e Elder David F. Evans
O Le Fitugafulu

O Le Moni o Mea Uma

Ua tofu i tatou taitoatasi ma se tiutetauave patino ina ia faia mea e tatau ai ina ia maua ai ma tausia se molimau malosi.

Ua tatou o mai i lenei po ma le faamoemoe ma le faatuatua o le a tatou o ese atu ua faamalosia ma faamanuaina i nisi o auala, e le Agaga Paia, o le e aoao mai le upumoni.¹ E faatatau i lo tatou sailiga faaletagata lava ia mo le upumoni lea ou te manao e talanoa atu ai.

A'o avea ma se tama talavou, sa ia te au ni fesili se tele e uiga i le Eklesia. O nisi o au fesili sa faamaoni. O isi sa le faamaoni ma sa fatuina ona o masalo-sologa a isi.

E masani lava ona ou talatalanoa i a'u fesili ma lo'u tina. Ou te mautinoa lava sa ia lagona o le tele o au fesili sa faamaoni ma e mai i lo'u loto. Ou te manatu sa fai si ona le fafia laitiiti i fesili ia e le faamaoni ma sili ona finauvale. Peitai, na te lei faia ia leaga ou lagona mo le i ai o fesili. Na te faalogo ma taumafai e taliina i latou. A ia lagona ua ia fai mai mea uma na ia mafaia ma o loo i ai pea ni a'u fesili, na te fai mai se mea faapea: "David, o se fesili lelei lena. A o e saili ma faiatau ma tatalo mo le tali, aisea e te le faia ai ni mea e te iloa e ao ona e faia ma aua le faia ni mea e te iloa e le tatau ona e faia?" O lenei mea sa avea ma mamanu mo la'u sailiga mo le upumoni. E ala i le suesue, tatalo, ma le tausia o poloaiga, sa ou iloa ai o loo i ai tali i au

fesili uma e taua. Sa ou iloa foi mo nisi o fesili, e manaomia le faatuatua faifai pea, onosai, ma faaliga.²

Sa tuu maia e tina ia te au le tiute-tauave o le atiinaeina o le faatuatua ma saili ia tali. Sa ia silafia o tali taua o le a oo mai mai i lou sailia o le upumoni i le ala na faatulagaina e le Tama Faalelagi. Sa ia silafia ou te manaomia ona maua le upumoni. Sa ia silafia ou te manaomia ona faamaoni i au fesili ma ia naunau e faatino i luga o mea ua uma ona ou iloaina e moni. Sa ia

silafia ou te manaomia ona suesue ma tatalo ma ou te manaomia ona atiae le onosai atili a o ou sailia tali mai le Alii. O le naunau ina ia onosai o se vaega o la tatau sailiga mo le upumoni ma o se vaega o le mamanu a le Alii o le faaalia mai o le upumoni.³

Mulimuli ane, sa oo ina ou iloa sa aoao mai e lou tina ia te au le mamanu a le Tama Faalelagi mo le sailiga o le upumoni. Sa faateleina le faatuatua, sa amata ona oo mai tali, ma sa ou talaina se valaauga o le misiona.

Sa i ai se taimi, i le amataga o la'u misiona, na ou iloa ai e tatau ona ou iloa pe moni le Eklesia ma o Iosefa Samita o se perofeta a le Atua. Sa ou lagona le mea na matuai manino le faailoa mai e Peresitene Thomas S. Monson i la tatou konafesi aoao ua tuanai atu: "Afafai e te lei mauaina lava se molimau mausali o nei mea, ia e faia mea e tatau ai ina ia maua se molimau. E taua mo oe le i ai o sau lava molimau i nei taimi faigata, aua o molimau a isi e faatapulaa lona aoga mo oe."⁴ Sa ou iloa le mea sa manaomia. Sa ou manaomia le faiatina o le Tusi a Mamona ma se loto faamaoni, ma se faamoemoega moni, ma ole atu i le Atua pe moni.

Faalogo i le folafolaga matagofie a lo tatou Tama Faalelagi na tuuina mai e ala i le perofeta o Moronae: "Ma pe a outou maua nei mea, ou te apoapoi atu ia te outou ia outou ole atu i le



Atua, le Tamā Faavavau, i le suafa o Iesu Keriso, pe ua le moni ea nei mea; ma afai tou ole atu ma le loto faamoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia.”⁵

Ina ia maua mea sa i totonu o le Tusi a Mamona, sa manaomia ona ou faitau i ai. Sa ou amata i le amataga o le tusi ma faitau i aso uma. O nisi e vave ona mauaina se molimau. Mo isi, e alu ai le isi taimi ma isi tatalo ma e ono aofia ai le faitauina o le tusi i le tele o taimi. Sa ou manaomia le faitauina o le tusi atoa ae ou te lei mauaina le molimau folafolaina. Ae peitai, na faaali mai e le Atua le upumoni o ia mea ia te au e ala i le mana o le Agaga Paia.

I lau api talaaga faafaifeautalai, sa ou faamatala ai lou olioli i le iloaina o le upumoni faapena foi ma lou tautinoga o le faailoaga patino ma le faamoemoega moni e galue i luga o le upumoni na ou mauaina. Sa ou tusia: “Ua ou tautino atu i lou Tama oi le Lagi ma ia te au lava ou te faia le mea silisili, e tuu atu le 100 pasene mo le vaega o totoe o lou olaga, po o a mea o le a talosaga ai au, ou te faia, ae mo le taimi nei ua ia te au le vaega o totoe o lau misiona ma o le a ou faia o se misiona maoae, se tasi e le lelei ou lagona e uiga i ai, ae e le mo au, e mo le Alii. Ou te alofa i le Alii, ma ou te fiafia i le galuega, ma ou te tatalo ia le aluese lava lena lagona mai ia te au.”

Na oo ina ou iloa o le tausiga faifai pea ma le faaaauauina pea o taumafaiga ina ia salamo ma tarsi poloaga e manaomia ina ia le aluese ai lena lagona. Na saunoa mai Peresitene Monson, “E manaomia e se molimau ona faatumauina le taūa ma le ola e ala i le usitai faifai pea i poloaga a le Atua faapea ma le tatalo e le aunoa ma le suesueina o tusitusiga paia i aso uma.”⁶

I le aluga o tausaga, sa ou fesili atu i faifeautalai ma tagata talavou i le lalolagi atoa pe faapefea ona latou amata i o latou taumafaiga patino e saili le upumoni ma maua se molimau. E toetoe o tagata uma na ou fesili i ai, sa latou tali mai o o latou lava taumafaiga ia maua se molimau



patino na amata i le faaiuga faaletagata lava ia e faitau le Tusi a Mamona mai le amataga ma fesili atu i le Atua pe ua moni. I le faia o lea mea, sa latou filifili ai e “gaoioi” nai lo le “faagaoioi”⁷ e masalosaloga a isi.

Ina ia iloa le upumoni, e tatau ona tatou ola i le talalelei⁸ ma “tofotofo”⁹ i le upu. Ua lapataia i tatou ia aua nei teena le Agaga o le Alii.¹⁰ O le salamo, a tuuafatasia ma se naunautaiga e tausi poloaga, o se vaega taua o saili taitasi faaletagata lava ia mo le upumoni.¹¹ O le mea moni, atonu tatou te manaomia ona naunau e “lafoai ese [a tatou agasala] uma” ina ia tatou iloa le upumoni.¹²

Ua poloaiina i tatou e “saili i le aoaoina, e ala lava lea i le suesue ma le faatuatua foi” ma ia “saili . . . mai totonu o tusi sili ona lelei upu o le poto.”¹³ O la tatou sailiga mo le upumoni e tatau ona taulai atu i “tusi sili ona lelei” ma punavai sili ona lelei. I tusi silisili, o loo i ai tusitusiga paia ma upu a perofeta soifua.

Ua talosagaina i tatou taitoatasi e Peresitene Monson e “faia [mea] e tatau ai” ina ia maua ma tausia se molimau malosi.¹⁴ O le a se mea e manaomia e faaloloto ai ma faamalosia ai lau molimau? Ua tofu i tatou taitoatasi ma se tiutetauave patino e fai mea e tatau ai ina ia maua ai ma tausia se molimau malosi.

O le tausia ma le onosai o a tatou feagaiga a o tatou “faia [mea] e tatau ai” ina ia maua tali mai le Alii o se vaega o le mamanu a le Atua mo le aooina o le upumoni. Aemaise lava pe a faigata ni mea, tatou te ono manaomia ia “gauai atu ma le fiafia ma le onosai i le finagalo atoa o le Alii.”¹⁵ O le onosai e tausi feagaiga e faateleina ai lo tatou lotomaualalo, faaloloto ai lo tatou naunau e iloa le upumoni, ma faataga ai le Agaga Paia e “taitai [tatou] i ala o le poto ina ia mafai ona [tatou] manuia ai, ma uluola, ma faasaoina.”¹⁶

E ia i maua ma lou toalua o Mary, se tasi ma te alolofa faapelepele i ai sa tauivi mo le tele o lona olaga i ni vaega faapitoa o le Ekalesia. E alofa o ia i le talalelei, ma e alofa o ia i le Ekalesia ae o loo i ai pea ni fesili. Ua faamauina o ia i le malumalu, malosi i le Ekalesia, faataunu ana valaauga, ma o se tina ma se ava lelei. I le aluga o tausaga, sa ia taumafai e fai mea na sa ia iloa e sao ma aloese mai le faia o na mea sa ia iloa e sese. Sa ia tausia ana feagaiga ma faaaauau pea ina saili. E i ai taimi e na te faafetai ai i le pipii mau i le faatuatua o isi tagata.

E lei leva atu sa talosaga ai lona epikopo e fia vaaia ia te ia ma lona toalua. Sa ia fai atu ia i laua e talia se tofiga faalemalumalu e galulue o ni sui mo i latou o e manaomia sauniga o le malumalu. Sa faateia i laua i lenei



valaauga, ae sa la taliaina ma amata le la auaunaga i le maota o le Alii. Sa auai talu ai nei lo la atalii talavou i le sailiga o talafaasolopito o aiga ma maua ai se tasi o le aiga o le e lei faia ni sauniga o le malumalu. I se taimi, sa la fai ma sui ma faia sauniga o le malumalu mo lenei tagata ma lona aiga. A o la tootutuli i le fata faitaaulaga ma faatino le sauniga o le faamauga, sa maua e lenei fafine agalelei, onosai, o le sa saili mo se taimi umi se aafiaga faaleagaga lea na ia iloa ai e moni ma faamaoni le malumalu ma sauniga o loo faia i totolu. Sa valaaau atu i lona tina ma tau ia te ia lona aafiaga ma faapea atu a o ia te ia pea ni fesili, ua ia iloa e moni le malumalu, e moni sauniga o le malumalu, ma e moni le Ekalesia. Sa tutulu lona tina ma le loto faafetai mo se Tama Faalelagi agaalofa, onosai ma mo se tama teine o le sa faaaaua peea onosai e saili.

O le onosai e tausia feagaiga e aumaia ai faamanuiaga o le lag i totolu o o tatou olaga.¹⁷

Ua ou maua le mafanafana sili i le folafolaga a le Alii e faapea "o le mana o le Agaga Paia e mafai ona outou iloa ai le moni o mea uma lava."¹⁸ E aunoa ma le iloina o mea uma, e mafai ona tatou iloa le upumoni. E mafai ona tatou iloa e moni le Tusi a Mamona. O le mea moni, e pei ona aoao mai e Peresitene Russell M. Nelson i lenei

aoauli, e mafai ona tatou maua se lagona loloto i le 'vaega totonugalemu' o o tatou loto [tagai Alema 13:27], o le Tusi a Mamona e manino lava o le afioga a le Atua." Ma e mafai ona tatou "lagonaina le o'oo'o lea tatou te le mananao ai lava e ola i se aso e aunoa ma le tusi."¹⁹

E mafai ona tatou iloa o le Atua o lo tatou Tama, e alofa ia i tatou, ma o Lona Alo, o Iesu Keriso, o lo tatou Faaola ma le Togiola. E mafai ona tatou iloa o le auai ai i Lana Ekalesia etatau ona faatauaina ma o le a fesoasoani le aai ma le feinu i le faamanatuga i vai-aso uma ia i tatou ma o tatou aiga ina ia saogalemu. E mafai ona tatou iloa e ala i sauniga o le malumlau, e mafai moni ona faatasia aiga e faavavau. E mafai ona tatou iloa o le Togiola a Iesu Keriso ma faamanuiaga o le salamo ma le faamagaloga e moni ma faamaoni. E mafai ona tatou iloa o lo tatou perofeta pele, o Peresitene Thomas S. Monson, o le perofeta a le Alii ma o ona fesoasoani ma uso o le Korama a le Toasefululua o ni aposetolo, perofeta, tagatavaai, ma tali faaialiga.

O nei mea uma ou te iloa e moni ma ou te molimau atu ai i le suafa o Iesu Keriso, amene. ■

FAAMATALAGA

1. Tagai Moronae 10:5.
2. O se tasi o fesili na faatatau i le avanoa o le perisitua i alii agavaa uma. O lenei fesili

sa taliina e ala i se faaialiga na mauaina e Peresitene Spencer W. Kimball, ona fesoasoani, ma uso a le Toasefululua i le aso 1 Iuni, 1978. O lenei faaialiga o le Folafolaga Aloaia 2 i le Mataupu Faavae ma Feagaiga.

3. Tagai, mo se faataitaiga, Luka 21:15; Roma 8:5; Alema 32:41–43; Eteru 12:19; Mataupu Faavae ma Feagaiga 21:5; 101:38; 107:30–31.
4. Thomas S. Monson, "O Le Mana o le Tusi a Mamona," *Liahona*, Me 2017, 87.
5. Moronae 10:4.
6. Thomas S. Monson, "O Le Mana o le Tusi a Mamona," 87.
7. 2 Nifae 2:14; tagai foi David A. Bednar, "Saili e Aoao e Ala i le Faatuatua," *Liahona*, Sete. 2007, 19–21.
8. Tagai, mo se faataitaiga, Ioane 7:17, lea na folafola mai ai le Alii, "Ai se tasi e fia fai lona finagalo, e iloa ai e ia le mataupu, pe mai le Atua, pe ou te tautala fua lava a'u." Tagai foi Alema 32.
9. Tagai Alema 32:27.
10. Tagai Alema 32:28.
11. Tagai Alema 22:18; Mataupu Faavae ma Feagaiga 93:27–28.
12. Alema 22:18.
13. Mataupu Faavae ma Feagaiga 88:118.
14. Thomas S. Monson, "O Le Mana o le Tusi a Mamona," 87.
15. Mosaea 24:15; tagai foi Mosaea 24:13–14; David A. Bednar, "Tauave ma le Faigofie a Latou Avega," *Liahona*, Me 2014, 87–90.
16. Mosaea 2:36.
17. Tagai Jeffrey R. Holland, "O Se Faitaulaga Sili i Mea Lelei Atali," *Liahona*, Ian. 2000, 45. I lena savali, na saunoa mai ai Elder Holland, "E vave oo mai nisi faamanuiaga, o nisi e tuai, o nisi e le oo mai vagana le lagi; ae mo i latou e taliaina le talalelei a Iesu Keriso, e oo mai lava."
18. Moronae 10:5.
19. Russell M. Nelson, "O Le Tusi a Mamona: Faamata e Faape'i Lou Olaga e aunoa ma ia?" *Liahona*, Nov. 2017, 63.



O Au Pulega Aoao ma Taitai Aoao o Le Ekalesia a lesu Keriso o le Au Paia o Aso e Gata Ai

OLE AU PERESITENE SILI



Henry B. Eyring
Fesoasoani Muamua



Thomas S. Monson
Peresitere



Dieter F. Uchtdorf
Fesoasoani Lua

OLE KORAMA A APOSETOLO E TOASEFULULUA

Russell M. Nelson

Dallin H. Oaks

M. Russell Ballard

Jeffrey R. Holland

Quentin L. Cook

David A. Bednar

Gary E. Stevenson

Ronald A. Rasband

Neil L. Andersen

D. Todd Christofferson


L. Whitney Clayton



Dieter F. Uchtdorf




Thomas S. Monson



David A. Bednar



Gary E. Stevenson



Ronald A. Rasband




Neil L. Andersen




D. Todd Christofferson



Gary E. Stevenson



Ronald A. Rasband



Neil L. Andersen



D. Todd Christofferson



L. Whitney Clayton



Dieter F. Uchtdorf



Thomas S. Monson



David A. Bednar



Gary E. Stevenson



Ronald A. Rasband



Neil L. Andersen



D. Todd Christofferson



L. Whitney Clayton



Dieter F. Uchtdorf

AU PULEGA AOAO O FITUGAFULU

	Marcos A. Aitukaitis	J. Devi Alonso	Wilford W. Andesen	Ian S. Arden	Meny B. Arnold	W. Mark Bassett	David S. Baxter	Randall K. Bennett	Shayne M. Bowen	Mark A. Bragg	Craig A. Cardon	Yoon Hwan Choi	Kim B. Clark	Weatherford T. Clayton	Carl B. Cook	Lawrence E. Corbridge
	Valeri V. Cordon	Robert C. Gay	Carlos A. Godoy	Joaquin E. Costa	Christófeli Golden	Taylor G. Goddy	Claudio R. M. Costa	Hugo Montoya	Peter J. Meurs	Richard J. Maynes	James B. Martin	Rafael L. Phin	John C. Pringle Jr.	Chi Hong (Sam) Wong	Kazuhiko Yamashita	Brian K. Ashton
	Hugo J. Martinez	Larry C. Wilson	John C. Pringle Jr.	Robert C. Gay	Valeri V. Cordon	Jose L. Alonso	Wilford W. Andesen	Marco A. Godoy	Christófeli Golden	Taylor G. Goddy	Claudio R. M. Costa	Joaquin E. Costa	Carlos A. Godoy	Valeri V. Cordon	Chi Hong (Sam) Wong	Kazuhiko Yamashita
	John C. Pringle Jr.	Devin G. Duran	Darwin V. Matania	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie	Carolyn McConkie
	Marcos A. Aitukaitis	J. Devi Alonso	Wilford W. Andesen	Ian S. Arden	Meny B. Arnold	W. Mark Bassett	David S. Baxter	Randall K. Bennett	Shayne M. Bowen	Mark A. Bragg	Craig A. Cardon	Yoon Hwan Choi	Kim B. Clark	Weatherford T. Clayton	Carl B. Cook	Lawrence E. Corbridge

	Edward D. Funk		Bradley D. Foster		Enrique R. Falabella		David F. Evans		Larry J. Dyches		Paul V. Johnson		Larry S. Kachler		Von G. Keetch		Jörg Klebingat
	Michael F. Palmer		Allan Octavia		Brian H. Nelson		Steven E. Show		Joseph W. Stati		Vern P. Stanfill		Michael John U. Teh		José A. Féreira		Amilfo Valenzuela
	Michael F. Palmer		Allan Octavia		Steven E. Show		Joseph W. Stati		Vern P. Stanfill		Michael John U. Teh		José A. Féreira		Amilfo Valenzuela		Michael F. Palmer
	Michael F. Palmer		Allan Octavia		Steven E. Show		Joseph W. Stati		Vern P. Stanfill		Michael John U. Teh		José A. Féreira		Amilfo Valenzuela		Michael F. Palmer
	Michael F. Palmer		Allan Octavia		Steven E. Show		Joseph W. Stati		Vern P. Stanfill		Michael John U. Teh		José A. Féreira		Amilfo Valenzuela		Michael F. Palmer

O LE AU EPIKOPO PULEFAAMALUMALU

	Dean M. Davies		Gérald Causse		W. Christopher Wardell		Douglas D. Holmes		Cristina B. Franco		Bonnie H. Cordon		Joy D. Jones		Stephen W. Owen		M. Joseph Brough
	Bonnie H. Cordon		Joy D. Jones		Sharon Eubank		Jean B. Bingham		Reina A. Aburo		Neil F. Marchett		Carol F. McConkie		Brian K. Ashton		Devin G. Duran
	Bonnie H. Cordon		Joy D. Jones		Sharon Eubank		Jean B. Bingham		Reina A. Aburo		Neil F. Marchett		Carol F. McConkie		Brian K. Ashton		Devin G. Duran
	Bonnie H. Cordon		Joy D. Jones		Sharon Eubank		Jean B. Bingham		Reina A. Aburo		Neil F. Marchett		Carol F. McConkie		Brian K. Ashton		Devin G. Duran
	Bonnie H. Cordon		Joy D. Jones		Sharon Eubank		Jean B. Bingham		Reina A. Aburo		Neil F. Marchett		Carol F. McConkie		Brian K. Ashton		Devin G. Duran





Saunia e Elder Richard J. Maynes
O Le Fitugafulu

Mauaina o le Faatuatuaga a le Alii ma Lou Aiga

O alii e i ai le “faamaoni o le loto” o alii ia e ao ona faatuatuaina—aua e fausia le faatuatuaina i luga o le amio sao.

Uso e, masalo e leai se faamalo sili atu e mafai ona tatou maua mai le Alii nai lo le iloaina e Na te faatuatuaina i tatou e avea ma e agavaa e umia le perisitua ma ni tane ma ni tama maoae.

E tasi le mea e mautinoa lava: o le mauaina o le faatuatuaga a le Alii o se faamanuiaga e oo mai e ala i taumafaiga silisili mai ia i tatou. O le faatuatuaina o se faamanuiaga e faalagolago i le usiusitai i tulafono a le Atua. O le mauaina o le faatuatuaga a le Alii e oo mai o se taunuuga o le faamaoni i feagaiga na tatou osia i vai o le papatisoga ma i malumalu paia. A tatou tausia la tatou tautinoga i le Alii, e tuputupu ae Lona faatuatuaina o i tatou.


Ou te fiafia uma i tuisusiga paia anamua ma aso nei lea e faaaoga ai le fuaitau “faamaoni o lona loto” pe a faamatalaina se uiga o se tagata amiontonu.¹ O le amio sao po o le leai o se amio sao o se elemene taua o le uiga faaletagata o se tasi. O alii e i ai le “faamaoni o le loto” o alii ia e ao ona faatuatuaina—aua e fausia le faatuatuaina i luga o le amio sao.


manino i a tatou tiutetauave ua tofia mai le lagi o ni tane ma ni tama.

Ua tatou maua se tiutetauave paia o ni tane ma ni tama mai perofeta, tagatavaai, ma tali faaaliga o aso nei e gata ai, i le pepa o faamatalaga “O Le Aiga: O Se Folafolaga i le Lalolagi.” Ua aoao i tatou e lenei pepa o faamatalaga e faapea (1) “e tatau ona pulefaamalu-malu tama i o latou aiga i le alofa ma le amiontonu,” (2) “e tuuina atu [le tama] mea e manaomia o le olaga ma le puipuiga mo o latou aiga,” ma (3) o tama e nafa ma le puipuiga o o latou aiga.²

Mo i tatou ina ia maua le faatuatuaga a le Atua, e manaomia ona tatou ausia nei tiutetauave na tofia mai le lagi e tolu i o tatou aiga i le ala a le Alii. E pei ona toe taua i le folafolaga o le aiga, o le ala a le Alii e faataunuui ai nei tiutetauave faatasi ma o tatou ava “o se paaga tutusa.”³ Ia te au, o le uiga o lenei mea, tatou te le faia se faaiuga taua e faatatau i nei tiutetauave e tolu e aunoa ma le lotogatasi atoatoa ma o tatou ava.

O le mea muamua e tatau ona tatou faia e maua ai le faatuatuaga a le Alii o le tuu lea o lo tatou faalagolago ia te Ia. Sa faaali mai e Nifae lenei ituaiga o tautinoga ina ua ia tatalo atu: “Le Alii e, ua ou faalagolago ia te oe, ma o le a ou faalagolago pea ia te oe e faavavau.” O le a ou le tuu atu lo’u faalagolago i le lima o le tagata.⁴ Sa tautino atoatoa atu Nifae e fai le finagalo o le Alii. E faaopoopo i le *faapea atu* e na te “faia mea ua poloaiina e le Alii,” sa





lei maluelue Nifae i lana tautinoga e *faataunuu* lana tofiga, e pei ona faaalia i le faamatalaga lenei: “E pei ona soifua le Alii, ma e pei foi ona tatou ola, tatou te le o ifo lava i lalo i lo tatou tama i le vao seiloga ua uma ona tatou faataunuina o le mea na poloaiina ai i tatou e le Alii.”⁵

Ona sa faalagolago muamua Nifae i le Atua, sa tuu atu ai e le Atua le faatuatuga sili ia Nifae. Sa faamanuiaina o ia e le Alii i le tele naua o le Agaga na manuia ai lona olaga, olaga o lona aiga, ma olaga o ona tagata. Ona sa pulefamalumalu Nifae i le alofa ma le amiontonu ma saunia mo ma puipuia lona aiga ma tagata, sa ia tusia, “Ma sa oo ina matou ola e tusa ma le ala o le fafia.”⁶

Ina ia tuuina se vaiga a se tamaitai e uiga i lenei mataupu, sa ou fai atu i ou afafine e toalua ua faaipoipo e fesoasoani mai ia te au. Sa ou fai atu pe mafai ona la tuuina mai i se fuaiupu se tasi pe lua le auala la te vaai ai i le taua o le faatuatuaina e pei ona aafia ai lo la olaga faaipoipo ma le aiga. O ni manatu nei a Laura Harris ma Christina Hansen.

Muamua, o Lara: “O se tasi o mea aupito taua ia te au o le iloaina a o feagai lo’u toalua ma lona aso, o loo

ia faia ni filifiliga lea e faaalia ai le faaaloalo ma alofa ia te a’u. A mafai ona ma faatuatuaina le tasi ma le isi i lenei auala, e aumaia le filemu i lo ma aiga, lea ma te mafai ai ona ma olioli i le tausi ae faatasi o lo ma aiga.”

O manatu a Christina: “O le mauaina o le faatuatuaina i se tagata e talitutusa i le mauaina o se faatuatua i se tagata. A aunoa ma lena faatuatuaina ma le faatuatua, e i ai le fefe ma le masalosalo. Mo a’u, o se tasi o faamanuiaga silisili e oo mai mai le mafai ona faatuatuaina

atoatoa o lo’u toalua o le filemu—filemu o le mafaufau i le iloaina e na te faia moni lava mea na te fai mai e fai. E aumaia e le faatuatuaina le filemu, alofa, ma se siosiomaga lea e mafai ona tuputupu ae ai lena alofa.”

E lei vaai lava Lara ma Christina i mea na tusia e le isi. E mataina ia te au le mafaufau taitasi ai o i laua uma i faamanuiaga o le filemu i le aiga e avea o se taunuuga tuusao o le mauaina o se tane e mafai ona la faatuatuaina. E pei ona faaalia i faataitaiga a ou afafine, e avea le mataupu faavae o le faatuatuaina o se matafaioi taua naua i le atiaeina o se aiga e totonugalemu ia Keriso.

Sa mafai foi ona ou fafia i lena aganuu e tasi o le totonugalemu ia Keriso i le tuputupu ae ai i se aiga lea sa faamamalu ai e lou tama lona perisitua ma maua le faatuatuga a le aiga atoa ona o le “faamaoni o lona loto.”⁷ Sei ou faasoia atu ia te outou se mea na tupu i lou talavou lea e faaalia ai le aafia leleitumau e mafai e se tama e malamalama ma ola i le mataupu faavae o le fausia o le faatuatuaina i luga o le amiosao ona i ai i luga o lona aiga.

A o ou talavou lava, sa faavaeina e lou tama se kamupani e faapitoa i le gaosiga tau enisinia. E enisinia, gaosia, ma faapipiina e lenei pisinisi laina gaosi enisinia i le lalolagi atoa.

A ou i ai i le aoga tulagalua, sa manao lou tama ou te aoao i le auala e galue ai. Sa ia manao foi ia te au e aoao i faamatalaga uma o le pisinisi. O la’u galuega muamua na aofia ai le tausiga



o le fanua ma le valiina o vaega o fale sa le mafai ona iloa e tagata lautele.

Ina ua ou ulufale i le aoga maualuga, sa siitia a'u ou te galue i le vaega lautele o le falegaosi mea. Sa ou manao e aoao le auala e faitau ai mamanu ma gaosi masini mo le gaosiga o uamea mamafa. Ina ua maea le faaiuina mai le aoga maualuga, sa ou auai i le iunivesite ona sosoo ai lea ma le ulufale atu i le misiona. O le toe foi mai i le fale i le maea ai o la'u misiona, sa alu sa'o lava i le galuega. Sa ou manaomia le maua o se tupe mo tupe faaalau o leisi tausaga aoga.

I se tasi aso e lei leva ona maea lau misiona, sa ou galue i le falegaosi ina ua valaaaina au e lou tama i totonus o lona ofisa ma fesili mai pe ou te manao e ma te o i se malaga faapisinisi i Los Angeles. O le taimi muamua lea ua valaaulia ai au e lou tama e faatasi atu ma ia i se malaga faapisinisi. Sa ia faataga moni au e alu atu i nofoaga faitele e fesoasoani e fai ma sui o le kamupani.

Ae matou te lei tuua mo le faigamalaga, sa ia saunia au i ni nai faamatallaga e uiga i lenei tagata faamoemoeina fou. Muamua, o le tagata o se kamupani faavaomalo. Lua, sa latou faafouina o latou laina gaosi i le lalolagi ato i tekinolesi tau enisinia sili ona fou. Tolu, e lei sapalaia muamua e la matou kamupani i latou i auuaunaga faaleenisinia po o le faatekinolosi. Ma le mea mulimuli, o le latou taitai maualuga o le kamupani e pule i mea tau fefaaatauaiga sa taloina lenei fonotaga e iloilo ai le matou ofa lea sa tuuina atu i se galuega fou. O lenei fonotaga sa tuuina mai ai se avanoa fou ma taua na faamoemoeina mo la matou kamupani.

Ina ua mavae le taunuai ai i Los Angeles, sa ma o ma lo'u tama i le faletalimalo o le pule mo le fonotaga. O le faagasologa muamua o mataupu faapisinisi o le talanoaina lea ma iloiloina ia vaega o mamanu faaenisinia o le galuega. O le isi aitema o le talanoaga na faatatau i auiliiliga o le faagaoioiga, e aofia ai le fuafuaina ma aso e tiliva ai. O le aitema mulimuli na talanoaina na taulai i le tau, tuutuuga, ma tulaga. O i tonu a sa manaia ai le fonotaga.

Sa faamatala mai e le taitai o le kamupani ia i matou o le matou

talosaga, o le tau pito i maualalo lea mai tau uma na auina mai mo le galuega. Ma le fia iloa, sa ia tau mai ai le tauofoga e lona lua le tau maualalo. Ona ia fesili mai lea pe ma te mananao e toe aumai i tua le matou talosaga ma toe auina atu. Sa ia taua o la matou tau fou e tatau ona sau i lalo ifo tonu lava o le isi tauofoga maualuga e sosoo ae. Ona ia faamatala mai lea o le a matou vaevaea tutusa ma ia ia talā fou ia o le a faaopoopoaina. Sa ia faamatatalaina i le faapea mai o le a manuia ai tagata uma. O le a manumalo le matou kamupani aua o le a maua le tele atu o tupe nai lo le matou tauofoga muamua na tuuina atu. O le a manumalo lana kamupani aua o le a latou fai pisinisi pea ma le tauofoga sili ona maualalo. Ma, e moni lava, e malo o ia aua e maua lana vaega o le tupe faaopoopo aua sa ia tuufaatasia lenei tauofoga maoae.

Ona ia aumaia lea o lona numera o le pusa meli e mafai ai ona matou auina atu lana tupe na ia talosagaina. I le maea ai o nei mea uma, sa ia vaai mai i lo'u tama ma fesili mai, "Ea, ua i ai se ta maliliega?" Na faateia lava au, na tu i luga lou tama, faatalofa, ma tau atu ia te ia o le a ma toe fesootai mai ia te ia.

I le mavae ai o le tuua o le fonotaga, sa ma o i totonus o le taavale totogi, ma sa liliu mai lou tama ia te au ma fesili mai, "Ia, o le a sou manatu i le mea e tatau ona ta faia?"

Sa ou tali atu i le faapea atu ou te manatu e le tatau ona ma talaina lana ofa.

Ona fesili mai lea o lou tama, "E te manatu ua ia i taua se tiutetauave i o tatou tagata faigaluega uma ia faatumauina se aofaiga o galuega faamoemoeina?"

A o ou mafaufau ai i lana fesili ma a o lei mafai ona ou tali atu, sa ia taliina lana lava fesili. Sa ia fai mai, "Faalogo, Rick, o le taimi lava e te faia ai se fesui-aiga tau tupe pe fetuunaia lou amio sao, e faigata tele ona toe maua mai. Aua lava nei faia, pe faa-tasi aua lava."

O le mea moni ua ou faasoatatu ai lenei aafiaga o lona uiga sa le galolava ia te au mea na aoao ai au e lou tama i lena uluai malaga faapisinisi



ma ia. Ou te faasoatatu atu lenei aafiaga e faamatala ai le uunaiga tumau tatou te maua o ni tama. E mafai ona e vaai faalemafaufau i le faatuatuaga sa ia te au i lou tama ona o le amio sao o lona loto. Sa ia ola ai i nei mataupu faavae e tasi i lona olaga tumaoti ma lou tina, lana fanau, ma tagata uma sa ia fegalegaleai faatasi.

Uso e, o la'u tatalo i lenei aafiagi ina ia tatou tuu muamua lo tatou faalagolago i le Alii, e pei ona faaalia e Nifae, ona maua lea o le faatuatuaga a le Alii e ala i le amio sao o o tatou loto, e faapena foi le faatuatuaina a o outou ava ma fanau. E pei ona tatou malamalamama faaaoga lenei mataupu faavae paia o le fausia o le faatuatuaina i luga o le amio sao, o le a tatou faamaoni i a tatou feagaiga paia. O le a tatou manuia foi i le pulefaamalumalu ai i o tatou aiga i le alofa ma le amiontu, saunia o mea e manaomia o le olaga, ma le puipua o o tatou aiga mai mea leaga o le lalolagi. O nei upumoni ou te molimau atu ai ma le agaga lotomaualalo i le suafa o Iesu Keriso, amene. ■

FAAMATALAGA

1. Tagai, mo se faataitaiga, 1 Tupu 9:4; Mataupu Faavae ma Feagaiga 124:15.
2. "O Le Aiga: O Se Folafolaga i le Lalolagi," *Liahona*, Nov. 2010, 129.
3. "O Le Aiga: O Se Folafolaga i le Lalolagi," 129.
4. 2 Nifae 4:34.
5. 1 Nifae 3:7, 15.
6. 2 Nifae 5:27.
7. Mataupu Faavae ma Feagaiga 124:15.



Saunia e Peresitene Dieter F. Uchtdorf
Fesoasoani Lua i le Au Peresitene Sili

O Ē Tauaveina le Malamalama Faalelagi

I le avea ai ma sē e tauaveina le perisitua a le Atua ma se soo o Iesu Keriso, o oe o sē e tauaveina le malamalama.

Sa tu se toeaina matua i le laina i le falemeli e faatau ni faailoga tusi i le laulau tautua. Sa matauina e se tamaitai talavou e fai si faigata ona ia savali ma ofo atu e faaali atu ia te ia le auala e faatau ai faailoga tusi mai se masini e sefe ai le taimi. Sa fai atu le toeaina matua, "Faafetai lava, ae e sili ia te au le faatali. E le fesili mai le masini ia te a'u e uiga i o'u gugu."

O nisi taimi e aoga ai le talanoa atu i se tasi e uiga i o tatou faafitauli.

O tiga, faanoanoa, ma ma'i o aafiaga ia tatou te tausoaina uma—o taimi o measese, faanoanoaga, ma le le manuia e mafai ona faaopoopo atu i se faaputuga o manatuaga o mea tatou te teufatuitina.

A oo mai la i lo tatou tulaga manuia faaletino, tatou te taliaina le matutua ma faama'i o se vaega o la tatou malaga faaletino. Tatou te saili le fautuaga a tagata atamamai e malamalama i le tino faaletino. A tatou mafatia mai le ātu faalelagona po o le ma'i faalemafaufau, tatou te saili atu i le fesoasoani a tagata atamamai e togafitia nei ituaiga o ma'i.

E pei lava ona tatou feagai ma tofotofoga faaletino ma faalelagona i lenei

olaga faitino, tatou te feagai foi ma lui-tau faaleagaga. O le toatele o i tatou ua oo i ni taimi i o tatou olaga na matua musaesae ai a tatou molimau. Atonu foi ua tatou oo i ni taimi e foliga mai ua mamao ese atu lo tatou Tama Faalelagi. E i ai foi ni taimi tatou te faapelepele ai i mea a le Agaga ma o tatou loto atoa. E i ai foi taimi latou te foliga mai ai ua ititi le taua pe ua faaititia foi le taua.



O le asō ou te fia talanoa atu ai i le soifua maloloina faaleagaga—le auala e mafai ai ona tatou maua le faamalologa mai le le toaga, ma savali i se ala o le soifua maloloina faaleagaga e ola.

Ma'i Faaleagaga

O nisi taimi e oo mai ai le ma'i faaleagaga ona o se taunuuga o le agasala po o manu'aga faalelagona. O nisi taimi e sausau malie ai lava le lafotuina faaleagaga lea e faafaigata ai ona tatou iloaina le mea o loo tupu. E pei o vaega o papa e faaputuputu, e faapena tiga ma faanoanoaga faaleagaga e mafai ona fatufatu i le aluga o taimi, ma mamafatu ai i o tatou agaga seia oo ina a toetoe lava lematatalia le mamafa tele. Mo se faataitaiga, e mafai ona tupu lenei mea pe a lofotuina tele o tatou tiutetauave i galuega, aiga, ma le ekalesia lea tatou te le vaaia ai le olioli o le talalelei. Tatou te ono lagonaina foi e pei ua le o toe i ai se mea tatou te foai atua, pe faapea foi o le ola ai i poloaiga ua le gafatiaina e lo tatou malosi.

Ae e le faapea la e moni tofotofoga faaleagaga ona faapea ai lea e le mafai ona foiaina.

E mafai ona faamaloloina i tatou faaleagaga.

E oo lava i manu'aga faaleagaga loloto—ioe, e oo lava i na mea e ono foliga mai e le matineia—e mafai lava ona faamaloloina.

A'u uo pele, o le mana faamalolo o Iesu Keriso e le o misi i o tatou aso.

O le aao faamalolo a le Faaola e mafai ona suia ai olaga i o tatou aso e pei lava ona sa Ia faia i Ona aso. Afai tatou te maua le faatuatua, e mafai ona Ia uuina o tatou lima, faatumu o tatou loto i le malamalama ma le faamalologa faalelagi, ma fetalai mai ia i tatou upu faamanuia, "Ina tu ia i luga, ave ia lou moega, ma ia e savali."¹

Pouliuli ma le Malamalama

Po o le a lava le mea o mafua ai o tatou ma'i faaleagaga, e tasi lava le mea e tutusa uma ai: o le leai o se malamalama faalelagi.

E faaititia e le pouliuli lo tatou tomai e vaai ai ma le manino. Na te faanenefuina la tatou vaai i mea na sa

i ai le taimi muamua na manino ai. A tatou i ai i le pouliuli, o le a mautinoa lava lo tatou faia o ni filifiliga le lelei, ona e le mafai ona tatou vaaia mea lamatia i lo tatou ala. A tatou i ai i le pouliuli, e mautinoa lava o le a leiloa atu le faamoemoe, ona e le mafai ona tatou vaaia le filemu ma le olioli o loo faatalitali mai ia i tatou pe afai tatou te fetaoomi pea i luma.

O le malamalama, i le isi itu, na te faatagaina i tatou e vaai atu i mea e pei ona latou i ai. Na te faatagaina i tatou e iloatino le va o le upumoni ma le measese, le va o mea e taua ma mea e le taua. A tatou i ai la i le malamalama, e mafai ona tatou faia ni filifiliga amiontonu e fua i mataupu faavae moni. A tatou i ai i le malamalama, tatou te maua "se susulu atoatoa o le faamoe-moe,"² ona e mafai ona tatou vaai atu i o tatou tofotofoga faaletino mai se vaaiga e faavavau.

O le a tatou maua se faamalogia faaleagaga pe a tatou o ese mai atalafoia o le lalolagi ma o atu i le Malamalama o Keriso e faavavau.

O le faateleina o lo tatou malamalama ma le faaaogaina o le manatu faaleaoaoga faavae o le malamalama, o le faateleina foi lena o le mafai ona pui-puia o i tatou mai ma'i faaleagaga o loo mafatia ai pe faaatuatuvalo ai i tatou mai itu uma; o le lelei atili foi lena o lo tatou auauna atu o e tauaveina ma le malosi, lototele, popole ma le lotomaualalo le perisitua paia—o auauna ma soo moni a lo tatou Tupu pele ma faavavau.

O Le Malamalama o le Lalolagi

Na fetalai mai Iesu Keriso, "O a'u nei o le malamalama o le lalolagi; o lē mulimuli mai ia te au, e le savali o ia i le pouliuli, a e ia te ia le malamalama o le ola."³

O le a le uiga o lenei mea?

E faigofie lava: O le e mulimuli ma le faamaulalo ia Iesu Keriso o le a lagonaina ma faasoa atu Lona malamalama. O lena malamalama o le a faatuputeleina seia oo lava ina tafiesea le pouliuli sili ona pogisa.

O lona uiga o loo i ai se mana, se faatosinaga malosi, lea e pogai mai le Faaola. O le [mana] lea "ua susulu

atu mai luma o le Atua e faatumulia ai le loaloa o le vateatea."⁴ Ona o lenei mana e faamalamalamaina, siitiaina, ma faasusuluina o tatou olaga, e masani lava ona ta'ua e tusitusiga paia o le malamalama, ae o loo faasino atu foi i ai o le agaga ma le upumoni.

I le Mataupu Faavae ma Feagaiga tatou te fatau ai, "O le afioga a le Alii o le upumoni lea, ma o soo se mea ua moni, o le malamalama lea, ma o soo se mea ua malamalama, o le Agaga lea, o le Agaga lava lea o Iesu Keriso."⁵

O lenei malamalamaaga loloto—o le malamalama o le agaga lea, o le upumoni foi lea ma o lenei malamalama e susulu atu i agaga uma e o mai i le lalolagi—e taua tele e pei ona faamoe-moe i ai. O le Malamalama o Keriso e faamalamalamaina ma faatumuina agaga o tagata uma e faalogo atu i le siufogaga o le Agaga.⁶

O le Malamalama o Keriso ua tumu ai le atulaulau.

Ua tumu ai le lalolagi.

Ma e mafai ona tumu ai loto uma.

"E le faailogaina tagata e le Atua."⁷

O loo avanoa Lona malamalama i tagata uma—tauvaloa pe faatauvaa, mauoa pe mativa, faamanuiaina pe le tagolima.

A tatala atu lou mafaufau ma lou loto e talia le Malamalama o Keriso ma mulimuli atu ma le lotomaualalo i le Faaola, o le a e maua atili le malamalama. I lea laina ma lea laina, sina mea itiiti iinei ma sina mea itiiti i o, o le a e aoina atili ai le malamalama ma le upumoni i lou agaga, seia oo lava ina tafiesea le pogisa mai lou olaga.⁸

O le a tatalaina e le Atua ou mata.

O le a foai atu e le Atua ia te oe se loto fou.

O le alofa o le Atua, le malamalama, ma le upumoni o le a faamatua'iā mea fou e fotu mai i le olaga, ma o le a toe-fanaufouina oe i se olaga fou ia Keriso Iesu.⁹

Ua folafola mai e le Alii, "Ma afai e tau-tasi o outou mata i lo'u mamalu, o le a faatumulia o outou tino atoa i le malamalama, ma o le a leai se pouliuli e ia te outou; ma o lena tino ua faatumulia i le malamalama e malamalama i mea uma."¹⁰



O le vaifofo silisili lea mo le ma'i faaleagaga. E mou ese le pouliuli pe a oo mai le malamalama.

O Se Talafaatusa mo le Pouliuli Faaleagaga

Peitai, o le a le faamalosia lava e le Atua i tatou ia taliaina Lona malamalama.

Afai e oo ina tatou toafimalie i le pouliuli, e mautinoa lava o le a le sua o tatou loto.

Ina ia tupu se suiga, e manaomia ona tatou faatagaina ma le mataalia le malamalama ia ulu mai i totonusi.

I taimi o a'u malaga faataamilo i le tatou paneta o le lalolagi a o kapeteni ai i se vaalele, sa ou maofa pea i le matagofie ma le atoatoa o foaoaga a le Atua. Sa faapitoa lo'u maofa i le sootaga i le va o le lalolagi ma le la. Ou te manatu i ai o se lesona loloto o meafaitino, i le auala o loo i ai le pouliuli ma le malamalama.

E pei ona tatou iloaina uma, o itula uma e 24 e liliu i le aso ma le aso e liliu i le po.

O lea la, o le a le po?

O le po e leai a se mea ua na o se atalafoia.

E oo lava i po sili ona pogisa, e le muta lava le faasusulu mai e le la o lona malamalama. E faaaauau pea ona susulu tele mai. Ae o le afa o le lalolagi o loo i ai i le pouliuli.

O le leai o le malamalama e mafua ai ona pogisa.

A oo ina pa'u mai le pogisa o le po, tatou te le faanoanoa ma popole faapea ua le toe i ai se la. Tatou te le manatu ua le o toe i ai le la iina pe ua mate foi. Ua tatou malamalama o loo tatou i ai i se atalafoia, o le a faaauau pea ona taamilo le lalolagi, ma e iu lava ina toe oo mai ave o le la ia i tatou.

O le pouliuli e le o se faailoga lena e le o i ai se malamalama. Ae tele lava, o lona uiga tatou te le o i ai i le nofoaga sa'o e maua ai le malamalama. I le gasetoto o le la talu ai nei sa toatele na faia ni taumafaiga maoae ina ia oo atu i le vaega manifinifi o se atalafoia na fatuina e le masina, i le ogatotonu o le susulu malamalama o le la.

I lea lava auala e tasi, e faaauau pea ona susulu mai le malamalama faaleagaga i luga o mea uma na foafolina e le Atua. O le a faia e Satani taumafaiga uma e tulei atu ai i tatou i se atalafoia o a tatou lava faiga. O le a ia faamalosia i tatou e fatu so tatou lava ia gasetoto; o le a ia tuleia i tatou i le pouliuli o loo i ai ana mea leaga.

E mafai e le pouliuli faaleagaga ona tosoina se veli o le galo o mea ia i latou sa savavali muamua i le malamalama ma olioli i le Alii. E ui i lea, i taimi o le pouliuli matuia, e faafogaina e le Atua a tatou aioiga faamaulalo, ao tatou tatalo atu, "Le Alii e, ua ou faatuatua; ia e fesoasoani i lo'u le faatuatua."¹¹

O aso o Alema, sa toatele i latou na tauivi e talia mea faaleagaga, ma "ona o lo latou le talitonu," sa le mafai ai e le malamalama ma le upumoni o le Atua ona ulufiaina o latou agaga; "ma sa faamaaa o latou loto."¹²

O i Tatou o Ē Tauaveina le Malamalama

Uso e, o lo tatou lava faitalia pe tatou te i ai i le nofoaga sa'o e vaai atu ai i le malamalama faalelagi ma le upumoni o le talalelei a Iesu Keriso. E tusa lava pe oo mai le po ma foliga mai ua pogisa le lalolagi, e mafai lava ona tatou filifili e savavali i le malamalama o Keriso, taus i Ana poloaiga, ma molimau atu ma le lototele i Lona moni ma Lona silisilise.

I le avea ai ma sē e tauaveina le perisitua a le Atua ma se soo o Iesu Keriso, o oe o sē e tauaveina le



malamalama. Ia fai pea mea e te iloaina o le a fafaileleina ai Lona malamalama faalelagi. "Tuu i luga lo outou malamalama"¹³ ma "ia [faal]pupula atu i luma o tagata"—e le faapea ina ia latou vaai i ai ma faamemelo ai ia te outou, ae "ina ia latou iloa la outou amio lelei, latou te vivii atu ai i lo outou Tama o i le lagi."¹⁴

Ou uso e pele, o outou o mea faigaluega i aao o le Alii faatasi ma le faamoemoega o le aumaia o le malamalama ma le faamalologa i agaga o fanau a le Tama Faalelagi. Atonu e te le lagonaina le agavaa e faamalolo ai i latou ua gasegase faaleagaga—ae mautinoa lava e le sili atu ma se tagata faigaluega o le falemeli ua agavaa e fesoasoani i [se toeaina] mafatia. Atonu e te feagai ma ni ou lava luitau faaleagaga. Ae ui i lea, ua valaauiua oe e le Alii. Ua Ia tuu atu ia te oe le pule ma le tiutetauave e aapa atu ai ia i latou o loo mafatia. Ua Ia faaee atu ia te oe Lona mana paia o le perisitua e aumai ai le malamalama i le pouliuli ma siitia ma faamanuia fanau a le Atua. Ua toefuatai mai e le Atua Lana Ekalesia ma Lana talalelei faapelepele, "lea e faamalolo ai le agaga ua manu'alia."¹⁵ Ua Ia saunia le ala i le soifua maloloina faaleagaga; e maua ai le faamalologa mai le le toaga ae agai atu i le soifua maloloina faaleagaga e ola.

O taimi uma tou te ua'i atu ai o outou loto i le Atua i tatalo faamaulalo, tou te mauaina Lona malamalama. O taimi uma tou te saili atu ai i Lana afioga ma Lona finagalo i tottonu o tusitusiga paia, e faatuputeleina ai lava le susulu o le malamalama. O taimi uma tou te matauina ai se tasi o mafatia ma ositaulaga ai lou lava toafimalie e aapa atu ai ma le alofa, e faalauteleina le malamalama ma maena. O taimi uma e te teenaina ai se faaososoga ae filifili le mama, o taimi uma e te saili atu ai [mo se faamagalgal] pe faamagalgal atu, o taimi uma e te molimau atu ai ma le lototele e uiga i le upumoni, e tuliese a le malamalama le pouliuli ma tosina mai ai isi o loo saili foi i le malamalama.

Mafaufau i ou lava aafiaga, o taimi o auaunaga i le Atua ma uso a tagata pe a susulu mai le malamalama faalelagi i lou olaga—i tottonu o malumalu paia, i le laulau faamanatuga, i se taimi filemu o mafaufauga loloto ma le agaga tatalo, i a outou faatasiga faaleaiga, po o taimi e faatino ai se auaunaga faaleperisitua. Ia fefaasoai na taimi ma aiga, uo, ae maise lava ma a outou autalavou o loo saili i le malamalama. E manaomia ona latou faalogo atu ia te oe o lenei malamalama e oo mai ai le faamoemoe ma le faamalologa.

E aumai e le malamalama o Keriso le faamoemoe, fiafia, ma le faamalologa

o soo se manu'a po o se ma'i faale-agaga.¹⁶ O i latou e lagonaina lenei unaiga faamamaina e avea ma mea-faigaluega i aao o le Malamalama o le Lalolagi ma e mafai ona tuu atua le malamalama i isi.¹⁷ O le a latou lagonaina le mea sa lagonaina e le Tupu o Lamona'e: "O lenei malamalama sa faatumulia ai lona agaga i le olioli tele naua, ua tafi ese ai le ao o le pogisa, ma ua faamumu a'e ai i lona agaga le malamalama o le ola tumau faavavau."¹⁸

Ou uso e pele, o la tatou sailiga o le saili atu lea i le Alii seia oo ina musae-sae Lona malamalama o le ola tumau faavavau i totonusi o i tatou ma oo ai ina mausali ma malolosi a tatou molimau e oo lava i le lotolotoi o le pogisa.

O la'u tatalo ma le faamanuiauga ina ia outou manuia i le ausiaina o lou taunuuga o ē umiaina le perisitua a le Atua Silisilise ma o ē tauaveina ma le fiafia Lona malamalama faalelagi. I le suafa paia o Iesu Keriso, amene. ■

FAAMATALAGA

1. Ioane 5:8.
2. 2 Nifae 31:20.
3. Ioane 8:12.
4. Mataupu Faavae ma Feagaiga 88:12; tagai foi Mataupu Faavae ma Feagaiga 88:6-7.
5. Mataupu Faavae ma Feagaiga 84:45.
6. Tagai Mataupu Faavae ma Feagaiga 84:46.
7. Galuega 10:34.
8. O le Mataupu Faavae ma Feagaiga 88:40 o loo aoao mai ai e faapea "o le malamalama e pipii i le malamalama." I se isi faaupuga, o le tele lava o le malamalama, upumoni, poto, ma le mama tatou te mauaina, o le tele foi lena o lo tatou tosinaina maia i o tatou olaga. "O ia o le e mauaina le malamalama, ma tumau pea i le Atua, e mauaina le malamalama atili; ma o lena malamalama o le a tupu susulu malamalama tele pea lava pea seia oo i le aso e atoatoa ai" (MF&F 50:24).
9. O le tasi lenei o folafolaga o le papatisoga—lea a tatou tatanu o tatou tagata, olaga faalelalolagi, tatou te tutu ae mai le vai papatiso ua ola ia Keriso. Tatou te toe tutu ae o ni tagata fou e savavalu i se olaga fou (tagai Roma 6:4; 2 Korinito 5:17).
10. Mataupu Faavae ma Feagaiga 88:67; tagai foi Mataio 6:22.
11. Mareko 9:24.
12. Mosaea 26:3.
13. 3 Nifae 18:24.
14. Mataio 5:16.
15. Iakopo 2:8.
16. Tagai 1 Ioane 1:7; Alema 7:11-13.
17. Tagai Mataio 5:14.
18. Alema 19:6.



Saunia e Peresitene Henry B. Eyring
Fesoasoani Muamua i le Au Peresitene Sili

E Taitai e le Alii Lana Ekalesia

O le taitaiga a le Alii o Lana Ekalesia e manaomia ai le faatuatua tele ma le mausali mai ia i latou uma o e auauna atu ia te la i le lalolagi.

O'u uso pele o e ua umia le peri-situa a le Atua, o le po nei ou te fia tautala atu e uiga i le ala matagofie o loo taitaia ai e le Alii Lona malo i le lalolagi. Ua outou iloa faavae autu taua. Ou te tatalo o le a faamautu atu e le Agaga Paia [na faavae autu taua] ia te outou.

Muamua, o Iesu Keriso o le ao o le Ekalesia i le lalolagi atoa.

Lona lua, o loo Ia taita'ia Lana Ekalesia i ona po nei e ala i le tulei mai i alii ua valaauiina o ni perofeta, ma ua ia faia e ala i faaaliga.

Lona tolu, ua loa ona Ia tuuina mai faaaliga i Ana perofeta, o loo Ia faia pea lava, ma o le a faaauau pea ona faia.

Lona fa, Na te tuuina mai faaaliga faamautu ia i latou o e auauna atu i lalo o le taitaiga a Ana perofeta.

Mai na faavae autu taua, ua tatou iloa ai e manaomia e le taitaiga a le Alii o Lana Ekalesia le faatuatua tele ma le mausali mai ia i latou uma o e auauna atu ia te Ia i le lalolagi.

Mo se faataitaiga, e manaomia le faatuatua e talitonu ai o loo vaavaaia e le Alii toetu auiliiliga o Lona malo i





aso taitasi. E manaomia le faatuatua e talitonu ai Na te valaauna tagata e le atoatoa i tofiga o le faatuatua. E manaomia le faatuatua e talitonu ai Na te silafia atoatoa ia tagata Na te valaauna, i o latou malosiaga ma o latou gafatia, ma o lea e le sese lava se mea na te faia i Ana valaauga.

E ono aumaia e lena mea se soisoi po o se lulu o le ulu i nisi o lenei aofia—o i latou ua manatu e sese lo latou valaauga e auauna atu faapea foi i latou o vaavaai faalemafaufau atu i nisi latou te iloa e foliga e le fetaui i o latou tofiga i le malo o le Atua. O la'u fautuaga i vaega uma ia o le, ia faatuatua i na ituaiga o faamasinoga seja mafai ona e iloa atu le mea o loo silafia e le Alii. O le faamasinoga e tatau ona e faia, nai lo lena, o le ua ia te oe le mana e maua ai faaliga ma e galue ai e aunoa ma le fefe.

E manaomia ai le faatuatua ia e faia ai. Ma e manaomia ai le faatuatua

e sili atu e talitonu na valaauna e le Alii ni auauna tagata e le atoatoa e taitai outou. O lo'u faamoemoega i le po nei o le fausia lea o lou faatuatua faapea e taitai e le Atua oe i lau tautua ia te Ia. Ma e sili atu foi ona taua, o lo'u faamoemoe o le fausia o lou faatuatua e faapea e musuia e le Alii tagata e le atoatoa ua Ia valaauna e fai ma ou taitai.

Atonu e te manatu, muamua, o lena faatuatua e le taua mo le manuia o le malo o le Ekalesia a le Alii ma le malo. Peitai, e mafai ona e iloaina—po o fea lava e te i ai i le filifilli o le auaunaga faaleperisitua, mai le perofeta a le Alii i se tagata fou e umia le Perisitua Arona—e tatau lava ona i ai lena faatuatua.

Se'i o tatou amata i le uiga o le faatuatua i se peresitene o le korama a aoao po o se tiakono. E taua ia te ia ona i ai le faatuatua ua valaauna o ia e le Alii lava Ia, ma le silafia lelei o

vaivaiga ma malosiaga o lena aoao. E tatau ona i ai lona faatuatua faapea o le tagata na tuuina atu le valaauga, na mauaina faaaliga e ala i le Agaga o le Atua. O ona fesoasoani ma uso o lana korama e manaomia foi lena lava faatuatua e mulimuli ia te ia ma le talitonuga mautinoa e aunoa ma le fefe.

Sa ou vaiai lena talitonuga mautinoa ina ua saofafai se tamaitiiti faatasi ma le au peresitene o lana korama a tiakono i le taeao o se tasi Aso Sa. O ia o la latou failautusi faatoa tofia. Sa gefautua'i faatasi lena au peresitene talavou. Sa latou talanoa i ni auala eseese e mafai ona latou faataunu ai le talosaga a le epkopo e toe aumai se tamaitiiti ua le o toe toaga mai i le lotu. Ina ua uma se tatalo ma le talatalanaga, sa latou tofia le failautusi e alu i le fale o se tamaitiiti e lei sau lava i se fono ma valaaulia o ia.

E lei iloa e le failautusi le tamaitiiti, ae na ia iloa o se tasi o matua o le tamaitiiti ua le o toe lotu ae o le isi e le auai i le eklesia ma e le agalelei. Sa lagona e le failautusi le popole ae e le i fefe. Sa ia iloa na talosagaina e le perofeta a le Atua le au perisitua e toe aumai mamoe ua leiloloa. Ma sa ia faaologo i le tatalo a lana au peresitene. Sa ia faaologo ua latou malilie i le igoa o le tamaitiiti ina ia laveaiina ma lona igoa.

Sa ou matauina le taimi na savali atu ai le failautusi i le magala agai i le fale o le tamaitiiti ua le toe lotu. Sa ia savalivali lemu e faapei ua aga atu o ia i se mea matautia. Ae i le totonu o le afa itula na toe savavali mai o ia faatasi ma le tamaitiiti i le auala, ma le ataata fiafia. Ou te le o mautinoa pe na ia iloa i lena taimi, ae sa alu o ia ma le faatuatua o loo i ai o ia i le feau a le Alii. Sa tumau ia te ia lena faatuatua ma faatupulaia i le tele o tausaga a o avea o se faifeatalai, se tama, se taitai o alii talavou, ma se epikopo.

Se'i o tatou talanoa pe o le a le uiga i se epikopo o lena ituaiga o faatuatua. O nisi taimi e valaauna ai se epikopo e auauna atu i tagata e iloa lelei o ia. E iloa e tagata o le uarota se mea e uiga i ona vaivaiga faaleagaga, ma latou te iloaina foi e i ai isi i le uarota sa tatau ona tofia—

o isi e foliga e sili atu lo latou a'otauina, sili atu le poto masani, sili atu ona ttauagafau, pe aulelei foi.

E tatau i nei tagata ona iloa o le valaauga e auauna atu o se epikopo e sau mai le Alii, e ala i faaaliga. A aunoa ma lo latou faatuatua, o le a sili ona faigata i le epikopo o le na valaauna e le Atua ona maua faaaliga na te manao-mia e fesoasoani ai ia te i latou. O le a le manuia o ia e aunoa ma le faatuatua o tagata o le uarota e lagolagoina o ia.

Ma le fiafia, e moni foi lona faafeagai. Mafaufau i le auauna a le Alii le Tupu o Peniamina o le sa ta'ita'ia lona nuu e salamo. Sa faamaluluina loto o tagata e ala i lo latou faatuatua na valaauna o ia e le Atua ma o ana upu na mai le Atua. Tou te manatua la latou tala: "Ioe, ua matou talitonu i upu uma na e saunoa mai ai ia te i matou; o lenei foi, ua matou iloa lo latou mautinoia ma le moni, ona o le Agaga o le Alii Mamana Aoao, lea ua ia faia se liuga tele i totonu o i matou, po o i totonu o o matou loto, ua le toe i ai so matou manao e fai mea leaga, ae ia faia mea lelei e le aunoa" (Mosaea 5:2).

Mo se taitai ia faamanuiaina i le galuega a le Alii, o le faatuatuga o tagata faapea na valaauna o ia e le Atua e tatau ona malosi atu nai lo o latou manatu i ona faaletonu ma vaivaiga faaleolaga nei. Tou te manatua le faamalamalamaaina atu e le Tupu o Peniamina o lana matafaioi faaleta'ita'i:

"Ou te lei poloai atu ia te outou ia outou o mai iinei ina ia outou mata-tau mai ia te a'u, pe ina ia outou manatu ai ua sili atu a'u lava ia i lo se tagata soifua.

"Ae ua pei lava a'u o outou, e oo i ai vaivaiga eseese uma o le tino ma le mafaufau; peitai ua filifilia a'u e lenei nuu, ma faapaiaaina e lo'u tamā, ma tuu mai e le aao o le Alii ia avea a'u o se pule ma se tupu i luga o lenei nuu; ma sa tausia ma faasaoina e lona mana lē mafaatusalia, e auauna atu ia te outou ma le manatu atoa, mafaufau, ma le malosi atoa ua tuu mai e le Alii ia te a'u" (Mosaea 2:10–11).

Atonu o lou taitai i le Ekalesia a le Alii e foliga mai ia te oe e vaivai ma ua na o se tagata soifua, pe foliga mai foi

e malosi ma musuia. O le mea moni o taitai uma o se su'ifelelo i na uiga ma isi. O le mea e fesoasoani i auauna a le Alii o e ua valaauna e taitai i tatou pe a tatou taumafai e vaai atu ia i latou faapei ona silasila atu ai le Alii pe a Ia valaauna i latou.

E silasila atu atoatoa le Alii i Ana auauna. E silasila atu i o latou gafatia ma o latou lumana. Ma Na te silafia le ala e mafai ona suia ai o latou natura. Na te silafia foi le ala e mafai ai ona latou suia e ala i aafiaga ma tagata o le a latou ta'ita'ia.

Atonu na i ai sou aafiaga o le faamalosia o oe e tagata sa valaauna oe e te auauna atu i ai. Na valaauna a'u foi e fai ma epikopo o le autalavou nofofua matutua. Ou te le o mautinoia pe o faamemoega o le Alii e mo suiga e mafai ona ou faia ia i latou po o suiga sa Ia silafia o le a latou faia mo au.

I se tulaga ou te lei malamalama ai, o le tele lava o na talavou i lena uarota sa galulue faapei na valaauna au e le Atua faapitoa mo i latou. Sa latou vaai i o'u vaivaiga ae sa latou vaavaai i talaatu o na vaivaiga.

Ou te manatua se tasi alii talavou sa talosagaina sa'u fautuaga mo ana filifiliga faalea'oa'oga. Sa avea o ia o se tamaititi aoga o le tausaga muamua i se iunivesite lelei tele. Na mavae se vaiaso mulimuli ane sa ou tuuina atu ai ia te ia se fautuaga, na ia toe faatulagaina se taimi ma te talanoa

Ina ua sau i lo'u ofisa, sa ia faate'ia au i le fesili mai, "Epikopo, e mafai ona taatalo a e ta te lei talanoa? Ma pe

mafai ona ta tootutuli? Ma pe mafai ona ou tatalo?"

Sa faateia a'u i ana talosaga. Ae sa sili ona faate'ia a'u i lana tatalo. Sa tau foliga faapea lana tatalo: "Tama Faalelagi, Ua e silafia na tuu mai e Epikopo Eyring ia te au se fautuaga i le vaiaso ua mavae, ma e le'i aoga. Faamolemole ia musuia o ia ia iloa pe o le a le mea ou te faia nei."

Ia atonu e te soisoi i lena mea, ae o a'u e leai. Sa ia iloa lelei le mea sa finagalo le Alii na te faia. Ae sa ia faamamaluina le tofi o se epikopo i le Ekalesia a le Alii ma atonu na manao ia ou maua le avanoa e maua ai se talitonuga mautinoia sili atu e maua ai faaaliga i lena valaauga.

Sa aoga. O le taimi lava na ma tutu ai i luga ma nonofo i lalo, sa oo mai ai le faaaliga ia te au. Sa ou ta'u atu ia te ia le mea sa ou lagonaina e finagalo le Alii na te faia. Sa na o le 18 ona tausaga i le taimi lea, ae sa matua i le faaleagaga.

Sa ia iloa lelei e le tau alu o ia i se epikopo mo lena ituaiga o faafitalui. Ae sa ia aoao e lagolago le auauna a le Alii tusa lava pe i ai ona vaivaiga faaleolaga nei. Na mulimuli ane avea o ia ma peresitene o le siteki. Sa ia tauaveina pea lena lesona sa ma aoaoina faatasi: afai e te faatuatua e taitai e le Alii Lana Ekalesia e ala i faaaliga i na auauna le atoatoa Na te valaauna, o le a tatala e le Alii pupuni o le lagi ia te ia, e faapei foi ona Ia faia ia te outou.

Mai lena aafiaga, sa ou tauaveina foi lena faatuatua o tagata tatou te auauna





i ai, o nisi taimi e sili atu lo latou faatuata nai lo i tatou, e aumaia ai faaaliga i le galuega a le Alii.

Sa i ai foi se isi lesona mo au. Pe ana fai e faamasinoina au e lena taulealea i lo'u le tuuina atu o se fautuaga lelei ia te ia, semanu e le toe foi mai lava e toe fesili mai. Ma o lea, o le filifili e aua nei faamasinoina o ia, sa ia maua ai le faamautuuga na ia manao ai.

Ae o le isi lesona mai lena aafiaga sa aoga tele ia te au. O lo'u iloa, na te lei ta'uina lava i se tasi o le uarota faapea ou te lei tuuina se fautuaga lelei ia te ia i le taimi muamua. Pe ana ia faia lena mea, e ono faaititia le faatuatua o isi o le uarota e faatuatuaia ia musumusuga a le epikopo.

Ou te taumafai e aua nei faamasinoina auauna a le Alii pe tautala foi e uiga i o latou vaivaiga iloagofie. Ma ou te taumafai e aoao atu e ala i faataitaiga i la'u fanau. Sa faasoai mai e Peresitene James E. Faust se matapu faavae o loo ou taumafai e fai mo'u. Ou te faasoaina atu ia te outou:

"O i tatou . . . e manaomia ona fesoasoani ma lagolago o tatou taitai i le lotoifale, aua o i latou . . . ua 'valaulia ma filifilia.' O tagata uma o lenei Ekalesia e mafai ona maua fautuaga mai se epikopo po o se peresitene o le paranesi, se peresitene o le siteki po o se misiona, ma le Peresitene o le Ekalesia ma e latou te galulue. E leai

se tasi o nei uso sa talosaga mo lona valaauga. E leai se isi e atoatoa. Ae o i latou o auauna a le Alii, na valaauna e Ia e ala ia i latou ua i ai le aia tatau i faaaliga. O i latou ua valaauna, lagolagoina, ma vaetofia ua i ai le aia tatau mo la tatou lagolago.

" . . . O le le migao i taitai faale-Ekalesia ua afua ai ona mafatia le toatele i vaivaiga ma toilalo faaleagaga. E tatau ona le amanaia ni le atoatoa, o lape, po o ni aleu o alii e tofia e pulefaamalumalu ia i tatou, ma lagolago le tofi o loo latou umia" ("Called and Chosen *Liahona* Nov. 2005, 54–55).

O lena fautuaga e faamanuiaina ai auauna a le Atua i lalo o tulaga uma lava.

I popofou o le Ekalesia a le Alii, sa amata e taitai na latalata i le Perofeta o Iosefa Samita ona talanoa e uiga i ona masei. E ui i mea uma na latou vaai i ai ma iloa i lona tulaga ma le Alii, sa sosolo lo latou uiga faaalia o le faitio ma le lotomatau'a e pei o se mala. Sa tuu mai e se tasi o le Toasefululuia mo i tatou le tagavai o le faatuatua ma le lotonuu e tatau ona tatou maua pe afai tatou te fia tautua i le malo o le Alii.

O le lipoti lea: "Sa talo e ni toeaina se fonotaga i le malumalu mo i latou uma ua manatu o Iosefa Samita o se Perofeta amioletonu. Sa latou faamoe-moe e tofia Tavita Uitimera e fai ma taitai fou o le Ekalesia. Ina ua uma ona faalogologo atu i lafoga e faasaga i le

Perofeta, sa tulai a'e Polika [Iaga] ma molimau atu, 'O Iosefa o se Perofeta, ma ou te iloaina lena mea, ma atonu latou te matua'i olopalaina o ia ma ta'uleagaina e tusa ma lo latou manao; ae e le mafai ona latou faataumaoia le tofiga o le Perofeta a le Atua, ua na o la latou lava pule e mafai ona latou faataumaoia, motusi pitofilo o loo noatia ai i latou i le Perofeta a le Atua, ma gotouga ifo ai i latou lava i seoli'" (*Church History in the Fulness of Times Student Manual* [Church Educational System manual, 2003], 2nd ed., 174; tagai foi *Teachings of Presidents of the Church: Brigham Young* [1997], 79).

O loo i ai se pitofilo o loo noatia ai i tatou i le Alii i a tatou auaunaga. Po o fea lava e valaauna i tatou e auauna ai i le malo e fesootai lava, e oo atu lava ia i latou e valaauna e pulefaamalumalu ia i tatou i le perisitua, ma i le perofeta, o le ua noatia i le Alii. E manaomia ai le faatuatua ma le lotomualalo e auauna atu ai i le nofoaga e tofia i ai i tatou, e faalagolago i le Alii na tofia i tatou ma i latou o e pulefaamalumalu ia i tatou, ma lagolagoina i latou i le faatuatua atoa uma.

O le a i ai taimi, e pei ona i ai i ona po o Katelani, o le a tatou manaomia ai le faatuatua ma le amiosa'o e pei o Polika Iaga e tutu atu ai i le tofiga e valaauna i ai i tatou e le Alii, ma le lotonuu i Lana perofeta ma taitai na Ia tofia.

Ou te tuu atu la'u molimau maua'i ae tumu i le olioli o le Alii o Iesu Keiriso o loo tu i le foe. O loo Ia taitaia Lana Ekalesia ma Ana auauna. Ou te molimau atu o Thomas S. Monson ona pau lea o le tamalii o loo umia ma faaogaina ki uma o le perisitua paia i le lalolagi. Ma ou te talosagaina faamanuiaga i luga o auauna lotomualalo uma o e loo auauna atu lelei atu ma le matua naunauta'i i le Ekalesia toefuatiaina a Iesu Keriso. Ou te molimau atu na vaai Iosefa Samita i le Atua le Tama ma Iesu Keriso. Na La tulei atu ia te ia. Na toefuatai mai ki o le perisitua mo faamanuiaga o fanau uma a le Tama Faalelagi. O la tatou misiona ma lo tatou faatuatua o le auauna atu lea i tofiga i le galuega a le Alii. I le suafa o Iesu Keriso, amene. ■



Saunia e Jean B. Bingham
Peresitene Aoao o le Aualofa

Ina la Atoa Lo Outou Olioli

O lesu Keriso o le pogai o faamalologa uma, filemu, ma le alualu i luma e faavavau.

Uso e ma tuagane, o se fiafiaga le i ai faatasi ma outou. Ma o le mea lena ou te fia manao e talanoa ai ma outou i lenei taeao—o le mauaina o se olioli atoatoa.

Sa i ai se tala tomua talu ai nei e fai-tauina, “O mala ua fesouaina ai le atunu [ma le] lalolagi.”¹ Mai afa ma lologa i mugala ma lamala, mai afisosolo ma mafui’e i taua ma faama’i faataumaoi, e foliga mai “ua vavao le lalolagi uma.”²

E faitau miliona tagata ua sui mea e nonofo ai, ma e le faitaulia ola ua afaina i nei luitau. O le fefinauai i aiga ma nuu faapea foi tauiviga i totonu ma le fefe, masalosalo, ma le faamoemoega ua le taulau e tuua ai foi i tatou i le feme-meai’. E mafai ona faigata ona lagolina le olioli lea na aoao mai e Liae o le faamoemoega lea o le olaga.³ Ua tatou fesili uma lava i nisi o taimi, “O fea e mafai ona ou liliu i ai mo se filemu? Fea lo’u filemu . . . ?”⁴ Tatou te tau mananatu, pe faapefea ona ou maua le olioli e ui i faigata o le olaga nei?

O le tali atonu e faigofie tele, ae ua faamaonia le moni mai lava i ona po o Atamu. E maua le olioli tumau i le taulai atu i lo tatou Faola, o Iesu Keriso, ma le ola ai i le talalelei e pei ona

faaa’oa’o ma aoao mai e Ia. O le tele tatou te *aoao ai, faatuatua*, ma *faataitai* ia Iesu Keriso, o le tele foi lena o lo tatou malamalama o Ia o le pogai o le faamalologa, filemu, ma le alualu i luma e faavavau. Ua Ia valaaulia i tatou taitoatas i o mai ia te Ia,⁵ o se valaaulia sa faauigaina e Peresitene Henry B. Eyring “o le valaaulia aupito taua e mafai e soo se tasi ona talia.”⁶

Aoao e uiga ia lesu Keriso

E faapefea ona tatou o mai ia te Ia? O Aperila talu ai, na fautua mai ai Peresitene Russell M. Nelson ma Elder M. Russell Ballard ia tatou suesueina le “O Le Keriso Soifua”⁷ o se vaega o lo tatou aoao e uiga i le Faaola. E toatele na talaina le lu’i ma ua faamanuiaina. E lei leva talu ai, sa avatu ai e se ue pele i ana fanau matutua taitoatas ni kopi o se tusiga e i ai ata o le talalelei e faapupula ai fasifuitau taitasi. Sa ia fautuaina lana fanau e fesoasoani i a latou fanau ia malamalama ma taulotoina. I se taimi mulimuli ane, sa faasoai mai ai e la’u ue se vitio o le tamateine a lana tama e ono tausaga, o Laynie, o tauloto ma le naunautai ma le to’ā. Sa ou iloaina ai afai e mafai ona fai e se ono-tausaga, e mafai foi la ona ou faia!

Ao ou suesueina le soifuaga ma aoaoga a Iesu Keriso ma taulai atili ma tautino atu e tauloto le “O Le Keriso Soifua, sa faateleina lo’u lotofaafetai ma le alofa mo lo tatou Faaola. O fuaiupu taitasi o lena tusiga musuia o loo i ai se lauga ma ua faalauteleina ai lo’u malamalama i Ana matafaioi paia ma le misiona i le lalolagi nei. O mea sa ou aoaoina ma lagonaina i lea vaitau o le suesue ma toe tomanatu i ai, ua faamautu ai e moni lava o Iesu “o le malamalama, o le ola, ma le faamoemoe o le lalolagi.”⁸ O tusitusiga paia anamua ma upu a perofeta o aso e gata ai na



tusia pe sa faaleo e vivii atu ai ia te Ia, o loo molimau mai ai “o Lona ala o le ala e tau atu i le fiafia i lenei olaga ma le ola e faavavau i le lalolagi a sau.”⁹

Ia Faatuatua ia Iesu Keriso

A o outou suesue i le soifuaga o Keriso ma aoaoga i auala e le mafaitaulia, o le a faateleina lo outou faatuatua ia te Ia. O le a oo ina outou iloa e alofa o Ia ia te outou taitoatasi ma e malamalamala lelei foi ia te oe. I le 33 tausaga o Lona soifua ai i le olaga nei, sa mafatia o ia i le teenaina, sauaga, galala i le fia taumafa, fiafinu, ma le le lava,¹⁰ tuuatoatasi, sauaina i upu ma le faaletino, o se oti matautia i lima o tagata agasala.¹¹ I le Faatoaga o Ketesemane ma i luga o le satauro i Kalevaria, sa Ia lagonaina ai o *tatou* tiga uma, mafatiaga, faaososoga, ma'i, ma vaivaiga.¹²

Po o a lava mea ua tatou mafatia ai, o Ia o le pogai o le *faamalologa*. O i latou ua aafia i soo se ituaiga o sauaga, se toesea ogaoga, ma'i faaumiumi po o se mafatiaga le ma'afolia, tuua'iga le moni, sauaga matuia, po o se faata-maiaga faaleagaga mai le agasala po o le le malamalamala e mafai ona faaatoatoa e le Togiola o le lalolagi. Peitai, o le a Ia le ulufale mai e aunoa ma se valaaulia. E tatau ona tatou o mai ia te Ia ma faata-gaina o Ia e faatino Ana vavega.

I se tasi aso matagofie o le tautotogo sa ou tuua ai le faitotoa e tatala se'i maua ai se ea fou. Sa lele mai se tamai manulele i le faitotoa sa matala ma iloa ai e le o le mea lea sa manao e sau i ai. Sa felelea'i faataamilo i le potu, ma lele faafia atu i le faamalamala tioata i se taumafaiga e sola. Sa ou taumafai e taiala malie atu o ia agai i le faitotoa sa matala, ae sa fefe ma saga sesegi ai lava. Na i'u ina pau i luga o pupuni o le faamalamala ua vaivai ma ua le mautonu. Sa ou tago i le pulumu ma tuutuu malie atu le itu felefele i luga i le mea sa faapuna ai le manulele ma le gatete. A o ou tuuina le ulu o le pulumu i autafa o ona vae, sa laalaa ifo ma le musua le manulele i luga o tala o le pulumu. Sa ou savali lemu i le faitotoa na matala ma faato'ato'a le uuina o le pulumu i le mea sa ou mafai. O le taimi lava na ma taunu ai i le faitotoa na matala, sa

lele saoasaoa ese loa le manulele i lona saolotoga.

E pei o le manulele, o nisi taimi tatou te fefefe ai e talitonuina ona tatou te le malamalamala i le alofa atoatoa o le Atua ma le naunauga e fesoasoani ia i tatou. Ae a tatou suesue i le fuafuaga a le Tama Faalelagi ma le misiona a Iesu Keriso, ona tatou malamalamala lea na pau lo La'ua faamoemoega o lo tatou fiafia e faavavau ma le alualu i luma.¹³ E fiafia i La'ua e fesoasoani mai pe a tatou ole atu, saili, ma tuitui atu.¹⁴ Pe a tatou faaaoga le faatuatua ma tatala atu ma le lotomaualalo i tatou lava i a La'ua tali, ona faasaoloto ai lea o i tatou mai le taotaomia i le le malamalamala ma talitonuga sese, ma mafai ai ona faasino mai ia i tatou le ala i luma.

O Iesu Keriso o le punavai o le *filemu*. Ua Ia valaaulia i tatou e “faalagolago atu i [Lona] aao ua lava”¹⁵ ma ua folafola mai le “filemu . . . e silisili i mea uma o loo manatu i ai,”¹⁶ o se lagona e oo mai pe a “fetalai mai e [Lona Agaga] le filemu i o tatou agaga”¹⁷ tusa lava po o a luitau o loo siomia ai i tatou. Pe o ni tauiviga patino, faalavelave faaleaiga, po o faafitauli faalenuu, o le a oo mai le filemu pe a tatou talitonu ua i ai i le Alo Pele e Toatas i le Atua le mana e faamalolo ai o tatou agaga tiga.

Sa faalagolago atu Sesana Potovini, o se tasi o nai Au Paia i Karatova, i Kalaotia i le Faaola ina ua maliliu lona



toalua ma ona matua uma i totolu o le ono masina i le tausaga na te'a nei. Na faatumulia i le faanoanoa, ae o le i ai o se molimau e faavavau aiga, o lea sa ia faaaogaina ai ana tupe uma sa teu e malaga ai i le malumalu i Suitiselani, lea sa faamauina ai o ia i lona toalua ma ona matua. Sa ia faamatala mai o na aso i le malumalu o se faatumutumuga lea i lona olaga. Ona o lana molimau mausali ia Iesu Keriso ma Lana Togiola, lea sa ia lagonaina ai le filemu ma ia maua le faamalologa lea foi na avea ma malosiaga ia i latou sa vagaia o ia.

O le faatuatua ia Iesu Keriso e aumaia atili ai isi mau meaalofa nai lo le na o le faamalologa ma le filemu. E pei ona faasoai mai e Peresitene Henry B. Eyring: “Ou te faafetai lava mo le tele o auala ua asiasi mai ai le Alii ia te au faatasi ma Le Faamafanafana i taimi sa ou manaomiaina ai le filemu. Ae e le na o lo tatou mafanafana o loo popole ai lo tatou Tama oi le Lagi ae faapena foi lo tatou alualu i luma.”¹⁸

Ona o le Togiola a Iesu Keriso, lea e aofia ai meaalofa o le togiola ma le toetu, ua mafai ai ona tatou salamo, suia, ma *alualu i luma e faavavau*. Ona o le mana Na te tuuina mai ia te i tatou pe a tatou usiusitai, ua mafai ai ona faateleina lo tatou gafatia nai lo le mea e tatou te mafai e i tatou lava. Atonu tatou te le malamalamala atoatoa pe faapefea, ae o i tatou taitoatasi ua lagonaina le faateleina o le faatuatua ia Keriso ua mauaina foi se malamalamala sili atu i le faasinomaga paia ma le faamoemoega, e taitai atu ai i tatou e faifiliga e ogatusa ma lena malamalamala.

E ui i se lalolagi o le a taumafai e ‘auato i tatou i lalo e faapei “o mea-ola,”¹⁹ ole iloa ai o le Atua o lo tatou Tama ua faamautinoa ai e i ai lo tatou gafatia paia ma le folafolaga tautupu. E ui i se lalolagi e fai mai ia i tatou o lenei olaga e leai se faamoemoe, o le iloaina na faia e le Alo Pele e Toatas i le Atua ia mafai ona togiolaina i tatou ma toetutu ua tatou maua ai le faamoemoe mo le alualu i luma e faavavau.

Faaa'oa'o ia Iesu Keriso

A o tatou aoao atili e uiga ia Iesu Keriso, ua tatou atiina ae le faatuatua



sili atu ia te Ia ma tatou mananao lava i tatou e mulimuli i Lana faataitaiga. O le tausiga o Ana poloaiga ua avea ma o tatou naunauga silisili. E naunau atu o tatou loto e fesoasoani i mafatiaga o isi e pei ona sa Ia faia, ma ua tatou mananao ia i latou ia maua le filemu ma le fiafia ua tatou maua.

Aisea ua mamana tele ai le tau-mafai e faia e faapei ona Ia fai? Talu ai ona ua tatou faatinoina lo tatou faatuatua, ua tuuina atu ai e le Agaga Paia le molimau i upumoni e faava-vau.²⁰ Na faatonu e Iesu Ona soo e tausi Ana poloaiga aua ua Ia silafia a tatou mulimuli i Ana faataitaiga, o le a amata ona tatou maua le olioli, ma a o faaauau pea ona tatou i ai i Lona ala, o le a tatou oo i le atoaga o le olioli. Sa Ia faamalamalama mai, “Ua ou fai atu nei mea ia te outou, ina ia tumau ai lo'u olioli ia te outou”²¹

Pe o fausia a tatou molimau i le faavae papa o Iesu Keriso ma Lana talalelei? A oo ina luluti mai afa o le olaga i o tatou luga, pe tatou te fitivale ea e sue pe faapefea ona fai po o se feau i le initoneti mo se fesoasoani? O le faavanoa o se taimi e fausia ai ma faamalolosia lo tatou iloa ma molimau ia Iesu Keriso o le a selesele mai ai vaegatofi mauoa i

taimi o tofotofoga ma faigata. O le fai-tauina o tusitusiga paia i aso taitasi ma le manatunatu loloto i upu a perofeta soifua, punouai i tatalo anoa faletagata lava ia, ‘ai ma inu ma le naunautai i le faamanatuga i vaiaso taitasi, tuuina atu o le auauanga e faapei ona faia e le Faaola—o nei gaoioiga faigofie taitasi e avea ma se poloka e fai se fausaga mo se olaga fiafia.

O le a se mea e aumaia ai le olioli ia te oe? Le vaaiga o e pele ia te oe pe a uma se aso umi? Le lotomalie ona o se galuega ua lelei ona fai? Le sulu i mata o se tasi pe a e tausoaina a latou avega? O upu o se viiga e pa'i loloto atu i lou loto? Le faatalofa a se uo pele? Vaii se taimi patino e tomanatu ai i ou faam-nuiaga, ona sue lea o ni auala e faasoa atu ai. A o faifai pea lou aapa atu ma auauina atu ma siitia ou tuagane ma uso i lo outou pitonuu po o le lalolagi atoa, o le a e lagonaina le filemu sili atu ma le faamalologa ma le alualu i luma.

O Mai ia te Ia. Ou te molimau atu a e faatotonugalemuina lou olaga ia Iesu Keriso, o le a e maua le olioli i ou tulaga, tusa lava po o le a. E moni, “O Ia, ma ua na o Ia lava,”²² o le tali lea. Ia faaalu le taimi ma maua se taimi ia iloa ai Iesu Keriso e ala i le suesueina

filiga, atiaeina o le faatuatua sili atu ia te Ia, ma taumafai ia avea atili e faapei o Ia. A o tatou faia, o le a uunaia i tatou e fai atu, “Ia faafetaia le Atua mo le meaalofa le mafaatusalia o Lona Alo paia lea.”²³ I le suafa paia ma mamalu o Iesu Keriso, amene. ■

FAAMATALAGA

1. Tamara Lush and Jay Reeves, “Disasters Rock the Nation, World,” *Deseret News*, Sept. 10, 2017, A1.
2. Mataupu Faavae ma Feagaiga 45:26
3. Tagai 2 Nifae 2:25.
4. “O Fea Lou Filemu?” *Viiga*, nu. 68.
5. Tagai 3 Nifae 9:14, 22.
6. Henry B. Eyring, “OMai ia Keriso,” *Liahona*, Mat. 2008, 49.
7. Tagai “O Le Keriso Soifua: O Le Molimau a le Au Apostolo,” *Liahona*, Ape. 2000, 2–3.
8. “O Le Keriso Soifua,” 3.
9. “O Le Keriso Soifua,” 3.
10. See Mosaea 3:7.
11. Tagai Luka 24:7.
12. Tagai Alema 7:11–12.
13. Tagai Mose 1:39.
14. Tagai i le Mataio 7:7.
15. “Lean on My Ample Arm,” *Hymns*, no. 120.
16. Filipi 4:7.
17. Alema 58:11.
18. Henry B. Eyring, “Ou Te Tuuina atu ia te Outou le Manuia,” *Liahona*, Me 2017, 17.
19. “Know This, That Every Soul Is Free,” *Hymns*, no. 240.
20. Tagai Ioane 7:17.
21. Ioane 15:11.
22. “O Fea Lo'u Filemu?” *Viiga*, nu. 68.
23. “O Le Keriso Soifua,” 3.



Saunia e Elder Donald L. Hallstrom
O Le Fitugafulu

Pe Ua Uma Ea le Aso o Vavega?

O le tatou taulaiga sili e tatau ona i ai o vavega faaleagaga ia o loo avanoa mo fanau uma a le Atua.

le tausaga talu ai, i se tofiga i le setete o Kalefonia, sa ma o ai ma se pere sitene o le siteki e asiasi ia Clark ma Holly Fales ma lo la aiga i lo latou fale. Sa tau mai ia te au sa latou aafia i se vavega talu ai nei. I lo ma taunuut atu, sa taumafai Clark e tu e faafeiloai i maua aua sa i ai se fusi [brace] lanuuli na taofia lona tua, o lona ua, faapea foi ma ona lima.

I le na o le lua masina talu ai, sa o ai Clark, lona atalii o Ty, ma le pe a ma le toa 30 o isi alii talavou ma taitai i se gaoioiga a le siteki, e savavali i le tumutumu o le Mauga o Shasta e 14,180 futu (4,322 m) le maualuga, o se tasi o mauga sili ona maualuga i Kalefonia. O le aso lona lua o le savaliga faigata, na taunuut ai le toatele o le au feaei i le tumutumu—o se ausiga mataina ua mafaia ona o le tele o masina o sauniuniga.

O se tasi o tagata na muai taunuut i le tumutumu i lena aso o Clark. Ina ua mavae sina malologa puupuu e lata i le pito o le tumutumu, sa tu o ia ma amata ona savali. A o ia faia, sa ia lävea ma pau i tua i le pito o le mato, ma mafatia ai i le pau i le pe a ma le 40 futu (12 m) o le le mau lelei sa toe

pau ai i lalo o le aisa tifato mo le isi 300 futu (91 m). O le mea e ofo ai, na ola Clark ae ua matua manu'a lava ma ua le mafai ona gaoioi.

O vavega ia na aafia ai Clark i le taimi o lenei mea matautia ia faatoa amata. O nisi na muai taunuut atu ia te ia na "faapea" o se vaega o tagata feaei ia na aofia ai ma ni taiala laveai ma

fomai mo faalavelave faafuasei. Na latou vave togafitia Clark mo le tei ma saunia ni mea e faamafanafana ai o ia. O lenei foi vaega na "faapea" sa faataitaia se masini fesootai fou ma auina atu se talosaga faafuasei mo se fesoasoani mai eria ia e le ola ai ni telefoni feaveai. Na vave ona auina atu se tamai helikopa i le Mauga o Shasta e itula le mamao. Ina ua mavae ni taumafaiga matautia le manuia e lua ina ia tulauelele i se tulaga e le gafatia e le vaalele, ma le tauiviga i tulaga o matagi maemaea, sa amata ai e le pailate se taumafaiga lona tolu ma le faai. A o agai mai le helikopa mai le isi itu, na "faapea" na toe suia le matagi ma mafai ai ona tulauelele le vaalele mo sina taimi e faaofoifi ai i totomu Clark i se vaega ititi i tua ifo o le nofoa o le pailate.

Ina ua suesueina Clark i le nofoaga autu mo gasegase tigaina, na faaalia e suesuega sa aafia o ia i le tele o manuaga i lona ua, tua, ivi asoaso, ma tapulima; o se māmā ua pu; ma le anoanoai o manua. O se fomai tipitipi e faapitoa i manua i le faiai ma neura na "faapea" foi sa tiute i lena aso; e na o ni nai taimi lava o le tausaga e i ai ai o ia i lenei falemai. Fai mai le fomai mulimuli ane na te lei vaai lava i se tagata ua aafia i ni manuaga se tele i le tuasivi ma uua ia e aveina le toto i le ulu ma le ua ma o loo ola pea. E le gata o le



faamoemoe mo Clark ia ola ae ia toe foi i le malosi atoatoa. O le faamatalaina o ia o se tagata e le mailoa pe i ai se Atua, sa fai mai ai le fomai tipitipi o le tulaga ia Clark na teenaina ana sue-suega uma faasaienisi e uiga i manuaga o neura ma e na o se vavega e mafai ona faamatalaina ai.

A o faaiuina le faamatalaina e Clark ma Holly o lenei tala matautia, sa faigata ona ou fai atu se tala. Sa le na ona sa iloaina lelei ia vavega, ae ona o se tasi e sili atu. Sa ou maua se uunaiga maoae—o se molimau faaleagaga—e faapea sa mafai lava e Holly ma le fanau aulelei taitoatasi e toalima o e na saofafai i le potu malolo o siomaina o latou matua i le i ai o sea faatuatua ona taliaina po o le a lava le taunuuga e ono oo i ai i lena aso ma o le a latou maua pea le manuia faaleagaga. O loo tatou faatasi iinei i le Maota Autu mo Konafesi ma Clark ma Holly ma le la fanau matutua e toalua, o Ty ma Porter.

I le manatunatu ai i le aafia o le aiga a Fales, na ou mafaufau tele ai e uiga i tulaga o le toatele o isi. A e faapefea le lemafaitalia o le Au Paia o Aso e Gata Ai o e ua tumu i le faatuatua, ua mauaina se faamanuiaga o le perisitua, tatalo e le aunoa ma ua tumu i le faamoemoe ae lei maua lava se vavega? Atonu i se auala latou te malamalama ai i se vavega. Atonu i se auala e foliga ai nisi ua maua ni vavega.

AE faapefea i latou o e mafatia mai mafatiaga ogaoga—faaletino, faalemafaufau, faalelagona—mo le tele o tau-saga pe mo le sefulu tausaga pe mo lo latou olaga atoa faaletino? A e faapefea i latou o e maliliu laiti lava?

I le na o le lua masina ua mavae, e toalua ni ulugalii faaipoipo e umia pepa faataga o le malumalu, ma le fanau faamisiona e toatolu ma le isi fanau e toalima a i latou, na malaga i se tamai vaalele mo se faigamalaga puupuu. Ou te mautinoa sa latou tatalo mo le saogalemu a o lei tuuvaat atu mo le faigamalaga ma sa tatalo faatauanau ina ua fetiaiai ma ni faafitauli ogaoga a o lei pau. E leai se tasi na sao. AE faapefea i latou?

E i ai se mafuaaga e fesili ai tagata lelei ma e pele ia i latou i le fesili na



tuuina mai e Mamona: “Pe ua uma ai ea le aso o vavega?”¹

E le mafai e lo’u malamalama faatapulaa ona faamatala le mafuaaga e i ai ai i nisi taimi se fesoasoani faalelagi a’o isi taimi e leai. Ae masalo e le o lava so tatou malamalama e uiga i le mea ua ta’ua o se vavega.

E masani ona tatou faamatalaina se vavega o se faamalologa e aunoa ma se faamatalaga atoa mai fomai faasaienisi po o le aloese mai mala matautia i le usitaia o se musumusuga manino. Ae, o le faauigaina o le *vavega* o “se mea aoga na oo mai e ala i le mana paia lea e le malamalama i ai tagata soifua”² e avatua se vaaiga lautele i mea e sili ona faavavau le natura. O lenei faauigaga tatou te mafai ai foi ona mafaufau i le matafaiioi taua o le faatuatua i le taliaina o se vavega.

Na aoao mai Moronae, “Ma pe sa i ai se taimi na faia ai e se tasi ni vavega seja mavae ona latou faatuatua muamua.”³; Na folafola mai e Amona, “Ua faapea ona saunia e le Atua se ala e mafai ona faia ai e le tagata vavega tetele, e ala i le faatuatua.”⁴ Sa faaalia

e le Alii ia Iosefa Samita, “Aua o A’u o le Atua, . . . ma o le a Ou faaali atu vavega . . . ia te i latou uma o e talitonu i lo’u igoa.”⁵

Na poloaiina e le Tupu o Nepukanesa ia Sataraka, Mesako, ma Apeteniko e tapuai i le tupua auro sa ia faatuina o se atua, ma taufaamatau atu, “Afai tou te le ifo, e lafoina outou . . . i totonu o le ogaumu e mu ai le afi.” Ona ia taufaifai lea ia i latou “O ai foi se Atua na te laveaiina outou ai la’u pule?”⁶

Sa tali atu nei soo faamaoni: “Afai o lea, ua mafai lo matou Atua, matou te auauna i ai, ona laveai mai ia te i matou ai le ogaumu e mu ai le afi. . . . Ae peitai, a le o lea, ia e silafia e oe le tupu e, matou te le auauna i ou atua.”⁷

Sa latou talitonu atoatoa e mafai e le Atua ona laveaiina i latou, “ae afai e leai,” sa latou faatuatua atoatoa i Lana fuafuaga.

E faapena foi, le fesili a Elder David A. Bednar i se alii talavou o le sa talosagaina se faamanuiaga faaleperisitua, “Afai o le finagalo a lo tatou Tama Faalelagi e siitia atu oe e ala i le

oti i lou talavou i le lalolagi o agaga e faaauau ai lau galuega, e te faatuatua e faalogo ma usitai atu i Lona finagalo ma e le malolo ai?"⁸ O i ai so *tatou* faatuatua "e le malolo ai" mai o tatou mafatiaga faalelalolagi ina ia tatou malolo ai e faavavau?

O se fesili taua tele e manatunatu i ai o le "O fea e tuu ai lo tatou faatuatua?" O taulai atu ea lo tatou faatuatua i le na o le manao ia tuuitia le tiga ma le mafatia, pe o faaogatotonuina mausali i le Atua le Tama ma Lana fuafuaga paia ma ia Iesu le Keriso ma Lana Togiola? O le faatuatua i le Tama ma le Alo e mafai ai ona tatou malamalama ma talia lo Laua finagalo ao tatou saunia mo le faavavau.

Ou te molimau atu i le asō i vavega. O le avea ma se atalii o le Atua o se vavega.⁹ O le mauaina o se tino i Lona faatusa ma foliga o se vavega.¹⁰ O le mealofa o le Faaola o se vavega.¹¹ O le Togiola a Iesu Keriso o se vavega.¹² O le faamoemoe mo le ola e faavavau o se vavega.¹³

E ui e lelei le tatalo ma galue mo le puipuiga faaletino ma faamaloloina i le taimi o lo tatou olaga faaletino, o le tatou taulaiga sili e tatau ona i ai o vavega faaleagaga ia o loo avanoa mo fanau uma a le Atua. E tusa lava po o le a le tatou aganuu, tagatanuu, mea ua tatou faia pe afai ua tatou salamo, po o le a se mea atonu na faia ia i tatou—tatou te mauaina uma avanoa tutusa i nei vavega. O loo tatou ola ai i se vavega, ma e i ai isi vavega o loo i luma atu. I le suafa, o Iesu Keriso, amene. ■

FAAMATALAGA

1. Moronae 7:35.
2. *Encyclopedia of Mormonism* (1992), "Miracles," 2:908.
3. Eteru 12:18.
4. Mosaea 8:18.
5. Mataupu Faavae ma Feagaiga 35:8.
6. Tanielu 3:15.
7. Tanielu 3:17–18.
8. David A. Bednar, "Taliaina o le Finagalo ma le Taimi a le Alii," *Liahona*, Aok. 2016, 19–20.
9. Tagai Salamo 82:6; Galuega 17:29.
10. Tagai Aperaamo 4:26.
11. Tagai Isaia 9:6.
12. Tagai Mataio 20:28; Alema 7:11–13; Mataupu Faavae ma Feagaiga 76:69.
13. Tagai Ioane 10:28; Moronae 7:41; Mataupu Faavae ma Feagaiga 45:8.



Saunia e Elder David A. Bednar

O Le Korama a Apostolo e Toasefululua

○ Mea Silisili Ese ma le Taua

O le fuafuaga sili o le fiafia a lo tatou Tama Faalelagi e aofia ai aoaoga faavae, sauniga, ma mea silisili ese ma le taua ina ia mafai ai e i tatou ona tofusia faatasi ai i le amioatua.

O se tasi o luitau sili e tofu fetaia'i ma i tatou i aso uma o le le faatagaina lea o popolega o lenei lalolagi e pulea o tatou taimi ma le malosi ona tatou faatuatuanai ai lea o mea o le faavavau e aupito sili ona taua.¹ E mafai ona faigofie tele ona tata'iese i tatou mai le manatuaina e taulai atu i mea taua faaleagaga e tatau ona faamuamua ona o o tatou tiutetave e tele ma le mau mea e fai. O nisi

taimi tatou te taumafai ai e tamomoe saoasaoa ma e ono galo ai ia i tatou le mea tatou te o i ai ma pe aisea ua tatou tamomoe ai.

Ua faamanatu mai e le Apostolo o Peteru e faapea o soo o Iesu Keriso, "Ua foaiina mai ia te i tatou ai lona mana Atua o mea uma, e oo ai i le *ola ma le amio Atua*, i lo tatou iloa lelei o le na valaau mai ia i tatou i lona lelei e silisili lava:

"Ona o lea ua ia folafolaina mai ai o *mea silisili ese lava ma le aoga*: ina ia tofusia faatasi ai outou i le amio *Atua*, ina ua sosola ese outou i le amioleaga o i le lalolagi i le tuinanau."²

O la'u savali e faamamafa ai le taua o mea silisili ese lava ma le taua o loo faamatala mai e Peteru o se faamanatu moni o le mea o loo tatou agai i ai i la tatou malaga i le olaga nei ma le mafuaaga. O le a ou talanoaina foi matafaioi mo le aso Sapati, le malumalu paia, ma o tatou aiga i le fesoasoani ai ia i tatou e manatua nei folafolaga faaleagaga taua.

Ou te tatalo faatauanau ia aoao i tatou taitoatasi e le Agaga Paia a o tatou mafaufau faatasi i nei upumoni taua.



O Lo Tatou Faasinomaga Paia

O le fuafuaga sili o le fiafia a lo tatou Tama Faalelagi e aofia ai aoaoga faavae, sauniga, feagaiga, ma mea silisili ese ma le taua ina ia mafai ai e i tatou ona tofusia faatasi ai i le amioatua. O Lana fuafuaga ua faamanino mai ai lo tatou taunuuga e faavavau ma le ala e tatau ona tatou mulimuli ai e aoao, suia, tuputupu ae, ma i'u ai ina nonofo faatasi ma Ia e faavavau.

E pei ona faamatalaina i le "O Le Aiga: O Se Folafolaga i le Lalolagi":

"O tagata soifua uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea ua tofu ai ma se natura paia ma se taunuuga. . . .

"I le muai olaga, sa iloa ma tapua'i atalii ma afafine agaga i le Atua o lo latou Tama e Faavavau ma sa [latou] talia Lana fuafuaga e mafai ai e Lana fanau ona maua se tino faaletino ma maua le tomai faalelalolagi latou te maua ai le atoatoaga ma iloa tino ai lo latou taunuuga paia o ni suli o le ola e faavavau"³

Ua folafola mai e le Atua i Ana fanau afai latou te mulimuli i mataupu faavae o Lana fuafuaga ma le faataitaiga a Lona Alo Pele, tausi poloaiga, ma tumau i le faatuatua e oo i le iuga, ona aoga lea o le mana o le Togiola a le Faaola latou te "maua le ola e faavavau, le meaalofa silisili lea o meaalofa uma a le Atua."⁴ O le ola e faavavau o le folafolaga aupito silisili ese lea ma le taua.

Toefanauina Faaleagaga

Tatou te malamalamana atoatoa i folafolaga silisili ese ma le taua ma amata maua ai le natura paia e ala i le taliaina ma le naunautai o le valaau mai o le Alii i le mamalu ma le amioatua. E pei ona faamatala mai e Peteru, e faataunuina lenei valaau e ala i le taumafai e sosola ese i le amioleaga o i le lalolagi.

A o tatou fetuleni atu i luma ma le gauai atu ma le faatuatua i le Faaola, ona ala mai lea i Lana Togiola ma le mana o le Agaga Paia, "se liuga tele i totonusi o i matou, po o totonusi o o tatou loto, ua le toe i ai so tatou manao e fai mea leaga, ae ia faia mea lelei e le



aunoa."⁵ Ua toefanauina i tatou; ioe, ua fanauina i le Atua, ma sua mai lo [tatou] tulaga faaletino ma pa'u, i se tulaga o le amiontonu, ua togolaina e le Atua.⁶ "O lenei, afai o ia Keriso se tasi, o le tagata fou ia: ua mavae mea tuai, faauta, ua faafouina mea uma."⁷

O sea suiga atoatoa i lo tatou natura e le faapea e vave ona tupu pe tupu foi i le taimi e tasi. E faapei o le Faaola, tatou te le mauaina foi "le atoatoaga i le amataga, ae [maua] e ia le alofa tunoa mo le alofa tunoa."⁸ "Aua faauta, ua faapea ona fetalai mai o le Alii le Atua: Ou te tuu atu i le fanauga a tagata lea fuaiteau i luga o lea fuaiteau, ma lea mataupu i luga o lea mataupu, o sina mea ititi ii ma sina mea ititi i o; ma e manuia lava i latou o e e faalogologo i a'u mataupu, ma ua'i mai o latou taliga i la'u fautuaga, ona o le a latou aoaoina le poto."⁹

O sauniga o le perisitua ma feagaiga paia e manaomia mo lenei gasologa faifai pea o le toefanauina faaleagaga; o auala foi ia ua atofa mai e le Atua tatou te maua ai Ana folafolaga silisili ese ma le taua. O sauniga e taliaina ma le agavaa ma manatuaina e le aunoa, e tatala ai auala faalelagi e mafai ai ona tafe mai le mana o le faale-atua i o tatou olaga. O feagaiga e faamamaluina pea lava ma manatuaina e le aunoa e maua ai le faamoemoega ma le faamautinaga o faamanuiaga i le olaga faapea foi le faavavau.

Mo se faataitaiga, ua folafola mai e le Atua ia i tatou, e tusa ai ma lo tatou faamaoni o le a tatou maua pea e le aunoa le mafutaga ma le sui lona tolou o le AigaAtua, le Agaga Paia lea,¹⁰ ma e ala mai i le Togiola a Iesu Keriso e mafai ai ona tatou maua e le aunoa ma faatumauina le faamagaloga o a tatou agasala,¹¹ ma e mafai foi ona tatou maua le filemu i lenei lalolagi,¹² ma ua motusia e le Faaola noataga o le otu ma sa manumalo o ia i le tuugamau,¹³ ma e mafai ona faatasia aiga i le olaga nei ma le faavavau atoa.

Ma le malamalamana lelei, o mea silisili ese uma ma le taua ua ofo mai e le Tama Faalelagi i Ana fanau, e le mafai ona faiataina pe faamatalaina atoatoa. Peitai, e oo lava i le lisi o se vaega o faamanuiaga folafolaina lea faatoou ou tuuina atu, e tatau ona faapogai ai ona "tu ma ofo" i tatou taitoatasi,"¹⁴ ma "faapauu i lalo ma ifo atu i le Tama"¹⁵ i le suafa o Iesu Keriso.

Manatuaina o Folafolaga

Na lapatai mai Peresitene Lorenzo Snow "Ua tele naua lo tatou lilifa atu e faagalo le faamoemoega sili o le olaga, o le faamoemoega na auina mai ai i tatou e le Tama Faalelagi iinei ia maua o tatou tino faitino, faapea foi le valaauga paia na valaauna ai i tatou; ma e tusa ai ma lena, nai lo le faatoilaloina o nai mea iti faatauvaa e le tumau. . . , ae ua tele taimi ua tatou



taulai atu ai i tatou lava i mea o le lalolagi, e aunoa ma le faavanoaina o i tatou lava ia maua mai le fesoasoani faalelagi na saunia e le Atua, ua na o le pau lava lena o le mea e mafai ai e i tatou ona faatoilaloina [na mea le tumau].¹⁶

O le aso Sapati ma le malumalu paia o punavai patino ia e lua o le fesoasoani faalelagi na saunia e le Atua e fesoasoani ai ia te i tatou e tula'i a'e i luga mai le amioleaga o le lalolagi. Atonu tatou te mafaufau faapea o faamoemoega aupito sili o le tausia o le paia o le aso Sapati ma le o i le malumalu e fesootai ae eseese o la 'auga. Ae peitai, ou te talitonu o na faamoemoega e lua e tutusa lelei lava ma e galulue faatasi foi e faamalolosia ai i tatou taitoatasii faaleagaga faapea foi i tatou aiga.

O Le Sapati

Ina ua uma ona foafoa e le Atua o mea uma, sa malolo o Ia i le aso fitu ma sa poloaiina e tasi le aso o vaison taitasi ia avea o se taimi e malolo ai e fesoasoani ai i tagata e manatua o Ia.¹⁷ O le Sapati o le taimi o le Atua, o se **taimi paia** ua vaetofaina patino mo tapuaiga ia te Ia ma mo le mauaina ma

le manatuaina o Ana folafolaga silisili ma taua.

Na poloai mai le Alii i lenei tisipenisione:

"Ma ina ia mafai ona e tausi atili atoatoa oe lava i le lē pisia mai le lalolagi, ia e alu atu i le fale tatalo ma osi a'e i luga au faamanatuga i lo'u aso paia;

"Aua e moni o se aso lenei ua tofia mo oe e te malolo ai mai au galuega, ma avatu ai au tapuaiga i le Silisili Ese.¹⁸

O le mea lea, i le Sapati tatou te tapuai atu i le Tama i le suafa o le Alo e ala i le auai i le faatinoga o sauniga ma aoao e uiga i le, mauaina, manatua, ma le faafouina o feagaiga. I Lona aso paia, o o tatou mafaufauga, taga, ma amioga o faailoga ia tatou te avatu i le Atua ma o se faailoilo foi lea o lo tatou alolofa mo Ia.¹⁹

O se isi faamoemoega faoopoopo o le Sapati o le siitia lea o la tatou vaaiga mamao mai mea o le lalolagi i faamaniuaga o le faavavau. Pe a tatou aveesea mai i tatou mai lenei taimi paia mai le tele o mea masani e fai i o tatou olaga, e mafai ona tatou "tepa atu i le Atua ma ola ai"²⁰ e ala i le mauaina ma manatua o folafolaga silisili ese ma le taua ia e tofusia ai i tatou ma le amioatua.

O Le Malumalu Paia

Sa poloaiina pea lava e le Alii Lona nuu e le aunoa e fausia malumalu, o nofoaga paia e faatino ai e le Au Paia agavaa sauniga paia o le talalelei ma mo i latou lava ma mo e ua maliliu. O malumalu o nofoaga ua silisili ona paia o nofoaga tapuai uma. O le malumalu lava ia o le maota o le Alii, o se **avanoa paia** e vaetofaina patino mo tapuaiga i le Atua ma mo le mauaina ma le manatuaina o Ana folafolaga silisili ese ma le taua.

Ua poloai mai le Alii i lenei tisipenisione "Ia outou faatulaga tatau outou lava; ia saunia mea manaomia uma; ma faatu se fale, o se fale tatalo lea, o se fale o le anapogi, o se fale o le faattua, o se fale o le aoaoga, o se fale o le mamalu, o se fale maopoopo, o se fale o le Atua."²¹ O le taulaga autu o le tapuai i le malumalu o le auai lea i le faatinoga o sauniga ma aoao e uiga, mauaina, ma le manatuaina o feagaiga. E ese o tatou mafaufauga, o faatinoga, ma laei i le malumalu mai lo isi nofoaga tatou te asiiasi i ai.

O se faamoemoega autu lava o le malumalu o le siitia o la tatou vaaiga mamao mai mea o le lalolagi i faamaniuaga o le faavavau. A tatou aveesea

mai i tatou mo sina taimi puupuu mai mea o le lalolagi tatou te masani ai, e mafai ona tatou “tepa atu i le Atua ma ola ai”²² e ala i le mauaina ma le manatuaina o folafolaga silisili ese ma le taua ia e tofusia ai i tatou ma le amioatua.

Faamolemole manatua o le aso Sapati ma le malumalu, o se *taimi paia* ma se *avanoa paia* ua vaetofiaina patino mo le tapuaiga i le Atua ma mo le mauaina ma le manatuaina o Ana folafolaga silisili ese ma le taua i Ana fanau. E pei ona faatuina e le Atua, o faamoemoega autu o nei punavai faalelagi o le fesoasoani, e tutusa lelei lava: ina ia taulai atu pea lava pea ma le mamana la tatou gauaiga i lo tatou Tama Faalelagi, o Lona Alo Pele e Toatas, o le Agaga Paia, ma folafolaga e o faatasi ma sauniga ma feagaiga o le talalelei toefuataiina a le Faaola.

O o Tatou Fale

E taua tele, o le fale e tatau ona avea ma tuuafatasiga aupito maua-luga o le **taimi ma le avanoa** sili ona manatua lelei ai e tagata taitoatasi ma aiga folafolaga silisili ese ma le taua a le Atua. O le tuua o o tatou fale ina ia faaalu se taimi i sauniga lotu i le Aso Sa ma ulufale atu ai i avanoa paia o se malumalu, e taua ae le lava. Sei vagana ua tatou aumaia le agaga ma le malosi e maua mai na gaoioiga paia e foi mai ma i tatou i o tatou fale ona mafai lea ona tatou lagolagoina la tatou taulaiga i faamoemoega sili o le olaga nei ma faatoilaloia ai le amioleaga o loo i ai i le lalolagi. O o tatou aafiaga i le Sapati ma le malumalu e tatau ona avea o ni auala faaleagaga e faatumulia ai tagata taitoatasi ma aiga ma o tatou fale i le afio ai o le Agaga Paia ma le mana, faatasi ai ma le liua faifai pea ma le loloto i le Alii o Iesu Keriso, ma faatasi ai ma “se susulu atoatoa o le faamoemoe”²³ i folafolaga e faavavau a le Atua.

O le Sapati ma le malumalu e mafai ona fesoasoani ia i tatou e faatuina ai i o tatou fale “se ala e silisili ona lelei”²⁴ a o tatou “faaopoopoia ia Keriso i le sauniga i le faaatoaga o tausaga, o i latou uma lava o i le lagi atoao ma i latou o i le lalolagi; o ia lava ua matou maua ai.”²⁵ O mea tatou te faia i o tatou

fale e faaaoga ai Ona *taimi paia* ma faatasi ai ma mea tatou te aoaoina i Lona *avanoa paia* e taua i le tofusia ai i folafolaga silisili ese ma le taua e maua ai le amioatua.

Folafolaga ma le Molimau

E faigofie lava ona faatoilaloina i tatou i mea e masani ona fai i le olaga. O le moe, o le ‘ai, o le faiga o lavalava, taalo, faamalositino, ma le tele o isi gaoioiga masani e moomia ma e taua. Ae o le iuga lava, o tagata e avea ai i tatou o le taunuuga lea o lo tatou malamalama ma le naunautaiga e aoao mai le Tama, o le Alo, ma le Agaga Paia; ua le na o se aofaiga o a tatou gaoioiga i aso taitasi i lo tatou olaga atoa.

O le talalelei e matuai tele atu nai lo le na o se lisi e siaki o galuega eseese e faatino; nai lo lena, o se ie lalaga tele o le upumoni “ua faavaaina lelei”²⁶ ma ua lalagaina faatasi, ua mamanuina e fesoasoani ai ia tatou faapei o lo tatou Tama Faalelagi ma le Alii o Iesu Keriso, ma tofusia ai ma se amioatua. E moni lava, e faatauasoina i tatou i le vaai i talaatu o le faailoga”²⁷ pe a uftia lea upumoni faaleagaga moni e tuinanauga, atugaluga, ma le faifaiaga o le lalolagi.

Pe a tatou popoto ma valaaulia le Agaga Paia e avea ma o tatou taiala,²⁸ ou te folafola atu o le a Ia aoao i tatou i le mea moni. “O le a molimau o ia ia Keriso, [ma] faapupula o tatou mafau-fau i mea o le lagi”²⁹ a o tatou taumafai e faataunu lo tatou taunuuga e faavavau ma tofusia i le amioatua.

Ou te tuuina atu la’u molimau o mea silisili ese ma le taua e soofaatasi ma a tatou sauniga ma feagaiga e mau-tinoia ia. Ua tautino mai e le Alii:

“Ou te tuu atu ia te outou ni faatonugia i le ala e mafai ai ona outou amioi o’u luma, ina ia liliu mai ia te outou mo lo outou olataga.

O A’u, o le Alii, e noatia a’u pe a outou faia mea Ou te fai atu ai; ae a outou lē faia mea Ou te fai atu ai, e leai se folafolaga mo outou.”³⁰

Ou te molimau atu o loo soifua lo tatou Tama Faalelagi ma o Ia o le Matai’sau o le ata o le faaolataga. O Iesu Keriso o Lona Alo Pele e Toatas,



o lo tatou Faaola ma le Togiola. O loo soifua o Ia. Ma ou te molimau atu o le fuafuaga ma folafolaga a le Tama, o le Togiola a le Faaola, ma le mafutaga a le Agaga Paia e mafai ai ona maua le “filemu i lenei lalolagi ma le ola e faavavau i le lalolagi a sau.”³¹ Ou te molimau atu ai i nei mea, i le suafa paia o le Alii o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 25:10.
2. 2 Peteru 1:3–4; ua faaopoopo le faamamafa.
3. “O Le Aiga: O Se Folafolaga i le Lalolagi,” *Liahona*, Nov. 2010, 129.
4. Mataupu Faavae ma Feagaiga 14:7.
5. Mosaea 5:2.
6. Mosaea 27:25.
7. 2 Korinito 5:17.
8. Mataupu Faavae ma Feagaiga 93:12.
9. 2 Nifae 28:30.
10. Tagai Moronae 2:2; Guide to the Scriptures, “Holy Ghost,” scriptures.lds.org.
11. (Tagai i le Mosaea 4:10–12.
12. Tagai Mataupu Faavae ma Feagaiga 59:23.
13. Tagai i le Mosaea 16:7–8.
14. “Ou Te Tu ma Ofo,” Viiga, nu. 107.
15. Mataupu Faavae ma Feagaiga 18:40.
16. *Teachings of Presidents of the Church: Lorenzo Snow* (2011), 100, 101.
17. Tagai Esoto 20:8–11.
18. Mataupu Faavae ma Feagaiga 59:9–10.
19. Tagai Russell M. Nelson, “O Le Sapati o le Aso Fiafia,” *Liahona*, Me 2015, 130.
20. Alema 37:47; tagai foi Alema 37:46
21. Mataupu Faavae ma Feagaiga 88:40.
22. Alema 37:47.
23. 2 Nifae 31:20.
24. 1 Korinito 12:31; Eteru 12:11.
25. Efeso 1:10.
26. Efeso 2:21..
27. Iakopo 4:14.
28. Tagai Mataupu Faavae ma Feagaiga 45:57.
29. “Agaga e Taitai Mai,” Viiga, nu. 143
30. Mataupu Faavae ma Feagaiga 82:9–10.
31. Mataupu Faavae ma Feagaiga 59:23.



Saunia e Bishop W. Christopher Waddell
Fesoasoani Lua i le Au Epikopo Pulefaamalumalu

Liliu Atu i le Alii

I lenei aaifiaga faaleolaga nei, e le mafai ona tatou pulea mea uma e tutupu ia i tatou, ae e ia te i tatou le pulea atoatoa o le ala tatou te tali atu ai i suiga i o tatou olaga.

le tautotogo o le 1998, sa mafai ai ona ma tuufaatasia ma Carol se malaga faapisinisi ma se tafaoga faaleaiga ma ave ai le ma fanau e toafa, faatasi ai ma lo'u tina faaletulafono ua faatoa maliu lana tane, i Hawaii mo ni nai aso.

O le po a'o loma le matou malaga i Hawaii, sa ta'u mai e le fomai o le ma atalii e fa masina le matua, o Jonathan, e faaluaina le afaina o lona taliga, ma sa ta'u mai e le mafai ona ave o ia pe a ma le tolu i le fa aso. Sa faia le faiiuga e nonofa ia Carol ma Jonathan, ae alu pea le matou malaga ma le isi vaega o le aiga.

O la'u faailo muamua lava e le o le malaga lea sa ou manao ai, na tupu a o lei leva ona matou taunu. Ao savalivali atu i lalo o se auala e faaitualua ai niu i le susulu o le masina, faatasi ai ma se vaaiga o le sami i o matou luma, sa ou faliu e fai atu se tala i le matagofie o le motu, ma i lena taimi o le faanaunau alofa, nai lo lo'u vaai atu ia Carol, sa ou tilotilo atu i mata o lo'u tina faaletulafono—o le, se'i ou faaopoopo atu lava, e ese lo'u alofa i ai. E le o le mea lea sa ou faanananau i ai. E lei faamoemoe foi Carol e faaalu lana tuuaga i le fale na o ia ma le ma atalii pepe e ma'i.

O le a i ai taimi i o tatou olaga tatou te iloa ai i tatou lava ua i se ala e lei

mafaufauina, fetaiai ma tulaga e sili atu ona matuia nai lo se tuuaga ua faalavefauina. E faapefea ona tatou tali atu pe a tutupu mai mea e tele ina le mafai ona taofiofia, e fesuiai ai le olaga sa tatou fuafuaina pe faamoemoe foi i ai?

I le aso 6 o Iuni, 1944, sa a'e ai i uta i le Matafaga o Omaha ia Ailama Shumway, o se taulealea liutena lona lua i le Ami a le Iunaite Setete, o se

*O Hyrum Shumway,
na faatausoina i le
taimi o le Taua Lona
II, na tuua se talatuu
o le faatuatua ma le
faalagolago i le Alii i
lana fanau.*



vaega o le osofaiga o le D-day. Sa tulauelolele saogalemu, ae i le aso 27 o Iulai, a o avea o ia o se vaega o le osofaiga Tuufaatasi, sa matuai faamanualia lava o ia i se maina o auupega e faatamaia tane o le militeli na pasae. I se minute, sa matua aafia lava lona faamoemoega faafomai i le lumanai. Ina ua uma ni mau taotoga, lea na fesoasoani ai ia te ia e toe malosi mai le tele o manu'a ogaga, e lei toe pupula lava ia Uso Shumway. E faapefea ona ia tali atu i ai?

Ina ua mavae tausaga e tolu i se falemai toefatufatua'i, sa ia toe foi i le fale i Lovell, Wyoming. Sa ia iloa ua le toe mafai ona taunu lana miti e avea ma se fomai, ae sa ia naunau e agai i luma, ia faaipoipo, ma lagolagoina se aiga.

Sa iu ina maua sana galuega i Baltimore, Maryland, o se faufautua toefatufatua'i ma se tagata faapitoa o galuega mo e tauaso. I lona lava faagasologa o le toefatufatua'i, sa ia aoaoina ai o e tauaso e gafataulimaina le tele naua nai lo le mea sa ia iloa, ma i le valu tausaga o i ai i lea tulaga, sa toatele atu tagata tauaso sa ia faafaigaluegaina nai lo se isi lava faufautua i le atunu.

Ua mautinoa nei i lona tomai e maua mea e tausi ai se aiga, sa faamalamalama loa Ailama i lana manamea i lona ta'u atu ia te ia, "Afa! o le a e faiatua meli, soka ia totini, ma ave le taavale, e mafai ona ou faia isi mea uma." E lei leva ae faamauina i la'ua i le Malumalu o Sate Leki ma iu ina faamniaina i se fanau e toavalu.

I le 1954, na toe foi ai le au Shumways i Wyoming, lea na faigaluga ai Uso Shumway mo le 32 tausaga o se Faatonusili o Aoga mo e Logonoa ma Tauaso. I le taimi lena, sa galue o ia mo le fitu tausaga o se epikopo o le Uarota Muamua a Cheyenne, mulimuli ane avea ma peteriaka o le siteki mo le 17 tausaga. Ina ua litaea, sa galulue foi Brother ma Sister Shumway o se ulugalii matutua faamisiona i le Misiona a Lonetona Egelani i Saute.


Na maliu Ailama Shumway ia Mati 2011, ma sa tuua e ia se talatuu o le faatuatua ma le faalagolago i le Alii, e oo lava i tulaga faigata, i se fanau toatele, ma fanau a fanau, ma fanau a fanau a fanau.¹

Atonu na suia le olaga o Ailama Shumway i le taua, ae e lei masalosalava i lona natura paia ma ona gafatia faavavau. E faapei foi o ia, o i tatou o atalii ma afafine agaga o le Atua, ma sa tatou taliaina Lana fuafuaga lea e mafai ai e i [tatou] ona maua se tino faitino ma maua ai aafiaga faalelalolagi ina ia alualu ai i luma seja tau atu i le faaatoatoaga ma oo ai ina tatou iloa [lo tatou] taunuuga paia o ni suli o le ola e faavavau.² E leai se aofaiga o suiga, tofotofoga, po o tetee e mafai ona fesuia'ia le ala o le faavavau—ua na o a tatou filifiliga lava, a o tatou faaaogaina la tatou faitalia.

O suiga, ma taunuuga o luitau, lea tatou te fetaiai i le olaga nei e oo mai i ni siepi ma ituaiga lapopoa ma aafia ai i tatou taitoatasi i ala tulaga ese. E faapei o outou, ua ou molimauina uo ma aiga o feagai ma luitau e afua ona o:

- O le oti o se e pele.
- O se tete'aga matuitui.
- Atonu e leai lava se avanoa e faaipoipo ai.
- Ma'i po o se manu'a matuia.
- E oo lava i faalavelave faalenatura, e pei ona sa tatou molimauina talu ai nei i le lalolagi atoa.

Ma e umi le lisi. E ui atonu e tulaga ese “suiga” taitasi i o tatou tulaga taitasi, e i ai se elemene e laugatasia ai i faigata po o luitau e tulai mai ai—e i ai lava le faamoemoe ma le filemu



e le aunoa e ala i le taulaga togiola a Iesu Keriso. O le Taulaga Togiola a Iesu Keriso ua saunia ai le toe fuataga e faasa'o ai ma faamalolo tino uma e manu'anu'a, o agaga ua manu'alia, ma loto ua nutimomoia.

Na te silafia, i se ala e leai lava se isi e mafai ona malamalamana i ai, le mea tatou te moomia, taitoatasi, ina ia mafai ai ona agai i luma i le lotolotoi o suiga. E le faapei o uo ma e pele ia i tatou, o le Faaola e le gata ina lotofaavauvau faatasi ma i tatou, ae e mafai foi ona ia malamalamana atoatoa, aua sa i ai foi o Ia i le mea o tatou i ai nei. E le gata i le totogiina o le tau ma puapuagatia mo a tatou agasala, sa savalia foi e Iesu Keriso ala uma, taulimaina luitau uma, feagai ma tiga uma—faaletino, faalelagona po o le faaleagaga—o le a tatou fetaiai i le olaga nei.

Na aoao mai Peresitene Boyd K. Packer: “O le alofa mutimutivale ma le alofa tunoa o Iesu Keriso e le faatuaoia ia i latou o e agasala . . . , ae aofia ai le folafolaga o le filemu e faavavau mo i latou uma o e o le a talia ma mulimuli ia te Ia. . . . O Lona alofa mutimutivale o se faamalologa sili lea, e oo lava i se tagata le sala sa faamanualia.”³

I lenei aafiaga faaleolaga nei, e le mafai ona tatou *pulea* mea uma e tutupu ia i tatou, ae e ia te i tatou le *pulea* atoatoa o le ala tatou te *tali atu ai* i suiga i o tatou olaga. E le o faa'ite mai i lenei mea faapea o le a leai ni taunuuga ma faigofie foi ona taulima ia luitau ma faigata tatou te fetaiai. E le

o faa'ite'ite mai faapea o le a tatou saoloto mai tiga po se lototiga. O le uiga e i ai le afuaga mo le faamoemoe ma ona o le Togiola a Iesu Keriso, ua mafai ai ona tatou agai i luma e saili aso e sili atu—aso e tumu i le olioli, malamalamama, ma le fiafia.

I le Mosaea tatou te faitau ai i le tala ia Alema, o le sa faitaulaga i le Tupu o Noa, ma lona nuu, o e, ina ua uma ona faailoa atu i ona tagata . . . na o ese atu i le vao ae lei oo mai autau a le tupu o Noa.” Ina ua mavae aso e valu, “sa latou taunu . . . i se laueelele mata-gofie tele ma lafulemu” lea na “latou faatutu ai o latou faleie ma amata ona galueaiina le eleele, ma fausia fale.”⁴

Ua foliga mai ua i ai so latou faamoemoe. Na latou taliaina le talalelei a Iesu Keriso. Sa papatisoina i latou o se feagaiga o le a latou auauna atu i le Alii ma tausi ana poloaiga. Ma “sa latou fanafanau ma faasolo malolosi tele lava i le laueelele.”⁵

Peitai, o le a le pine ae toe sua o latou tulaga. “Sa i ai se autau a sa Lamana i tuaoi o le laueelele.”⁶ E lei pine ae nofopologa Alema ma lona nuu, ma “sa oo ina matua tele lava o latou puapuaga sa amata ona latou tagi malosi atu i le Atua.” E le gata i lea, sa poloaiina i latou e o latou leo-leo e tuu a latou tagi, a leai, “ma o soo se tasi e maua o valaau atu i le Atua, o le a fasiotia.”⁷ E lei faia e Alema ma lona nuu se mea e agavaa ai i lo latou tulaga fou ua latou i ai. O le a se latou tali i ai?



Nai lo le latou tuua'ia o le Atua, sa latou liliu atu ia te Ia ma "sasaa atu o latou loto ia te ia." I le tali atu i lo latou faatuatua ma tatalo, sa tali atu le Alii: "Ia faamafanafanaina outou. . . ." "O le a ou . . . faamāmāina foi avega ua tuu i o outou tauau, e oo ia te outou tou te le lagonaina i latou i luga o o outou tua." E lei umi, "sa faamalosia i latou e le Alii ina ia mafai ona latou tauave ma le fai-gofie a latou avega, ma sa latou gaua'i atu ma le fiafia ma le onosai i le final-galo atoa o le Alii."⁸ E ui e lei faasaolo-toina mai le nofopologa, ae o le liliu atu i le Alii, ae le *mai* le Alii, sa faamanui-ina i latou e tusa ai ma o latou manaoga ma tusa ai ma le poto o le Alii.

E pei ona sa aoao mai e Elder Dallin H. Oaks: "E tele auala e oo mai ai faamanuiaga o le faamalologa, e fetau lava ma o tatou manaoga taitoatas, e pei ona silafia ai e Ia o lē e alofa silisili ia i tatou. O nisi taimi e faamaloloina e se 'faamalologa' o tatou ma'i pe faa-matuu ese atu ai a tatou avega. Peitai, o nisi taimi e 'faamaloloina' i tatou e ala i le tuuina mai o le malosi po o le malamalamo po o le onosai e onosaia ai avega ua tuu mai i o tatou luga."⁹

Mulimuli ane, "sa oo ina matua tele lava lo latou faatuatua ma lo latou onosai," sa laveaiina Alema ma lona nuu e le Alii, "ma sa latou avatu le faafetai," "aua a latou i ai i le pologa, ma sa leai se tasi sa mafai ona lavea'ia i latou vagana ai le Alii lo latou Atua."¹⁰

O le faitioga faanoanoa o le, e tele taimi, o i latou e manaomia, ua liliu ese mai o latou lava punavai atoatoa o le fesoasoani—o lo tatou Faaola, o Iesu Keriso. E i ai se tala faatusi paia masani o le "gata apamemea" o loo aoao ai i tatou e i ai sa tatou filifiliga pe a tatou feagai ma luitau. Ina ua toatele le fanauga a Israuelu e u e "gata uogo,"¹¹ "sa sii ae i luga se faatusa . . . e faapea o soo se tasi e tepa ae i ai e mafai ona ola. [Ae sa avea ma se filifiliga.] Ma e toatele sa tepa i ai ma ola ai.

" . . . Peitai sa i ai le toatele o e sa sili atu ona maaa tele sa latou le fia tetepa ae ai, ma o lea na fano ai i latou."¹²

E faapei o Israuelu anamua, ua fautuaina foi i tatou e vaavaai atu i le Faaola ma ola ai—aua e faigofie Lana amo ma o Lana avega foi e mama ia.

Na aoao atu e Alema le Ititi lenei upumoni paia ina ua fai mai, "Ua ou iloa o ai lava e tuu atu lo latou faalagolago i le Atua e lagolagoina i o latou tofotofoga, ma o latou faalavelave, ma o latou puapuaga, ma o le a sii ae i latou i luga i le aso gataaga"¹³

I nei aso e gata ai, ua saunia foi e le Alii le mau punaoa, a tatou "gata apa-memea," o ia mea uma ua mamanuina e fesoasoani ai ia tatou vaavaai atu ia Keriso ma tuu atu lo tatou faatuatuauga ia te Ia. O le taulimaina o luitau o le olaga e le o le faatuatanai i le mea moni ae o le mea tatou te filifili e taulai i ai ma le faavae tatou te filifili e fausia.

O nei punaoa e aofia ai, ae le na o le pau ia:

- Suesue ia tusitusiga paia ma aoaoga a perofeta soifua.
- Tatalo ma le loto faamaoni ma ana-pogi faisoo.
- Aai ma feinu ma le agavaa i le faamanatuga.
- Auai soo atu i le malumalu.
- Faamanuiaga o le perisitu.
- Fautuaga poto faapolofesa.
- Vai ma fualau, pe a faatonuina lelei ai ma faaaoga e pei ona faamaonia ai.


Po o le a lava le suiga o tulaga o le olaga e oo mai, ma pe o a foi ala e lei faamoemoeina tatou te ono malaga ai, pe faapefea ona tatou tali atu i ai o se filifiliga. Liliu atu i le Faaola ma puemau mai Lona aao o loo faaloaloa mai o le filifiliga aupito sili lava lea e le aunoa.

Na aoao mai e Elder Richard G. Scott le upumoni faavavau lenei: "O le fiafia moni tumau faatasi ma le malo-siaga e oo mai ai, lototoa, ma le gafatia e faatoilalo ai luitau aupito faigata e maua mai se olaga e faatotonugalemu ia Iesu Keriso. . . . E leai se faamaoniga o taunuuga vave, ae e i ai le faamau-tinoaga mautu e faapea, i le taimi a le Alii, o le a oo mai faaiuga, o le a manu-malo le filemu, ma o le a faatutumuina mea o gaogao."¹⁴

Ou te faasoaa atu la'u molimau i nei upumoni. I le suafa, o Iesu Keriso, amene.

FAAMATALAGA

1. Talafaasolipo na maua sao mai ia Joseph Shumway, o se e tupuga mai ia Ailama Samita Shumway.
2. "O Le Aiga: O Se Folafolaga i le Lalolagi," *Liahona*, Nov. 2010, 129.
3. Boyd K. Packer, "O Le Mafuaaga mo lo Tatou Faamoemoe," *Liahona*, Nov. 2014, 7.
4. Mosaea 23:1-5.
5. Mosaea 23:20.
6. Mosaea 23:25.
7. Mosaea 24:10-11.
8. Mosaea 24:12-15.
9. Dallin H. Oaks, "Na te Faamaloloina I Latou e Mafatia i Avega," *Liahona*, Nov. 2006, 7-8.
10. Mosaea 24:16, 21-22.
11. 1 Nifae 17:41.
12. Alema 33:19-20.
13. Alema 36:3.
14. Richard G. Scott, "Trust in the Lord," *Ensign*, Nov. 1995, 17.



Saunia e Elder W. Craig Zwick
Fitugafulu ua Faamalolo ma le Mamalu

Le Alii e, la Pupula o Ma'ua Mata

E tatau ona tatou vaai atu i isi e ala i fofoga o lo tatou Faaola.

Ole Lion King o se ata komi mataina e uiga i le vaomatua o Aferika [African savanna]. Ina ua oti le tupu liona a o ia laveaiina lona atalii, sa faamlosia le liona aloalii talavou ia faaaunuuaaina a o faatamaia e le pule aoao le faatumauina o le vaomatua [savanna]. Na toe maua mai e le liona aloalii le malo e ala i le fesoasoani a se faufautua. Sa tatalaina ona mata i mea na manaomia o le faatumauina i le lio o le ola i le vaomatua [savanna]. A o aoaoina o ia e avea ma tupu, sa fautuaina le liona laitiiti e "vaai i talaatu o mea e mafai ona ia vaai i ai."¹

O le aoao ai e avea ma tofi e maua-inna mea uma o i ai i lo tatou Tama, ua fautuaina ai i tatou e le talalelei ina ia vaavaai i talaatu o mea tatou te vaai i ai. Ina ia vaavaai i talaatu o mea tatou te iloa atu, e tatau ona tatou vaai atu i isi e ala i fofoga o lo tatou Faaola. E mafai e le talalelei ona tosina mai tagata e toatele, ma i o latou ituaiga esese. E le mafai ona tatou malamalama atoatoa i filifiliga ma talaaga faalemaufau o tagata i lo tatou lalolagi, o falefaigaluga, ma potopotoga faale-Lotu, e oo lava foi i o tatou aiga aua e seasea tatou maua le ata atoa po o ai i latou. E tatau ona tatou vaavaai i talaatu o manatu le

faavaea faigofie ma taatele ma faalautele tioata o o tatou lava aafiaga.

Sa pupula o'u mata e "vaai i talaatu o le mea sa mafai ona ou vaai i ai" a o avea au o se peresitene o le misiona. Sa taunuu se faifeau talavou faatasi ma le popole i ona mata. A o ma feiloai i se faatalanoaga, sa ia fai mai ma le faanoanoa, "Ua ou fia alu i le fale." Sa ou mafaufau ia te au lava, "Oi, e mafai ona

ta faaleleia lea mea." Sa ou fautuaina o ia e galue malosi ma tatalo i ai mo se vaiaso ona valaau mai lea ia te au. I se vaiaso mulimuli ane, toetoe o le taimi tonu e valaau mai ai, sa ia valaau mai ai. Sa tumau lava lona fia alu i le fale. Sa ou toe fautuaina o ia e tatalo, galue malosi, ma valaau mai ia te au i se vaiaso. I le isi a ma faatalanoaga, sa leai se suiga. Sa tumau pea lona fia alu i le fale.

Sa ou lei manao ia tupu lena mea. Sa amata ai ona ou aoaoina o ia i le natura paia o lona valaauga. Sa ou fautuaina o ia e "faagalo o [ia lava] ae alu e galue."² Ae po o le a lava le fautuaga sa ou ofoina atu, e lei suia ai lava lona mafaufau. Na iu ina oo mai ia te au atonu ou te le o iloa le ata atoa. O iina sa uunaia ai au e tuu atu le fesili: 'Elder, o le a le mea e faigata ia te oe?' O le tala na ia fai mai na tuia ai lo'u loto: "Peresitene, ou te le iloa faitau."

O le fautuaga poto sa ou manatu sa taua tele mo ia e faalogo ai sa le talafeauga ma ona manaoga. O le mea sa sili ona ia manaomia mai lona peresitene o le misiona, ia ou vaavaai i talaatu o la'u iloiloga faanatinati ma faataga le Agaga e fesoasoani ia ou iloa le mea moni o i lona mafaufau. Sa ia manaomia a'u ia ou vaai sa'o atu ia te ia ma ofo atu se mafuaaga i le faamoemoe. Nai lo lena, sa pei au o



se polo tele e tu'imomomo ma faataumaoia ai. Sa aoao lenei faifeau lototoa e faiatou ma avea ai ma se soo mama a'ia'i o Iesu Keriso. Sa ia faapupulaina o'u mata i upu a le Alii: "Aua e le vaai Ieova pei o le vaai o tagata; aua e vaai tagata i le tino, a e vaai Ieova i le loto" (1 Samuelu 16:7).

O se faamanuiaaga lava pe a faalau-tele e le Agaga o le Alii lo tatou vaaiga. Manatua le perofeta o Elisaia, o le na ala a'e ma vaaia le autau a Suria ua si'oina lona aai i a latou solofanua ma kariota? Sa fefe lana auauna tane ma sa fesili ia Elisaia po o le a se mea latou te faia i lenei mea uiga ese. Sa ta'u atu e Elisaia ia te ia i upu e le galu e aua le popole: "Aua e te fefe aua e toatele ua ia te i tatou i e ua ia te i latou" (2 Tupu 6:16). Sa le iloa e le auauna le mea sa talanoa atu ai le perofeta. Sa le mafai ona ia vaavaai i talaatu o le mea sa mafai ona ia vaai i ai. Peitai, sa vaaia e Elisaia 'au o agelu sa sauniuni e tau mo le nuu o le perofeta. O lea, sa tatalo ai Elisaia i le Alii ina ia faapupula mata o le taulealea, "faauta foi ua tumu le mauga i solofanua ma kariota afi ua latou vagavagaia Elisaia" (2 Tupu 6:17).

E tele ina tatou faaesea i tatou mai i isi ona o eseesega tatou te vaai i ai. Ua

lagona le toafimalie i le i ai faatasi ma i latou o e mafaufau, talanoa, oofu, ma amio e pei o i tatou, ma e le maua ni lagona lelei ma i latou o e ese tulaga ma talaaga e o mai ai. O le mea moni, pe le eseeese uma ea atunu tatou te o mai ai ma eseeese foi a tatou gagana? Pe tatou te le o vaai uma atu ea i le lalolagi e ui i tuaoi tetele o o tatou lava aafiaga i le olaga? O nisi e vaai ma tautatala ma mata faaleagaga, e pei o le perofeta o Elisaia, a o nisi e vaai ma talanoa atu ma mata faaletino e pei ona ou oo i ai ma la'u faifeautalai e lei iloa faiatatusi.

Ua tatou ola i se lalolagi ua fia-fia e faatusatusa, faitio, va'ilili masei, ma faipona. Nai lo le vaai atu mai manatu o ala faasalalau faaagafesootai, e manaomia ona tatou vaavaai ifo i totonu mo uiga paia faaleatua lea tatou te tofu aia i ai. O nei uiga auaumama faaleatua ma faanaunauga e le mafai ona maua fua mai i le Pinterest pe tuu i le Instagram.

Ina ia talia ma alofa i isi e le faapea e tatau ona tatou taliaina o latou manatu. O le mea moni, o le upumoni e faatautaia lo tatou lotonuu aupito maualuga e ui e le tatau ona avea o se papupuni i le agalelei. O le alofa moni

i isi e manaomia ai le taliaina pea o taumafaiga silisili a tagata atonu tatou te le iloaina atoatoa o latou aafiaga o le olaga ma o latou tuaoi. O le vaavaai i talaatu o mea e mafai ona tatou vaai i ai e manaomia ai le taulai maua'i atu i le Faaola.

I le aso 28 Me, 2016, sa i ai Beau Richie e 16 ona tausaga ma lana uo o Austin i se faatoaga a le aiga i Colorado. Sa tulioso Beau ma Austin i a la taavale mamanu faapitoa mo ala gaoa, ma le sagisagi atu mo se aso o fatufatuga. E lei mamao se mea ua oo i ai ae fetaiai ma ni tulaga matautia, o iina na tupu ai se faalavelave matuia. O le taavale na aveina e Beau na mafuli faafuasei, ma taomia ai Beau i lalo i le silia ma le 400 pauna (180 kg) o uamea ma le afi vevela. Ina ua taunu atu Austin le uo a Beau ia te ia, sa ia vaaia Beau o tauivi mo lona ola. Ma lona malosi atoa, sa ia taumafai e fuliese le taavale mai lana uo. Sa le'i migoi. Sa ia tatalo mo Beau ona tamoe faanatinati atu lea mo se fesoasoani. Sa taunu mai tagata mo faalavelave faafuasei, peitai, i ni nai itula mulimuli ane, sa maliu Beau. Sa faamaloloina o ia mai lenei olaga.

Sa taunu ane ona matua lotonutimomoia. A o tutu ai i la'ua i se falemai laitiiti faatasi ma le uo pele a Beau ma tagata o le aiga, sa ulufale atu se leoleo i le potu ma tuu atu le telefoni a Beau i lona tina. A o tago atu o ia i le telefoni, sa ee se faailoilo o le telefoni. Sa ia tatala le telefoni ma vaaia ai le faailoilo a Beau mo aso taitasi. Sa ia faiatina leotole le feau sa seti e lana tama talavou e agamalie ma fatufatui, na te faiatina i aso taitasi. Sa faapea mai, "Manatua e tuu Iesu Keriso i le totonugalemu o lou olaga i le asō."

O le taulai atu o Beau i lona Togiola e lei faaitiitia ai le faanoanoa o e pele ia te ia i lona toesea. Ae, na tuu atu ai le faamoemoega sili ma le uiga i le olaga o Beau ma filifiliga o le olaga. Ua mafai ai e lona aiga ma uo ona vaavaai i talaatu o le faanoanoa o lona maliu talavou i le olioli moni o le olaga a sau. Sa o se alofa mutimutivale mo matua o Beau le vaai atu e ala i mata o lo la'ua atalii le mea e sili ona taua.



I le avea ai ma tagata o le Ekalesia, ua tuuina mai ia i tatou ni faailoilo patino faaleagaga e lapataia i tatou pe a tatou vaavaai atu na o mata faaletino i lo tatou faaolataga. O le faamanatuga o la tatou faamanatu faalevaiaso lea ia faaaaua ona taulai atu ia Iesu Keriso ina ia tatou manatua pea o Ia ma maua Lona Agaga e faatasi ma i tatou (tagai MF&F 20:77). Ae, o nisi taimi tatou te le amanaiaina nei lagona o le faamanatua ma le faailoilo. A faatotonugalemuina Iesu Keriso i o tatou olaga, ona Ia faia lea ia tatala o tatou mata i avanoa tetele atu nai lo na o i tatou e mafai ona malamalama ai.

Sa ou maua se tusi malie e uiga i se faailoilo e puipui ai, sa iloa e se tuafafine faamaoni. Sa ia ta'u mai ia te au i se taumafaiga e fesoasoani i lona toalua ia malamalama i ona lagona, sa amata ona faia se lisi faaeletonika i lana telefoni, o mea sa faia pe tautala ai lona toalua sa ita ai o ia. Sa ia mafaufau a oo i le taimi sa'o, o le a ia tuufaatasia se faamaoniga tusitusia e mafai ona ia faasoa atu i ai, ma sa ia manatu o le a manao ai lana tane e suia ona ala. Peitai, i se tasi Aso Sa a o taumafa ma inu i le faamanatuga ma taulai atu i le Togiola a le Faaola, sa ia iloa o le tusi-faamaumauga o ona lagona le lelei e uiga i lana tane sa aveesea moni ai lava le Agaga mai ia te ia ma o le a le suaia ai lava [lana tane].

Sa ee se faailoilo faaleagaga i lona loto ma faapea mai: "Aveese; aveese uma. Tape na faamanatua. E le aoga." Ona ia tusia lea, ma ou te faitauina: "Sa umi se taimi o tau ta le 'filifili uma' ma sa sili ona umi ona tau ta le 'tapeese.' Ae ina ua ou faia, sa galoma atu i le vateatea na lagona le lelei uma. Sa faatumulia lo'u loto i le alofa—alofo i lo'u toalua ma le Alii." E faapei o Saulo i le ala i Tamaseko, sa suaia lana vaaiga mamaao. Sa paau ese mai una o le tau-faasese mai ona mata.

Sa tele taimi na faapupula ai e le Faaola mata o e na tauaso faaletino ma faaleagaga. O le tatalaina o o tatou mata i upumoni faalelagi, e saunaia moni ai i tatou ina ia faamaloloina mai le punitia o la tatou vaai. Pe a tatou gauai atu i "faailoilo" faaleagaga lea e



faailo mai ai se manaomia o le faa-s'aoga o le ala po o se vaaiga e tele atu mo le faavavau, ua tatou maua le folafolaga o le faamanatuga ia maua Lona Agaga e faatasi ma i tatou. Sa tupu lenei mea ia Iosefa Samita ma Oliva Kaotui i le Malumalu o Katedani ina ua aoao mai ni upumoni ofoofogia e Iesu Keriso, o le na folafola mai "o le veli" o le faamasino le tonu ma tuaoi faaletino o le a "aveesea mai [o la'ua] mafaufau, ma o le a tatalaina mata o lo [la'ua] malamalama" (MF&F 110:1).

Ou te molimau atu o le mana o Iesu Keriso, e mafai ai ona tatou vaavaai

faaleagaga i talaatu o mea tatou te vaitino i ai. A tatou "manatua o Ia ma maua Lona Agaga e faatasi ma i tatou, o le a tatala o tatou mata o le malamalama. Ona atili ai lea ona uunaia ma le mamana i luga o o tatou loto le moni silisili o le paia faalelagi i totolu o i tatou uma taitoatasi. I le suafa, o Iesu Keriso, amene. ■

FAAMATALAGA

1. Mai le *The Lion King 1½* (2004); outside North America, known as *The Lion King 3: Hakuna Matata*.
2. *Aoaoga a Peresitene o le Ekalesia: Gordon B. Hinckley* (2016), 74.



Saunia e Peresitene Henry B. Eyring
Fesoasoani Muamua i le Au Peresitene Sili

Aua le Fefe e Fai Mea Lelei

Ua ta'u mai e le Alii ia i tatou a tatou tutu ma le faatuatua i luga o Lana papa, e faaitiitia le masalosalo ma le fefe; ae faateleina le manao e fai le lelei.

O'u uso e ma tuafafine pele, ou te tatalo faamaualalo ia faatasi mai le Agaga o le Alii ma i tatou a o ou lauga atu i le asō. Ua tumu lo'u loto i le faafetai i le Alii, le ana le Ekalesia lenei, mo le musumusuga ua tatou lagonaina i tatalo faatauanau, o lauga musuia, ma pesega a agelu i lenei konafesi.

Ia Aperila talu ai, sa tuu mai ai e Peresitene Thomas S. Monson se savali na gaepu ai loto i le lalolagi atoa, e aofia ai ma a'u. Sa ia saunoa e uiga i le mana o le Tusi a Mamona. Sa ia unaia i tatou e suesue, mananu natu loloto, ma faaaoga ona aoaoga. Sa ia folafola mai afai tatou te tuuto atu taimi i aso taitasi e suesue ai ma mafaufau loloto ma tausi poloaiga o loo i ai i le Tusi a Mamona, o le a tatou maua se molimau taua e uiga i lona moni, atoa ma le molimau tauia o le Keriso soifua o le a fesoasoani ia i tatou i le saogalemu i taimi o faigata. (Tagai "O Le Mana o le Tusi a Mamona," *Liahona*, Me 2017, 86–87.)

E pei o le toatele o outou, sa ou faafologo i upu a perofeta o le siufogfa foi lea o le Alii ia te a'u. Ma, e pei foi o le

toatele o outou, sa ou filifili e usitai i na upu. Ia, talu mai lava lo'u tamaitiiti, sa ou lagona ai lava le molimau o le Tusi a Mamona o le afioga a le Atua, o le Tama ma le Alo na faaali mai ma fatalai mai ia Iosefa Samita, ma o Apostolo anamua na o ifo i le Perofeta o Iosefa e toefuatai mai ki o le perisitua i le Ekalesia a le Alii.

I lena molimau, ua ou faitauina ai lava le Tusi a Mamona i aso uma mo le silia ma le 50 tausaga. E masalo la e tonu lava lo'u manatu o upu a Peresitene Monson e faataatau i se isi tagata. Ae, e pei o le toatele o outou, sa ou lagonaina le faamalosiauga a le perofeta ma o lana folafolaga ua valaaulia ai a'u e fai se taumafaiga sili atu. E toatele outou ua faia le mea na ou faia: tatalo ma le faamoemoega faateleina, mafaufau loloto ma le naunautai atili i tusitusiga paia, ma taumafai malosi atili e auauna atu i le Alii ma isi mo Ia.

O le taunuuga fafia mo a'u, ma mo le toatele o outou, o le mea lea na folafola mai e le perofeta. O i latou na teufatua i le loto lana fautuaga, ua lagonaina manino atili le Agaga. Ua tatou mauaina se mana tele atu e tetee atu ai i le faaososoga ma lagonaina le faatuatua tele atu i se Iesu Keriso toetu, i Lana talalelei, ma i Lana Ekalesia ola.

I se vaitau o le faateteleina o le vāvāō i le lalolagi, o na mea ua faateleina i le molimau ua tafisea ai le masalosalo ma le fefe ma aumai ai ia i tatou lagona o le filemu. O le usitai i le fautuaga a Peresitene Monson ua maua ai isi aafiaga matagofie e lua mo a'u: Muamua, o le Agaga na ia folafola mai ua maua ai se lagona o le faamoemoe e uiga i mea o loo i luma atu, e tusa lava pe foliga mai ua faateleina le vāvāō i le lalolagi. Ma le, lona lua, ua foai mai e le



Alii ia te a'u—ma oe—se lagona sili atu o Lona alofa mo i latou e lofituina. Ua tatou lagonaina se faatelega o le manao e o atu e laveai mai isi. O lena manao sa i ai lava i le totongalemu o le auau-naga ma aoaoga a Peresitene Monson.

Na folafola mai e le Alii le alofa mo isi ma le lototele i le Perofeta o Iosefa Samita ma Oliva Kaotui ina ua foliga mai sa lofituina galuega sa i o laua luma atu. Sa fetalai mai le Alii o lena lototele manaomia o le a sau mai lo la faatuatua ia te Ia e fai ma o la papa:

“Aua le fefefe e fai mea lelei, o'u atalii e, auā o soo se mea e te lua lulu, o lena foi o le a oulu seleseleina; o lea, afai lua te luluina le lelei o le a oulu selesele foi le lelei mo o oulu taui.

“O lea, aua le matatau, le lafu ititi e; fai mea lelei; ia tuu le lalolagi ma seoli e aufaatasi faasaga mai ia te oulu, auā afai ua lua atia'e i luga o la'u papa, e lē mafai ona latou manumalo.

“Faauta, ou te lē tausalaina oulu; ō i o oulu ala ma ia lē toe agasala; fai ma le mamalu le galuega ua Ou poloaina ai oulu.

“Vaai mai ia te a'u i mafaufauga uma; aua le masalosalo, aua le fefefe.

“Matau i manu'a ua tuia ai lo'u itu, ma tulaga fao foi i o'u lima ma o'u vae; ia faamaoni, tausi i a'u poloaiga, ma o le a oulu mautofai ai i le malo o le lagi” (MF&F 6:33–37).

Na ta'u mai e le Alii i Ona taitai o le Toefuataiga, ma ua Ia ta'u mai foi ia i tatou, a tatou tutu ma le faatuatua i luga o Lana papa, e faaititia le masalosalo ma le fefe; ae faateleina le manao e fai le lelei. A tatou taliaina le valaaulia a Peresitene Monson e toto i o tatou loto se molimau ia Iesu Keriso, o le a tatou mauaina le mana, le manao, ma le lototele e o atu ai e laveai mai isi e aunoa ma le popole mo o tatou lava manaoga.

Ua ou vaiai lena faatuatua ma le lototele i le tele o taimi pe a feagai le Au Paia faatuatua o Aso e Gata Ai ma tofotofoga taufaamatau. Mo se tasi faataitaiga, sa ou i ai i Idaho i le taimi na pa ai le Faatanoavai o Teton i le aso 5 o Iuni, 1976. Sa solo i lalo le puipui o le faatanoa. E faitau afe na sosola ese mai o latou fale. E faitau afe fale ma



pisinisi na faaleagaina. O se vavega lava, e itiiti ifo ma le 15 tagata na fasiotia ai.

O le mea na ou vaiai iina, sa ou vaiai o soo se taimi lava e tu mausali ai le Au Paia o Aso e Gata Ai i luga o le papa o se molimau ia Iesu Keriso. Ona latou te le masalosalo o loo Ia leoleo i latou, latou te le fefefe ai lava. Latou te le amanaiaina o latou lava tofotofoga ae o atu mo le toomaga o isi. Ma e latou te faia lea mea ona o le alofa mo le Alii, e le fesili lava mo se taui.

Mo se faataitaiga, i le taimi na pa ai le Faatanoavai o Teton, sa malaga se ulugalii o le Au Paia o Aso e Gata Ai, i le tele o maila mai lo la aiga. Ae o le taimi lava na la faalogo ai i le tala i luga o le leitio, sa la toefoi vave atu i Rexburg. Nai lo le o atu i lo la fale e vaai pe ua faaleagaina, sa la o atu e

su'e le la epikopo. Sa i ai o ia i totonu o se fale sa faaaogaina e fai ma nofoaga autu o le sulufaiga. Sa fesoasoani o ia e faatonutonu le faitau afe o volenitia sa taunu atu i pasi aoga sasama.

Sa savavali atu le ulugalii i le epikopo ma faapea atu, “O lea faato'a ma taunu mai. Epikopo, o fea ma te o e fesoasoani ai?” Sa ia tuu atu ia i laua igoa o se aiga. Sa nonofo lena ulugalii e asu ese le palapala ma le vai mai lea fale i lea fale. Sa la galulue mai le tatafa o ata seja po mo le tele o aso. Mulimuli ane sa faia se la malologa ma o ai e vaai lo laua lava ia fale. Ua leai ma se fale i le lolo, leai ma se mea o totoe e faamama. O lea sa la toe liliu vave atu ai e toe o atu i lo la epikopo. Sa la fesili atu, “Epikopo, o i ai se tasi ma te fesoasoani i ai?”

O lena vavega o le lototele ma le alofa mama leleoa—le alofa le ponā o Keriso—o loo tupu peā i le aluga o tausaga ma i le lalolagi atoa. Sa tupu i aso matautia o sauaga ma tofotofoga i le taimi o le Perofeta o Iosefa Samita i Misuri. Sa tupu a o taitaia e Polika Iaga le malaga mai Navu ona valaau atu lea i le Au Paia e o mai i nofoaga toafa i le itu i sisifo atoa o le Iunaite Setete, e fesoasoani i le tasi ma le isi e faatu Siona mo le Alii.

Afai e te faiatū i tusiga i apitalaaga a na paionia, e te vaiai ai le vavega o le faatuatua na tafiesea le masalosalo ma le fefe. Ma e te faiatū i le Au Paia na tuua mea na latou fiafia i ai ina ia fesoasoani atu i se isi tagata mo le Alii, a o lei toe foi atu i a latou lava mamoe po o a latou lava fanua e lei suaina.

Sa ou vaaia lena lava vavega e tasi i ni nai aso talu ai i faatafunaga a le Afa o Irma i Puerto Rico, Saint Thomas, ma Florida lea e faipaaga ai le Au Paia o Aso e Gata Ai ma isi ekalesia, vaega faalenuu i le lotoifale, ma faalapotopotoga faavaomalo e amata taumafaiga faamama.

E pei o a'u uo i Rexburg, o se tasi ulugalii i Florida e le auai i le ekalesia sa taulai atu e fesoasoani i le nuu nai lo le galulue i lo laua lava fanua. Ina ua ofo atu e nisi o tuaoi o le Au Paia o Aso e Gata Ai le fesoasoani e aveese ni laau tetele se lua na pauu i lo la auala, sa faamalamalama mai e le ulugalii sa lofituina lava i laua o lea sa la liliu atu ai e fesoasoani i isi, ma le faatuatua o le a saunia e le Alii le fesoasoani la te manaomiaina i lo la fale. Ona faasoa mai lea e le tane lena mea i luma o tagata o le tatou Ekalesia na tauuu atu ma ofo atu le fesoasoani, sa tatalo le ulugalii. Sa la mauaina se tali o le a oo mai le fesoasoani. Sa oo mai i totolu o ni itula o lena faamautinoaga.

Na ou faalogo i se lipoti o nisi na amata faaigoaina le Au Paia o Aso e Gata Ai o loo ofuina le mitiafu sasama Lima Fesoasoani “O Agelu Sasama.” Sa ave e se tasi o le Au Paia o Aso e Gata Ai lana taavale i totolu e siaki, ma sa faamatala e le alii sa fesoasoani ia te ia le “aaifiaga faaleagaga” na ia maua ina ua aveesea e tagata i mitiafu sasama ia

laau mai lona fanua ona ia fai mai lea, sa latou “usuina se pese ia te a'u e uiga i le avea ma se atalii o le Atua.”

O le isi tagatanuu o Florida—e le o se tasi foi o le tatou faatuatua—sa faamatala mai sa o atu le Au Paia o Aso e Gata Ai i lona fale a o galue o ia i lona fanua na faaleagaina ma sa lagona le lofituina, mamafatū o le avega, ma sa toetoe lava a tagi. I ana lava upu, sa fai mai ai na fatua'i e volenititia “se vavega mamana.” Sa lei gata na latou auauna atu ma le filiga ae faatasi ma le ata ma laumata fiafia, ma le le taliaina o se taui.

Sa ou vaaia lena filiga ma faalogo atu i lena ata i le tauafiafi o se Aso Toonai, sa ou asia ai se vaega o le Au Paia o Aso e Gata Ai i Florida. Sa taofi e volenititia a latou galuega faamama mo sinā taimi ina ia ou faatalofa atu ai i nisi o i latou. Sa latou fai mai e 90 tagata o le latou siteki i Georgia sa faia se fuafuaga e auai atu i le laveai i Florida i le po na muamua atu.

Sa latou tuua Georgia i le 4 i le vaveao, ma tietie atu mo le tele o itula, galulue i le aso atoa, alu ai ma le po, ma fuafua e toe galulue foi i le aso e sosoo ai.

Sa latou faamatalaina uma i ni ataata ma le agamalie lelei. Sa na o le pau le popolega sa ou lagonaina o lo latou mananao lea ia taofi le faafetai atu ina ia mafai ona faaauau ona galulue. Sa toe faaola le iliafi a le peresitene o le siteki ma sa galue i se laau na pa'u ma sa la'u ese e se epikopo ni lala laau a o matou feosofi i totolu o le matou taavale e o atu i le isi vaega laveai.

Na muamua atu i lena aso, a o matou o ese atu mai le isi nofoaga, sa savali mai se alii i le taavale, aveese lona pulou, ma faafetai mai ia i matou mo le au volenititia. Fai mai o ia, “E le o a'u o se tagata o le tou lotu. Ou te le talitonu i mea ua outou faia mo i tatou. Ia faamanua le Atua ia te outou.” O le volenititia Mamona sa tu i ona talaane sa ataata ma faamimigi ona tauau, e pei e le onomea se viiga ia te ia.

A o mai ai volenititia mai Georgia e fesoasoani i lenei tamaloa na maofa, e faiatū selau le Au Paia o Aso e Gata Ai mai lena lava vaega na faaleagaina

o Florida na malaga atu i le faiatū selau o maila i se isi nofoaga i Florida na latou faalogo sa sili atu ona faatau-maoia ai tagata.

I lena aso, sa ou manatua ai, ma malamalamā atili, i upu faavavega a le Perofeta o Iosefa Samita: “O se tagata e faatumulua i le alofa o le Atua, e le faamalieina i le faamanuiaina na o lona aiga, ae oo atu i le lalolagi atoa le naunau ia faamanuiaina le fanauga uma a tagata” (*Aoaoga a Peresitene o le Ekalesia: Iosefa Samita* [2007], 426).

O loo tatou vaaia lea ituiga o alofa i olaga o le Au Paia o Aso e Gata Ai i soō se mea. O taimi uma e i ai se faalavē-lave matautia i soō se mea i le lalolagi, e foai atu ma ofofua atu le Au Paia o Aso e Gata Ai i taumafaiga o galuega alofa a le Ekalesia. O se talosaga mo volenititia e le tau manaomiaina. O le mea moni, o nisi taimi, e tatau ona matou talosagaina i latou o le a volenititia e faatali e aua le malaga i le nofoaga o loo tautapena seja oo ina saunia i latou o loo taitaia le galuega e talia i latou.

O le manao ia faamanua atu o le fua lea o tagata e mauaina se molimau ia Iesu Keriso, o Lana talalelei, Lana Ekalesia toefuataiina, ma Lana perofeta. O le mafuaaga lena e le masalosalo ai ma lē fefefe tagata o le Alii. O le mafuaaga lena e volenititia ai faifeautalai mo auauanaga i tulu'iga uma o le lalolagi. O le mafuaaga lena e tatalo ai matua faatasi ma a latou fanau mo isi. O le mafuaaga lena e lu'i ai e taitai a latou



talavou e teufatu i le loto le talosaga a Peresitene Monson ia faatofuina i latou lava i le Tusi a Mamona. E oo mai le fua lea, e le ona e faamalosia e taitai ae ona e ala i le faatinoina e talavou ma le au paia o le faatuatua. O lena faatuatua e faatino—lea e manaomia ai osigataulaga le manatu faapito—e aumaia le suiga o le loto e faatagaina ai i latou e lagonaina le alofa o le Atua.

Peitai, e na o le pau le mea e faatumauina le suia o o tatou loto pe afai e faaauau pea ona tatou mulimuli i le fautuaga a le perofeta. Afai tatou te tuu le taumafai pe a uma se taumafaiga tele, o le a mou atu le suiga.

Ua faateleina e le Au Paia o Aso e Gata Ai faamaoni lo latou faatuatua i le Alii o Iesu Keriso, i le Tusi a Mamona o le afioga a le Atua, ma i le toefuataiga o ki o le perisita i Lana Ekalesia moni. O lena molimau faateleina ua tatou maua ai se lototele sili atu ma le popole mo isi o fanau a le Atua. Ae o luitau ma avanoa i luma atu o le a manaomia ai nisi mea se tele.

E le mafai ona tatou muai vaaia ni auiiliiga, ae ua tatou iloa lava le ata tele atu. Ua tatou iloa i aso amuli, o le a i ai le lalolagi i le vāvāō. Ua tatou iloa i le lotolotoi o soo se faafitauli e oo mai, o le a i ai lava le Alii e taitai le Au Paia faamaoni o Aso e Gata Ai e avatu le talalelei a Iesu Keriso i atunuuma, ituaiga, gagana, ma tagata. Ma ua tatou iloa o le a agavaa soo moni o le Alii ma saunia e talia o Ia pe a toe afio mai o Ia. E le tatau ona tatou fefefe.

O lea, i le tele o mea ua tatou faisiaina ai le faatuatua ma le lototele i o tatou loto, ua faamoemoeina ai e le Alii le tele o mea mai ia i tatou—faapea ai ma augatupulaga pe a mavae i tatou. E manaomia ona latou malolosi atu ma lotototoa atili ona o le a latou faia ni mea tetele atu ma faigata atu nai lo mea ua tatou faia. Ma o le a latou feagai ma le faateteleina o le tete mai o le fili o o tatou agaga.

O le ala i le faamoemoe a o tatou agai pea i luma sa tuuina mai e le Alii: “Vai mai ia te a’u i mafauauga uma; aua le masalosalo, aua le fefefe” (MF&F 6:36). Sa ta’u mai e Peresitene Monson ia i tatou le auala e faia ai lena mea.



E ao ona tatou mafaufau loloto ma faaaoga le Tusi a Mamona ma upu a perofeta. Tatalo e le aunoa. Ia talitonu. Auauna atu i le Alii ma o tatou loto atoa, manatu, mafaufau, ma le malosi atoa. E ao ona tatou tatalo ma le malosi atoa o o tatou loto mo le meaalofa o le alofa mama, le alofa le pona o Keriso (tagai Moronae 7:47–48). Ma e sili i lo mea uma, e ao ona tatou tumau ma mausali i le mulimultaia o fautuaga faaperofeta.

A faigata le ala, e mafai ona tatou faalagolago atu i le folafolaga a le Alii—le folafolaga lea na faamanatu mai e Peresitene Monson ia i tatou lea e masani ona ia sii maia ai le fetalaiga lenei a le Faaola: “Ma ai se na te talia outou, o iina o le a Ou i ai foi, ona o le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo’u Agaga i o outou loto, ma si’o faataamilo outou e a’u agelu, e sapasapai outou i luga” (MF&F 84:88).

Ou te molimau atu e muamua atu le Alii i o outou luma i soo se taimi lava tou te i ai i Lana feau. O nisi taimi o le a avea ai oe ma le agelu e auina atu e le Alii e sapasapai i luga isi. O nisi taimi o le a avea ai oe ma lē e siosiomia e

agelu e sapasapaia i luga oe. Ae o le a e maua pea Lona Agaga e afio i lou loto, e pei ona folafola atu ia te oe i sauniga faamanatuga uma. Pau lava le mea o lou tausi i Ana poloaiga.

O loo i luma atu aso e sili ona lelei mo le malo o le Atua i le lalolagi. O mea faafeagai o le a faamalosia ai lo tatou faatuatua ia Iesu Keriso, e pei foi ona sa i ai talu mai aso o le Perofeta o Iosefa Samita. E faatoilalo e le faatuatua i taimi uma le fefe. O le tutu faatasi e tupu mai ai le lotogatasi. Ma o au tatalo mo i latou e mafatia e faafogaina ma taliina e se Atua alofa. E le tulemoe o Ia e le moe lava o Ia.

Ou te molimau atu o loo soifua le Atua le Tama ma e finagalo ia te oe e foi atu i le aiga ia te Ia. O le Ekalesia moni lenei a Iesu Keriso. E silafia e Ia oe, e alofa o Ia ia te oe, ma o loo leoleo o Ia ia te oe. Sa Ia togiola mo au agasala ma a’u agasala ma agasala a fanau uma a le Tama Faalelagi. O lou mulimuli ia te Ia i lou olaga ma au auaunaga i isi, e na o le pau lena o le ala i le ola e faavavau.

Ou te molimau atu ai ma tuu atu la’u faamanuiaga ma lo’u alofa. I le suaifa paia o Iesu Keriso, amene. ■



Sauniga i le Afiafi o le Aso Sa | 1 Oketopa, 2017

Saunia e Elder M. Russell Ballard

O Le Korama a Aposetolo e Toasefululua

E Faaauau Pea Le Savaliga!

O le savaliga e toe foi atu i lo tatou Tama Faalelagi o se savaliga taua tele i o tatou olaga.

O le selau fitusefulu tausaga talu ai, sa tagatagai atu ai Polika Iaga i le Vanu o Sate Leki mo le uluai taimi ma tautino atu, "O le nofoaga tonu leneil"¹ Na ia iloa le nofoaga aua sa faaali e le Alii ia te ia.

E oo atu i le 1869 ua silia ma le 70,000 le Au Paia ua faia lea lava savaliga e tasi. E ui i le tele o o latou eseesege i le gagana, aganuu, ma tulaganuu, sa latou faasoaina se molimau i le Tama, le Alo, ma le Agaga Paia, o le Toefuataiga o le talalelei a Iesu Keriso, ma se manao e fausia Siona—o se nofoaga o le filemu, fiafia, ma le matagofie e sauniuni ai mo le Afio Mai Faalu o le Faaola.

Na i ai faatasi ma na uluai Au Paia ia na taunu i Iuta ia Jane Manning James—o le afafine o se pologa ua faasaoloto, o se tagata liliu mai i le Ekalesia toefuataiina, ma se soo mataina o le na fetaimai ni luitau faigata. Sa tumau faamaoni Sister James o se tagata o le Au Paia o Aso e Gata Ai seia oo i lona maliu i le 1908.

Na ia tusia: "Ou te fia tau atu ii, o lo'u faatuatua i le talalelei a Iesu Keriso, e pei ona aoaoina e Le Ekalesia a Iesu Keriso o le Au Paia o Aso e Gata Ai,

e tutusa lava le malosi i le asō, leai, atonu, ua malosi atu nai lo le aso na ou muai papatiso ai. Ou te totogiina a'u sefuluai ma taulaga, tausia le upu o le poto, ou te vave moe ma vave ala, ou te taumafai i o'u auala vaivai e seti se faataitaiga lelei i tagata uma."²

O Sister James, e pei o le toatele o isi Au Paia o Aso e Gata Ai, e le gata na



Sa tumau ai Jane Manning James o se Au Paia o Aso e Gata Ai e ui i luitau faigata.

fausia Siona i le toto, afu, ma loimata ae sa sailia foi ia faamanuiaga a le Alii e ala i le ola ai i mataupu faavae o le talalelei i le mea sili na te mafaia a o tumau ai i le faatuatua ia Iesu Keriso—o le fomai sili mo tagata uma o e sailia ma le faamaoni o Ia.

O le Au Paia anamua sa le atoatoa, peitai sa latou faatulagaina se faavae lea ua tatou fausia ai aiga ma se lalolagi e fiafia ma osia ia feagaiga, lea ua faamamafaina i tala fou eseese i le salafa o le lalolagi ona o la tatou tautinoga ia Iesu Keriso ma a tatou taumafaiga ofo fua atu e fesoasoani ia i latou o e lata mai ma mamao ese atu.³

Peresitene Eyring, sei ou faaopoopo atu i lau faamamaluga le agaga talisapaia i le faitau sefulu afe o agelu mitiafu samasama loo auauna atu i Texas, Mekisiko, ma isi nofoaga.

E i ai sou talitonuga loloto afai e aveesea o tatou sootaga ma i latou o e ua muamua atu ia i tatou, e aofia ai o tatou augatama ma augatina paionia, o le a aveesea mai ia i tatou se oa tawa. Na ou talanoa e uiga i le "Faatuatua i Tulaga Aoao Uma" i le tuanai ma o le a faaaauau pea i le lumanai ona ua ou iloa e tatau ona maua e le tupulaga faiae lea lava ituaiga o faatuatua sa i ai i le Au Paia anamua e uiga i le Alii o Iesu Keriso ma Lana talalelei toefuataiina.⁴

Sa i ai faatasi foi ou augatama ma augatina paionia ma na paionia faamaoni o e na tuleia taavale tosolima, tietie i taavale solofanua, ma savaval i Iuta. Sa ia i latou, e pei o Sister Jane Manning James, le faatuatua loloto i o latou tulagavae a o latou faia se latou lava savaliga.

Ua faatumulia a latou api o talaga i faamatalaga o faigata, fiaaai, ma gasegase atoa ai ma molimau o lo latou faatuatua i le Atua ma le talalelei toefuataiina a Iesu Keriso.

Na i ai ni a latou oloa faalelalolagi ae sa fiafia i le tele o faamanuiaga mai le tulaga faaleusoga o alii ma tamaitai sa latou mauaina i le Ekalesia a Iesu Keriso. Pe a mafai ona latou faia, latou te siitia ae e ua lotovaivai ma faamania i e ua mamai e ala i le auaunaga a le tasi i le isi ma e ala i le perisitua a le Atua.

O tuafafine sa i ai i le Vanu o Cache, Iuta, na auauna atu i le Au Paia i le agaga o le Aualofa ina ia "galulue ma le lotogatasi ma fesoasoani ia i latou e le tagolima."⁵ O le tina o lo'u tina matua o Margaret McNeil Ballard sa ia auauna soosootauau ma lana tane, o Henry, a o ia pulefaamalumalu ai o se epikopo i le Uarota Lua a Logan mo le 40 tausaga. Sa avea Margaret ma peresitene o le Aualofa mo le 30 o na tausaga. Sa ia aveina atu i lo latou fale e matitiva, mamai, fafine ua oti a latou tane ma tamaiti ua matua oti, ma sa ia faalaeiina i latou ua maliliu i o latou laei mama o le malumalu.

E ui e talafeagai ma taua le man tua o le savaliga faasolopito a paionia Mamona i le seneturi lona 19, ae e manaomia le tatou manatuaina o "loo faaauau pea le savaliga i le olaga" mo i tatou taitasi a o tatou faamaonia atu lo tatou lava "faatuatua i tulaga aaoa uma."

E le o toe potopoto ia tagata fou liliu mai i nofoaga o paionia i sisifo o le Iunaite Setete. Ae, ua potopoto tagata liliu mai i a latou faapotopotoga i le lotoifale, lea e tapuai ai le Au Paia i lo tatou Tama Faalelagi i le suafa o Iesu Keriso. Ma le silia ma le 30,000 faapotopotoga ua faatuina i le salafa o le lalolagi, ua tatou potopoto i la tatou lava Siona. E pei ona taua i tusitusiga paia, "O Siona lenei—o e ua loto mama."⁶

A o tatou savalia le ala o le olaga, ua tofotofoina i tatou e vaavaai atu pe o le a tatou "vaai [ua] fai mea uma o soo se mea ua poloaiina ai o ia [e le Alii]."⁷

O le toatele o i tatou o loo faia ni malaga ofoofogia o le sailiga—e taitai atu ai i le faamalieina patino ma le faamalamalamaaina faaleagaga. Ae, o nisi o i tatou, o loo i ai i se savaliga lea e taitai atu ai i le faanoanoa, agasala, ita, ma le faavauvau.

I lenei tulaga, faamolemole fesili ifo ia te oe lava: O le a lou taunuuga mulimuli? O fea o aveina atu i ai oe e ou tulagavae? Ma o taitai atu oe e lau faigamalaga i lena "faatelega o manuia" ua folafola mai e le Faaola?⁸

O le savaliga e toe foi atu i lo tatou Tama Faalelagi o se savaliga taua tele i o tatou olaga, ma e faaauau pea i aso taitasi, vaiaso taitasi, masina taitasi, ma



tausaga taitasi a o faateleina lo tatou faatuatua ia te Ia ma i Lona Alo Pele, o Iesu Keriso.

E ao ona tatou faaeteete i le mea e aveina atu i ai i tatou e o tatou tulagavae i le olaga. E ao ona tatou mataala ma faalogo i le fautuaga a Iesu i Ona soo a o Ia tali atu i fesili nei: "Ia e fetalai mai ia te i matou pe oo afea ia mea? pe se a foie le faailoga o lou maliu mai, ma le galuega o le lalolagi?

"Ma sa tali atu Iesu, ma fetalai atu ia te i latou: Ia outou, nei faaseseina outou e se tasi."⁹

I le asō ou te toe taua fautuaga ana-mua mai taitai o le Ekalesia.


- Uso e ma tuafafine, tausi ia mama le aoaoga faavae a Keriso ma aua nei faaseseina e i latou o e sua le aoaoga faavae. O le talalelei a le Tama ma le Alo sa toefuataiina e ala mai ia Iosefa Samita, o le perofeta mo lenei tisipenisione mulimuli.
- Aua nei faalogo ia i latou o e e lei faauuina ma/pe ua vaetofia i o latou valaauga faale-Ekalesia ma ua aloaia

i le finagalo autasi o tagata o le Ekalesia.¹⁰

- Ia nofouta i faalapotopotoga, vaega, po o tagata taitoatasi e faia tali faalilolilo i fesili faaleaoaoga faavae lea latou te fai mai o apostolo ma perofeta o aso nei e le maua pe malamalama.
- Aua nei faalogo atu ia i latou o e faatosinaina outou i gaoioiga e vave ai ona tamaoaiga. Ua tele naua tupe a o tatou tagata ua leiloloa, o lea ia faaeteete ai.

I nisi nofoaga, o le toatele naua o o tatou tagata o loo vaavaai i talaatu o le faailoga ma saili ni atamai faalilolilo i faataitaiga taugata ma fesiligia ia saunia ai ni faamalologa ma le lagolagosua.

O se faamatlagaga aloaia a le Ekalesia, na faasilasila atu i le tausaga ua tea, e faapea: "Matou te uunaia tagata o le Ekalesia ina ia faaeteete i le auai atu i soo se vaega e faia folafлага—faafesuiai mo tupe—faamalologa faavavega pe o faapea mai ua i ai ni metotia faapitoa mo le mauaina o le



mana o le faamalologa i fafo atu o le e umia le perisitua ua faauuina tatau.”¹¹

Ua fautua mai le *Tusitalima* a le Ekalesia: “E le tatau i tagata ona faaaogaina ia faiga faafomai pe faale-soifua maloloina ia e fesiliglia i tulaga o le tonu ma le sao po o le faatulafonoina. E tatau i taitai i le lotoifale ona fautua-ina tagata o le ekalesia o i ai ni faafituli tau le soifua maloloina ina ia vaai ni fomai atamamai ua laiseneina i atunu o loo latou galulue ai.”¹²

Uso e ma tuafafine, Ia atamamai ma mataala ona o na ituaiga o faiga atonu e faatosina faalelagona ae e mafai ona faamaonia mulimuli ane e lamatia ai le faaleagaga ma faaletino.

Mo o tatou augatuaa paionia, o le saoloto ma le ola tutoatasi sa taua tele, ae sa taua foi lo latou lagona faalenuu. Sa latou galulue faatasi ma fesoasoani le tasi i le isi e foia luitau faaletino ma faalelagona o lo latou taimi. Mo alii, sa i ai le korama a le au perisitua, ma o tamaitai na auauna atu

i ai le Aualofa. O nei taunuuga e lei sua lava i o tatou aso.

O le Aualofa ma korama a le au perisitua e saunia mo le soifua laulelei faaleagaga ma faaletino o o tatou tagata.

Tumau i le ala o le talalelei i le mauaina o le “faatuatua i tulaga aoao uma” ina ia mafai ona e toe foi saogalemu atu i le afioaga a le Tama Faalelagi ma le Alii o Iesu Keriso. O le Alii o lo tatou Faaola pele. O Ia o le Togiola o le lalolagi. E tatau ona tatou faamamaluina Lona suafa ma aua nei faaaogaina sese i soo se auala, ma taumafai pea e tauis Ana poloaiga. Afai tatou te faia, o le a Ia faamanuiaina i tatou ma taitai saogalemu atu i tatou i le aiga.

Ou te valaaulia tagata uma o loo lagonaina lo’u leo ina ia talisapaia ma opomauaina soo se tasi o e o loo faia sana lava savaliga i le asō, po o fea lava o latou i ai i la tatau faigamalaga.

Faamolemole ia manatua e leai se faamanuiaga sili atu e mafai e se tasi

ona faasoaina atu nai lo le savali o le Toefuataiga, lea a mauaina ma ola ai, ua folafola mai le olioli ma le filemu tumau—e oo lava i le ola e faavavau. Sei o tatou faaaogaina lo tatou malosiaga, malosi, ma molimau e fesoasoani atu ai i o tatou faifeautalai ina ia saili, aoao atu, ma papatiso le fanau a le Atua ina ia latou maua le mana o le aoaoga faavae o le talalelei e taitai ai o latou olaga i aso taitasi.

E tatau ona tatou taliaina ma le agaalofo fanau a le Atua ma faaitiitua soo se faaituau, e aofia ai le faailogalanu, faailoga tagata, ma le manatu faapito. Ia faapea ona tau atu ua tatou talitonu moni o faamanuiaga o le talalelei toefuataiina a Iesu Keriso e mo fanau uma a le Atua.

Ou te molimau atu o loo “faaauau pea le savaliga,” ma ou te valaaulia outou ina ia tumau ai i le ala o le talalelei a o faaauau pea ona e fetaomi atu i luma i le aapa atu i fanau uma a le Atua i le alofa ma le agalelei ina ia mafai ona tatou faamamaina faatasi o tatou loto ma mama o tatou lima e talia ai le “faatelega o manuia” o loo faatalitali mai mo i latou uma o e alolofa moni i lo tatou Tama Faalelagi ma Lona Alo Pele, lea ou te tatalo atu ai ma le faamaulalo i le suafa o Iesu Keriso, amene. ■

FAAMATALAGA

1. Brigham Young, as remembered by Wilford Woodruff, in *The Utah Pioneers* (1880), 23.
2. Jane Manning James autobiography, ca. 1902, Church History Library, Salt Lake City; see also James Goldberg, “The Autobiography of Jane Manning James,” Dec. 11, 2013, history.lds.org.
3. Tagai, mo se faaitaiga, Jill DiSanto, “Penn Research Shows That Mormons Are Generous and Active in Helping Others,” *Penn News* Apr. 17, 2012.
4. Tagai M. Russell Ballard, “Faith in Every Footstep,” *Ensign*, Nov. 1996, 23–25.
5. “The Purpose of Relief Society,” lds.org/callings/relief-society/purposes; tagai foi *Tusitalima 2: Taitaiina o le Ekalesia* (2010), 9.1.1.
6. Mataupu Faavae ma Feagaiga 97:21.
7. Mataupu Faavae ma Feagaiga 97:25.
8. Mataupu Faavae ma Feagaiga 97:28.
9. Mataio 24:3–4.
10. Tagai Mataupu Faavae ma Feagaiga 26:2; 28:13; 43:6–7.
11. Church spokesman Eric Hawkins, in Daniel Woodruff, “The Business behind Christ-Centered Energy Healing,” Sept. 28, 2016, kutv.com.
12. *Tusitalima 2*, 21.3.6.



Saunia e Tad R. Callister
Peresitene Aoao o le Aoga Sa

○ Le Molimau Mamana a le Atua: ○ Le Tusi a Mamona

O le Tusi a Mamona o le molimau mamana a le Atua i le paia o Iesu Keriso, le valaauga faaperofeta o Iosefa Samita, ma le moni a'i'a'i o lenei Ekalesia.

Le Tusi a Mamona e le gata o le maa'au'au o lo tatou talitonuga faalelotu, peitai e mafai foi ona avea ma maa'au'au o a tatou molimau a oo ai ina tatou fetaiai ma tofotofoga ma fesili e lei taliina, e mafai ai ona faamautuina a tatou molimau. O lenei tusi e tasi e sili atu lona mamafa i le fua o le upumoni, nai lo le mamafa o faitioga uma e faasaga i le tusi. Aisea? Aua afai e moni, o lona uiga o Iosefa Samita o se perofeta ma o le Ekalesia toefuatina lenei a Iesu Keriso, tusa lava pe o a nisi finauga iloga e tetee ai. Ona o lenei le mafuaaga, ua faamoemoe ai le au faitio ia le faamaonia le faapogai paia o le Tusi a Mamona, ae o faafitauli o latou fetaiai e le mafaafoeina aua e moni le tusi nei.

Muamua, o faitioga e tatau ona faamalamalama mai pe na faapefeara e Iosefa Samita, o se tamaititi faifaatoga e 23 tausaga e utiuti sona a'otauina, ona fatuina se tusi e faitau selau igoa ma nofoaga uigaese, faapea foi tala auiliili ma mea na tutupu. Ina ia

mau, e leai se molimau e tasi o faapea na vaai ia Iosefa ma nisi o nei punaoa le faavaea a o lei amataina le faaliliuga.

Tusa lava foi pe na moni lenei mau, e matuai le lava e faamalamalama ai le i ai o le Tusi a Mamona. E tatau lava foi ona tali se tasi i le fesili: Na faapefeara ona faitau e Iosefa nei punaoa le faavaea uma, ilo ese faamatatalaga e le talafeauga, tausia le ogatusa o faamatatalaga pei o ai ma i fea ma pe o anafea, ona faalau atu lea i se manatua atoatoa? Ina o faaliliu Iosefa, sa leai lava ni ana mea tusitusi. O le mea moni, sa toe faamatatala e lona toalua o Ema: "Sa leai ni ana faamaumauga tusitusia po o se tusi e faitau mai ai. . . . A na fai e i ai se mea o nei mea, semanu e le mafai ona ia nanaina mai ia te au."¹

O lea na faapefeara ona faatinino e Iosefa lenei galuega ofoofogia o le faalau atu o se tusi e 500-ma sili atu itulau e aunoa ma ni mea tusitusi? Ina ia faia, atonu e le gata ina o ia o se alii atamai fatufatu ae sa ia te ia foi se manatua maoae le atoatoa sa matuai tulaga ese. Ae afai e moni lenei mea, aisea na le tulimata'i atu ai e lana au faitio lenei taleni ofoofogia?

Ae e i ai se mea e sili atu. O nei finauga sa na o le anotusi faasolopito o le tusi na fataulia. O loo tumau pea faafitauli moni: na faapefeara ona aumaia e Iosefa se tusi e aumaia ai le Agaga, ma o fea na ia maua mai ai nei





aoaoga faavae maoae, o le tele lava ua faamanino ai feteenaiga o talitonuga Kerisiano i lona taimi?

Mo se faataitaiga, o loo aoao mai e le Tusi a Mamona, e ese mai talitonuga o le tele o Kerisiano, e faapea o le Pau o Atamu o se laasaga lelei i luma. Ua ia faaali mai feagaiga na faia i le papatipoga, lea e le o taua i le Tusi Paia.

E le gata i lea, e ono fesili se tasi: o fea na aumai ai e Iosefa le malamalamaaga mamana e faapea o le Togiola a Keriso, e le gata ina mafai ai e Ia ona faamama i tatou ae e faaatoatoaina ai foi i tatou? O fea na ia aumai ai le lauga maoae i le faatuatua oi le Alema 32? Po o le lauga a le Tupu o Peniamina i le Togiola a le Faaola, atonu o le lauga aupito ofooofogia i lenei mataupu i tusituisiga paia uma? Po o le talafaatusa o le laau o le olive ma lona lavelave ma le tamaoaiga tele i aoaoga faavae? Pe a ou faitau i le talafaatusa, ou te tago tusi se ata e mulimuli ai i ona auililiga. Pe ua manatu nei ea ua tatou malamalama sa na ona faalau lava e Iosefa Samita nei lauga mai ona mafaufauga e aunoa ma ni mea tusitusia?

E ese ai mai na ituaiga o faaiuga, ua tumu le Tusi a Mamona i ata lolomi o alofiaao o le Atua, e pei ona faamaonia i upumoni faaleaoaoga faavae mamalu o le Togiola a Iesu Keriso.

A na fai e le o se perofeta ia Iosefa, o lona uiga ina ia tusia nei mea ma le tele o isi malamalamaaga ofooofogia ma faaleaoaoga faavae, e tatau i le au faitio ona faia se finauga faapea o ia foi o se alii atamai i mataupu silisili. Ae, pe afai o lea, e ono fesili se tasi: aisea sa na o Iosefa ai i le 1,800 tausaga na sosoo ma le misiona a Keriso na aumaia sea aofaga lautele o aoaoga faavae tulaga ese ma le manino? Ona o faaaliga, ae le o le atamai, o le faapogai lena o le tusi lenei.

Ae tusa lava foi pe tatou te manatu o Iosefa o se alii atamai i mataupu silisili, ma se manatua maoae—o ia lava taleni e le lava e avea ai o ia o se tusitala maoae le tomai. I le faamatala ai o le i ai o le Tusi a Mamona, e tatau ai foi i le au faitio ona faia se mau faapea o Iosefa o se tusitala talenia lava ia i le 23 o ona tausaga. A leai, pe na faapefea ona tuufaatasia le anoano o igoa, nofoaga, ma mea na tutupu i se galuega sologa lelei e aunoa ma ni mea e le gatusatusa? Na faapefea ona ia tusa faiga faatogafiti auiliili o taua, fatu lauga mamana, ma fatufatu fasifuitau o loo failogia, taulotoina, sii mai, ma tuu i luga o faitotoa o pusa aisa e le faitau miliona o tagata, e pei o, “Pe a outou auauna atu i o outou uso a tagata, ua na o lo outou auauna atu

lava lea i lo outou Atua”(Mosaea 2:17) po o le “Ua i ai tagata ina ia latou maua le olioli” (2 Nifae 2:25). O savali nei e i ai le mana—savali e foliga mai e ola ma manava ma e musuia ai. O le faapea mai o Iosefa Samita i le 23 o ona tausaga na umia ai e ia ni tomai e tatau ai e tusia ai lenei galuega ofooofogia i se tusitosi e tasi i le pe tusa ma le 65 aso faigaluega, e manino le ese pe a faatusa i mea moni o le olaga.

Sa faasoa mai e Peresitene Russell M Nelson, o se tusitala tomai ma poto masani, ua silia ma le faa-40 ona toe tusi se lauga o se konafesi aoao lata mai. Pe ua tatou talitonu nei ea o Iosefa Samita, na o ia lava, na faalauina le Tusi a Mamona atoa i se tusitosi e tasi ma na o nai suiga iti o le kalama na faia i le uluai kopi?

Sa faamautu mai e le faletua o Iosefa, o Ema, le le mafaia o sea ituaiga o ausiaga: “O Iosefa Samita [a o avea o se alii talavou] sa le mafai e ia ona tusi-tusi pe faalau se tusi manino ma lelei ona faaupu, ae tu'u ai ia le faalauina o se tusi e pei o le Tusi a Mamona.”²

Ma le mea mulimuli, tusa pe toatasi e taliaina finauga uma na ta'ua, tusa lava pe masalomia atonu lava e sa'o, ae o loo feagai pea le au faitio ma se isi toatuga tele. Sa ta'u atu e Iosefa sa tusia le Tusi a Mamona i papatusi auro. O lea mau sa faaauau pea ona faitioina e le au faitio i ona aso—aua na iloa e “tagata uma” o talafaasolopito anamua sa tusia i pa'ulaau po o pa'umanu, seia oo i tausaga mulimuli ane, na maua ai papatusi apamemea o tusia ai tusiga anamua. E le gata i lea, sa fai mai le au faitio e faapea o le faaaoga o le sima, o loo faamatala mai i le Tusi a Mamona, o se mea sa le i oo i ai le tomai faatufugaga o tagata Amerika i lea taimi—vagana ina ua maua fausaga o sima i Amerika anamua. Ua faapefea nei la ona faamatala e le au faitio nei mea? Ua outou vaai la, o Iosefa, atonu sa o se tagata mate e ese le laki. Ae po o le a, e ui i le gasu na faasagatau ia te ia, faasagatau i le silafia uma faasaienisi ma faaakatemia, sa sa'o lava lana mate ae sese uma isi.

I le uma ai ona manatunatu i nei mea uma, e ono fesili se tasi pe mafai

faapefea ona talitonu se tasi faapea na tuufaatasia faafuasei nei mea moni ma ‘malosiaga, e pei ona fautuaina e le au faitio, i se faiga na mafai ai e Iosefa ona tusi le Tusi a Mamona ma ua fafau mai ai se togafiti faasatani. Ae faapefea la ona sagatonu lenei mea? I le tetee tuusao i sea ituaiga o mau, o lenei tusi ua musuia ai le faitau miliona e tetee atu ia Satani ma ola atili i ni olaga faapei o Keriso.

E ui atonu e filifili se tasi e talitonu i le faamalamalamaga a le au faitio, ia te a'u lava ia, o le faia o lea mea e le aumaia ai se alaluu i luma faaleatamai po le faaleagaga. Ina ia talitonu i lena mea, e tatau ona ou taliaina se faasologa o manatu e le faamaonia. E le gata i lea, e tatau ona ou faaleaogaina le molimau a molimau e toa 11,³ e ui ina

tumau faamaoni tagata taitasi i lana lava molimau e oo i le iuga; e tatau ona ou teena le aoaoga faavae paia o loo faatumulia ai lea itulau ma lea itulau o lenei tusi paia i ona upumoni faalelagi; e tatau ona ou faaleaogaina le mea moni e faapea e anoanoai tagata, e aofia ai ma au lava, ua latalata atili i le Atua ona o le faitauina o lenei tusi nai lo se isi lava, ma e sili atu i lo mea uma, e tatau ona ou faafitia musumusuga mautinoa a le Agaga Paia. O le a feteenai lena ma mea uma ua ou iloa e moni.

Sa tuua e se tasi o a'u uo lelei atamai le Ekalesia mo se taimi. Sa tusi mai o ia talu ai nei e uiga i lona toe foi mai: “Muamua, sa ou manao ina ia faamaonia mai ia te au le Tusi a Mamona i lona faasolopito, faaletino, faalegagana,

ma faaleaganuu. Peitai, ina ua ou suia la'u tauilaiga i le mea o loo ia aoao mai e uiga i le talalelei a Iesu Keriso ma Lana misiona laveai, sa amata ona ou maua se molimau i lona moni. I se tasi aso a o ou faitauina le Tusi a Mamona i lo'u potu, sa ou taofi ae tootuli i lalo ma avatu se tatalo ma le lotu ma lagonaina ma le manino sa musumusu mai le Tama Faalelagi i lo'u Agaga e faapea o le Ekalesia ma le Tusi a Mamona e matuai moni a'ia'i. O lau tolu ma le afa tausaga o le toe sailiilia o le Ekalesia na toe taitai mai ai a'u ma le lotu atoa ma le faatalitonuina i lona moni.”

Afai e faaalu e le tagata se taimi e faitau ai ma manatunatu loloto ma le lotomualalo le Tusi a Mamona, e faapei ona faia e la'u uo, ma uai atu i fua suamalie o le Agaga, ona mulimuli ane lea ona maua le molimau o loo moomia.

O le Tusi a Mamona o se tasi o meaalofa e le mafaatauina a le Atua ia i tatou. O le pelu ma le talita—na te auina atu le upu a le Atua i le taua e tau ai mo loto o e amiontu ma avea ai o se puipui autu o le upumoni. I le avea ai ma Au Paia, e le gata ua ia i tatou le matafaioi ma le avanoa le laumaua e puipua ai le Tusi a Mamona ae o le avanoa foi e faaaoga tonu ai—e folafola atu ai ma le mana ona aoaoga faavae paia ma tautino atu ai le molimau faapaleina ia Iesu Keriso.

E tuuina atu la'u molimau maua'i na faaliliuina le Tusi a Mamona e ala i le meaalofa ma le mana o le Atua. O le molimau mamana a le Atua i le paia o Iesu Keriso, le valaauga faaperofeta o Iosefa Samita, ma le moni a'ia'i o lenei Ekalesia. Ou te faamoemoe o le a avea ma maa'au'au o a tatou molimau, ina ia ta'uai i tatou, e faapei o sa Lamana na liua, “sa lei pauu ese lava i latou” (Alema 23:6). I le suafa, o Iesu Keriso, amene. ■

FAAMATALAGA

1. Emma Smith, in “Last Testimony of Sister Emma,” *Saints’ Herald*, Oct. 1, 1879, 289, 290.
2. Emma Smith, in “Last Testimony of Sister Emma,” 290.
3. Tagai “O Le Molimau a Molimau e Toatolu” ma “O Le Molimau a Molimau e Toavalu,” i le faatomuaga o le Tusi a Mamona.





Saunia e Elder Joni L. Koch
O Le Fitugafulu

Valavala, ae Lotogatasi Pea

I le Ekalesia, e ui i o tatou eseesege, e faamoemoe mai le
Alii ina ia tatou tasi!

a Iuni 1994, sa ou aveina ma le nau-nautai le taavale e toe foi i le fale mai galuega e matamata i le TV lo matou au soka faavaomalo o loo taaalo i le Ipu o le Lalolagi. E lei umi ona amatalia lau faigamalaga, sa ou vaai mamao atu i se alii e le atoatoa le malosi i luga o le auala savali o toso faatopetope lana nofoa faataavalevale ua teuteuina i la matou fua Pasila. Sa ou iloa i lena taimi o le a alu foi o ia i le fale e matamata i le taaloga!

Ina ua fesopoai o ma ala, na feiloi o ma mata; mo se taimi puupuu, sa ou lagona malosi le lotogatasi ma lena alii! Sa eseese ni vaega na ma agai i ai, e le iloa e le tasi le isi, sa manino le eseese o tulaga faaagafesootai ma faaletino, ae o le ma faamemelo e tasi mo le soka ma le alofa mo lo ma atunu na ma lagona ai le lotogatasi i lena lava taimi! Ou te lei toe vaaia lena alii talu mai lena taimi, ae i le asō, i le tele o tausaga ua tea, e mafai pea ona ou vaai i na fofoga ma lagona lena sootaga malosi ma lena alii. E ui i lea, na matou manumalo i lena taaloga ma le Ipu o le Lalolagi i lena tausaga!

I le Ekalesia, e ui i o tatou eseesege, e faamoemoe mai le Alii ina ia tatou

tasi! Na Ia fetalai mai i le Mataupu Faavae ma Feagaiga, "Ia tasi outou; ma afai tou te le tasi e le a au outou."¹

A tatou ulu atu i se falelotu po o se malumalu e tapuai ai o se vaega, e tatau ona tuu ese o tatou eseesege, e aofia ai le tupuaga, tulaga faaagafesootai, vaega faaupufai e filifili ai, ausiaga faaleao-aoga ma faalegaluega, ma ia taulai atu i a tatou faamoemoega faaleagaga e tutusa. Tatou te usuina faatasi viiga,

manatunatu e uiga i feagaiga e tasi i le taimi o le faamanatuga, fai atu faatasi se "amene" leotele pe a maea lauga, lesona, ma tatalo—o lona uiga tatou te ioeina faatasi mea na faasoa mai.

O nei mea lea tatou te faia faatasi e fesoasoani e fatuai se lagona malosi o le lotogatasi i totonu o le potopotoga.

Ae, o le mea moni e iloa ai, faamau-saliina, pe faatamaia ai lo tatou lotogatasi o le auala o tatou amioai ai pe a tatou valavalala ma tagata o le Ekalesia. E pei ona tatou iloa uma, e le mafai ona aloese mai ma e masani ai le iu lava ina tatou talanoa e uiga i le tasi ma le isi.

E faalagolago i mea tatou te filifili e fai atu e uiga i le tasi ma le isi, o a tatou upu o le a "fili faatasi o latou loto i le lotogatasi,"² e pei ona aoao mai Alema i Vai o Mamona, pe o le a latou faatamaia le alofa, faatuatuaina, ma le agalelei lea e tatau ona ia i tatou.

O loo i ai tala e tau leiloa le faatamaia ai o le lotogatasi e pei o le "Ioe, o ia o se epikopo lelei; oi, ae pe ana e vaai ia te ia a o laitiiti!"

Atonu o se vaega sili ona aoga o lenei tala "E lelei tele le epikopo, ma ua ia tuputupu ae i le matua ma le atamai i le aluga o tausaga."

E tele taimi tatou te tuu ai ni faailoga tumau i tagata i le faaapea atu "E le mafai ona sui le matou peresitene o le Aualofa, e faigata tele o ia!" I le faatusa i ai, atonu tatou te faapea atu, "Ua tau le mafai ona fetuunai le peresitene



o le Aualofa; atonu o ia feagai ma ni taimi faigata. Sei o tatou fesoasoani ia te ia ma lagolagoina o ia!"

Uso e ma tuafafine, e leai so tatou aia tatau e faamatala ai soo se tasi, aemaise lava mai la tatou Ekalesia, o se tagata e leaga! Nai lo lena, e tatau ona atagia i a tatou upu e uiga i o tatou uso a tagata lo tatou talitonuga ia Iesu Keriso ma Lona Togiola ma ona o Ia, e mafai ai ona tatou suia mo le lelei!

E amata e nisi le faitioina ma fevaevaeai ai ma taitai ma tagata o le Ekalesia mo mea e matua laiti lava.

O le tulaga lea mo se alii e suafa ia Simonds Ryder, na avea ma se tagata o le Ekalesia i le 1831. Ina ua uma ona faitau i se faaaliga e faatatau ia te ia, sa le mautonu i le vaai atu i lona igoa o Rider ua sese le sipelaga, ma le mataitusi nai lo le y. O lona tali atu i lenei mea na uunaia ai lona fesiliglia o le perofeta ma iu atu ai i le fasiotia o Iosefa ma liliuese ai mai le Ekalesia.³

E faapena foi lo tatou oo ai i ni aoaiga mai i o tatou taitai faaleekalesia, lea e avea o se suesuega pe o faapefea lo tatou lotogatasi ma i latou.

Sa na o le 11 ou tausaga, ae ou te manatua le 44 tausaga ua mavae, sa faia se toefaafouga tele o le falelotu lea sa auai ai lou aiga i le lotu. A o lei amataina le toefaafouga, sa i ai se fonotaga lea sa talanoaina ai e taitai o le lotoifale ma le eria le auala e auai ai tagata o le ekalesia i le galuega i lena taumafaiga. O lo'u tama, o le sa pulefaamalumalu muamua i lena iunite mo le tele o tausaga, sa faailoa atu lona manatu malosi o lenei galuega e tatau ona faia e se konekarate ae le o tagata e leai ni tomai.

E le gata sa teena lona manatu, ae sa matou faalogo na ogoga ma faalau- aitele le aoaiina o ia i lena tulaga. O lenei tamalii o le sa matuai tuuto i le Ekalesia ma o se sui o le Taua Lona II i Europa, ua masani i le teenaina ma le tau atu mo mea sa ia talitonu i ai! Atonu e mafaufau se tasi po o le a lana tali i le maea ai o lenei mea na tupu. Pe na te tumau pea i lona manatu ma faaauau pea le tetee atu i le faaiuga ua uma ona faia?

Sa matou vaaia ni aiga i la matou uarota ua faavaivai i le talalelei ma sa



taofi le auai mai i sauniga ona sa le mafai ona latou tasi ma i latou sa taitai. Sa matou molimauina foi a matou ue mai le Peraimeri ua le faamaoni i lo latou talavou aua sa saili masei pea o latou matua i tagata i totolu o le Ekalesia.

Peitai, sa filifili lo'u tama ia tumau pea i le tasi ma o matou uso a Au Paia. Ma i nai aso mulimuli ane, ina ua potopoto tagata o le uarota e fesoasoani i le fausiaina, sa ia "valaaulia" lo matou aiga e mulimuli atu ia te ia i le faletapuai lea o le a faaavanoa ai i matou lava e fesoasoani i soo se auala.

Sa ou le mautonu. Sa mafai lava ona ou fesili atu ia te ia, "Tama, aisea tatou te o ai e fesoasoani i le fausiaina pe afai na e tetee i le faia e tagata o le au paia?" Ae o le vaaiga i ona foliga na faalotovaivaia ai au mai le faia o lena mea. Sa ou manao ina ia ou malosi mo le toe faapaiaga. O le mea e lelei ai, sa ou filifili e filemu ma tau lava o le alu e fesoasoani i le fausiaina!

E lei vaaia Tama i le faamaeaina o le faletapuai, aua sa maliu o ia a o lei


maea lenei galuega. Ae sa faaauau pea e lo matou aiga le faia o la matou vaega seiā maea, ma o lena mea sa faatasia i matou ma ia [Tamal], ma tagata o la matou uarota, taitai, ma le mea sili, ma le Alii!

I nai taimi a o lei oo i Ona aafiga tiga i Ketesemane, ina ua tatalo atu Iesu i le Tama mo Ana Apostolo ma le Au Paia uma, sa Ia fetalai atu, "Ina ia tasi i latou uma, faapei o oe le Tama o i totolu ia te au, o au foi o i totolu ia te oe."⁴

Uso e ma tuafafine, ou te molimau atu a tatou filifili ia tasi ma tagata ma taitai o le Ekalesia—i taimi uma tatou te potopoto faatasi ai, aemaise pe a tatou valavalai ai—o le a tatou lagona foi le lotogatasi atoatoa ma lo tatou Tama Faalelagi ma le Faaola. I le suafa, o Iesu Keriso, amene. ■

FAAMATALAGA

1. Mataupu Faavae ma Feagaiga 38:27.
2. Mosaea 18:21.
3. Tagai Milton V. Backman Jr., *The Heavens Resound: A History of the Latter-day Saints in Ohio, 1830–1838* (1983), 93–94.
4. Ioane 17:21.



Saunia e Elder Stanley G. Ellis
Fitugafulu ua Faamalolo ma le Mamalu

Pe Ua Tatou Faatuatuaina Ea o Ia? E Lelei le Faigata

Po o le a lava le faafitauli, o le faigata e mafai ona lelei mo i latou o le a agai i luma ma le faatuatuua ma faatuatuaina le Alii ma Lana fuafuaga.

Ae ou te lei amata, i le avea ai ma se tasi e fai ma sui o i tatou uma na aafia i le faatamaiaiga o afafulifao talu ai nei ma mafuie, ou te faailoa atu lou agaga faafetai mai le loto mo Lima Fesoasoani ma o latou taitai uma, o e na tuuina mai ia i tatou le fesoasoani ma le faamoemoe.

O Oketopa i le 2006, sa ou tuuina atu ai la'u uluai lauga o le konafesi aoao. Sa ou lagonaina se savali taua mo le Ekalesia i le lalolagi atoa e aofia ai se faaupuga "Ua faatuatuaina i tatou e le Alii!"

E moni lava na te faatuatuaina i tatou i le tele naua o itu. Ua Ia tuuina mai ia i tatou le talalelei a Iesu Keriso, ma i lenei tisipenisione, i lona atoaga. Ua Ia faatuatuaina i tatou i Lana pule o le perisitua faatasi ai ma ki mo lona faaogaina tatau. Faatasi ai ma lena mana, e mafai ai ona tatou faamanuiaina, auaua atu, maua sauniga paia, ma osia feagaiga. Ua Ia faatuatuaina i tatou ma Lana Ekalesia toefuataiina, e aofia ai le malumalu paia. Ua Ia faatuatuaina Ana auaua i le mana e fai ai faamauga—

e fusifusia ai i le lalolagi ma fusifusia ai foi i le lag! Ua Ia faatuatuaina foi i tatou e avea o ni matua faalelalolagi, faiaoga, ma tausia Ana fanau.

I le mavae ai o nei tausaga o le tautua i le Au Pulega Aoao i le tele o vaega o le lalolagi, ou te tautino atu



faatasi ai ma le mautinoa sili atu: Ua Ia faatuatuaina i tatou.

O nei la o le fesili mo lenei konafesi o le "Pe ua tatou faatuatuaina ea o Ia?"

O Tatou Faatuatuaina ea o Ia?

E tele ina faamanatu mai ia i tatou e Peresitene Thomas S. Monson ia "faatuatuua ia Ieova ma lou loto atoa; a e au a faalagolago i lou lava atamai."

"Ia e manatua o ia i ou ala uma, ona faatonuina ai lea e ia lava ou ala.

"Aua e te faafapoto" (Faataoto 3:5–7).

Pe tatou te faatuatuaina ea Ana poloaiga e mo lo tatou lava lelei? O Ana taitai, e ui ina le atoatoa, e taitai lelei i tatou? O Ana folafolaga ia mautinoa? Pe o tatou faatuatuaina ea e silafia e le Tama Faalelagi ma Iesu Keriso i tatou ma finagalo e fesoasoani mai ia i tatou? E oo lava i le lotolotoi o tofotofoga, luitau, tulaga faigata, ma taimi faigata, pe tatou te faatuatuaina pea lava o Ia?

I le toe tepa i tua, sa ou aoaoina nisi o lesona silisili, i taimi sili ona faigata—pe i lo'u talavou, i le misiona, amataina o se matata fou, taumafai e faalautele o'u valaauga, tausia o se aiga toatele, po o le tauivi ina ia ola tutoatasi. Ua foliga manino mai e lelei le faigata!

E Lelei le Faigata

O le faigata e tatou te malolosi atili ai, e faalotomaualaloina i tatou, ma aumaia ia i tatou se avanoa e faamonia ai i tatou lava. Na oo ina iloa e o tatou paionia o taavale tosolima, le Atua *i le ogaoga o o latou faigata*. Aisea na lua ai mataupu mo Nifae ma ona uso e maua mai ai papatusi apamemea ae na o le tolu fuaiupu na tauanau ai le aiga o Isamaeli latou te faatasi i le vao? (tagai 1 Nifae 3–4; 7:3–5). E foliga mai na finagalo le Alii e faamalosia Nifae e ala i tauiviga mo le mauaina mai o papatusi.

E le tatau ona oo mai mea faigata o se faate'ia i o tatou olaga. O se tasi o uluai feagaiga tatou te osia ma le Alii o le ola ai lea i le tulafono o le taulaga. O le ositaulaga i lona faauigaga e aofia ai le lafoai o se mea e te fiafia i ai. O le poto masani ua tatou iloa ai o se



tau itiiti lava e totogi pe a fua i faama-nuiaga e mulimuli mai ai. I lalo o le taitaiga a Iosefa Samita, sa taua ai e faapea “o se tapuaiga e le manaomia ai le ositaulagaina o mea uma e leai lava se mana ona lava e maua ai le faatuatua e tatau ai mo le ola ma le faaolataga.”¹

O Sui o le Aiga Atua e masani i mea faigata. Na taulagaina e le Atua le Tama Lona Alo Pele e Toatasi i pua-puaga matautia o le Togiola, e aofia ai le maliu ma le faasatauroga. Ua tau mai e tusitusiga paia “o mea sa tiga ai o Ia na aaooina ai o Ia [Iesu Keriso] ia usiusital” (Eperu 5:8). Sa ofofua mai o Ia e puapuaga i tiga o le Togiola. Atonu foi na talitiga le Agaga e uunaia, lapatai, ma taiala i tatou ae o nisi taimi tatou te le amanaia, faauiga sese, pe faagalogalo foi.

Vaega o le Fuafuaga

O le faigata o se vaega o le fuafuaga o le talalelei. O se tasi o faamoemoega o lenei olaga o le faamaonia lea o i tatou (tagai Aperaamo 3:25). E toaitiiti na sili atu mafatiaga e aunoa ma se mafuaaga nai lo le nuu o Alema. Na latou sosola mai le Tupu amioleaga o Noa ona avea ai lea ma pologa i le au sa Lamana! E ala i na tofotofoga, sa aaooina ai i latou e le

Alii faapea Na te a’oa’iina Lona nuu ma tofotofoina lo latou onosai ma lo latou faatuatua” (Mosaea 23:21).

I le taimi matautia i le Falepuipui o Liperate, sa aoao ai Iosefa Samita e le Alii ia “talitalia lelei” (MF&F 121:8) ma folafola atu afai na te faia, “o nei mea uma e te maua ai le poto masani, ma ole a avea mou lelei” (MF&F 122:7).

Sa faamalosiau mai Peresitene Thomas S. Monson, “Ia tatou matua filifili i le mea faigata e sa’o, nai lo le mea faigofie e sese.”² E faatatau i o tatou malumalu, sa ia saunoa ai e “leai se osigataulaga ua tele naua, e leai se tau ua mamafa tele naua, e leai se tauiviga ua faigata naua, ina ia maua ai faama-nuiaga [o le malumalu].”³

I le lalolagi o le natura, o le faigata o se vaega o le li’o o le olaga. E faigata mo se tama’i moa ona fofoa mai i lona atigi malo. Ae a taumafai se tasi e faa-faigofie, e le galueaiina e le tamai moa le malosi e tatau ai ina ia ola. I se ala foi faapena, o le tauivi o se pepe lele e sola ese mai le afuafu e faamalosia ai o ia mo le olaga o le a ia ola ai.

E ala i nei faataitaiga, ua tatou vaai ai o le faigata o le *mataupu faavae lava lea!* E tofu uma i tatou ma luitau. O le *eseesega* o le tatou tali atu i le faigata.

E i ai se taimi i le Tusi a Mamona na feagai ai tagata ma “sauaga tetele” ma “mafatiaga e tele” (Helamana 3:34). Na faapefea ona latou tali atu? “Sa latou anapopogi ma tatalo soo, ma sa faasolo malolosi ma atili malolosi ai i lo latou lotomaualalalo, ma mausali ma atili mausali ai i le faatuatua ia Keriso, seja oo ina faatutumuina o latou agaga i le olioli ma le faamafanafanaga” (Helamana 3:35). O se isi faataitaiga na tulai mai ina ua mavae tausaga o taua: “Ona o le umi tele o le taua i le va o sa Nifae ma sa Lamana, sa toatele na faamaaaina, . . . ae e toatele foi sa faamaluluina ona o o latou puapuaga, sa oo ina latou faalotomaualalaloina i latou lava i luma ole Atua” (Alema 62:41).

Tatou te tofu filifilia la tatou lava tali i le faigata.

Ia Faaeteete i le Faigofie

A o lei valaauiina au i lenei vala-auga, sa avea a’u ma faufautua tautupe i Houston, Texas. O le tele o a’u galuega o tagata maumea e fai a latou lava pisinisi. E toetoe o i latou uma lava sa amataina a latou pisinisi faamanuiaina mai le leai o se mea e ala i le tele o galuega faigata. O le mea e sili ona faanoanoa ai o le faalogo atu lea i nisi o i latou o faapea mai sa latou mananao e fafaigofie atu mo a latou fanau. Sa latou le mananao ia latou fanau e pologa e faapei ona latou faia. I se isi faaupuga, o le a latou aveesea mai a latou fanau le mea tonu lava na ala ai ona latou faamanuiaina.

I se faatusatusaga ese, matou te iloa se aiga sa ese auala na latou faia. Sa musuia matua i le poto masani o J.C. Penny lea na ta’u atu e lona tama ia te ia ina ua valu ona tausaga o le a taulima e ia lava ana mea tautupe. Sa latou faia la latou lava fatuga: a o faauu tamaiti taitoatasai mai le aoga maualuga, sa latou taulimaina a latou lava mea tautupe—mo le faalauteleina o aoga (i kolisi, iunivesite, ma isi) ma mo le teuina o a latou lava tupe (o le ola tutoatasai moni) tagai MF&F 83:4). Ma le fiafia, sa tali atu le fanau ma le poto. O i latou uma ua faauu mai kolisi, o isi ua mae’ a iunivesite—ua tutoatasi



i latou uma., E lei faigofie, ae sa latou mafaiia. Sa latou faia i le agai i luma ma le faatuatua.

Faatuatua e Faatuatuaaina ai o la

O le fesili “Pe tatou te faatuatuaaina ea o Ia?” atonu e sili ona faaupu “Pe o i ai so tatou *faatuatua* e faatuatuaaina ai o Ia?”

Pe o i ai so tatou *faatuatua* e faatuatuaaina ai Ana folafolaga e faatatau i le sefuluai e faapea o le 90 pasene o a tatou tupe faasili *faaopoopo i ai ma le fesoasoani a le Alii*, ua sili atu ai nai lo le 100 pasene o a tatou tupe maua i le tausaga *pe a na o i tatou?*

Pe o lava lo tatou faatuatua e faatuatuaaina ai o le a asiasi mai o Ia i o tatou mafatiaga (tagai Mosaea 24:14), o le a Ia finau ma i latou o e finau ma i tatou (tagai Isaia 49:25; 2 Nifae 6:17), ma o le a Ia faapaiaina o tatou puapuaga mo lo tatou manuia? (tagai 2 Nifae 2:2).

Pe o le a tatou faaaogaina ea le *faatuatua* e tatau ai e tausi Ana poloaiga ina ia mafai ai ona Ia faamanuiaina i tatou i le tino ma le agaga? Ma pe o le a faaaauau pea ona tatou faamaoni e oo i le iuga ina ia mafai ai ona Ia avatu i tatou i Lona afioaga? (tagai i le Mosaea 2:41).

Uso e ma tuafafine, e mafai ona i ai lo tatou faatuatua e faatuatuaaina ai o Ia. E finagalo o Ia i le mea sili mo i tatou (tagai Mose 1:39) O le a Ia tali mai i a tatou tatalo (tagai MF&F 112:10). O le a Ia tausia Ana folafolaga (tagai MF&F

1:38). Ua ia te Ia le mana e tauri ai na folafolaga (tagai Alema 37:16). Na te silafia mea uma! Ma o le mea e sili ona tauri, Na te silafia le mea e sili ona lelei (tagai Isaia 55:8–9).

O Se Lalolagi Matautia

O lo tatou lalolagi i le taimi nei ua faigata. Ua taatele mea leaga ma le piopio i atunuuma, ua oo atu le taufaamatau i nofooga saogalemu, o le pau o le tamaoaiga, leai ni galuega, o faama’i, o faalavelave faalenatura, o fetaua’iga, taitai pule sau, ma isi. O le a se mea e tatau ona tatou faia? Pe tatou te sosola ea pe tau? O le fea e sa’o? Po o le a lava le filifiliga e mafai lava ona matautia. Sa matautia mo Siaosi Uosigitone ma lana autau ona tau ae faapea foi i o tatou augatama paionia ona sosola. Sa matautia ia Nelesoni Mandela ona tauivi mo le saolotoga. Fai mai ina ia manumalo le leaga, ua na ona tatau lava i tagata lelei ona leai se mea e fai.⁴

Aua Tou Te Matatau!

Po o a lava mea tatou te fai, e le tatau ona tatou faia se faaiuga, pe gaoioi i se agaga o le fefe. E moni, “Ua le foaiina mai e le Atua ia te i tatou le Agaga e mata’u ai; a o le Agaga e faamalosi ai” (2 Timoteo 1:7). (Pe na outou iloaina o le fasifuitau “aua tou te matatau” o loo ta’ua i tusitusiga faavae?) Ua aoaoina au e le Alii o le lotovaivai ma le fefe o auupega ia a le fili. O le tali a le Alii mo taimi faigata o le agai i luma ma le faatuatua.

O Le A Le Faigata?

Atonu e tofu i tatou ma se manatu ese pe o le a le faigata? O nisi e manatu e faigata ona totogi le sefuluai pe a utiuti mea tautupe. O nisi taimi e faigata ai i taitai ona manatu e tatau ona totogi sefuluai e matitiva. Atonu e faigata mo nisi o i tatou ona agai i luma ma le faatuatua e faaipoipo pe fai se aiga. E i ai i latou e faigata ona “malilie i mea ua tuuina mai e le Alii ia te [i latou]” (Alema 29:3). Atonu e faigata ona malilie i o tatou valaauga o i ai nei (tagai Alema 29:6). O aoaiga faale-Ekalesia atonu e faigata tele, ae

mo nisi e faailoga ai le amataga o le faagasologa o le salamo moni.

Po o le a lava le faafitauli, o le fai-gata e mafai ona lelei mo i latou o le a agai i luma ma le faatuatua ma faatuatuaaina le Alii ma Lana fuafuaga.

O La’u Molimau

Uso e ma tuafafine, ou te molimau atu o nei taitai e i o’u tua ua valaauna e le Atua. O lo latou naunauga o le auauna lelei atu i le Alii ma fesoasoani ia i tatou e faatuina le talalelei i o tatou loto. Ou te alofa ma lagolagoina i latou.

Ou te alofa i lo tatou Faaola, o Iesu Keriso. Ou te ofo i le lava o Lona alofa i le Tama ma i tatou ua avea ai ma o tatou Faaola ma Togiola, ma o le faia o lena mea na afua ai ona ona Ia “gatete ona o le tiga, ma tafe toto ai i pu afu uma, ma mafatia ai i le tino atoa ma le agaga” (MF&F 19:18). Ae e ui ina feagai ma lenei tulaga matautia ma le mea moni e mafai, sa Ia lagolagoina le Tama, “Aua le faia lo’u loto a o lou finagalo.” (Luka 22:42). Ou te olioli i upu a le agelu: “E le o iinei o ia: aua ua toe tu mai o ia” (Mataio 28:6).

O Lana faataitaiga moni o Ia “o le ala, ma le upu moni, ma le ola” (Ioane 14:6). Ua na o le mulimuli i lena faataitaiga e mafai ai ona tatou maua le “filemu i le lalolagi lenei, ma le ola e faavavau i le lalolagi a sau” (MF&F 59:23). E pei ona sa ou mulimuli i Lana faataitaiga ma faaaogaina Ana aoaoga, ua ou iloa mo au lava o Ona “mea silisili ese ma le aoga [taitasi]” (2 Peteru 1:4) e moni.

O lo’u faanaunauga silisili o le tu atu lea faatasi ma Mamona o se soo moni o Iesu Keriso (tagai 3 Nifae 5:13) ma o le a i ai se aso o faalogo atu mai Ona lava laufofoga o faapea mai, “Ua lelei ia, le auauna lelei e, ma le faamaoni” (Mataio 25:21). I le suafa, o Iesu Keriso, amene. ■

FAAMATALAGA

1. *Lectures on Faith* (1985), 69.
2. Thomas S. Monson, “Filifiliga,” *Liahona*, Me 2016, 86.
3. Thomas S. Monson, “O Le Malumalu Paia—o se Sulu Taiala i le Lalolagi,” *Liahona*, Me 2011, 92.
4. Tagai John Stuart Mill, *Inaugural Address: Delivered to the University of St. Andrews, Feb. 1, 1867* (1867), 36.



Elder Adilson de Paula Parrella
O Le Fitugafulu

O Upumoni Taua— Manaomia Lo Tatou Galulue

Na aumaia e le Uluai Faaaliga ma le Perofeta o Iosefa Samita le malamalam faaopoopo ma le upumoni e taua mo lo tatou fiafia i lenei olaga ma lo tatou faaeaga i le afioaga o le Atua.

Pe tusa ua fitu o'u tausaga, sa ou fesili i lo'u tina, "Pe a oti oe ma a'u ma o i le lagi, pe o le a avea pe a oe ma o'u tina?" Na te lei mafau-fauina sea ituaiga o fesili. Ae i le tali mai i le mea sili na ia iloa, sa ia fai mai, "E leai, o le a avea i tatou o ni uso ma ni tuafafine i le lagi. O le a le avea a'u ma ou tina." E le o le tali lea na ou faamoemoeina.

I se taimi talu ona mavae lena talanoaga, sa taunu atu ai ni alii talavou se toalua i le faitotoa o lo matou fale. O se vasega, aua na faataga e lo'u tama i la'ua e o mai i totonu. Sa la fai mai o i laua o ni faifeatalai mai Le Ekalesia a Iesu Keriso o le Au Paia o Aso e Gata Ai.

Sa amata e nei faifeatalai, pei ona matou aoaoina le igoa e faaigoa ai, ona aoao lo matou aiga. Ou te manatua lelei o matou lagona o le fiafia ma le sagisagi atu i taimi uma sa o mai ai i lo matou fale. Sa la faamatala mai ia te i matou sa i ai se alii talavou na alu i se vao e fesili i le Atua po o le fea ekalesia e moni ma sa ia vaai i le Atua ma Iesu

Keriso.¹ Sa faaali mai e faifeau ia i matou se atao lena faaaliga vaaia, ma ina ua ou vaai i ai, sa ou iloaina e moni lava na vaai Iosefa Samita i le Atua le Tama ma Iesu Keriso. Fai mai faifeatalai ona o lena faaaliga vaaia, ua toe i ai nei le Ekalesia moni a Iesu Keriso i le fogaelele.²

Sa aoao mai foi e faifeatalai ia i matou le fuafuaga a le Atua mo le fiafia

ma sa tali ai fesili a lo matou aiga e uiga i le lotu. Sa la aoao mai i matou e faapea e moni lava e mafai ona faatasi aiga pe a mavae lenei olaga, o se tama, tina, ma atalii ma afafine.

Sa papatisoina lo matou aiga. O le auala i le suiga o mausa tuai, lafoai tu masani, ma avea ma tagata toaaga o le Ekalesia sa le mauaa i lena taimi. Peitai ona o le alofamutimutivale ma le alofa o le Atua ma faatasi ai ma le fesoasoani a le toatele o taitai ma tagata o le ekalesia, o lea na matou sao mai ai i uluai tausaga faigata.

E faitau miliona ua auai i le Ekalesia, faapea foi le toatele o e ua liliu mai ma papatisoina i vaiaso taitasi, ua maua se molimau o le Uluai Faaaliga. E mafai e le Agaga Paia ona fai faafia lenei molimau ia i tatou taitoatas i o tatou taumafai e ola i upumoni faigofie o le talalelei a Iesu Keriso.

Na aumaia e le Uluai Faaaliga ma le Perofeta o Iosefa Samita le malamalam faaopoopo ma le upumoni e taua mo lo tatou fiafia i lenei olaga ma lo tatou faaeaga i le afioaga o le Atua. O le a ou ta'uua ni upumoni se tolu sa tatou mauaina ma e tatau ona galulue ai ona o se alii talavou sa tootuli i le tatalo ma le loto faamaoni.

E Valaau e le Atua Perofeta e Taitai ma Taiala i Tatou

O se upumoni taua ua tatou aoao mai le Uluai Faaaliga ma le Perofeta o Iosefa Samita o le, e valaaicina e le Atua perofeta,³ tagatavaai, ma talifaa-aliga e faatonutonu, taiala, lapatai, ma



taitai i tatou.⁴ O nei tamalii o fofoga taumomoli ia o le Atua i le lalolagi,⁵ faatasi ai ma le pule e saunoa ai ma galulue i le suafa o le Alii.⁶ O le mulimuli i a latou fautuaga, o le a puipuia ai i tatou ma maua faamanuiaga silisili i la tatou malaga fai i lenei lalolagi.

A o ou aoga i le Iunivesite o Polika Iaga o se faifeatalai talavou, nofofua, ua foi mai, sa ou alu i se sauniga a le au perisitua o le konafesi aoao i le Tapeneko i le Lotoa o le Malumalu. Sa uunaia e Peresitene Ezra Taft Benson, o le Peresitene o le Ekalesia i lena taimi, ia faifeatalai uma ua foi mai e matua faataua le faaipoipoga ma ia avea o se faamuamua aupito maualuga i lenei olaga.⁷ Ina ua uma le sauniga, sa ou iloaina ua valauina a'u ia salamo ma sa manaomia ona ou galue i le fautuaga a le perofeta.

O lea, sa tonu ai ia te au ou te foi i lo'u nuu moni o Pasila e sue se toalua. Ae ou te lei tuua mo Pasila e galue faataitai mo le lua masina, sa ou telefoni i lo'u tina ma ni uo ma sa maua mai se lisi pe tusa ma le 10 tamaitai talavou—e tofu onomea uma ona avea o se ava.

A o ou i ai i Pasila, ina ua mavae le mau tatalo ma le manatunatu loloto, sa ou feiloai, faamasani, faamau, ma faatulaga se aso e faaipoipo ai i se tasi o tamaitai talavou sa i le lisi. Sa le o se matatia' fou mo tamaiti aoga i Provo, Iuta, le eva faamasani ma faamau, ae sa vave e ala i tulaga masani i Pasila.

I ni nai masina mulimuli ane, sa ou faaipoipo atu ia Elaine. O ia o le fatu o lo'u olaga ma o se faamanuiaga silisili.

Ou te le o fautua atu faapea e tatau i tagata uma ona faia se lisi, ae ou te fautua atu—pe atonu e sili atu nai lo le fautua atu—e faapea ia tatou galulu e le aunoa pe a saunoa lo tatou perofeta soifua.

O le perofeta a le Atua i aso nei o Peresitene Thomas S. Monson, ma o le a faamanuiaina i tatou i le mulimuli atoatoa i ana fautuaga ma le sa'olele.

O Le Malamalama i le Natura Moni o le Atua

O le isi upumoni ua tatou aoaoina ona o le Uluai Faaaliga ma le Perofeta o Iosefa Samita, o le natura moni o le Atua. Se'i mafaufau i le faamanuiaina

o i tatou ua iloa o le Atua o se tagata e i ai se tino o aano ma ivi e mafai ona pa'i i ai pei foi o i tatou,⁸ e mafai ona tatou tapuai i se Atua e moni, o le e mafai ona tatou malamalama ai, ma o le na faaalia mai o Ia lava ma Lona Alo i Ana perofeta—o perofeta anamua ma perofeta i nei aso e gata ai.⁹ O Ia o se Atua o le faafogfa ma tali mai i a tatou tatalo;¹⁰ o se Atua o le e vaavaaia mai i tatou mai le lagi i luga¹¹ ma e popole mai lava e le aunoa o Ia mo lo tatou soifua manuia faaleagaga ma le faale-tino; o se Atua o le na tuuina mai lo tatou faitalia e filifili ai mo i tatou lava e mulimuli ia te Ia ma usitai i Ana polo-aiga e aunoa ma le faamalosia;¹² o se Atua o le tuuina mai faamanuiaga ma faatagaina i tatou e fetaiiai ma tofoto-fogfa ina ia mafai ai ona tatou tuputupu ae ma avea e faapei o Ia.

O Ia o se Atua alofa o le na saunia se fuafuaga lea e mafai ai ona tatou sapi i le fiafia i lenei olaga ma i le faavavau.

O Iesu Keriso O Lo Tatou Faaola

Mai le Uluai Faaaliga ma le Perofeta o Iosefa Samita, sa tatou maua ai le malamalama i le moni ma le misiona paia a le Alii o Iesu Keriso, o le maatulimanu o la tatou tapuaiga.

Ona ua oo mai le oti i le lalolagi, e faapei ona moni o loo tatou ola nei, o le a tatou oti uma foi i se aso. O se tasi o aafiaga o le oti o le leiloloa tumau lea o o tatou tino faaletino; semanu e leai se mea tatou te mafai a toe faafoi mai ai. E le gata i lea, ona tatou te agasala uma i le taimi o la tatou malaga i lenei lalolagi, o le a le mafai lava ona tatou toe foi atu i le afioaga o lo tatou Tama Faalelagi.

Pe mafai ona outou vaai faalema-faufau i taunuuga o le aveesea mai le afioaga o le Atua ma le le toe mafai ona maua se tino?

Sa manaomia se Faaola ma se Togiola e faasaoloto ai i tatou mai le oti ma le agasala. I lalo o le taitaiga a le Tama Faalelagi, sa afio mai ai Iesu Keriso i le lalolagi, puapuagatia, maliu i luga o le satauro, ma sa toetu mai ina ia mafai ai foi ona tatou toetutu ma, faatasi ai ma le salamo ma le lotofaamaoni



ma osia ma tausia feagaiga paia, e toe foi atu ai i le afioaga o le Atua.

Sa faamalamalama mai e Iakopo, “E, le silisiliere na'uā e o le agalelei o lo tatou Atua, o lē ua ia saunia se ala mo lo tatou sosola ese mai le 'u'u a lenei sau'ai leaga matautia; ioe, lena sau'ai, o le oti ma seoli, lea ou te ta'u a o le oti o le tino, ma le oti foi o le agaga.”¹³

O Iesu o le Mesia na folafola mai, o le Faitulafono, o Le Paia o Israelu, o lo tatou Alii, o lo tatou Faaola, o lo tatou Togiola, o lo tatou Tupu, o lo tatou Alii.

Ia tatou faaauau uma ona galulue i nei upumoni taua ma le malamalama, ia ofo atu lo tatou usiusitai i le Atua ma Lona Alo Pele. I le suafa, o Iesu Keriso, amene. ■

FAAMATALAGA

- Tagai Iosefa Samita—Talafaasolopito 1:17–18
- Tagai Mataupu Faavae ma Feagaiga 1:30.
- Tagai Amosa 3:7.
- Tagai, mo se faataitaiga, e faatatau i *instruct*: Mataio 28:20; 2 Nifae 9:48; *taiala*: *Aoaoga a Peresitene o le Ekalesia*: Gordon B. Hinckley (2016), 262–63; *warn*: Esekielu 3:17; *taitai*: Mataupu Faavae ma Feagaiga 124:45.
- Tagai 2 Nifae 3:18.
- Tagai Esekielu 3:4; Luka 1:70; Galuega 3:21; Mataupu Faavae ma Feagaiga 1:38.
- Tagai Ezra Taft Benson, “To the Single Adult Brethren of the Church; *Ensign*, May 1988.
- Tagai Mataupu Faavae ma Feagaiga 130:22.
- Tagai Mataupu Faavae ma Feagaiga 110:2–3.
- Tagai Mosaea 9:18.
- Tagai Mataupu Faavae ma Feagaiga 1:1.
- Tagai 2 Nifae 2:27; Helamana 14:30; Mataupu Faavae ma Feagaiga 58:28.
- 2 Nifae 9:10.



Saunia e Elder Ian S. Ardern
O Le Fitugafulu

la Outou Saili Mai Totonu o Tusi Sili

A o tatou suesue mai tusi sili ona lelei, tatou te puipuia i tatou lava mai 'aulamu faataumaoi o loo saili e 'ati'ati o tatou faavae faaleagaga.

le taeao po o se tasi aso, sa ou vaafiai ai se katepila fiaai ua faalafi lelei i luga o se pupurosa matagofie i se togalaau e vaaia lelei. Mai se vaaiga o 'au ua leai ni lau, sa iloagofie e oo lava i se tagata faasamasamanoa, sa 'ati'ati atu lona ala i nai lau mu'amu'a i ona 'aulamu faataumaoi. I se tulaga faavaliata, sa ou mafaufau ai e tele katepila ua faalafai; e maua i le lalolagi atoa ae ua matua popoto lava i le faafoliga ma o nisi taimi tatou te faatagaina ai i latou i a tatou togalaau, ma e aunoa ma so

tatou iloa, ua latou 'atia o tatou a'a faaleagaga ma a tatou rosa aupito mananaia o tagata o o tatou aiga ma uo.

Ua tatou ola i se taimi ua faulai ai faamatalaga sese e uiga i o tatou talitonuga. I taimi faapena, o le le puipuia ma le le faalolotoina o o tatou a'a faaleagaga o se valaaulia lea ia 'atia e i latou o e saili e faaumatia lo tatou faatuatua ia Keriso ma lo tatou talitonuga i Lana Eklesia toefuataiina. I le taimi o le Tusi a Mamona, sa saili ai Seseroma e faaumatia le faatuatua o e na talitonu.



O ana taga ma upu o le "o se mailei a le fili, lea ua ia . . . tatao e pupue ai [le] nuu, ina ia mafai ona ia aumai [i latou] i lalo o lana pule, ina ia mafai ona ia sio faataamilo [i latou] i ana filifili" (Alema 12:6). O loo i ai foi i aso nei na lava mailei, ma sei vagana ua tatou mataala faaleagaga ma fausia se faavae mautu i luga o lo tatou Togiola (tagai Helamana 5:12), tatou te ono maua i tatou lava ua noanoatia i filifili a Satani ma taitai filemu atu ai i tatou i le ala i seoli lea e tautala i ai le Tusi a Mamona (tagai 1 Nifae 8:28).

Na tuuina mai e le Aposetolo o Paulo se lapataiga i ona taimi e faatatau i o tatou aso: "Aua o a'u nei ua ou iloa lenei mea, . . . ia te outou lava tagata e tautala mai i mea faapiopio, e fetoso ese ai le au soo ia mulimuli ia i latou" (Galuega 20:29–30).

O lana lapataiga ma lapataiga a o tatou perofeta ma aposetolo ua faamanatu mai ai ia te i tatou e tatau ona tatou faia mea uma tatou te mafai e faamalolosia ai i tatou lava faaleagaga mai upu a e tetee ma taufaasese. A o ou asiasi atu i uarota ma siteki o le Eklesia, e faagaetia lava a'u i mea ou te vaai i ai, faalogo, ma lagonaina pe a tali mai ma le naunautai ma le faamoni le Au Paia i aoaoga a le Faaola ma Ana auauna.

O le faateleina o le tausiga o le aso Sapati o se tasi lea o faataitaiga o tagata o le au paia ua faamalolosia faaleagaga i latou lava e ala i le ua'i atu i valaaulia faaperofeta. O le faamalolosia atili ua iloagofie i le faateleina o galuega i le malumalu ma talafaaasolipo o aiga a o faatasia e aiga o latou augatuaa e ala i sauniga o le malumalu. E atili malolosi o tatou faavae faaleagaga pe a avea tatalo faamaoni faaletagata lava ia ma faaleaiga ma lagolago o lo tatou faatuatua, pe a tatou salamo i aso taitasi, sailia le mafutaga ma le Agaga Paia, ma aoao e uiga i lo tatou Faaola ma Ona uiga auaumama ma taumafai ia avea faapei o Ia (tagai 3 Nifae 27:27).

O lo tatou Faaola o Iesu Keriso, o le Malamalamo o le Lalolagi, ma o loo talo mai o Ia tatou te mulimuli atu ia te Ia. E tatau lava ona tatou vaavaai atu ia te Ia i taimi uma aemaise pe a i ai po



pogisa ma le matagia pe a tolotolo mai i totonu pei se puaoa sosolo, matagi malolosi o le masalosalo ma le mautonu. Pe a oo ina tusitusilima mai “le isi itu o le vaitafe, [i le meal] o i ai se fale tele ma le ateatea [o tu aii]” (1 Nifae 8:26) ma foliga mai o loo tata’i atu oe i le uiga o le faatauem, ta’ufaatauvaina, ma talotalo mai, ou te talosaga atu ia vave ona e faliu ese ina ia le faatauanauina oe i auala taufaasese ma faatogafiti e aveesea ai oe lava mai le upumoni ma ona faamanuiaga.

E ui o le vave ona faliu ese o le a fesoasoani, ae o le a le lava lena mea i nei ona po aua o loo tautalagia, tusitusia, ma faalialia mea mataga. Na aoao mai i tatou e Elder Robert D. Hales, “Vagana ua tatou punouai atoatoa e ola i le talalelei—ola ai ma lou ‘loto atoa, manatu, mafaufau ma le malosi atoa’—e le mafai ona e fatuina se malamalama faaleagaga e lava e tetee atu ai le pogisa” (“Out of Darkness into His Marvelous Light,” *Liahona*, July 2002, 78). O le mea moni, o lo tatou naunau e mulimuli ia Keriso, o le malamalama o le lalolagi (tagai Ioane 8:12), o lona uiga e tatau ona tatou faatinoina Ana aoaoga. E faamalolosia i tatou faaleagaga, mautu, ma puipuia pe a tatou galulue i le afioga a le Atua.

O le tele o le malamalama i o tatou olaga, o le itiiti foi lea o atalafoia. Peitai, e tusa lava foi pe tele le malamalama e siomia ai i tatou ae tatou te aliali atu lava i tagata ma faamatalaga e ta’useseina o tatou talitonuga ma tofotofo ai lo tatou faatuatua. Na tusa e le Apostolo o Iakopo e faapea “o le tofotofoina o lo outou faatuatua e tupu ai le onosai” (Iakopo 1:3). Faatasi ai ma lea malamalamaaga, na aoao mai ai Elder Neal A. Maxwell e faapea “o se soo onosai . . . o le a le te’i lava pe faataumaoia pe a ta’useseina le Ekalesia” (“Patience Brigham Young University devotional, Nov. 27, 1979], speeches.bry.edu).

O le a ai fesili e uiga i le talafasolopito o le Ekalesia ma talitonuga o le a tulai mai. O le mea tatou te liliu e sue ai tali sa’o e moomia ai se faaeteetega tele. E leai se mea e maua mai i le sailia o manatu ma lagona o e lava se iloa po o e foi ua leai se talitonuga i le lotu. O le fautuaga sili lava na tuu mai e le Apostolo o Iakopo: “Afai ua leai se poto i so outou, ina ole atu ia i le Atua” (Iakopo 1:5).

O le ole atu i le Atua e tatau ona taimua le suesue ma le faaeteete, aua ua tatou i ai i lalo o se poloaiga e saili “mai totonu o tusi sili ona lelei upu o le poto; . . . saili i le aoaoina, e ala

lava lea i le suesue ma le faatuatua foi” (MF&F 88:118). E tumu nei tusi i le tamaoaiga, na tusa e taitai o le Ekalesia e musuia mai le lagi ma ua aloaiaina, e saogalemu, ma o sikola faatuatuaaina o le talafasolopito o le Ekalesia ma aoaoga faavae. I le fai atu ai o na mea, e leai lava se tusi o na tusi e taea le malualii o le afioga faaalia a le Atua i tusi paia ua faamaonia aloaia. Mai nei itulau manifinifi ua mafiaia i faatofala’iga faaleagaga, ua tatou aoao mai ai upumoni e ala i le Agaga Paia ma faateleina ai le malamalama.

Sa talosagaina e Peresitene Thomas S. Monson, ia “tatou e suesue ma le agaga tatalo ma mafaufau loloto i le Tusi a Mamona i aso taitasi” (“O Le Mana o le Tusi a Mamona,” *Liahona*, Me 2017, 87).

E tele ni tausaga ua mavae, a o avea o se peresitene o le Misiona a Fiti i Suva, sa i ai se aafiaga o ni faifeautalai na toe faamalosia i latou e le mana liua o le Tusi a Mamona. I se aso vevela ma susu le tau, sa taunuutu atu ai ni faifeautalai se toalua i se aiga i le nuu laitiiti i Labasa.

Sa tali mai le tu’itu’i i le faitotoa e se toeaina sa faalogologo a o molimau atu faifeautalai i le moni o le Tusi a Mamona. Na la tuu atu ia te ia se kopi ma valaaulia e fatau ma tatalo ia ona iloa, e faapei o i la’ua, o le afioga ia a le Atua. E puupuu lava lana tali. “O taeao ou te toe foi ai e fagota. O le a ou fatauina a o ou i ai i le sami, ma a ou foi mai, e mafai ona oulua toe asia a’u.”

A o alu o ia, sa faia siitaga, ma i ni nai vайао mulimuli ane, sa toe foi atu se soa fou o faifeautalai e asiasi i le faifaiva. O le taimi lea ua ia fatauina atoa le Tusi a Mamona, sa ia maua se faamaoniga o lona moni, ma sa manao o ia ia iloa atili.

Na faaliliuina lenei alii e le Agaga Paia, o le sa molimauina le moni o upu ttauia i itulau uma o mea na tutupu ma aoaoga faavae ua loa ona aoaoina ma faasaoina mo o tatou aso i le Tusi a Mamona. O faamanuiaga lava ia e tasi o loo avanoa mo i tatou taitoatas.

O le fale o se nofoaga lelei tele lea mo aiga e suesue ai ma fefaaasoai malamalamaaga ttauia mai tusitusiga

paia, o upu a perofeta soifua ma maua ai anomea o le Ekalesia i le LDS.org. O iina o le a e maua ai se anoanoai o faamatalaga e uiga i autu o le talalelei e pei o tala o le Uluai Faaaliga. A o tatou suesue mai tusi sili ona lelei, tatou te puipuia i tatou lava mai ‘aulamu faataumaoi o loo saili e ‘ati’ati o tatou faavae faaleagaga.

E ui i a tatou tatalo uma, suesuega, ma le manatunatu loloto, atonu e i ai lava ni nai fesili e lei taliina, ae e le tatau lava ona avea lena mea ma mea e faaumatia ai le afimumu o le faatuatua lea e momu i totonusi o i tatou. O na fesili o se valaaulia e atiina ae lo tatou faatuatua ma e le tatau ona tuu i ai se faamuamua a o i ai ni o tatou masalosaloga. O le ute lea o le talitonuga faalelotu ia aua nei i ai se tali mautu i fesili uma, aua o le tasi lea o faamoemoega o le faatuatua. I lena manatu, na aoao mai Elder Jeffrey R. Holland e faapea “a alia’e mai na taimi ma oo mai faafitauli, ma a le vave ona maua se vaifofo, *ia taofi mau i mea ua uma ona outou iloa ma tutu malolosi seiā oo mai se isi malamalamā*” (“Le Alii e, ua Ou Faatuatua,” *Liahona*, Meay 2013).

Ua tatou vaaia i lo tatou siomaga le olioli o le anoanoai o e ua tutu malolosi e ala i le faafaileleina pea lava pea o o latou faavae faaleagaga. Ua lava ma totoe lo latou faatuatua ma le usiusitai latou te maua ai le faamoeome sili i lo latou Faaola, ma ua pogai mai iina le fiafiaga sili. Latou te le faapea mai ua latou iloa mea uma, ae ua latou totogiina le tau ia lava ai mea latou te iloa ia maua ai le filemu ma ola ai ma le onosai a o latou saili ia iloa atili. O lea fuaiupu ma lea fuaiupu, ua faamausali ai lo latou faatuatua ia Keriso, ma ua latou tutu malosi atu ai o ni tagatanuu faatasi ma le Au Paia.

Ia tatou ola ina ia le maua se avanoa i le taimi nei po o se isi lava taimi, o aulamu faataumaoi o katepila ua faalalafi, i o tatou togalaau matagofie o loo vaavaaia lelei ina ia mafai ona tatou tutumau “mausalai i le faatuatua ia Keriso, e oo i le iuga” (Alema 27:27). I le suafa o Iesu Keriso, amene. ■



Saunia e Elder Jose L. Alonso
O Le Fitugafulu

Ia Fealofani e Pei Ona Ia Alofa Mai la I Tatou

E ala i le auauna atu ma le faamagaloina o isi ona o le alofa moni, e mafai ona faamaloloina ma tatou te maua le malosi e faatoilalo ai a tatou lava luitau.

I le taimi o le Paseka Mulimuli, na tuuina mai e le Faaola se poloaiga fou i Ona soo, e faapea:

“O le poloaiga fou ou te tuu atu ai ia te outou, Ia outou fealofani; faapei ona ou alofa atu ia te outou, ia fealofani foi outou.

“O le mea lea e iloa ai e tagata uma lava o o’u soo outou, pe afai ua outou fealofani.”¹

Sa tuuina atu i soo a le Faaola se poloaiga fou e faia se isi mea, se mea silisili, ma se mea e sili ona paia. O lenei poloaiga fou ma le valaaulia ua aotele atu i le fuaitau autu “faapei ona ou alofa atu ia te outou.”

O Le Alofa o Le Faatino; O Le Alofa o Le Auauna Atu

“O le alofa o se lagona o le tau-tinoga loloto, popole, ma le alofa. “O le faataitaiga silisili o le alofa o le Atua mo Lana fanau o loo maua i le Togiola Lē Gata a Iesu Keriso.”² “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau.”³ “O le alofa mo le

Atua ma tagata o se uiga lea o soo o Iesu Keriso.”⁴

I ni nai tausaga ua mavae, a o fa tausaga o le atalii ulumatua o le ma atalii, o Jose, sa ia taaalo ai ma lou toalua. A o la talie ma fiafia faatasi, sa fesili atu le atalii o le ma atalii ia te ia, “Tinamatua, e te alofa ia te au?”

Sa ia tali atu ia te ia, “Ioe, Jose, ou te alofa ia te oe.”

Ona ia fai atu lea o se isi fesili ia te ia: “E faapefea ona e iloa e te alofa ia te au?”





Sa ia faamatala atu ia te ia ona lagona ma tau atu foi ia te ia mea uma sa ia faia ma naunau e faia mo ia.

Mulimuli ane, sa faia e lou toalua ia Jose le fesili lea e tasi, e aofia ai lenei fesili ootia: "E faapefea ona e iloa e te alofa ia te au?"

I se tali mama ae faamaoni, na ia faapea mai, "Ou te alofa ia te oe aua ou te lagonaina i totonus o lou loto." O le uiga agaalofa o Jose i lona tinamatua i lena aso ma taimi uma e faaalia ai o le alofa o se tuufaatasiga o amioga e oo lava i lagona loloto.

Na aoao mai le Tupu o Peniamina, "Ma faauta, ua ou tau atu nei mea ia te outou ina ia mafai ona outou aoainina, pe a outou auauna atu i o outou uso-a-tagata, ua nao lo outou auauna atu lava lea i lo outou Atua."⁵

I le lalolagi i le aso o loo i ai le tele o mafatiaga ona o tulaga eseese, o le auina atu o se savali tesia ma se ata malie po o le tuuina i luga o se ata manai a ma faaupuga "Ou te alofa ia te oe" e lelei ma e taua. Ae o le mea

e manaomia ona faia e le toatele o i tatou, o le tuu lea i lalo o a tatou masini feaveai ma, faatasi ai ma o tatou lima ma vae, e fesoasoani atu ai i isi o matua manaomia le fesoasoani. O le alofa e aunoa ma le auaunaga ua pei o le faatuatua e mate e aunoa ma galuega; e le aoga moni lava.

O Le Alofa o Le Faamagalo Atu

O le alofa mama o Keriso, o le alofa le pona lea,⁶ e le gata e uunaia i tatou e galulue ma tuuina atu auaunaga ae ia maua foi le malosi e faamagalo atu ai, e tusa lava po o le a le mea na tupu. Sei ou faasoa atu ia te outou se mea na tupu lea na aafia ai ma suia ai lou olaga. Ua tuuina mai e Ted ma Sharon, o matua o Cooper, ia te au le faatagaga e faasoa atu ai le mea na tupu i lo latou aiga i le silia ma le iva tausaga ua tua-nai atu. O le a ou faamatala atu le mea na tupu mai le vaaiga a Ted, o le tama o Cooper:

O le aso 21 Aokuso 2008, o le aso muamua lea o le aoga, ma o Ivan,

Garrett, ma Logan, o uso matutua e toatolu o Cooper sa i ai uma i le faatali pasi e faatali pasi e o ai. Sa i ai Cooper, e fa tausaga le matua i luga o lana uila, ma sa savali lou toalua o Sharon.

Sa i ai lou toalua i le isi itu o le auala ma sa talo mai ia Cooper e kolosi le auala. I le taimi lava lea e tasi, sa faia lemu ai e se taavale se afega agavale ma alu ai luga o Cooper.

Sa ou maua se valaau mai se tuaoi e tau mai ia te au o Cooper na lavea i se taavale. Sa vave ona aveina atu lau taavale i le faatali pasi e vaai o ia. Sa taoto Cooper i luga o le vao, o loo tauivi e manava, ae sa leai ni manuaga na iloa atu.

Sa ou tootuli i lalo i talaane o Cooper ma fai atu ni mea faamalosiau e pei "O le a lelei. Onosai." I lena taimi sa o mai ai lou taitai vaega o fataulaga sili, o Nathan, ma lona toalua. Sa ia fautuaina le ma tuu atu ia Cooper o se faamanuiaga faaleperisitua. Sa ma tuu o ma lima i luga o le ulu o Cooper. Ou te le manatua mea na ou tau atu i le faamanuiaga, ae ou te manatua manino le i ai o isi i o matou autafa, ma o lena taimi sa ou iloa ai o le a maliu Cooper.

Sa ave atu Cooper e le helikopa i le falemai ae, sa maliu lava. Sa ou lagona le tau mai e le Tama Faalelagi ia te au ua maea ou tiute faalelalolagi ia Cooper ma ua i ai nei Cooper i Lana tausiga.

Sa mafai ona matou faaaluina se taimi ma Cooper i le falemai. Sa saunia e le au faigaluega iina o ia ina ia mafai ona matou siiina o ia ma faamavae ma faataga lo matou faaaluina o le tele o le taimi ma ia, siiina o ia, e pei ona matou mananao ai.

I le agai atu i le fale, sa ma vaai ma lou toalua ua tumu i le faavauvau i le tasi ma le isi ma amata ona talanoa e uiga i le tama lea sa aveina le taavale. Ma te le iloaina o ia, e ui e na o le tasi le magaala le mamao ese sa nofo ai, ma sa i ai totonus o la matou tuaoi o le uarota.

Sa faigata le aso na sosoo ai aua sa matou lofituina atoa uma i le faavauvau. Sa ou faapau ifo i ou tulivae ma tatalo se tatalo sili ona faamaoni ua ou tuuina atu muamua. Sa ou ole atu i le Tama Faalelagi i le suafa o lou Faaola

e aveese lou faavauvau lofituina. Na Ia faia lava.

I le faaiuga o lena aso, sa faatulaga ai e se tasi o fesoasoani i la matou au peresitene o le siteki mo i maua e feiloiat atu i le alii talavou—le avetaavale o le taavale—ma ona matua i le fale o le fesoasoani. Sa ma faatali ma Sharon i le taunu mai o le tama ma ona matua. Ina ua matale le faitotoa, sa ma feiloiat i latou mo le taimi muamua. Sa musumusu mai lou epikopo i lou taliga, “Alu atu ia te ia.” Sa ma opoina ma Sharon

o ia i se o po faalevaega tele. Sa matou fetagisi faatasi mo se taimi na foliga mai o se taimi umi lava. Sa ma tau atu ia te ia sa ma iloa o le mea na tupu o se faalavelave faafuasei moni lava.

Sa o se vasega ia Sharon ma au, le auala na ma lagonaina ai ma o loo ma lagonaina pea. Ona o le alofa tunoa o le Atua, sa mafai ai ona ma uia le ala sao, le ala manino, na o le pau lea o le ala, ma alofa ai i lenei tama talavou lelei.

Sa amata ona matou vavalalata tele ma ia ma lona aiga i le aluga o tausaga.

Sa ia faasoa maia ona taimi sili ona taua ma i maua. Na ma o foi i le malumalu ma ia a o ia sauni mo lana misiona.⁷

Sa iloa e Ted e aunoa ma se masalosalo e alofa lo tatou Tama Faalelagi ia i tatou. Na te silafia o le mafai ona faamagalo atu, ma faasaoloto o ia lava i lena auala, e suamalie e pei o le faamagaloina. E oo mai lenei suamalie mai le mulimuli i le faataitaiga a lo tatou Faataitaiga sili. I le Tusi a Mamona, sa tautino atu Alema i le Faaola: “Ma o le a afio atu o ia, ma mafatia i tiga ma puapuaga ma faaosoosoga o ituaiga eseese uma; ma o le a oo ia te ia nei mea, ina ia mafai ona faataunuuina o le upu ua fai mai, o le a ia ave i ona luga tiga ma ma’i o ona tagata.”⁸

Uso e ma tuafafine, o le tala matagofie lena e uiga i le alofa moni ma le faamagalo atu. E mafai foi ona tatou maua le olioli ma le fiafia pe a tatou auauna atu ma faamagalo atu i isi. E masani ona faapea mai Georgy, o se atalii o se tasi o ou atalii, “O le a le ituaiga o aiga o i ai i tatou?” Ma na ia talia lena fesili, “O i tatou o se aiga fiafia!”


Ua fautua mai Peresitene Thomas S. Monson ia i tatou, e faapea: “Sei o tatou suesueina o tatou olaga ma naunau e mulimuli i le faataitaiga a le Faaola e ala i le agalelei, agaalofa, ma le alofa mama.”⁹

Ou te iloa e alofa lo tatou Tama Faalelagi ma Lona Alo, o Iesu Keriso ia i tatou ma naunau e fesoasoani ia i tatou e galulue a o tatou alolofa i le tasi ma le isi e pei ona La alolofa mai ia i tatou. Ma ou te iloa, e ala i le auauna atu ma le faamagaloina o isi ona o le alofa moni, e mafai ona faamaloloina ma tatou maua le malosi e faatoilalo ai a tatou lava luitau. Ou te molimau atu ai i le suafa o Iesu Keriso, amene. ■

FAAMATALAGA

1. Ioane 13:34–35.
2. “Love,” Gospel Topics, topics.lds.org.
3. Ioane 3:16.
4. “Love,” Gospel Topics, topics.lds.org.
5. Mosea 2:17.
6. Tagai Moronae 7:47.
7. Ua siiina mai ma fetuunaia mai le tusiga e lei lolomiina a Ted Mardesich.
8. Alema 7:11.
9. Thomas S. Monson, “Agalelei, Alofa Mama, ma le Alofa,” *Liahona*, Me 2017, 67.





Saunia e Elder Neil L. Andersen

O Le Korama a Aposetolo e Toasefululua

O Le Siufofoga o le Alii

Ou te molimau atu i lenei konafesi ua tatou faalogo ai i le siufofoga o le Alii. O le suega mo tatou taitoatasi o le auala tatou te tali atu ai.

M uamua lava, o se upu agalelei mo le fanau iti. Ioe, o le sauniga mulimuli lenei, ma o a'u o le failauga faaiu.

Talu ai nei, a o ou asiiasi atu i le Malumalu o Provo City Center, sa ou faamemelo lava i se atavali ua faaigoaina *First Vision from Afar*. Ua faaalia i le atavali le malamalamama ma le mana mai le lagi a o asiiasi ifo le Tama ma le Alo i le Taulealea o Iosefa Samita.

E ui e le o faia se faatusatusaga i le mea paia na tupu lea na amata ai le Toefuataiga, ae e mafai ona ou mafaufau i se vaaiga faapena lea o le a atagia ai le malamalamama ma le mana faaleagaga o le Atua o alu ifo i luga o lenei konafesi aoao ma, i se taunuuga, e sosolo atu ai lena mana

ma le malamalamama i le lalolagi atoa.

Ou te tuu atu la'u tautinoga o Iesu o le Keriso, o loo la taitaia mataupu o lenei galuega paia, ma o le konafesi aoao o se tasi lea o taimi taua tele Na te tuu mai ai faatonuga i Lana Ekalesia ma ia i tatou taitoatasi.

O Le Aoaoina mai Luga

I le aso na faatulaga ai le Ekalesia, sa tofia ai e le Alii Iosefa Samita e avea ma perofeta, tagatavaai, ma aposetolo a le Alii o Iesu Keriso¹ ma fatalai atu i le Ekalesia:

“Ona o lana upu ia outou talia, e pei lava ua mai i lo'u lava gutu, i le onosai ma le faatuatua atoa.

“Ona o le faia o nei mea o le a lē manumalo ai faitotoa o seoli ia te

outou; . . . ma o le a faamataa ese ai e le Alii le Atua mana o le pouliuli mai i o outou luma, ma faia ia luluina le lagi mo lo outou lelei.”²

Mulimuli ane, o uso uma o le Au Peresitene Sili ma le Korama a Aposetolo e Toasefululua sa lagolagoina foi ma faauuina o ni perofeta, tagatavaai, ma talifaaaliga.³

O lenei la, a o tatou feiloai ai i lalo o le taitaiga a Peresitene Thomas S. Monson, tatou te tulimatai atu e faalogo i le “finagalo o le Alii, . . . o le mafaufau o le Alii, . . . o le siufogoga o le Alii, ma o le mana lea a le Atua mo le Olataga.”⁴ Tatou te faalagolago i Lana folafolaga: “Pe i lou lava leo po o i le leo o a'u auauna, ua tutusa lava.”⁵

I le vāvāō ma le fenumiai o lo tatou lalolagi i nei aso, o le faatuatuaina ma le talitonuina o upu a le Au Peresitene Sili ma le Korama a le Toasefululua e taua tele i lo tatou tuputupua'e faaleagaga ma le tumau.⁶

Ua tatou o mai faatasi mo lenei konafesi matagofie. E faiata miliona le Au Paia o Aso e Gata Ai ma isi o faatuatua i le silia ma le 200 atunuu, e tautatala i le silia ma le 93 gagana, o loo auai i nei sauniga pe faiata foi i savali o le konafesi.

Ua tatou o mai ma tatalo ma saunia. Mo le toatele o i tatou, o loo i ai ni popolega e manaomia vave ni tali, ma ni fesili aupito faamaoni. Tatou te mananao ia faafou lo tatou faatuatua i lo tatou Faaola, o Iesu Keriso, ma ia faamalosia lo tatou tomai e tetee atu ai i faaosoosoga ma aloese ai mai mea faalavefau. Ua tatou o mai ina ia aoaoina mai lugā.



O le ata vali First Vision from Afar ua faaaliai ai le mana ma le malamalamama mai le lagi.



Na alu ifo le malamalamama ma le mana faaleagaga o le Atua i luga o le konafesi aoao.



Ua agai atu i le salafa o le lalolagi le mana ma le malamalamama mai le konafesi aoao.



O Le Mafaufau ma le Finagalo o le Alii

Mo le Au Peresitene Sili ma le Toasefululua, o e e masani ona saunoa i konafesi taitasi, o le tiutetauave tele o le sauniaina o a latou savali o se avega fai soo ma se faatuatuaga paia.

I ni tausaga ua mavae, a o lei auauna atu o se Pulega Aoao, sa ou fesili atu ai ia Elder Dallin H. Oaks pe eseese ni ana lauga e saunia mo konafesi taitasi a siteki. Sa ia tali mai e leai ae sa ia faaopoopo mai, "Ae o a'u lauga o le konafesi aoao e ese la. E ono oo atu tusiga faataitai i le 15 i le 20 ia mautinoa ou te ta'u atu mea e finagalo le Alii ou te ta'u atua."⁷

O le a le taimi ma pe faapefea ona oo mai musumusuga mo se lauga o le konafesi aoao?

Faatasai ai ma ni autu e lei atofaina, matou te vaiaia le tuufaatasiga matagofie faalelagi o mataupu ma autu o upumoni e faavavau i konafesi taitasi uma.

Sa ta'u mai e se tasi o le Usoga ia te a'u o lana mataupu mo lenei konafesi sa tuu atu ia te ia i le taimi lava

na maea ai lana lauga ia Aperila talu ai. Sa ta'ua e le isi uso i le tolu vaiaso talu ai, sa ia tatalo pea ma faatalitali i le Alii. O le isi ina ua fesiliglia, po o le a le umi e tusia ai se lauga e faapitoa le maaleale, sa tali mai, "Luasefululima tausaga."

E i ai taimi e oo vave mai ai se manatu autu, ae o le anotusi ma auililiga e manaomia ai pea se tauiviga tele faaleagaga. O le anapogi ma le tatalo, suesue ma le faatuatua, o vaega lava ia o le faagasologa. E le finagalo le Alii i ni manatu faafoliga e faaitiitia ai Lona siufogoga i Lana Au Paia.

E tele ina oo mai le taitaiga mo se lauga o le konafesi aoao i le po po o le vaveao, a o mamao ese le lauga mai manatu o le mafaufau. E faafusei lava, ona tafe mai i nisi taimi ia malamalamaaga sa lei faamoemoeina, o upu ma fuaitau patino, o se faaaliga paia.⁸

A o e faalogologo, atonu e matua saolele lava savali e te mauaina, pe ono faapatinoina foi mo na o oe lava.

I le lauga ai i le tele o tausaga ua

tuanai i se konafesi aoao, sa ou faamatalaina ai se fasifuitau na oo mai i lo'u mafaufau a o ou tuufesili pe sa ou saunia e auauna atu i se misiona. O le fasifuitau "E te le iloa mea uma, ae ua lava mea ua e iloa!"⁹ Sa i ai se tamaitai talavou sa nofo ai i le konafesi aoao i lena aso sa fai mai ia te a'u sa ia tatalo mo se talosaga a se alii e fia faaipoipo ia te ia, sa ia tuufesili ai po o le a le lelei o lona iloaina o lea alii talavou. Ina ua ou tautala i upu "E te le iloa mea uma, ae ua lava mea ua e iloa," sa faamautu atu e le Agaga ia te ia ua *lava* lona iloaina lelei [o le alii lea]. Ua la faaipoipo ma le fiafia mo le tele o tausaga.

Ou te folafola atu a e saunia lou agaga, ma e sau ma tulimatai atu o le a e faalogo i le siufogoga o le Alii, o le a oo atu manatu ma lagona i lou mafaufau ua faapatinoina faapitoa lava mo oe. Ua uma lava ona e lagonaina i lenei konafesi, pe o le a e lagonaina foi, pe a e suesueina savali i ni vaiaso o lumanaei nei.



Mo le Taimi Nei ma Masina o i Luma Atu
Na saunoa mai Peresitene Monson:
“Faaalu se taimi e faitau ai savali o le konafesi.”¹⁰

“Mafaufau loloto [i ai]. . . Ua ou iloa . . . e tele atu isi mea ou te mauaina mai nei lauga musuia pe a ou suesue i ai i se tulaga e loloto atu.”¹¹

O aoaoga o le konafesi aoao o mea ia ua finagalo le Alii tatou te mafaufau loloto i ai i masina o i luma.

O le leoleo mamoe “e muamua atu [i ana mamoe], ona mulimuli atu ai lea o mamoe ia te ia: aua ua latou iloa lona leo.”¹²



I le 1979, sa ia Dr. Nelson se lagona e tatau ona ia mulimuli i le fautuaga a Peresitene Spencer W. Kimball e suesue i le faaSaina Meniterini.

E tele lava ina taitai atu e Lona siufofoga i tatou e sui se mea i o tatou olaga. Ua Ia valaaulia i tatou ia salamo. Ua Ia valaaulia i tatou ia mulimuli atu ia te Ia.

Mafaufau i saunoaga nei mai lenei konafesi:

O Peresitene Henry B. Eyring mai lenei taeao: “Ou te tuu atu la’u molimau o loo soifua le Atua le Tama ma e finagalo ia tou toe foi atu i le aiga ia te Ia. O le Ekalesia moni lenei a le Alii o Iesu Keriso. Na te silafia oe; e alofa o Ia ia te oe; ma o loo leoleo o Ia ia te oe.”¹³



O le manao a Dr. Nelson e mulimuli i le fautuaga a Peresitene Kimball na taitai atu ai i le asiasiga a Dr. Wu Yingkai i le Aai o Sate Leki ma i le tuuina atu e Dr. Nelson o aoaoga ma le faatinoina o togafitiga i Saina.

O Peresitene Uchtdorf mai ananafi: “Ou te molimau atu a tatou amatalia pe faaauau foi i lenei malaga maoae lea e tau atu i le Atua, o le a lelei atili o tatou olaga . . . ma o le a faaaogaina i tatou e le Alii i ni auala ofoofogia e faamanuiaina i latou o siomiaina i tatou, ma faataunu Ona faamoemoega e faavavau.”¹⁴

O Peresitene Nelson mai ananafi i le afiafi: “Ou te folafola atu a e faatofuina oe lava ia i le Tusi a Mamona i aso taitasi, e mafai ona puipuia oe mai mea leaga o le aso, e aofia ai le mala faataumaoi o ponokalafi ma isi vaisu ua punitia ai le mafaufau i mea faaleagaga.”¹⁵

O Elder Oaks mai ananafi: “Ou te molimau atu o le folafolaga i le aiga o se malelega o upumoni e faavavau, o le finagalo lea o le Alii mo Ana fanau o loo sailia le ola e faavavau.”¹⁶

Ma Elder Ballard mai i ni nai minute ua tea: “E tatau ona tatou taliaina ma le agaalofo fanau a le Atua ma tafiesea soo se faaituau, e aofia ai le failogalanu, failogaga tagata, ma le manatu faapito.”¹⁷

Ona o loo i ai sa tatou minute faaopoopo, ou te fia faaopoopo atu se manatu puupuu e uiga ia Elder Robert D. Hales. Sa tau atu e le Au Peresitene Sili ia Elder Hales e mafai ona ia tuuina atu se savali puupuu i le sauniga o le taeao o le Aso Sa pe a faatagaina e lona soifua maloloina. E ui sa le faatagaina e lona soifua maloloina, sa ia saunia se savali, lea sa ia faamaeaina i le vaiaso ua tea ma faasoa maia ia te au. I le tauina mai o



Ia Oketopa 2015, sa faamamaluina ai Peresitene Russell M. Nelson i se malelega aloaia, na faaigoaina ai o ia o se “uo ua leva a Saina.”



lona maliu pe tusa ma le tolu itula ua mavae, ou te faasoa atua na o le tolu laina mai i lana saunoaga.

I le siiina mai ia Elder Hales: "A tatou filifili e maua le faatuatua, ua saunia i tatou e tutu i le afioaga o le Atua. . . . I le mavae ai o le Faasatauroga o le Faaola, e na o i latou 'na faamaoni i le molimau ia [te Ia] a'o i soifua i latou i la le tino' sa Ia faaali mai i ai. MF&F 138:12.] O i latou 'na teena molimau . . . a . . . perofeta [sa le mafai] na vaai [i le] mamalu [o le Faaola], pe na vaai i ona fofoga.' [MF&F 138:21.] . . . O lo tatou faatutua e saunia ai i tatou ina ia i ai i le afioaga o le Alii."

E maeu le agalelei o le Alii e uunaia Peresitene Russell M. Nelson i le faaiuga o le sauniga o lenei taeao e malaga ese faatopetope mai le fale, faamisi lana taumafataga o le aouli, ma nanati atu i talaane o le moega a Elder Hales, e mafai ai ona ia tauunu atu ma i ai iina, o lona peresitene o le korama, faatasi ai ma Mary Hales lalelei a o faauu ai Elder Hales mai le olaga faaletino.

Tali atu i le Siufogfa o le Alii

Ou te molimau atu, i lenei konafesi ua tatou faalogo ai i le siufogfa o le Alii.

E le tatau ona tatou atuatuvale pe a feteenai upu a auauna a le Alii ma manatu o le lalolagi, ma o nisi foi taimi, e feteenai ma o tatou lava manatu. O le auala lava lenei e i ai i taimi uma. Matou te tootutuli i totonus o le malumalum faatasi ma le matou Usoga. Ou te faamaonia le lelei o o latou agaga. O lo latou manao silisili o le faafafiaina lea o le Alii ma fesoasoani i fanau a le Atua ia toefoi atu i Lona afioaga.

O Fitugafulu, o Au Epikopo, o le Aualofa, Tamaitai Talavou, Peraimeri, ma isi taitai o ausilali ua faaopoopoina musumusuga maoae i lenei konafesi, ma ua faapena foi i musika matagofie ma tatalo musuia.

O loo i ai se oa natia o le taitaiga faalelagi o loo faatalitali mo lou mauaina i savali o le konafesi aoao. O le suega la mo i tatou taitoatas i le auala tatou te tali atu ai i mea tatou te faalogo i ai, o mea tatou te faitau i ai, ma mea tatou te lagonaina.

Se'i o'u faasoa atua se aafiaga e uiga i le tali atu i upu faaperofeta mai le soi-fuaga o Peresitene Russell M. Nelson:

I le 1979, lima tausaga a o lei valaauna o se Pulega Aoao, sa auai ai Uso Nelson i se fonotaga a o lumai ai le konafesi aoao. "Sa lu'iina ai e [Peresitene Spencer W. Kimball] tagata uma na auai ia faauumi a latou laa i le avatuga o le talalelei i le lalolagi atoa. Faatasi ma isi atunu na ta'ua faapitoa e Peresitene Kimball o Saina, ma tau-tino mai, 'E tatau ona tatou auauna atu i tagata Saina. E tatau ona tatou aoaoina le latou gagana. E tatau ona tatou tatalo mo i latou ma fesoasoani ia i latou.'"¹⁸

I le 54 tausaga, sa maua ai e Uso Nelson se lagona i le taimi o le sauniga e tatau ona ia suesueina le gagana Meneterini. E ui o se fomai tipitipi pisi mo le fatu, ae sa vave ona ia maua le auaunaga a se faiaoga.

E lei leva talu ona amata ana suesuega, ae auai atu Dr. Nelson i se fonotaga tele ma sa nofo ai ma e lei faamoemoeina i talaane o "se fomai tipitipi iloga a Saina, Dr. Wu Yingkai.

. . . . Ona sa suesueina e [Uso Nelson] le Meneterini, o lea sa amata ai [se] talanoaga [ma Dr. Wu]."¹⁹

O le manao o Dr. Nelson e mulimuli i le perofeta na taitai atu ai i le asiasiga a Dr. Wu i le Aai o Sate Leki ma le malaga atu o Dr. Nelson i Saina e fai ni aaoaga ma faatino ni taotoga.

O lona alofa mo tagata Saina, ma lo latou alolofa ma le faaaloalo mo ia, sa faatupulaia.

Ia Fepuari 1985, sefulu masina talu ona valaauna o ia i le Korama a le Toasefululu, sa maua ai e Elder Nelson se telefoni faateia mai Saina o loo aioi mai ia Dr. Nelson e alu atu i Beijing e fai se taotoga mo le fatu ua faaletonu o le tagata pese opera sili ona lauiloa i Saina. Faatasi ai ma le faamalosiauga a Peresitene Hinckley, sa toefoi atu ai Elder Nelson i Saina. O le taotoga mulimuli lava na ia faia o totonus i le atunu o Saina.

Na o le lua tausaga talu ai, ia Oketopa 2015, sa toe faamamaluina ai foi Peresitene Russell M. Nelson i se malelega aloaia, na faaigoaina ai o ia o se "uo ua leva a Saina."

Ae o ananafi, sa tatou faalogo ai ia Peresitene Russell M. Nelson ua 93 nei tausaga le matua na saunoa e uiga i le augani a Peresitene Thomas S. Monson ia i "tatou taitoatasi [i le konafesi ia Aperila talu ai] ia suesue ma le agaga tatalo ma mafaufau loloto i le Tusi a Mamona i aso taitasi."

E pei lava ona sa ia faia a o avea ma se fomai tipitipi pisi, ina ua ia totogina se faiaoga Meneterini, sa vave ave foi e Peresitene Nelson le fautuaga a Peresitene Monson, ma faaaoga i lona lava olaga. E sili atu nai lo le tau na ona faitau, sa ia saunoa ai sa ia "faia ni lisi o mea e uiga i le Tusi a Mamona, o mea e na te *faamautuina*, o mea na te *faamaoniaina*, o mea na te *faataunuina*, o mea na te *faamaninoina*, ma mea na te *faaalia mai*."²⁰

O le mea e mata'ina ai, i le avea ma se molimau lona lua, sa saunoa ai foi Peresitene Henry B. Eyring i lenei taeao e tusa ma lona tali atu i le apoapoaiga a Peresitene Monson. Tou te manatua upu nei? "E pei foi o le toatele o outou sa ou faalogo i upu a le perofeta o le siufogaga lava lea o le Alii ia te a'u. Ma e pei foi o le toatele o outou, sa ou filifili ai e usitai i na upu."²¹

Tau ina ia tatou vaai atu i nei mea o ni faataitaiga mo o tatou lava olaga.

O Se Folafolaga ma se Faamanuiaga

Ou te folafola atu ia te oe a o e faafogaga i le siufogaga o le Alii ia te oe i aoaoga o lenei konafesi aoao, ona faatino lea o na uunaiga, o le a e lagonaina le aao o le lagi i ou luga, ma o le a faamanuiaina ai lou olaga ma olaga o isi o loo siomiaina oe.²²

I lenei konafesi, ua tatou mafaufau ai lava i lo tatou perofeta pele. Matou te alolofa ia te oe, Peresitene Monson. Ou te faamaea atu i ana lava upu na tuuina atu mai lenei pulelao. Ou te talitonu o se faamanuiaga e finagalo o ia e tuuina mai ia i tatou taitoatasi i le aso, pe ana mafai ona ia faatasi ma i tatou. Ua ia saunoa mai: "A o tatou tuua ai lenei konafesi, ou te talosagaina faamanuiaga o le lagi i o outou luga taitoatasi. . . . Ou te tatalo ia faamanuiaina outou ma o outou aiga e lo tatou Tama Faalelagi. Ia avea savali ma le agaga o

lenei konafesi ma foliga vaiaia o mea uma tou te faia—i o outou aiga, i tou galuega, i tou fonotaga, ma i a outou feoauga uma."

Sa ia faaiuina: "Ou te alofa ia te outou Ou te tatalo mo outou. Ia faamanuia le Atua ia te outou. Ia i ai Lona filemu folafolaina faatasi ma outou i le aso ma aso uma."²³

I le suafa, o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 21:1.
2. Mataupu Faavae ma Feagaiga 21:5–6.
3. Sa tusia e Iosefa Samita o le mea lenei na tupu i le faapaiaga o le Malumalu o Ketelani i le aso 27 o Mati, 1836:

"Ona ou faia lea o sina tautalaga puupuu, ma valaau atu i nai korama, ma le faapotopotoga atoa o le Au Paia, ia faamamaluina le Au Peresitene [Sili] o ni Perofeta ma Tagatavaai, ma lagolagoina i latou i a latou tatalo. Sa latou osifeagaiga uma ia faia faapena, e ala i le tutula'i ae.

"Ona ou valaau atu lea i korama ma le faapotopotoga a le Au Paia ia faamamaluina Apostetolo e Toasetulua, sa i ai iina, o ni Perofeta, Tagatavaai, ma Talifaaliga, ma o ni molimau faapitoa i malo uma o le lalolagi, o loo umiaina ki o le malo, ina ia tatalaina, ma faia ia faataunuua, ia i latou, ma lagolagoina i latou e ala i a latou tatalo, lea na latou ioe i ai e ala i le tutula'i" (*Aoaoga a Peresitene o le Ekalesia: Iosefa Samita* [2007], 199).

4. Mataupu Faavae ma Feagaiga 68:4.
5. Mataupu Faavae ma Feagaiga 1:38.
6. Na saunoa Peresitene Henry B. Eyring i se tasi taimi:

"O le filifiliga e aua nei talaina fautuaga faaperofeta e suia ai le faavae o loo tatou tutu ai i luga. O le a matuai sili lava ona matautia. O le le mafai ona talaina fautuaga faaperofeta e faaititia ai lo tatou malosiaga e talaina ai fautuaga musuia i le lumanaui. O le taimi sili lava na faia ai le faaiaga e fesoasoani ia Noa e fau le vaa o le taimi muamua lava sa ia fesili ai. O taimi uma sa ia fesili ai i le mavae ai o lena taimi muamua, o toilalo taitasi e tali atu semanu e faaititia ai le nofouta i le Agaga. Ma o taimi uma la sa foliga mai o lana talosaga sa sili atu ona faavalevaleda, seia oo ina timu mai. Ae sa fai lava si tuai.

"O taimi uma i lo'u olaga pe a ou filifili ai e faatuatui ona mulimuli i se fautuaga musuia pe filifili faapea e le aofia ai au, sa oo ina ou iloa ai sa ou tuuina au lava i se ala e pagatia ai. O taimi uma lava na ou faalogo ai i fautuaga a perofeta, ma lagonaina le faamautuina i se tatalo, ona mulimuli lea i ai, na ou iloa ai lou agai atu i le saogalemu" (*Mauaina o le Saogalemu i Fautuaga*, *Ensign*, May 1997, 25).

7. Tagai Neil L. Andersen, "Teaching Our Children to Love the Prophets," *Ensign*, Apr. 1996, 47.
8. Sa saunoa mai Boyd K. Packer i se tasi taimi:

"Sa ou faalogo e amata e Peresitene Harold B. Lee le tele o faamatatalaga e uiga i mataupu e aofia ai faaaliga ma se faailoa atu o se mea e faapenei: 'I vaveao, a o ou mafaufau loloto e uiga i lena mataupu . . .' Sa ia avea o se faiga le galue ai i itula fou ma mataala o le taeao po i faafitali lea na manaomia ai le faaaliga.

"Sa silafia e le Alii se mea ina ua ia faatonuina i le Mataupu Faavae ma Feagaiga, 'Tuu le faapaiē; tuu le lē mamā, tuu le fai pona o le tasi i le isi; tuu le moe umi atu nai lo le mea e tatau ai; vave momoe, ina ia outou lē vaivai; alapo a'e, ina ia olaola o outou tino ma o outou mafaufau.'" (MF&F 88:124.) . . .

"Sa ou aoaoina le mana o le manatu, 'Vave ona moe, vave ona ala.' Pe a ou lagona le mamafatu, e te le maua au o faamumuina le sauuu i le vaeluapo. E sili atu ia te au le vave ona moe ma vave ona ala i le vaveao, lea e mafai ona ou latalata ai ia te la o loo tatalaina lenei galuega" (*Teach Ye Diligently* [2005], 244–45).

9. Neil L. Andersen, "Ua Lava Mea Ua E Iloa," *Liahona*, Nov. 2008, 13.
10. Thomas S. Monson, "Seia Tatou Toe Feiloi," *Liahona*, Me 2014, 115.
11. Thomas S. Monson, "Seia Tatou Toe Feiloi," *Liahona*, Nov. 2012, 110.
12. Ioane 10:4.
13. Henry B. Eyring, "Fear Not to Do Good," *Liahona*, Nov. 2017, 103.
14. Dieter F. Uchtdorf, "A Yearning for Home," *Liahona*, Nov. 2017, 22, 24.
15. Russell M. Nelson, "The Book of Mormon: What Would Your Life Be Like without It?" *Liahona*, Nov. 2017, 63.
16. Dallin H. Oaks, "The Plan and the Proclamation," *Liahona*, Nov. 2017, 30.
17. M. Russell Ballard, "The Trek Continues!" *Liahona*, Nov. 2017, 106.
18. Spencer J. Condrie, *Russell M. Nelson: Father, Surgeon, Apostle* (2003), 215.
19. Spencer J. Condrie, *Russell M. Nelson*, 215.
20. Russell M. Nelson, "The Book of Mormon: What Would Your Life Be Like without It?" 61.
21. Henry B. Eyring, "Fear Not to Do Good," 100.
22. Sa saunoa mai Peresitene Gordon B. Hinckley i se tasi o aso:

"O le a oo mai le tofotofoina i le faaogaina o aoaoga ua tuuina mai. Afai, e amata atu i lenei taimi, ona tatou agalelei teisi atu, afai tatou te faauo teisi atu, afai ua tatou latalata teisi atu i le Faaola, faatasi ai ma se tautinoga malosi atu e mulimuli i Ana aoaoga ma Lana faataitaiga, o le a avea lenei konafesi o se mea aoga matagofie. Ae afai, i se isi itu, e leai se alualu i luma i o tatou olaga, ona faapea lea ona toilalo le toatele o i latou na saunoa atu.

"Atonu e le mafuatia na suiga i se aso po o se vaiaso po o se masina. O tautinoga e vave lava ona fai ma e vave foi ona gal. Ae peitai, i se tausaga mai i le aso, afai tatou te faia ai ni mea lelei atu nai lo o mea na tatou faia i le taimi ua tuanai, o le a le maimaua ia taumafaiga o aso nei" ("An Humble and a Contrite Heart," *Ensign*, Nov. 2000, 88).

23. Thomas S. Monson, "A Word at Closing," *Liahona*, May 2010, 113.

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoo, e mafai ona faaaoga i suesuega a le tagata lava ia, aafiai faaleaiga, ma isi aaoaga. O le numera o loo faasino i le itulau muamua o le lauga.

Failauga	Tala
Jose L. Alonso	(119) Ua fesiliglia e le atalii o le atalii a Jose L. Alonso le alofa o lona tinamatua mo ia. O matua e ona le atalii na maliu i se faalavelave faafuasei na aveesea le avega mamafa mai ia i laua e ala i le faamagalo atu.
Neil L. Andersen	(122) Ua fesoasoani le Agaga Paia i se tamaitai talavou e talia se talosaga mo se faaipoipoga. Ua faamanuaina e Russell M. Nelson tagata Saina auia sa ia mulimuli i le fautuaga faaperofeta.
Ian S. Ardern	(117) Na maua e se alii fagota se molimau o le Tusi a Mamona a o i ai i le sami.
M. Russell Ballard	(104) Na tumau Jane Manning James le paonia Au Paia o Aso e Gata Ai i le faatuatua e ui i luitau. Ua auauna atu ma le faamaoni matua o matua matutua o M. Russell Ballard mo le tele o tausaga.
Jean B. Bingham	(85) Ua taulotoina e Jean B. Bingham le "O Le Keriso Soifua." Ua malaga atu se tamaitai Kalaotia i le malumalu ina ia faamauina i lona toalua ua maliu ma [ona] matua.
Tad R. Callister	(107) Ua toe foi mai se uo a Tad R. Callister i le Lotu i le mavae ai o le mauaina o se molimau o le Ekalesia ma le Tusi a Mamona.
D. Todd Christofferson	(36) Ua salamo se peresitene o le misiona ma sua lona loto i le mavae ai o se miti.
Quentin L. Cook	(51) Ua faia e Heber C. Kimball se misiona i Egelani. A o feiloai ai ma Thomas B. Marsh, na mauaina e losefa Samita le Mataupu Faavae ma Feagaiga vaega e 112.
Stanley G. Ellis	(112) Ua faamalosia e se tama ma se tina a la fanau e ala i le fesoasoani atu ia i latou i mea tautupe ina ua maea le aoga maualuga.
Sharon Eubank	(6) Ua suaia e se tamaitai le ala o lona aiga e ala i le salamo. Ua faasaoina e se filifili o tagata le au auu i se galu malosi. Ua tesia atu tamaitai talavou i se teineitiiti na masii mai i totomu o le latou uarotu.
David F. Evans	(68) Ua maua e David F. Evans Talavou tali i fesili o le talalelei ma maua se molimau o le Tusi a Mamona. Ua maua e se tamaitai se molimau o sauniga o le malumalu.
Henry B. Eyring	(81) Ua valaaulua e se failautusi o le korama a le au tiakono se tama e le toaga i le lotu. Ua tatalo se talavou matua o le a musuia Epikopo Henry B. Eyring i le tuuina atu ia te ia o le fautuaga. Ua molimau Polika laga i le valaauga faaperofeta a losefa Samita. (100) Ua faamanuaina Henry B. Eyring mo le usitaia o le fautuaga a Peresitene Monson e suesue le Tusi a Mamona. Ua fesoasoani Au Paia o Aso e Gata Ai i tagata na aafia i le faalavelave.
O. Vincent Haleck	(58) Ua faia e se ulugalii matutua le osigataulaga e auai i le Ekalesia. Ua tatala atu e se matai Samoa le talalelei i lona nuu. Ua tuuina atu e Au Paia Samoa o latou "manao" e fausia se malumalu.
Donald L. Hallstrom	(88) Ua faasaoina faavavega mai se tagata o le Ekalesia i Kalefonia i se pau mai se tofe. Ua fesili atu David A. Bednar i se alii talavou pe o ia te ia le faatuatua "e le malolo ai."
Jeffrey R. Holland	(40) I se tala na saunia e Leo Tolstoy, na puipua ai e se ositaulaga e le atoatoa le ala na ia mulimuli ai ma le le atoatoa.
Joy D. Jones	(13) Ua faamautinoa mai e le Agaga Paia i tamaitai e toatolu o latou taua paia o ni afafine o le Atua.
Joni L. Koch	(110) Ua "lagona le lotogatasi" e Joni L. Koch faatasi ai ma se tagata tapuai soka a Pasila. Ua filifili le tama o Joni L. Koch "e tumau ai i le lotogatasi" ma Au Paia e ui na tauemuina.
Neill F. Marriott	(10) Ua tau atu e tama Peraimeri i se tagata tuuatoatasi o le vasega le mafuaaga e taua ai o ia. Ua tatalo Neill F. Marriott mo le fesoasoani e alofa ai i se tagata "faigata" o le aiga.
Richard J. Maynes	(75) Ua aoao e Richard J. Maynes mai i lona tama ia aua nei fetuunaia lona amiosao.
Russell M. Nelson	(60) Ua tuuina atu e Russell M. Nelson se Tusi a Mamona i se tupu Aferika. Ua mulimuli Russell M. Nelson i le fautuaga a Peresitene Monson e suesue le Tusi a Mamona. O se tagata nuu [fomai] tipitipi, na manao Russell M. Nelson e aoao atu i tagata faavauvau o le aiga o le oti o se vaega o lo tatou olaga.
Bonnie L. Oscarson	(25) Ua vaavaai e se 10-tausaga ma se 17-tausaga ni auala e auauna ai i tagata o le aiga. Ua maua e se peresitene o le Aualofa se uunaiga e auauna atu i lona tuaoi.
Stephen W. Owen	(48) Ua iloaina e Stephen W. Owen faifeautalai fou "na maua le faatuatua i le salamo." Ua galue se faifeautalai ua foi mai le misiona e tausia o ia lava "i le ala sao."
Adilson de Paula Parrella	(115) Ua aoao atu e faifeautalai le aiga o Parrella e mafai ona latou faatasia e faavauvau. O se tamaitiiti aoga i le kolisi, na mulimuli Adilson de Paula Parrella i le fautuaga faaperofeta e saili se ava.
John C. Pingree Jr.	(32) Ua auauna atu se tagata o le Ekalesia mai Nepal i tagata sulufai Nepalese i luta ma fesoasoani e faaliliu le Tusi a Mamona i le faaNepali. Ua fesoasoani le Agaga Paia ia John C. Pingree Jr. ia malamalamana i le faomoemoega o "tofiga paia." E galue le Alii e ala i meaalofa faaleagaga ma tofotofoga e faamanuia ai Lana fanau.
Ronald A. Rasband	(55) Ua olioli le afafine o fanau a fanau a Ronald A. Rasband i se feiloaiga faamomolito ma lona tuagane i lana misiona. Ua feiloai Ronald A. Rasband i se faifeautalai tamaitai i le Lotoa o le Malumalu o le sa ia fesoasoani i ai e aumai i le Ekalesia.
Dale G. Renlund	(64) E olioli Dale G. Renlund i le toefuataiga o faamanuiga faaleperisitua a se alii talavou.
Gary E. Stevenson	(44) Ua faamanatu e Au Paia le aso soifua o Peresitene Monson. O se gasetoto o le la i le lunaite Setete na gauai atu i ai le miliona o tagata.
Dieter F. Uchtdorf	(21) O se taifau na leiloa na savali mo le 2,000 maila (3,220 km) i le aiga. O taitai anamua o le Ekalesia e avea ma tagata moni ia Dieter F. Uchtdorf i le taimi o se asiasiga faaleaiga i nofoaga fasolopito o le Ekalesia.
W. Christopher Waddell	(94) O se malologa faaleaiga o Waddell sa lei taunu e pei ona fuafuaina. Ua tuua e se Au Paia o Aso e Gata Ai na po le vaai i le taimi o le Taua Lona II se talatuu o le faatuatua, auaunaga, ma le faalagolago i le Alii.
W. Craig Zwick	(97) Na fesoasoani le Agaga Paia ia W. Craig Zwick e malamalamana i manaoga o se faifeautalai e leiloa faiatau. O se taulaiga a se atalii i le Faaola a o lei oo ina maliu o ia na fesoasoani i lona aiga e vaai atu ma le olioli i le isi olaga. Ua faatumulia se ava i le alofa i le mavae ai o lona aveesea o lagona le lelei i lana tane.



Elder Juan A. Uceda

Au Peresitene o Fitugafulu

Ao savali sopo i mea na faaleagaina o Machu Picchu i Peru o se faifeautalai talavou, sa see ese ai Elder Juan A. Uceda mai le auala vaiti. I le pipii mau ai ma le naunautai i ni lala na tautau i le 2,000 futu (610 m) i luga ae o se vaitafe, sa ia tatalo faatauanau mo se fesoasoani. Sa ia tatalo i le amataga o lena aso ma ona laugutu, o lana tala lea, ae “ina ua tauau ina fano, sa ou tatalo mai le loto.” O le taimi lava sa toetoe a pau ai, sa toso ae ai o ia e se isi faifeautalai i le saogalemu.

O se tasi o le tele o lesona sa ia aoaoina i lena aso o le “ia tatalo pea, tatalo pea ‘ma le loto faamaoni, ma le manatu moni i ai, [faatinoina] o le faatuatua ia Keriso’ (Moronae 10:4).”

Sa lagolagoina Elder Uceda o se Fitugafulu o le Pulega Aoao i le aso 3 o Aperila, 2010. Sa ia auauna atu o se Faatonu Sili Lagolago i le Matagaluega a Faifeautalai ma o se Fesoasoani Eria o Amerika Matu Sautesasae ina ua valaauiina o ia i le Au Peresitene o Fitugafulu i le aso 1 Aokuso, 2017.

Mai le 2010 i le 2013 sa ia auauna atu o se fesoasoani i le Au Peresitene o le Eria o Amerika i Saute Matuisisifo, ma mai le 2013 i le 2016 sa ia auauna atu o le Peresitene o le Eria o Amerika i Saute Matuisisifo.

Sa aotauina Elder Uceda i Peru. Sa ia lesitala i le Inisitituti o Jose Carlos Mariátegui i Lima, lea sa ia suesue ai i tomai faatausitusi ma le va i fafo. Sa ia aoga i pulega o pisinisi i le Inisitituti o Centro Andino de G.E. Institute. O ia sa faauu mai i le Iunivesite o San Luis Gonzaga, lea sa ia maua ai se faailoga o le matuaofaiva i le sootaga ma le va i fafo.

Sa galue Elder Uceda i le Matagaluega a Aoga a le Ekalesia o se faatonusili o le eria mo Peru ma Bolivia. Sa ia tuua Peru i le 2003 e masii atu i New Jersey, ISA, e fesoasoani i lona tama i lo latou pisinisi o le aiga.

Talu mai le auai i le Ekalesia i le 1972, sa auauna atu Elder Uceda i le tele o valaauga, e aofia ai o se faifeautalai faamisiona i le Misiona o Lima Peru, au peresitene o le Aoga Sa a le siteki, epikopo, fautua maualuga, fesoasoani i se au peresitene o le siteki, peresitene o le siteki, peresitene o le Misiona o Lima Peru i Matu (1992–95), ma le Fitugafulu Eria.

Sa ia faaipoipo ia Maria Isabel Bendezu ia Mati 1979.

O i laua o ni matua o se fanau e toalima. ■



Elder Patrick Kearon

Au Peresitene o Fitugafulu

Ao auauna atu o se Peresitene o le Eria o Europa, sa molimauina e Elder Patrick Kearon le malaga a tagata sulufai e toa lua miliona mai Sasae Tutotonu na faatamaia e le taua i le saogalemu i Europa. “Ina ua maea ona vaai i o latou fofoga ma faalogo i o latou tala, o o latou matata’u na latou sosola ese mai ai ma le malaga lamatia e saili se sulufaiga, o le a ou le toe avea ma tagata na i ai muamua,” o lana tala lea. “E musuia le molimauina o mea ua foai ma le limafoai e tagata o le Ekalesia mai le lalolagi e fesoasoani ai i nei tagata ma aiga o e ua aveesea le tele o mea.”

O Elder Kearon, sa lagolagoina o se Pulega Aoao o Fitugafulu i le aso 3 Aperila, 2010, sa valaauiina i le Au Peresitene o Fitugafulu i le aso 1 Aokuso, 2017.

Sa soifua mai Elder Kearon i Carlisle, Cumberland, i Egelani, ia Iulai 1961, ia Paddy ma Patricia Kearon. A o tautua lona tama i le Ea fosi a le British Royal, sa a’otauina Elder Kearon i Sasae Tutotonu ma le Malo o Peretania.

A o suesue i le Ekalesia, sa ia tau ai i se mau i le Tusi a Mamona lea e faitauina faapea, “Ua ola tagata ina ia latou maua le olioli” (2 Nifae 2:25). “Na tagitagi pea lena mau i o’u taliga,” o le saunoaga lea a Elder Kearon. “Na ou vaaia ia i latou na ou feiloi i ai, le auala e matua faaleleia ai o tatou olaga e ala i le mulimuli i aoaoga a le Faaola ina ia loto tetele.” Sa ia auai i le Ekalesia i le Vaeluapo o le Kerisimasi o le 1987.

Sa la feiloi ma Carole Hulme a o aoga Carole i Egelani ma le Iunivesite o Polika Iaga. Sa la faaipoipo i le Malumalu o Kalefoni Oaklana i le 1991, ma aumau ai i Egelani seia oo i lana valaauga i le 2010. O i la’ua o matua o se fanau e toafa.

Sa ia nofo ma galue ai i le Malo Aufaatasi, Saudi Arabia, ma le Iunaite Setete i pisinisi esesee, e aofia ai tausiga faalesoifua malololina, meaai, femalagaaiga, ma pisinisi tautaavale, ma faia sana ia lava kamupani tau fesootaiga. O lona auai i le lotoifale ma faalenuu na aofia ai auaunaga i puleaga o auaunaga alofa, o se aoga, ma se kamupani, ma se kolisi.

Sa auauna atu Elder Kearon i le tele o valaauga o le Ekalesia, e aofia ai le avea ma se failautusi fesoasoani o le uarota, peresitene o Alii Talavou a se uarota, fesoasoani i le au epikopo, peresitene o le paranesi, peresitene o le siteki, ma le Fitugafulu Eria. ■

Fesoasoani i Taimi o Faalavelave

le mavae ai o se afa fulifao ma lologa matautia i Houston, Texas, ISA, sa vaia e se loomatua ni Au Paia o Aso e Gata Ai mitiafu sasama Lima Fesoasoani i lo latou ala e fesoasoani i tagata na aafia i le faatamaiaga. "Sa ou iloaina e o mai le au Mamona!" o lana tala lea.

O lenei mea na tupu, na lipotia i se tusiga i le Facebook e peresitene o le Misiona a Texas Houston i Saute, o Aaron T. Hall, ua faailoa mai ai le auala e o mai ai le Ekalesia e fesoasoani uma i tagata ma tuaoi i taimi o faalavelave. "E leai se luitau e silisili tele mo tagata o le Ekalesia a le Alii!" Na tusia a Peresitene Hall.

A tupu se mala, e masani ona i ai le Ekalesia i [vaega] e tali atu muamua, ma i eria na aafia, e masani ona faaaaua pe a le fesoasoani agaalofa i taimi o le toe faamalosia i taimi pupuu ma taimi umi, faatasi ai ma le sini o le atiaeina o le ola tutooatasi. E galulue faatasi taitai i le lotoifale ma le laumua o le Ekalesia i le iloiloina ma le sauniaina mo manaoga ma i le faatulagaina o tagata e fesoasoani atu i le auina atu o punaoa, faamamaina, toefuataiga, ma le toe fausiaina.

E ala i Auaunaga Limafoai a le AAG ma le faigapaaga ma toomaga i eria

na aafia, e lei leva atu ona saunia e le Ekalesia le fesoasoani i tagata na aafia i lologa i Peru; papala solo i lalo i Sierra Leone; afisasaio i Montana, ISA, ma Alberta, Kanata; afa fulifao i Texas, Florida, ma le atu Karipeane, e aofia ai Puerto Rico, Haiti, ma le Ripapelika Temokarasi; ma mafuie malolosi e lua i Mekisiko.

Ia Setema, sa fofogaina e le Ekalesia le tuuina atu o le I.S. \$11 miliona e lagolago ai le toomaga faatino o le oge ma fafaga ai fanau fiaaai i atunu e valu i Aferika ma Sasae Tutotonu. Ua faipaga le Auaunaga Limafoai a le AAG ma faalapotopotoga e 11 i galuega faatino e 25 e auina atu le fesoasoani.

Ua saunia e le Auaunaga Limafoai a le AAG le toeitiiti \$2 piliona e fesoasoani ai i le faitau miliona o tagata i atunu e 189 talu mai le 1985, e amata i le toomaga na tuuina atu i tagata na aafia i le oge i Ethiopia. ■

O i latou e finagalo e foai i le Tupe o Fesoasoani mo le Auaunaga Alofa a le Ekalesia e mafai ona faia i lugia o o latou lisiti sefuluai.



E Tolu Malumalu ua Faapaiaina

Talu mai le konafesi aoao ia Aperila 2017, e tolu malumalu ua faapaiaina po o le toe faapaiaina. Sa faapaiaina le Malumalu o Paris Farani ia Me, le Malumalu o Idaho Falls Idaho (ISA) ia luni, ma le Malumalu o Tucson Arisona (ISA) ia Aokuso.

O le a faapaiaina le Malumalu o Idaho Temple (ISA) i le aso 19 Novema, 2017; le Malumalu o Cedar City Utah (ISA) i le aso 10 Tesema 10; ma le Malumalu o Jordan River Iuta (ISA) o le a toe faapaiaina i le aso 20 Me, 2018.

O le a fofogaina atu fuafuaga, po o le faaaauauina o sauniuniga ma le fausiaina, mo malumalu e 23 i le lalolagi atoa. E ono malumalu o loo tapunia i le taimi nei mo le toefaafouga, ma e lima malumalu ua fuafuaina e tapunia mo le toe faafouga i le 2018. ■

Sue ni faamatatalaga fou ma faamatalaga i le temples.lds.org.

O Perofeta, Aposetolo e Auauna Atu i le Lalolagi Atoa

Ua valaauiina perofeta ma apostolo o ni “molimau faapitoa o le igoa o Keriso i le lalolagi atoa” (MF&F 107:23). O nisi nei o gaoioiga talu mai le konafesi aoao ia Aperila.

Sa faamanatuina ma le filemu e Peresitene Thomas S. Monson lona aso soifua lona 90 i **Iuta, ISA**, i le aso 21 o Aokuso. Sa ia toe taua se moomooga o le aso fanau sa ia faailoa mai i le taimi muamua, o le meaalofa sili e mafai ona ia maua e mo tagata ina ia “saili se tasi o loo feagai ma se taimi faigata pe o ma'i pe o tuuatoatasi ma faia se mea mo i latou.”

I Hamilitone, **Niusila**, sa faapaia ai e Peresitene Henry B. Eyring ia fale i le Temple View, sa avea muamua ma lotoa o le Kolisi o le Ekalesia a Niusila. I le mavae ai o le Afa Fulifao o Irma, sa ia asia ai **Puerto Rico, Saint Thomas**, ma volenitia a le Ekalesia na fesoasoani i taumafaiga faamama i **Florida, ISA**.

Na asia e Peresitene Dieter F. Uchtdorf **Texas, ISA**, ma molimauina au o Au Paia o Aso e Gata Ai o loo galulue sosoo tauau ma o latou tuaoi i le mavae ai o le Afa Fulifao o Harvey, na fai mai o le uiga “fesoasoani i le mea ou te mafafia” ua taatele i Au Paia o Aso e Gata Ai i le lalolagi atoa.

Sa tuuina atu e Peresitene Russell M. Nelson i le kovana o **Nebraska, ISA**, se tuufaatasiga o talafaasolopito o aiga, asia taitai ma faifeautalai i **Niu Ioka, ISA**, ma tau atu i tagata aooga o le inisitituti i **Iuta** o le Tusi Paia e “tumu i valoaga e uiga . . . i le Toefuataiga.”

Ina ua maea le asiasi atu i tagata o le Ekalesia i **Iapani** ma **Korea**, sa saunoa mai Elder Dallin H. Oaks, “E silafia e le Alii Lana fanau. Na te silafia o latou tulaga ma popolega ma e agalelei i Lona

alofa.” I se talanoaga Faafesagai i Korea, sa ia tali atu ai i fesili mai le autalavou. Sa ia feiloai i minisita sa nafa ma le Olimipeka 2020 a Tokyo. Ma i le talosaga a le peresitene o **Peru**, sa feiloai atu ai Elder Oaks ina ia talia le agaga faafetai a le peresitene mo le fesoasoani a le Eklesia i le taimi o lologa.

I **Iuta**, sa uunaia e Elder Ballard talavou nofoufa matutua e tausia le Sapati o “se taimi matagofie ma faamaluina” ma ia suesue i mataupu faavae autu ma aoaoga faavae o le Ekalesia. Sa ia tau atu i tagata faigluega o le malumalu o malumalu ua fausia i le taimi nei o le a faaaogaina i le taimi o le Meleniuma. Faatasi ai ma Elder Ronald A. Rasband, sa ia asiasi atu i **Texas** e faamalosiau i volenitia na faamamaaina mea na faaleagaina o le afa fulifao ma lologa.

Sa maua e Elder Robert D. Hales le Pioneers of Progress President's Award mai se faalapotopotoga o le nuu i **Iuta**. “Ina ia mafai ona fesoasoani i le tasi ma le isi, ia siitia le tasi ma le isi, o le faamalosia o le tasi ma le isi o le uiga silisili, ou te manatu ai, o le avea ai o se paonia,” o lana tala lea.

I **Rusia** ma **Iukureini**, sa aoao ai e Elder Jeffrey R. Holland o le olaga e tatau ona i ai tofotofoga, ae e saunia e le talalelei le vaaiga, faamoemoe, ma le faamalosiauga. I le Konafesi Lona Lua o Windsor e uiga i Sauaga Faalelotu i **Egelani**, sa ia fai mai e fesoasoani le faatuatua i le toatele o tagata e toefotuai mai tulaga o tagata sulufai ma saofaga atu i le lalolagi. I le mavae ai o le konafesi, sa ia ofo atu le fautuaga i tagata o le Ekalesia, peresitene o misiona, ma faifeautalai i **Potukale** ma **Sepania**.



Sa asia e Elder David A. Bednar atunuu e tolu o Aferika i Sisifo e lei asia talu ai nei e se Aposetolo: **Senegal**, lea sa ia tuuina atu ai se tatalo o le toe faapaiaga; **Guinea**; ma **Mali**. Sa ia feiloai foi ma tagata o le ekalesia i **Nigeria** ma **Kana**. I le taimi o se faigalotu i le lalolagi atoa na fatuina mai **Karolaina i Matu, ISA**, sa ia uunaia talavou matutua ia avea ma “sootaga mau” i o latou filifili o aiga e faavavau.

Sa feiloai Elder Quentin L. Cook i tagata o le ekalesia ma faifeautalai i **Taiuani, Hong Kong, Initia**, ma **Taialani**, ma matauina “o tagata o le ekalesia o loo fiafia e uiga i le Eklesia, ma le taulai atu i le malumalu ma galuega faafeautalai.” I **New Jersey, ISA**, sa ia saunoa ai i le Semina a le Seymour Inisitituti i Saolotoga Faalelotu. “E tatau ona tatou faaauau pea ma tatau taumafaiga faifai pea ma tatau e



Taumatau i le agavale, mai le agavale mamao i luga: Ua auai atu Peresitene Henry B. Eyring i le faapaiaga o le Temple View i Niusila; ua opoina e Peresitene Dieter F. Uchtdorf se volenitia talavou o Lima Fesoasoani i le maea ai o le Afa Fulifao o Harvey i Texas, ISA; ua saunoa atu Elder Jeffrey R. Holland faatasi ai ma Baroness Emma Nicholson i le Konafesi a Windsor Lua e uiga i Sauaga Faalelotu; ua faafeiloai atu e Elder Ronald A. Rasband se tamaitai i le taimi o lana asiasiga i Aferika i Saute; ua faafeiloai atu e Elder Christofferson tamaiti aooga i le Aoga o Kamalabai Joshi i Kenjal, Initia; ua asiasi atu Elder Quentin L. Cook i tagata o le Ekalesia i Taiuani.

faateleina le amio mama ma puipuia aiga,” o lana tala lea. I **Kalefonia, ISA**, sa ia uunaia sosaiete o tulafono i tagata o le ekalesia e faatumauina ai le faatuautua ma le paleni i o latou olaga ma ia puipuia ai saolotoga faalelotu.

I **Ekuatoa ma Colombia**, sa aoao e Elder D. Todd Christofferson, o le talitonu i le Toetu o Keriso o le a faamafanafana ai ma lagolagoina i tatou. I **Initia**, sa ia talia se Taui o le Filemu i le Lalolagi e fai ma sui o le Ekalesia ma tuuina atu kopi o le Tusi a Mamona i le faaNepali i le peresitene ma le sui peresitene o **Nepali** ma i le Paranesi o Kathmandu.

O le tele o masina a o lei oo i afa fulifao ma lologa, sa asia ai e Elder Neil L. Andersen **Puerto Rico, Haiti**, ma le **Dominican Republic**, ma talanoa atu e uiga i le ola tutoatasi, aotauina, ma le saunia e maua sauniga o le malumalu. I le Po Aotauina o Aiga

AAG i le Iunivesite o le Setete o Arisona i **Arizona, ISA**, sa ia uunaia Au Paia o Aso e Gata Ai e “tatala a tatou faitotoa, talisapaia talitonuga a isi tagata, [ma] aoao atili e uiga i ai.” Sa fatuina e Elder Andersen le siteki lona 100 i **Filipaina** ma faapaiaina le faaopoopoga o le nofoaga autu e aoao ai faifeautalai i Manila.

I **Aferika i Saute** ma le **Ripapelika Temokarasi o Congo**, sa matauina ai e Elder Ronald A. Rasband faatasi ai ma malumalu e tolu o loo faagaoioia i Aferika ma leisi lima o loo fausiaina pe ua faalauiloa mai, “ua saunia e le Alii tagata Aferika ina ia maua uma Ana faamanuiga.”

Sa asia e Elder Gary E. Stevenson **Vanuatu, Ausetalia, Niusila, Farani Polenia**, ma le Iunivesite o Polika Iaga-Hawaii i **Hawaii, ISA**. “A o tatou . . . vaai atu i a tatou luitau e ala i tioata o le talalelei, o le a tatou maua

tali lea e aumaia ia i tatou le fiafia ma le olioli,” o lana tala lea. Sa ia feiloai i le peresitene ma le palemia o Vanuatu ma le akiepikopo o Papeete, Tahiti.

Sa asia e Elder Dale G. Renlund malo e lima ia Iuni: **Kuatemala, Costa Rica, El Salvador, Nicaragua, ma Honduras**, e faatulagaina le uluai siteki faaQ'eqchi' i Kuatemala ma auai i se konafesi o le saolotoga o tapuaiga ma se konafesi a le autalavou. Ia Aokuso, o ia ma lona faletua, o Sister Ruth L. Renlund, sa auai i le uluai gaoioiga Face to Face na fatuina mai **Accra, Kana**, ma ia Setema sa ia faamalosiau atu i tagata aooga i le Iunivesite o Polika Iaga-Idaho i **Idaho, ISA**, ina ia faalago-lago i le aoaoga faavae o Keriso. ■

E mafai ona maua faamatalaga fou i auan-naga a nei taitai o le Ekalesia i o latou lava itulau o le Facebook ma le prophets.lds.org.

Punaoa mo E Faaletonu le Faalogo

“In ia fesoasoani i tagata o e faaletonu le faalogo, o tekinolosi a le Ekalesia ua saunia o loo mafai ona maua i malumalu ma faletapuai,” ua ttau a se faaliga na auina atu i taitai i le lalolagi atoa i le aso 14 Setema, 2017. “E tatau ona faamasani taitai i nei tekinolosi ma faamautinoa ua silafia ma faaaogaina ia masini e i latou o e ono manua ai.”

I malumalu, e mafai e tagata e faaletonu le faalogo ona talosaga le meafaalogo lea e faaaoga ai se polokalama infrared e faasalalauina i totonu o le malumalu. I faletapuai, e mafai e tagata ona maua se polokalama e ala i le (1) mauaina o fesoasoaniga tau leitio (RF), masini e tuu i taga lea e faaaogaina le polokalama faalogo i le falesa po o le fale faafiafa e malosi ai le leo i se mea faalogo, po o le (2) polokalama e fesoasoani i le faalogo (ALS) tautau i le ua lea e faasalalau tuusao ai i se T-coil-e mafai ona feaveai a se tagata e fesoasoani ai i le faalogo.

Ua faatonuina e le faaliga “e tatau i uarota ma paranesi ona i ai le tele o mea e taliaina [RF] ma tautau i le ua [ALS]. Pe a manaomia, e mafai ona talosaga nisi masini e ala atu i le sui e vaaia meatotino o fale ma fanua a le siteki.” ■

O nisi faamatalaga e uiga i polokalama o loo fesoasoani i le faalogo o loo maua lea i le mhtech.lds.org. Mo faamatatalaga e uiga i le lelei o le faalogo, tutuli, ma gagana fai faailoga, tagai disabilities.lds.org.

Faaliliuga Fou o Tusitusiga Paia

Faaliliuga fou o tusitusiga paia na faamaonia i ni nai tausaga ua tuanai e aofia ai le Tusi a Mamona i le Burmese, Efik, Georgian, Navajo, Pohnpeian, Sesotho, ma le Tshiluba ma le fusitolu o tusitusiga paia i le Gagana Fai Faailoga Amerika, Aferika, Amharic, Arapi, Pisilama, Eleni, Hiligaynon, Hindi, Hmong, Lao, Lingala, Malay, Peresia, Polish, Serbian, Setswana, Sinhala, Solovakia, Solovenia, Tahiti, Tamil, Telugu, Tok Pisin, Take, Twi, Urdu, ma Yoruba.

I se tusi na tusia i le aso 9 Oketopa, 2017, sa lisi ai e le Au Peresitene Sili nei galuega faatino ma faailoa mai se gasologa foi o le a mafai ai e tagata tai-toatasi ona suesueina vaega faataitai o faaliliuga a o lei lolomiina le faaliliuga mulimuli.

“A o faagasolo le faaliliuga, e mafai ona faalauiloa atu vaega ua maea i se faagasologa mai i lea taimi i lea taimi,” na tusia ai i le tusi. “O nei vaega faagasolo, e ui e le iloiloina o le vaega mulimuli seia maea le faaliliuga atoa, o le a maua i luga o le LDS.org ma i le polokalama feaveai Gospel Library.” O le faalauiloaga muamua mo ni nai gagana ua filifilia o le a amata i le aso 30 Novema, 2017. A o faamaeaina le faaliliuga, ma iloilogia ma faamaoniga e tatau ai, o le a suitulaga faalauiloaga faagasolo muamua i lomiga mulimuli, faatasi ai ma lomiga e lolomiina e mulimuli mai.

O galuega faatino o le faaliliuga e alu ai ni nai tausaga e pei ona faaliliuina anotusi o tusitusiga paia ma le faaeteete. O le mea lea, o galuega faatino o loo i ai i tulaga eseese. O le uluai faalauiloaga o faaliliuga faataitai ua faamaonia o le a aofia ai le talaaga ua faaliliuina ma iloiloina e taitai i le



lotoifale. O vaega faaopoopo o faaliliuga o le a faaaauau pea ona faalauiloa mai faavaitaimi. O faaliliuga ua lata ona maea i le taimi nei o le a leai ni [lomiga] faataitai e lolomiina.

Ua talosaga mai le Au Peresitene Sili e faapea, a o faagasolo pe o loo faatalitali galuega faatino o le faaliliuga, o tagata o le ekalesia ma taitai e “faaaauau pea ona faaaoga le faaliliuga o i ai nei o Mataupu Faavae o le Faatuatua, tatalo o le faamanatuga, ma tatalo o le papatisoga seia maea faaliliuga fou.”

O lomiga AAG o tusitusiga paia ua faaliliuina ma o loo maua i numera nei o gagana: o le Tusi Paia, 3; e finagalo i lomiga e le AAG o le Tusi Paia, 95; o le Tusi a Mamona, 90; Filifiliga mai le Tusi a Mamona, 21; ma le Mataupu Faavae ma Feagaiga ma le Penina Tau Tele, 58. ■

Nofoaga Autu e Aoao ai Faifeautalai

O se nofoaga autu fou e aoao ai faifeautalai i Accra, Kana, ma se faaopoopoga o le nofoaga autu e aoao ai faifeautalai i Provo, Iuta, ISA, ua faalia ai le faaaauai ai o le taua o auaunaga faafaifeautalai.

O le NAF a Kana na faamaeaina talu ai nei, i talaane o le Malumalu o Kana Accra, e ofi ai faifeautalai e 320 ma o loo i ai avanoa e faatupulaia ai. O fare tetele e ofi ai faifeautalai e o ese atu mai sisifo ma sautesasae o Aferika, e faapena foi faifeautalai mai le lalolagi atoa na valaauna e auauna atu i Aferika. O fare fou ua faaigofieina mo faifeautalai e aoao ai i o latou gagana moni—faaPeretania po o le faaFarani—ma aoao le gagana ma le aganuu o le eria na tofia latou e galulue ai.

Ua faaluaaina le faaopoopoga o le NAF i lona gafatia i le 280 faifeautalai.

E aofia ai fare fou e lua i se lotoa o fogafale lima, e lata ane i ofisa o le Eria i Filipaina ma e faafesagai le auala mai le Malumalu o Manila Filipaina. Talu mai le tatalaina o le NAF i Filipaina i le 1983, ua taulimaina faifeautalai mai le, po o le oo atu i le 60 malo.

O le faaopoopoga o le NAF i Provo e aofia ai le fogafale ono fou faatasi ai ma potuaoga fou e 200, silia ma le 100 potu o aoaoga faataitai, ma potu komepiuta e 12 lea e maua ai e faifeautalai le aoaoga faamasani a o lei auina atu i latou i o latou eria atofaina i le lalolagi atoa. O le NAF i Provo e i ai le gafatia e aoao ai le toatele e 3,700 alii talavou, tamaitai talavou, ma faifeautalai matutua i le taimi.

O loo i ai i le Eklesia nofoaga autu e aoao ai faifeautalai e 15 i nofoaga eseese i le lalolagi atoa. ■



O loo faalogo se faiaoga o le Nofoaga Autu e Aoao ai Faifeautalai fou i Kana a o talanoaina e faifeautalai le auala e aoao atu ai le talalelei.



Sister Bingham i Malo Aufaatasi

I le saunoa ai i le taimi o le talanoaga e faatatau i le faatuatua e uiga i le tuufaatasiga o tagata sulufai i Malo Aufaatasi i le Aai o Niu loka i le aso 13 Aperila 13, 2017, sa faailoa atu e le Peresitene Aoao o le Aualofa o Jean B. Bingham le faamoemoe o faalapotopotoga e faavae i le faatuatua “o le a galulue faatasi uma e ala i mea faigofie ma faatauvaa e ausia ai mea tetele.”

I le taimi o le fonotaga faale-tausaga “Taulai i le Faatuatua”, sa talanoaina ai e Sister Bingham tau-mafaiga o galuega agaalofa a le Ekalesia i tagata sulufai ma faailoa atu le talisapaia faamaoni ia i latou uma o e punouai i le “galuega luitauina ae loloto le tauia” o le faamamaina o le mafatiaga i le lalolagi atoa.

E lei leva atu ona toe foi mai Sister Bingham mai se vaega o asi-asiga i Mea Tautupe a Tamaiti o Malo Aufaatasi (UNICEF) i Uganda ma Sister Sharon Eubank, Fesoasoani Muamua i le Au Peresitene Aoao o le Aualofa ma le faatonu sili o Auaunaga Limafoai a le AAG. Sa auai atu foi Sister Eubank i le fonotaga a le U.N. i le Aai o Niu loka. ■

Mo nisi faamatalaga e uiga i mea e mafai ona e faia e fesoasoani ai i tagata sulufai, alu i le IWASASTRANGER.lds.org.

O Se Auala Fou mo Sauniga o le Perisitua Mekisateko ma le Aualofa

E aumaia e le mataupu aoaoina fou suiga fiafia i a tatou sauniga o le Aso Sa lea e fausia i luga o le Aoao Atu i le Ala a le Faaola. O la tatou sauniga o le Aso Sa muamua o se taimi lea e fefautuaai faatasi ai e uiga i a tatou tiutetauave, avanoa, ma luitau a o tatou faia le galuega a le Alii. I isi Aso Sa, nai lo se tusi lesona fou o le Aoaoaga a Peresitene o le Ekalesia, o le a tatou taulai i le aoao atu o savali mai le konafesi aoao sili ona lata mai ma se autu ua filifilia e o tatou taitai aoao o le Ekalesia. Ae o suiga nei e le na o autu o le a tatou suesue i ai—o le mataupu aoaoina fou e aafia ai foi le auala tatou te saunia ai, aoao atu ai, fefautuaai ma aoao faatasi ai, ma maua ai ma galulue i musumusuga. Sa auai tagata o le ekalesia ma taitai i Mekisiko ma i Iuta, Kaledonia, ma Georgia i le Iunaite Setete i se faataitaiga o anomea fou. O nisi nei o o latou manatu ma aafiaga:

“O le a le mea ou te faia e aunoa ma se tusi lesona?” na mafau-fau ai Nancy Feragen, o se faiaoga o le Aualofa, ina ua ia muai iloiloa se kopi o le Sau, *Mulimuli Mai ia te Au—Mo le Perisitua Mekisateko ma le Aualofa*. “I le taimi muamua, sa ou popole,” sa ia tautino mai ai. “Ona oo mai lea o se manatu ia te au: E finalo le Alii ia i tatou ia faataunu nisi tiutetauave mo lo tatou aoaoina ma le faateleina o lo tatou faaleagaga o ni uso ma tuagane i le talalelei.”

“E fai si taufaafefe e faalagolago i le Alii ma sau saunia e taitai se talanoaga e aunoa ma ni anomea se tele,” o le tala

a Linda Harmon, o se peresitene o le Aualofa, “ae o le taimi lava e te faia ai—pe afai e te saunia oe lava e ala i le tatalo, suesue, alu i le malumalu, ma isi mea e musuia oe e fai—e ese le ofoo fogia.”

AOAO ATU I LE ALA A LE FAAOLA

“O se tasi o luitau i le mataupu aoaoina fou o le tuu atu i tagata ia aua nei toe aoao atu ‘i le ala lava e tasi,’” na fai mai ai Epikopo Boyd Roberts. “E tatau ona tatou taofi le tau lava o le faasoa atu o faamatalaga, le faia o mea e taofia ai le Agaga, ma tuu atu i le Agaga e aoao atu.”

“O se auala fou o le aoao atu atonu

e faigata mo nisi o tagata,” o le tala a Lisa Smith, o se peresitene o le Aualofa, e faasino i le *Aoao Atu i le Ala a le Faaola*. “O le mafuaaga lena e taua ai le mamanu o metotia lelei o le aoao atu ma uunaia taitai e auai pea i fonotaga a aufono a faiaoga faatasi ai ma faiaoga,” o lana tala lea.

SAUNIA MA AOAO ATU

Na fai mai David Mickelson, o se faiaoga o vaega a fataulaga sili, o le fuaitau “aoao atu ma le filiga” i le Mataupu Faavae ma Feagaiga 88:78 “e faatatau i lo tatou sauniuniga muamua ma lo tatou tomai e mulimuli ai ma le filiga i le Agaga a o tatou aoao atu. A tatou aoao atu ma le filiga, o le a faatasi mai tatou le alofa tunoa a le Faaola ma o le a atili aoaoina ma le atoatoa i tatou. Ou te manatu o le auala atoatoa lena a le Alii e aoao atu ai. O le faiaoga—o le tagata e taitaile le talanoaga—e tatau ona naunau ina ia aoaoina e le Agaga.”

E saunia Adam Bushman, o se fai-aoga o le korama a toeaina mo lesona e ala i le iloiloina o saunoaga o le konafesi aoao na filifilia, ona mafau-fau lea ma le agaga tatalo pe o a mataupu e sili ona taua mo le korama. “Ina ia fesoasoani i alii e maua nisi taimi e mafau-fau loloto ai,” sa ia faamatala, “e



auina atu se imeli i le aluga o le vaisao e faapea, ‘O le saunoaga lenei o le a tatou talanoaina ma matou te manao na ia te oe e mafaufau i fesili nei.’”

FEFAUTUAAI MA LE AOAOINA FAATASI

“O Aso Sa i le Aualofa e le tau lava o se tiutetauave a taitai,” fai mai ai Brooke Jensen, o se fesoasoani i se au peresitene o le Aualofa. “E manao-mia ona faia e tagata taitoatasi se matafaioi ola.”

Sa lagona e Brother Bushman o le nofo ai i se lio na faia ai se eseesega. “Ou te fiafia i ai,” o lana tala lea. “E na te suia le natura o le talanoaga. E na te suia faamoemoega o tagata. Ia e tele atu isi fefaaasoaiga. Nai lo le toalua pe toatalu alii e masani ona taliina le fesili, e fefaaasoai mai ni tagata fou.”

Ina ua muai faalogo Rebecca Siebach, o se tamaitai o le Aualofa, e uiga i le taulaiga fou i aufono, sa vave ona ia mafaufau i uo sa le toe toaaga mai. “Sa ou iloa a latou atugaluga,” o lana tala lea. “Sa latou faasoa mai ia te au e uiga i o latou atugaluga e o mai i le lotu, ma sa ou mafaufau, o le avanoa silisili lenei e aapa atu ai ia i latou ma fai atu, ‘Matou te manaomia outou i la matou aufono! Faamolemole, o mai ma faasoa mai!’”

“Ina ua ou talanoa atu mulimuli ane i se aluga o se fonotaga faaleau-fono,” o le tala lea a LonaMarie Cook, o se fesoasoani i se au peresitene o le Aualofa, “sa maoae le i ai o ni tagata e lagolagoina le mea sa ou mafaufau i ai ma avea o se vaega o lena vaega.”

MAUAINA MA GALUE I LE MUSUMUSUGA

“Matou te fatuina se siosiomaga mo le Agaga e aoao mai ma mo i matou ina ia faalogo ma lagona,” na saunoa ai Epikopo Roberts. “Ona avea lea o le Agaga ma faiaoga, e tau mai ia i tatou mea tatou te manaomia ona fai i o tatou olaga patino, aiga, ma valaauga. O mea tatou te faia o se taunuuga o na

musumusuga o mea ia e taitai atu i le liua moni ma le auaunaga.”

Na saunoa mai Susan Farr, o se pere-sitene o le Aualofa, “E uunaia i tatou e lenei auala ina ia tutu i luga ma fai, e le tau lava o le aluese mai le lesona ma mafaufau ‘e musuia lena [lesonal,’ ona vave lea ona galo. E fesoasoani le fefautuuaai faatasi ia i tatou e vaai ai o le aoaoina ma le faatinoga e faatatau ia i tatou uma lava—e le na o le faiaoga.”

“A o tatou faamaumauina a tatou lagona ona galulue ai lea e faatatau i ai, ua tatou faatinoina se suiga o le loto ma avea ma auauna sili atu o le Alii,” o le tala a Susan Mitchell, o se fesoasoani i se au peresitene a le Aualofa.

“O le iloaina o oe e tali atu mo se mea ma o le a fesili atu se tasi ia te oe pe o a ni ou lagona,” sa fai mai ai Sister Smith, “e avea oe o se tagata auai ola i le fausia o lau molimau.”

Na saunoa mai Landen Roundy, o se taitai o le vaega o fiaitalaga sili, o le imeli atu o faamatalaga o mea na talanoaina ma fuafuaina “e fesoasoani lea i tagata e iloaina aafiaga ua latou mauaina i le aluga o le vaisao atonu latou te mananao e faasoa mai i le Aso Sa e sosoo ai.”

“Mai i na faamatalaga,” na faaopoopo mai ai Epikopo Roberts, “Ua ou vaaia se agaga o le faasoaina ma le aoaoina pea i le vaisao atoa a o talanoaina e le usoga manatu ma lagona faaopoopo e ala i imeli, e faamalosia ai la latou korama.”

“E finagalo le Alii ia tatou liliu atu o tatou loto i le tasi ma le isi ma e mafai ona faia lena mea pe a tatou feiloai faatasi ai ma se faamoemoega,” na faaiu ai Sister Siebach. “E fesoasoani lenei mataupu aoaoina fou ia i tatou e faailoa autu e fiafia ai, seti ni sini, tagai i le punavai sao mo tali, maua faaaliga faaletagata lava ia, ma ia aoaoina e le tasi ma le isi a o tatou liliu atu i perofeta soifua mo tali tatou te manaomia i o tatou aso.” ■

E MAFAI FAAPEFEA ONA TATOU SAUNIA?”

O le punaoa fou Sau, Mulimuli Mai ia te Au mo sauniga o le Perisitua Mekisateko ma le Aualofa o le a faaaogaina i le Ekalesia atoa e amata atu ia lanuari 2018. O lea la, o a mea e mafai e iunite o le Ekalesia ona faia e saunia ai mo lenei suiga?

- Faaalu sina taimi i se aufono a le uarota lata mai e tagai faatasi ai i punaoa ma talanoaina mea e ono ese ai. O a faamanuiaga o le a oo mai ai?
- Valaaulia le aufono a le uarota e fautua mai ni autu mo fonotaga a le aufono i Aso Sa muamua o le a fesoasoani e taulimaina ai manaoga o le uarota po o le paranesi. E mafai e taitai Perisitua ma le Aualofa ona filifili le aso ma pe faapefea ona talanoaina e o latou faalapotopotoga nei manaoga.
- Faalauiiloa atu ma talanoaina punaoa fou i le aluga o se sauniga o le korama, vaega, po o le Aualofa. O a mea e mafai ona faia e tagata taitoatasi ina ia saunia ai mo nei suiga?
- Uunaia faiaoga ma taitai o le perisitua ma le Aualofa e auai i fonotaga o aufono a faiaoga e faasoa ma talanoaina a latou aafiaga, luitau, ma fesili e uiga i le punaoa fou.

Vaaiga Puupuu i totonu o se Fonotaga a le Aufono

O le taeao o le Aso Sa, ma o loo nonofo tamaitai e 45 o le Uarota a Bugambilias i Guadalajara, Mekisiko, i se fonotaga. I le mavae ai o le viiga amata, ua valaaulia e le peresitene o le Aualofa Yara Ramirez nisi o i latou e faasoai mai ni aafiaiga mai lo latou lesona i le vaiaso na muamua atu.

I le maea ai o le faasoaina e uso o a latou aafiaiga mo ni nai minute, e tusi e Sister Ramirez se upu e tasi i luga o le laupapa a o lei nofo i lalo i le lio [o le usoga].

E faapea “Lotogatasi.”

I lalo o le taitaiga a Sister Ramirez, latou te susue i le Mosaea 18:21 ma faiatau, “... ua fili faatasi o latou loto i le lotogatasi ma le alofa o le tasi i le isi.”

“O a mea e mafai ona faia e i tatou o se Aualofa e faatino ai lenei mau?” ua ia fesili ai.

Ua mafaufau tamaitai mo ni nai minute. “Ia, e le mafai e le autalavou ona o i le malumalu,” ua faasoai mai ai se tasi o tamaitai. “E le lava tamaitai matutua e o atu mai i latou.”

“E leai sou manatu,” o le tala lea a se isi tamaitai, ma le tei. “Afaie te le iloina o loo i ai se manaoga,” na ia fesili ai, “e mafai faapefea ona e fesoasoani?”

“O le mafuaaga lena ua tatou i ai iinei,” na tali atu ai Sister Ramirez. “O loo i ai manaoga faapea ou te aoao e uiga i ai i aufono a uarota lea e mafai ona tatou fesoasoani ai.”

“Aisea tatou te le faia ai se kalena?” ua fautua mai ai se tasi. Ua amata nei ona fia auai le vaega. “Ou te manatu e i ai se faatulagaga a le autalavou i le malumalu e tasi le Aso Tofi i le masina.”

“E faigata ona ou alu au lava ia i le malumalu,” ua tautino mai ai se tina talavou i le vaega. “Ou te lei toe oo iina i se taimi umi, ma ou te lagona lou

manatu mo au lava. Ou te fiafia e alu atu ma auauna atu,” o lana tala lea.

Ua ioenia e nisi o tamaitai. Latou te maua foi le faigata ona auai soo e pei ona latou mananao ai.

Ua fautua mai se isi tina talavou, e latou te feauauai e tausi tama i le tasi ma le isi ma feauauai e o i le malumalu.

Ona, amata lea ona fesili tamaitai i le tasi ma le isi i nofoaga latou te nonofo ai ma o ai e nofo i autafa o le autalavou. Latou te talanoaina pe faapefea ona latou feauauai e fesoasoani i le autalavou ia o i lo latou gaoioiga.

“Ia, e tatau ona tatou faamasani foi i le tasi ma le isi,” o le tala lea a se tasi. “E tatau ona tatou faia ni gaoioiga!”

E faaauau ona talanoa mai tamaitai, e ofo mai fautuaga ma faia ni fesili.

I le faiiuga o le fono, e fai atu Sister Ramirez i lana failautusi e aotele mai minute. “O a uma ni tou lagona i le taimi o le fonotaga?” na ia fesili ai.

Latou te tali mai latou te lagona le

nofouta atili i manaoga o tagata uma, o lo latou auaunaga sa manaomia, ma sa latou i ai ma ni uo.

“E faalagolago i mea na tatou aafia ai i le aso, o a ni faatinoga faapitoa tatou te mananao e taulai i ai i lenei masina o se Aualofa?” ua ia fesili ai.

O se vaega, sa latou filifili e faia se taumafataga o soo se meaai e aumai e le tagata i lena Aso Sa i le maea ai o le lotu, amata taaalo voli i po o Aso Tofi, faia se kalena mo le auai i le malumalu, ma fuafua pe faapefea ona o atu le autalavou i gaoioiga.

“Ua matou lagonaina le lotogatasi i lenei aso,” ua faiiu ai Sister Ramirez, ma valaaulia tamaitai taitasi e mafaufau i ni auala e mafai ai e ia ona auauna atu i le aluga o le vaiaso. “O le faaauau pea ona tuuina mai e le Agaga Paia o musumusuga ia i tatou a o tatou galulue ai tai-toatas ma o se Aualofa. Ou te valaaulia outou ina ia saunia e faasoai mai a outou aafia i le Aso Sa e sosoo ai.” ■

FAUTUAGA MO FONOTAGA A LE AUFONO

- la onosai ma tuu atu i le Alii e aoao oe i le uiga o le fefautuauai faatasi.
- O loo i ai mataupu faavae e mafai ona tatou manatua: Mulimuli i le Agaga, faasoai atu ou manatu, ma galue i musumusuga.
- la tausia le tatalaina o lou loto ma le mafaufau i manatu fou, vaaiga, ma tali.
- A o lei faaiiuna fonotaga taitasi, mafaufau e uiga i mea na aoao atu e le Agaga ia te oe; ona filifili lea pe faapefea ona e galue i Ana musumusuga.



O uso o le Aualofa i Guadalajara, Mekisiko, o loo fono faatasi.



Sau, Mulimuli Mai ia te Au—Mo le
Perisitua Mekisateko ma le Aualofa



*Saili punaoa nei i le poloka-
lama o le Potutusi o le Talalelei
i le comefollowme.lds.org.*



O Le A Le Mea ua Ese Ai?

I nei aso e gata ai, ua toefuataiina e le Atua le perisitua ma faatulaga korama a le au perisitua ma le Aualofa e fesoasoani e faataunuu Lana galuega (tagai Mose 1:39). O Aso Sa taitasi pe a tatou potopoto i sauniga a le Perisitua Mekisateko ma le Aualofa, tatou te potopoto e talanoa ma fuafua le auala o le a tatou faataunuuina ai Lana galuega. O le

mafuaaga lena e manaomia ai ona sili atu nei sauniga nai lo vasega. O ni avanoa foi e fefautuaai ai e uiga i le galuega o le faaoalataga, aoao faatasi mai aoaoga a taitai o le Ekalesia e uiga i lena galuega, ma faatulaga e faataunuina ai. O nei suiga i a tatou sauniga i Aso Sa o le a fesoasoani ia i tatou e faataunuu ai nei faamoemoega.

O Se Faasologa Faalemasina

O sauniga i Aso Sa a le Perisitua Mekisateko ma le Aualofa o le a mulimuli i le faasologa faalemasina lenei:

VAIASO	FAAMOEMOEGA
Aso Sa Muamua	Fefautuaai faatasi e uiga i tiutetauave, avanoa, ma luitau i le lotoifale ma fai ni fuafuaga e faatino ai.
Aso Sa Lona Lua ma le Lona Tolu	Suesue i savali o le konafesi aoao talu ai nei ia na filifilia e le au peresitene po o taitai vaega pe, i nisi taimi, o le epikopo po o le peresitene o le siteki.
Aso Sa Lona Fa	Talanoa i se autu faapitoa, na filifilia e le Au Peresitene Sili ma le Korama a Apostolo e Toasefululua
Aso Sa Lona Lima	Talanoa i se autu na filifilia e le au epikopo

O Se Mamanu mo a Tatou Sauniga

I a tatou sauniga taitasi o le Perisitua Mekisateko ma le Aualofa, tatou te mulimuli i se mamanu e faataunuu ai le galuega a le Atua.

1. *Faasoaa aafiaga* na oo mai i musumusuga ma valaaulia na maua mai sauniga talu ai a le au perisitua ma le Aualofa (taitaia e le au peresitene po o le taitai vaega).
2. *Fefautuaai faatasi* (Aso Sa muamua, taitaia e le au peresitene po o se uso o le vaega) po o le *aoao faatasi* (aso sa lona lua, lona tolu, ma le lona fa, e taitaia e se faioga ua valauina).
3. *Fuafua e faatino* o se vaega po o ni tagata taitoatas (taitaia e le au peresitene po o le taitai vaega).



FONOTAGA A LE AUFONO MO LE ASO SA MUAMUA

O le Aso Sa muamua o masina taitasi, o le a le toe i ai i sau-niga a le korama, vaega, ma le Aualofa se lesona na aoao-inia e sefaiaoga. Nai lo lena, o le a taitaia e au peresitene po o taitai vaega se fonotaga a le aufono. O le a fefautuaai

faatasi korama, vaega, po o le Aualofa e uiga i tiutetauave, avanoa, ma luitau i le lotoifale; aoao mai malamalamaga ma aafiaga o le tasi ma le isi; ma fuafua ni auala e tali atu ai i ni musumusuga na mauaina mai le Agaga.

A o lei faia le Fonotaga a le Aufono

- Ua faailoa mai e taitai tiutetauave, avanoa, ma luitau i le lotoifale ma filifili ma le agaga tatalo i se autu e talanoaina.
- Saili e tagata uma le taitaiga a le Agaga.
- Saunia tagata uma e faasoa atu ni manatu ma aafiaga.

I le taimi o le Fonotaga a le Aufono

- E valaaulia e taitai tagata o le au paia e fefaasoaii aafiaga na faatino ai ni uunaiga sa latou mauaina mai sauniga na muamua atu.
- Ua fefautuaai faatasi tagata uma e uiga i le autu, faalogo i le tasi ma le isi, ma saili le taitaiga o le Agaga.
- E aotele e taitai manatu autu ma tuu atu valaaulia e faatino ai.

I Le Maea ai o le Fonotaga a le Aufono

- E galulue tagata uma i uunaiga ma valaaulia, galulue faatasi pe o ni tagata taitoatasi.
- Saunia tagata uma e faasoa o latou aafiaga i fonotaga o i le lumana.



**“O LOO SALALAU
FAAALIGA IA I TATOU.”¹**

Elder Neil L. Andersen

**“O I TATOU O
ONA AAO.”²**

Peresitene Dieter F. Uchtdorf

FAAMATALAGA

1. Neil L. Andersen, i le Adam C. Olson, “Ua Faamamafaina e Le Aoaoga o le Tusitalima le Galuega o le Faaolataga,” *Ensign* po o le *Liahona*, Ape. 2011, 76.
2. Dieter F. Uchtdorf, “O Outou o O’u Lima,” *Ensign* po o le *Liahona*, Me 2010, 68.

Mataupu Faavae o le Fefautuaai Faatasi

E le o fonotaga uma a aufono e foliga tutusa. Tuu atu i le Alii e aoao atu outou.

O ni nai mataupu faavae nei e te amata ai:

1. O le faamoemoega o se fonotaga a aufono o le fefautuaai faatasi lea e uiga i tiutetauave, avanoa, ma luitau i le lotoifale; aoao mai malamalamaaga ma aafiaga; ma fuafua ni auala e tali atu ai i uunaiga na mauaina mai le Agaga.
2. O se fonotaga a le aufono e tatau ona taitai atu i le faatinoga—fuafuaga taitoatasi ma faalevaega, musuia e le Agaga, e faatino i fafo atu o le fonotaga ia faataunu le galuega a le Alii (tagai MF&F 43:8–9).
3. E tatau i aufono ona faaaoga tusitusiga paia ma upu a perofeta ma apostolo o aso e gata ai, isi au Pulega Aoao, ma Taitai Aoao e taitai ma lagolagoina le talanoaga. I lenei auala, o upu musuia a taitai o le Ekalesia e mafai ona fesoasoani i korama, vaega, ma Aualofa e taulima manaoga taua.
4. E le tatau ona pa'ia i talanoaga ia mataupu e le faalauaiteleina pe maaleale e uiga i tagata taitoatasi po o aiga.
5. E ui lava e taitaia fonotaga a aufono e se sui o le au peresitene po o taitai vaega, e le tatau ona ia pulepuletutuina le fetufaaiga. E folasia atu e le taitai se mataupu mo le talanoaga ma valaaulia tagata uma e fefaaosai mai manatu ma aafiaga, e pei ona taitaia ai e le Agaga.
6. E ui e le tatau i se tasi ona lagona le faamalosia e auai, e tatau ona lagona e tagata uma le saogalemu e faasoai mai ni manatu ma aitia e aunoa ma le fefe i le fatioina.
7. Pe a talafeagai ai, o le saofafai i se li'o e mafai ona fesoasoani e gaosia ai le agaga o le fetufaaiga ma tatala ai le talanoaga.

Autu e Ono I Ai mo Fonotaga a le Aufono i Aso Sa Muamua

O manatu mo autu e talanoaina i fonotaga a aufono e ono sau mai fonotaga a le uarota, fonotaga a le au peresitene, fuafuaga a le eria, musumusuga a taitai

mai le auauna atu i tagata, ma musumusuga mai le Agaga Paia. O autu o i lalo ua na o ni fautuaga lava. E ono silafia e taitai nisi manaoga latou te lagona le musuia ia talanoaina.

- E mafai faapefea ona faaleleia atili le tatou faamuamuaina o o tatou tiutetauave eseese uma?
- E mafai faapefea ona tatou faalatalata atili i le Atua ma maua nisi taitaiga mai le Agaga i o tatou olaga ma i o tatou aiga?
- O le a faapefea ona tatou faasoai atu le talalelei ma o tatou aiga ma tuaoi? (tagai Alema 17).
- E mafai faapefea ona tatou puipuia i tatou lava ma o tatou aiga mai ala faasalalau le talafeagai ma ponokalafi? (tagai MF&F 42:22–23).
- O le a se mea o le a tatou faia e fesoasoani ai i le faiaoga ma faamalosia a tatou fanau ma talavou i la tatou uarota?
- E faapefea ona tatou faateleina le lotogatas i la tatou korama, vaega, po o le Aualofa? (tagai Mosaea 18:19–22).
- E mafai faapefea ona sili atu lo tatou auai i le galuega o le talafasolopito o aiga ma tapuaiga i le malumalau?
- E faapefea ona tatou valaaulia le fesoasoani a le Alii a o tatou saili i tali o a tatou fesili ma se malamalamaaga loloto o le talalelei
- E mafai faapefea ona avea matua ma taitai sili ona lelei i le aiga po o le fale?
- E mafai faapefea ona tatou faamalosia a tatou molimau i le Alii ma Lana talalelei ma fesoasoani i o tatou aiga ina ia ola tutoatasi faaleagaga?
- O le a le uiga o le auauna atu? O faapefea ona tatou auauna atu ia i latou o siomiaina i tatou? (tagai 1 Peteru 4:11).

Afai e talafeagai, atonu e mananao taitai e faailoa mamao atu i tagata o le ekalesia le autu ina ia mafai ona latou o mai saunia e talanoaina.



SAUNIGA- ASO SA LONA LUA MA LE LONA TOLU

I Aso Sa lona lua ma lona tolu o masina taitasi, e suesue e korama a le Perisitua Mekisateko ma le Aualofa ni aaooga mai perofeta soifua, Apostolo, ma isi taitai o le Ekalesia mai le konafesi aoao e sili ona lata mai. **E mafai ona talanoaina soo se savali mai le konafesi e sili ona lata mai.**

I le tele o tulaga, o le au peresitene o le korama, taitai vaega, po o le au peresitene o le Aualofa o le a filifilia se savali mai le konafesi e suesue e tusa ai ma manaoga o tagata o le au paia, e ui e mafai ona i ai se sao o le epikopo po o le peresitene o le siteki. E mafai e taitai ona filifili se savali e fesootai i le autu na talanoaina i fonotaga a le aufono i le Aso Sa muamua, pe e mafai foi ona latou filifili se isi savali e tusa ai ma musumusuga a le Agaga. E tatau i taitai ma faiaoga ona saili ni auala e uunaia ai tagata o le au paia e muai faitau savali ia ua filifilia ma o mai saunia e faasoa mai ni malamalamaaga. O gaoioiga nei mo le aaooina ua fautuaina atu, lea e faatatau i mataupu faavae o i le *Aoao Atu i le Ala a le Faaola*, e mafai ona faagauai atu i ai tagata o le au paia i le aaooina o savali o le konafesi aoao.

Sharon Eubank, "Ia Pupula Atu Lou Malamalama"

Fesili atu i tagata o la outou korama po o le Aualofa e mafaufau e uiga i le auala na uunaia ai o latou olaga mo le lelei e se tamaitai amiontonu ma faamaoni. Mafaufau e valaaulia ni nai tagata o le au paia e faasoa mai le auala na faataitai ai e lenei tamaitai se tasi po o le sili atu o uiga o se tamaitai amiontonu lea o loo otootoina mai i le savali a Sister Eubank. O le a se mea ua tatou aoao mai ia Sister Eubank e uiga i le auala e mafai ai ona tatou avea "o se *malosiaga maoae* i le tuputupu ae faafuinumera ma faale-agaga o le Ekalesia i aso e gata ai?"

Neill F. Marriott, "Tumau i le Atua ma Faaleleia le Va"

O lenei savali e mafai ona fesoasoani i tagata o le ekalesia o e ono lagona le vavaeesea mai le Tama Faalelagi pe mai



ia i latou o e siomiaina i latou. O le a se mea o le a fesoasoani ia i latou ia e te aaooina ia malamalama ai po o le a le va? Atonu e mafai ona e aumaia ni ata o soo se ituaiga o va. Na faapefea ona faauigaina e Sister Marriott le va? O le a se mea e mafai ona tupu ai se va i le tatou mafutaga ma le Atua faapea ma isi? Valaaulia tagata o le ekalesia e suesue i le savali a Sister Marriott mo ni fautuaga e uiga i mea e mafai ona tatou faia e lipea pe faaleleia ai ni va i o tatou olaga. Tuu atu i tagata se taimi e tusi ai i lalo mea na uunaia i latou e le Agaga ia latou faia e faalatalata atili atu ai i le Atua ma isi.

Joy D. Jones, "O Le Taua le Mafuatiaina"

O a faamanuiaga o tafe mai i o tatou olaga pe a tatou malamalama i lo tatou faasinomaga paia? Ina ia taliina lenei fesili, e mafai e tagata o la outou korama po o le Aualofa ona iloilo faatasi tala ia Miriama, Renu, ma Taiana i le savali a Sister Jones. O le a se fautuaga na tuuina mai e Sister Jones e fesoasoani ia i tatou "ina ia manatuaina ma opomauina lo tatou faasinomaga paia"? Valaaulia tagata o le au paia e saili ma talanoa i se fuaitau o mau po o se upu sii mai i le savali a Sister Jones o le a fesoasoani ia i latou ina ia malamalama i lo latou agavaa moni i le Atua. Valaaulia i latou e faasoa mai se tasi o nei mau po o upusii ma se tagata o loo manaomia se faamanatu o lona taua paia.

Dieter F. Uchtdorf, "O Le Auuso e Toatolu"

O se tasi o auala e iloilo ai le savali a Peresitene Uchtdorf o le vaevaeina lea o le korama po o le Aualofa i ni vaega laiti. E mafai ona e tofia vaega taitasi e faitau e uiga i se tasi o uso i le savali a Peresitene Uchtdorf. E mafai ona tusi e vaega taitasi se tusi i lena uso o aoteleina ai lana fautuaga ma faasoa atu mea sa latou tusia i isi vaega. O le a se mea e mafai ona tatou faia ia avea atili ai e pei o le uso lona tolu? E mafai faapefea ona tatou faia la tatou korama po o Aualofa ia avea o se "aiga saogalemu" mo i latou o e o tauivi?

Dieter F. Uchtdorf, "O Se Faananaau mo le Aiga"

E mafai faapefea ona e fesoasoani atu ia i latou o e aaooina ina ia iloa le auala o loo faaaogaina ai i latou e le Atua ina ia faamanua atu i isi? E mafai ona e valaaulia i latou e iloilo le vaega o le savali a Peresitene Uchtdorf ua faaautuina "O Le a Faaaoga Oe e le Atua," vaavaai ai mo folafolaga na faia ia i latou o e taumafai e auauna atu i le malo o le Atua e ui i o latou vaivaiga. O le faitauina o lenei savali e ono faamanatu mai ai foi i tagata o le au paia ia aafiafa e mafai ona latou faasoa atu lea na faaaoga ai i latou e le Atua ia faamanuiaina ai isi—pe na ia faaaogaina isi e faamanuiaina ai i latou. Tuu atu i tagata se taimi e mafaufau loloto ai i mea ua latou lagona le musuia e fai ona o lenei talanoaga.

Bonnie L. Oscarson, "O Manaoga i o Tatou Luma"

O se tasi o auala e amata ai se talanoaga e uiga i le savali a Sister Oscarson o le tuu atu ia tofu tagata uma ma se fasi pepa o loo tusia ai le "O ai o manaomia a'u i le asō?" i le pito i luga. E mafai ona faaaoga e tagata o la outou Aualofa po o korama ni nai minute e mafaufau loloto ai ma lisi mai ni tali i lenei fesili. Ona mafai lea ona latou suesue i le savali a Sister Oscarson mo ni manatu e uiga i le auala e mafai ona latou auauna atu ai i tagata i le latou lisi—pe faaopoopo ni igoa pe a musuia ai. Atonu e mafai e nai tagata ona faasoa mai mea sa latou aoaoina.

Dallin H. Oaks, "O Le Fuafuaga ma le Folafolaga"

Mata o le a faapefea ona tali atu tagata o la outou korama, vaega, po o le Aualofa i le valaaulia a Elder Oaks ina ia "aoao atu [ma] ola ai" i le folafolaga i le aiga, i le fale, i le nuu, ma le ekalesia? Valaaulia i latou e fetufaai manatu i le tasi ma le isi. Atonu o le a fesoasoani foi e saili ai le savali mo nisi o faamatalaga faaleaoaoga faavae mai le folafolaga i le aiga. O faapefea ona fesoasoani nei faamatalaga ia i tatou e tali atu ai i "luitau o i ai nei i le aiga"? O le Vaega IV o le savali a Elder Oaks o loo i ai nisi o faataitaiga o ia faamatalaga.

D. Todd Christofferson, "O Le Areto Ola Na Ahu Ifo Mai le Lagi"

O nisi nei o fesili atonu o i ai i mafaufau o le Aualofa ma uso o le korama a o latou iloiloina le savali a Elder Christofferson: O le a le paia? E faapefea ona tatou sailia le paia? E faapefea i le 'ai ma le inu i le faamanatuga ona fesoasoani ia i tatou i a tatou taumafaiga? E mafai e tagata ona fefaasoaaai upu mai le savali a Elder Christofferson lea e fesoasoani e tali nei fesili. E faapefea ona tatou fesoasoani i le tasi ma le isi i le avea ai ma "uso a Au Paia" ia tatou taumafaiga ia paia atili?

Jeffrey R. Holland, "Ia Atoatoa Ona Lelei o La Outou Amio—I Le Iuga"

O nisi o i latou o loo e aoaoina e ono lagona lo latou le atoatoa pe a oo i le tulaga o le ola ai i aoaoga a le Faaola. O le a se mea o aoao mai e Elder Holland e mafai ona faamafanafanaina ma uunaia i latou o e atonu o i ai ni lagona faapenei?

E mafai ona e valaauliaina ni uso o le Aualofa po o le korama e tagai mo se mea i lenei savali e mafai ona latou faa-soa atua i se tasi o loo tauivi ina ia lagona ua "lava lo [latou] lelei." Pe e mafai ona latou mauaina se mea i le savali e uunaia i latou ia lagona le "alofa tele atu ma le faamemelo mo [Keriso] ma se manao sili atu ia avea e faapei o Ia."

Gary E. Stevenson, "Gasetoto Faaleagaga"

Pe na i ai ni tagata o la outou korama po o Aualofa na aafia i le gasetoto o le la' Afai o lea, e mafai ona e valaaulia se tasi o i latou e faamatala le tala faatusa lea na faasoa mai e Elder Stevenson e uiga i se "gasetoto faaleagaga." O a faalavefau ia e mafai ona "punitiainia le maoae, susulu, ma le mafanafana o le malamalamo o Iesu Keriso ma Lana talalelei"? E mafai faapefea e ala faaagafesootai ona taofia mai i tatou mai "i le matagofie, mafanafana, ma le malamalamo faalelagi o le talalelei"? E faapefea ona tatou faaaogaina "matatioata faaletalalelei" e puipuia mai i tatou mai le tauaso faaleagaga? O le a se mea o aoao mai i tatou e le tala faaftausa a Elder Stevenson e uiga i le faatumauina o le vaega faaletalalelei?

Quentin L. Cook, "O Le Faavavau o Aso Uma"

O le savali a Elder Cook o loo faamanatu mai ia i tatou le taua o le taumafai ina ia lotomaualalo i auala eseese. O se tasi o auala e talanoa ai mea sa ia aoao mai o le vaevae lea o tagata i ni vaega se lua. Fesili atu i se tasi o vaega e tagai mo ni fautuaga i le savali a Elder Cook e ono fesoasoani ia i tatou e atiina ae le lotomaualalo, ma le isi vaega e tagai mo ni auala e faaalia ai e tagata le faamaualuga. Valaaulia vaega taitasi e fefaasoaaai a latou faamatalaga ma le isi vaega. E mafai foi e tagata ona fefaasoaaai auala e mafai ai ona latou faaalia atili le "lotomaualalo i aso taitasi" i o latou olaga ma mafaufau pe faapefea ona fesoasoani lenei lotomaualalo ia i latou e saunia ai e fetaiai ma le Atua.

Ronald A. Rasband, "E Ala i le Mamanu Faalelagi"

Ina ia uunaia talanoaga e uiga i le savali a Elder Rasband, atonu e aoga le

valaaulia o nai tagata o le au paia e aumai se fua o se ofu, se ata po o se mamanu, po o se fua o se meaai ma talanoa e uiga i le auala e aoga ai nei mea. O a ni faataitaiga po o aoaoga mai le savali a Elder Rasband e uunaia tagata ina ia iloa le mamanu a le Atua mo o latou olaga? Atonu e mafai e tagata o le vasega ona fefaasoaaai aafiaga lea na latou vaaia ai le taialaina o o latou olaga e le Alii. O le a se mea ua latou faia e faaali atu ai i le Atua latou te "faatauaina" Lana taitaiga? Aisea e taua ai le iloaina o le "mamanu faalelagi" a le Atua?

Russell M. Nelson, "O Le Tusi a Mamona: Faamata e Faape'i Lou Olaga e aunoa ma Ia?"

Na valaauliaina e Peresitene Nelson tagata o le ekalesia e mafaufau e uiga i fesili e tolu: (1) "Faamata e faapei lou olaga e aunoa ma le Tusi a Mamona?" (2) "O le a se mea o le a e le iloaina?" (3) "O le a se mea o le a e le mauaina?" Valaaulia tagata o la outou korama, vaega, po o le Aualofa ina ia mafaufau loloto i nei fesili ma faasoa mai pe o le a faapefea ona latou taliina. O le a se mea latou te mauaina i lenei savali e uunaia i latou e faataua atili ai le Tusi a Mamona e sili atu nai lo "taimane po o penina"?

Dale G. Renlund, "O Le Perisitua ma le Mana Togiola o le Faaola"

E mafai faapefea ona e fesoasoani i tagata o la outou korama po o le Aualofa ina ia malamalamo i le auala e fesoasoani ai le perisitua e faaavanoa faamanu-iaga o le Togiola a le Faaola ia i latou? Atonu e mafai ona e tusiina nei ulutala se lua i luga o le laupapa: "Aisea tatou te manaomia ai le Togiola a Iesu Keriso" ma le "Auala o loo 'tilivaina' ai e le perisitua faamanuiaga o le Togiola ia i tatou." Ona valaaulia lea o tagata e suesue i le savali a Elder Renlund, tagai mo ni fasifuitau e tusi i lalo o ulutala taitasi. O faapefea ona fesoasoani le perisitua ma ona sauniga e faataunu ia faamoemoega a le Tama Faalelagi mo Lana fanau?

Dieter F. Uchtdorf, "O Ī Tauaveina le Malamalamo Faalelagi"

Valaaulia tagata e suesue i le savali e Peresitene Uchtdorf ma faailoa mai le auala e mafai ai e le i ai po o le leai

o se malamalama faalelagi ona aafia ai o tatou olaga. E mafai ona e valaaulia tagata e suesue nisi o mau na faasino mai e Peresitene Uchtdorf ma faailoa mai upumoni e fesoottai i le malamalama faaleagaga. O le a se mea na aoao mai i tatou e le tala faafaatusa i le gasetoto e uiga i le matafaioi o le faitalia i le sailia o le malamalama faaleagaga? O le a se mea e mafai ona tatou faia e faasoa atu ai le malamalama faalelagi a Iesu Keriso i isi, aemaise ma o tatou aiga ma "o tatou talavou, o e sailia le malamalama"?

Henry B. Eyring, "E Taitai e le Alii Lana Ekalesia"

Valaaulia tagata o la outou korama po o le Aualofa e fefasoaaifaaifiaga lea latou te manaomia e atiae ai le faatuatua faapea o o latou valaauga po o le valaauga a se isi tagata na sau mai le Atua. Na faapefea ona latou faatinoina lo latou faatuatua? Na faapefea ona latou iloa o le valaauga na aumai mai le Atua? Valaaulia tagata e suesue i le savali a Peresitene Eyring ma faailoa mai upumoni na ia aoaoina mai i se aafiaga patino lea e mafai ona fesoasoani ia i tatou ina ia faatuatuaaina ma onosai ia i tatou lava faapea ma isi o e ua valaaufina e le Alii.

Jean B. Bingham, "Ina Ia Atoa Lo Outou Olioli"

O le savali a Sister Bingham e mafai ona fesoasoani i tagata o la outou Aualofa po o korama ina ia malamalama i le auala e maua ai le olioli, e uiga i faafitauli o le olaga, pe a tatou o mai ia Keriso. O se tasi o auala e talanoa ai i lana savali o le tusia lea o se auala i luga o le laupapa e taitai atu ai i le upu *olioli*. Valaaulia ni nai tagata e tusi i luga o le auala se fautuaga mai le savali a Sister Bingham lea e taitai atu ai i le olioli moni. Uunaia tagata e mafaufau i ni auala e mafai ona latou faatino ai le fautuaga a Sister Bingham. Valaaulia ni nai tagata e faasoa mai o latou manatu.

David A. Bednar, "O Mea Silisili Ese ma le Taua"

Ina ia fesoasoani i tagata o la outou Aualofa po o korama e talanoaina le savali a Elder Bednar, e mafai ona e tuuina ni ata i luga o le laupapa e suitulaga



i le Sapati, le malumalu, ma o tatou aiga. Valaaulia tagata e faitau ia vaega talafeagai o le savali a Elder Bednar ma tusi i luga o le laupapa pe faapefea ona fesoasoani le aso Sapati, le malumalu, ma o tatou aiga ia i tatou e taulai atu i folafolaga a le Atua ia i tatou. O a mea i o tatou olaga e ono tosoesea le tatou gauai atu mai nei folafolaga? O a laasaga e mafai ona tatou faia ia faamautinoa ai tatou te manatuaina i latou?

Henry B. Eyring, "Aua le Fefe e Fai Mea Lelei"

O le savali a Peresitene Eyring e mafai ona fesoasoani atu ia i latou o loo e aoaoina ina ia maua le lototele ma le faatuatua e fai ai mea lelei i le lalolagi. E mafai ona e valaaulia ni nai tagata e aotele mai ni faataitaiga o tagata faamaoni lea na faasoa mai e Peresitene Eyring. O le a se mea o aoao mai e nei faataitaiga ia i tatou e uiga i le auauna atu i isi? O a ni mea o fautuaina mai e nei faataitaiga e uiga i auala e mafai ona tatou auauna atu ai o se korama po o le Aualofa?

O se isi auala e talanoa ai lenei savali o le iloilo lea o faamanuiaga na vaai i ai Peresitene Eyring mai le fautuaga lenei a Peresitene Thomas S. Monson e suesue le Tusi a Mamona. O a faamanuiaga ua tatou vaaia mai le suesueina o le Tusi a Mamona?

M. Russell Ballard, "E Faaauau Pea Le Savaliga!"

Ina ia amata se talanoaga e uiga i le savali a Elder Ballard, e mafai ona e valaaulia se tasi e faasoa mai se aafiaga o le i ai i se faigamalaga ae iloaina e sese le auala o loo latou i ai. E faapefea ona fesoottai ni faataitaiga faapenei i sa tatou lava "savaliga" e toe foi atu i le Tama Faalelagi? E mafai e tagata ona saili mo le fautuaga ma lapataiga lea na tuuina mai e Elder Ballard e mafai ona fesoasoani ia i tatou ina ia iloa pe o sa'o le auala o tatou agai i ai i o tatou lava olaga. Tuu atu i tagata se taimi e mafaufau loloto ai i o latou lava auala ma talanoaina ni auala e mafai ona fesoasoani ma uunaia ai isi i le latou "savaliga" e toe foi atu i le Tama Faalelagi.

Neil L. Andersen, "O Le Siufogoga o le Alii"

Atonu e mafai e tagata o la outou Aualofa po o korama ona faasoa mai se aafiaga lea na matua taua ai se savali o le konafesi ia i latou. Aisea na taua ai nei savali? O le a se mea o aoao atu e Elder Andersen e uiga i le taua o savali o le konafesi aoao ma le taumafaiga ma le faagasologa o aofia ai i le sauniaina o i latou? E tatau faapefea ona aafia e lenei malamalama le faanatinati lea tatou te suesue ai ma usitaia ai nei upu? Mafaufau i le faia o se lisi o valaaulia mai le konafesi sili ona lata mai. O le a se mea ua tatou faia e faatino ai nei valaaulia?

SAUNIGA I ASO SA LONA FA

O Aso Sa lona fa o masina taitasi, o le a talanoaina ai e korama, vaega, ma Aualofa se autu ua filifilia e le Au Peresitene Sili ma le Korama a Apostetolo e Toasefululu. O nei autu o le a faafouina i taimi o konafesi aoao taitasi. O le autu seia oo i le isi konafesi aoao o le aso Sapati. E mafai e taitai ma faiaoga ona filifili mai aoaoga faavae ma gaoioiga e aoao mai ai lea ua fautuaina atu i lalo, ia tuuataasi nisi o nei gaoioiga, pe fatu ni a latou lava gaoioiga e tusa ma manaoga o tagata.

O le Sapati o se aso e manatua ai mea ua faia e le Atua mo i tatou.

I le talafaasolopito atoa, ua fesoottai e le Atua nisi o galuega ofoofogia ma le Sapati. O nei galuega ofoofogia e aofia ai le Foafoaga (tagai i le Kenese 2:1–3), o le malaga umi a le fanauga a Israuelu mai Aikupito (tagai Teuteronomie 5:15), ma le Toetu o le Faaola (tagai Ioane 20:1–19; Galuega 20:7). Valaaulia tagata e toe iloilo nei fuaitau ma talanoa pe na faapefea i le manatuaina o nei mea taitasi na tutupu ona fesoasoani ia i tatou e faamamalu le aso Sapati. O a nisi o galuega ofoofogia ua faia e le Atua mo i tatou? E mafai faapefea ona tatou manatuaina nei mea i le aso Sapati? Pe a talafeagai ai, valaaulia tagata e talanoa i fesili e pei o fesili nei i o latou aiga.

O Iesu Keriso o le Alii o le Sapati.

Ua ta'ua foi le Sapati o le aso o le Alii (tagai Faaaliga 1:10). Aisea e te manatu ai ua ta'ua Iesu Keriso o le Alii o le Sapati? (tagai Mataio 12:8). Iloilo faatasii ni nai fuiupu lea e mafai ona fesoasoani e musuia ai tagata ia mafaufau i ni auala e faaogatotonu ai o latou aafiaga o le aso Sapati ia Iesu Keriso (mo se faataitaiga, Helamana 5:12; Eteru 12:41; Moronae 10:32; ma le MF&F 6:36–37). O a nisi mau e mafai ona fefaaasoai e tagata e fesoasoani ai ia i latou ia faaogatotonu atili ai le Sapati ia Keriso? O a ni sini e mafai ona tatou setiina e fesoasoani ia i tatou ia taulai atu ai i le Faaola i le aso Sapati atoa?

O Iesu Keriso o lo tatou faatataiga mo le faamamaluina o le Sapati.

I le taimi o Lana galuega talai i la le tino, na faaaoga e le Faaola avanoa e aoao atu ai e uiga i le aso Sapati. Fai atu i tagata e faitau tala nei ma fai se lisi o mea na faia e Iesu i le Sapati ma mataupu faavae na Ia aoao atu: Luka 6:1–11; 13:11–17; Ioane 5:1–20; 9:1–16. O a nisi mataupu faavae e uiga i le Sapati ua tatou aoaoina mai nei mau? Esoto 20:8–11; 31:12–18; Isaia 58:13–14; ma le MF&F 59:9–19. Valaaulia tagata e faasoa mai mea e mafai ona latou faia e mulimuli ai i le faataitaiga a le Faaola.

Tagai foi Russell M. Nelson, “O Le Sapati o se Aso Fiafia,” *Ensign* po o le *Liahona*, Me 2015, 129–32.

O Le Sapati o se aso e tapuai ai.

Tusi le upu *tapuai* i luga o le laupapa ma fesili atu i tagata o le vasega e tusi nisi upu e fesoottai i ai i autafa. Ona fai lea o ni koluma se tolou i upu *luma mai, i le taimi*, ma le *mavae ai* i le pito i luga o koluma taitasi. O le a se mea e mafai ona tatou faia i luma mai, i le taimi, ma le mavae ai o le lotu e tapuai atu ai i le Alii i Lona aso paia? E mafai e tagata o le vasega ona faitau faatasii le Mosaea 18:17–29 ma le Moronae 6 mo ni manatu. Valaaulia tagata e mafaufau loloto i le auala o loo fesoasoani ai o latou uiga ma faatinoga i le aso Sapati i le latou tapuaiga i le Alii i lena aso (tagai Esoto 31:16–17). O le a se mea e mafai ona tatou faia e fesoasoani e faaleleiai ai le aafiaga tapuai o mauaina e o tatou aiga ma tagata o le uarota i le taimi o sauniga Lotu?

O le 'ai ma le inu i le faamanatuga e mafai ai ona tatou maua le Agaga e faatasii ma i tatou i taimi uma.

Tusi fesili nei i luga o le laupapa: O faapefea ona aafia e le faamanatuga lou olaga? Ina ia tali i lenei fesili, valaaulia tagata e galulue i paga e filifili ai ma talanoaina se tasi o fuaitau mai tatalo o le faamanatuga i le Mataupu Faavae ma Feagaiga 20:77, 79 ma le fautuaga i le Mataupu Faavae ma Feagaiga 59:9. Tuu

atu ia tofu paga taitasi ma le taimi e sue ai ni mau ia e mafai ona fesoasoani ia i latou ina ia malamalamalama lelei atili ai ia latou fuaitau, ma talanoa i le auala o le a latou tali ai i le fesili o loo i luga o le laupapa. Atonu e mafai foi ona e valaaulia tagata o le vasega e filifili ni viiga o le faamanatuga e fiafia i ai ma usu faatasi i latou.

Tagai foi Cheryl A. Esplin, “O Le Faamanatuga—o se Toefaafouina o le Agaga,” *Ensign* po o le *Liahona*, Nov. 2014, 12–14.

O le Sapati o se aso e auauna atu ai i isi.

O le a se mea e mafai ona tatou aoao mai e uiga i le auauna atu i isi i le Sapati mai auala na auauna atu ai le Faaola ma faamanuaina ai i latou na siomiaina o Ia? Uunaia tagata e toe iloilo ma talanoaina le Mataio 9:10–13; Luka 19:1–9; Ioane 11:32–46; 13:1–5, 12–17; ma le 3 Nifae 17:5–10. Fai atu i tagata e mafaufau e uiga i nei mau a o latou mafaufau i le auala e mafai ona latou auauna atu ai i le Sapati. Mo se faataitaiga, e mafai ona latou auauna atu i tagata o le aiga, aapa atu i tagata taitoatasii ma aiga latou te auauna atu i ai i faiaoga o aiga ma faiaoga asiiasi, galulue i talafaasolopito o aiga, asiiasi i e mama'i, pe faasoa atu le talalelei. Atonu e mafai e tagata ona faia se fonotaga faaleiga e fuafua ai auala e mafai ona latou auauna atu ai i isi i le Sapati.





© KATHLEEN PETERSON, E LE MAFAI ONA KOPINA

*"O le fuafuaga o le talalelei e tatau
ona mulimuli ai aiga taitasi e saunia
ai mo le ola e faavavau ma le faaeaga,
ua ototo atu i le folafolaga a le Ekale-
sia 1995, 'O Le Aiga: O Se Folafolaga i
le Lalolagi.' . . .*

*". . . Ua avea pea ma faavae o
aoaoga ma faatinoga a le Ekalesia mo
le 22 tausaga talu ai ma o le a faaau-
au pea mo le lumanai. Mafaufau i ai,
aoao atu, ola ai, ma o le a faamanu-
iaina outou a'o tou fetaomi atu i luma-
agai i le ola e faavavau.*

*"I le fasefulu tausaga talu ai, sa
aoao mai ai Peresitene Ezra Taft
Benson e faapea 'e tofu lava le auga-
tupulaga ma ona tofotofoga ma ona
avanoa e tutu atu ai ma faamaonia
latou lava.' Ou te talitonu o o tatou
uiga e faatatau i le folafolaga i le aiga
ma lona faaaogaina o se tasi lea o na
tofotofoga mo lenei tupulaga."*

Elder Dallin H. Oaks, o le Korama a
Apostolo e Toasefululua, "O Le Fuafuaga ma
le Folafolaga," 29, 30–31.

O Le Siva [The Dance],
saunia e Kathleen Peterson



"Ou te tuu atu la'u molimau maua'i ae tumu i le olioli o le Alii o lesu Keriso o loo tu i le foe. Na te taitaia Lana Eklesia ma Ana auauna," na saunoa mai ai Peresitene Henry B. Eyring, Fesoasoani Muamua i le Au Peresitene sili, i le taimi o le Konafesi Aoao Faaleafatausaga Lona 187 o le Eklesia. "Ou te molimau atu o Thomas S. Monson ua na o le pau lea o le tamalii o loo umia ma faaaogaina ki uma o le perisitua paia i le lalolagi i lenei taimi. Ma ou te talosagaina faamanuiaga i luga o auauna lotomaulalo uma o e o loo auauna lelei atu ma le matua naunauta'i i le Eklesia toefuataiina a lesu Keriso, lea o loo taitaiina e la lava. Ou te molimau atu na vaai Iosefa Samita i le Atua le Tama ma lesu Keriso. Na La tulei atu ia te ia. Na toefuatai mai ki o le perisitua mo faamanuiaga o fanau uma a le Tama Faalelagi. O le tatou misiona ma lo tatou faatuatuaga o le auauna atu lea i o tatou tofiga i le galuega a le Alii."